

圣祖仁皇帝  
圣训

雍正

文硕阁

wenshuoge.com

## 目录

|                |     |
|----------------|-----|
| 关于我们 .....     | 4   |
| 圣祖仁皇帝圣训序 ..... | 6   |
| 序 .....        | 8   |
| 目录 .....       | 10  |
| 卷一 .....       | 18  |
| 卷二 .....       | 38  |
| 卷三 .....       | 47  |
| 卷四 .....       | 55  |
| 卷五 .....       | 63  |
| 卷六 .....       | 77  |
| 卷七 .....       | 85  |
| 卷八 .....       | 93  |
| 卷九 .....       | 100 |
| 卷十 .....       | 107 |
| 卷十一 .....      | 116 |
| 卷十二 .....      | 123 |
| 卷十三 .....      | 133 |
| 卷十四 .....      | 142 |
| 卷十五 .....      | 149 |
| 卷十六 .....      | 160 |
| 卷十七 .....      | 170 |
| 卷十八 .....      | 182 |
| 卷十九 .....      | 190 |
| 卷二十 .....      | 198 |
| 卷二十一 .....     | 205 |
| 卷二十二 .....     | 217 |
| 卷二十三 .....     | 229 |
| 卷二十四 .....     | 241 |
| 卷二十五 .....     | 247 |
| 卷二十六 .....     | 257 |
| 卷二十七 .....     | 267 |
| 卷二十八 .....     | 274 |
| 卷二十九 .....     | 282 |
| 卷三十 .....      | 291 |
| 卷三十一 .....     | 299 |
| 卷三十二 .....     | 303 |

|      |       |     |
|------|-------|-----|
| 卷三十三 | ..... | 312 |
| 卷三十四 | ..... | 324 |
| 卷三十五 | ..... | 335 |
| 卷三十六 | ..... | 342 |
| 卷三十七 | ..... | 351 |
| 卷三十八 | ..... | 357 |
| 卷三十九 | ..... | 366 |
| 卷四十  | ..... | 375 |
| 卷四十一 | ..... | 383 |
| 卷四十二 | ..... | 392 |
| 卷四十三 | ..... | 400 |
| 卷四十四 | ..... | 408 |
| 卷四十五 | ..... | 416 |
| 卷四十六 | ..... | 424 |
| 卷四十七 | ..... | 433 |
| 卷四十八 | ..... | 442 |
| 卷四十九 | ..... | 450 |
| 卷五十  | ..... | 456 |
| 卷五十一 | ..... | 460 |
| 卷五十二 | ..... | 474 |
| 卷五十三 | ..... | 478 |
| 卷五十四 | ..... | 482 |
| 卷五十五 | ..... | 489 |
| 卷五十六 | ..... | 495 |
| 卷五十七 | ..... | 499 |
| 卷五十八 | ..... | 507 |
| 卷五十九 | ..... | 513 |
| 卷六十  | ..... | 520 |

# 版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

## 什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

## 传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

## 如何联系我们？

网站：[www.wenshuoge.com](http://www.wenshuoge.com)

邮箱：[7sbook@duck.com](mailto:7sbook@duck.com)



(扫码访问网站)



(扫码加客服微信)

# 圣祖仁皇帝圣训序

钦定四库全书

圣祖仁皇帝圣训序

朕荷

皇考圣祖仁皇帝付托至重兢兢业业早作夜思以期无

负继述仰惟

皇考留遗矩矱朕得监於成宪是则是倣实天下万世所

当钦承观法爰命大学士等纂修

圣祖仁皇帝实录阅时九载书成千卷自古帝王功德之

隆盛记载之繁富未有加於此者顾

实录乃编年之书我

皇考顺时布化若

天道之流行春秋冬夏各协其宜而其中条分缕析饬纲振纪精微所寓随举一端皆为法式於是复令纂修诸臣分类恭辑

圣训六十卷洋洋乎

盛德

大孝敬

天勤民文教之诞敷武功之赫濯礼乐之明备政刑之修

举一经

睿谟千古莫易夫六经诸史之传皆有经有纬朕於皇考神功圣德精心体察以

实録为经以

圣训为纬於编年见因时之宜於分类见随事之要一敷施而有所循也一话言而有所法也一寤寐饮食而有所遵也於戲如天之仁如日之照如神之哲万类虽蹟莫不含弘并包於

圣人之度内而警惕训谕之辞尤必凜凜於时几孜孜於熙绩勤勤於小民之恬养亶亶於嘉师之祥刑盖

圣心愈切而

圣德愈崇是以统乾坤之范围而不过发圣贤之闕奥而靡遗以六十余载之鸿规为千万世後昆之垂裕其所裨益曷有涯量哉此朕命官敬纂

皇考实録而又恭繕

圣训之深意子子孙孙其永宝诸

雍正九年十二月二十日

# 序

钦定四库全书

圣祖仁皇帝圣训序

自古圣人诞受天命为下民君师必亶聪明睿智之资首出乘乾以绥猷而立极凡其经纬万端敷之彝训者罔不深切着明炳日星而章云汉典谟所载雅颂所陈唐虞三代之隆有如一辙钦惟

皇祖圣祖合天弘运文武睿哲恭俭宽裕孝敬诚信中和功德大成仁皇帝圣德广运久道化成文治光昭武功赫濯薄海内外深山穷谷之衆总沦浹於仁心仁政之中教思无穷训词深厚历考熙明之运未有跻此崇隆者也肆我

皇考世宗宪皇帝以

圣继

圣用人行政一一仰法

前徽既纂修

实録成书复分类恭辑

圣训六十卷俾

皇祖六十余年敬

天尊

祖经国保民农田学校礼乐兵刑之盛蹟见之都兪吁咈间者粲然常新厘然备具永貽我後嗣子孙亿万年昇平桀范盖

皇祖性本生安道兼创守实集千古圣帝明王之大成是

以

圣谟洋洋明徵定保宏纲鉅目有要有伦精一之心传荡平之王路胥不外乎此也予小子昔在韶龄早荷



圣慈赐育宫庭祇聆

训迪兹膺基绪绍闻衣德之志兢兢业业不懈益虔昕夕

寻绎惟期懋遵

祖训以无负

皇考善继善述之贻谋顾金匱石室之藏中外无得见者

爰命儒臣敬谨缮写授之剞劂庶我

皇祖圣祖仁皇帝建中表正牖民觉世之言昭垂寰宇羣

工士庶咸得渐摩於

圣训之崇闳而率由无斁也不亦庥欵谨序

乾隆六年三月二十四日

目录

钦定四库全书 史部六

大清圣祖合天弘运文武睿哲恭俭宽裕孝敬诚信中和功德大成仁皇帝圣训目錄  
诏令奏议类【诏令之属】

卷一

圣孝

卷二

圣德

卷三

圣德

卷四

圣德

卷五

圣学

卷六

圣治

卷七

圣治

卷八

圣治

卷九

圣治

卷十

敬天

卷十一

法祖

卷十二

文教【附武科】

卷十三

武功

卷十四

武功

卷十五

武功

卷十六

武功

卷十七

武功

卷十八

武功

卷十九

武功

卷二十

武功

卷二十一

恤民

卷二十二

恤民

卷二十三

任官

卷二十四

广言路

卷二十五

严法纪

卷二十六

严法纪

卷二十七

理财

卷二十八

慎刑

卷二十九

慎刑

卷三十

重农桑

卷三十一

兴礼乐

卷三十二

省方

卷三十三

治河

卷三十四

治河

卷三十五

治河【附运河北河水利】

卷三十六

澄叙

卷三十七

赏赉

卷三十八

蠲赈

## 卷三十九

蠲賑

## 卷四十

蠲賑

## 卷四十一

蠲賑

## 卷四十二

积贮

## 卷四十三

饬臣工

## 卷四十四

饬臣工

## 卷四十五

饬臣工

## 卷四十六

饬臣工

## 卷四十七

训将士

## 卷四十八

训将士

卷四十九

训将士【附恤兵】

卷五十

褒忠节

卷五十一

恤旧劳

卷五十二

广幅员

卷五十三

弘制度

卷五十四

弭盗

卷五十五

牧政

卷五十六

礼前代

卷五十七

柔远人

卷五十八

柔远人

卷五十九

柔远人

卷六十

柔远人

【臣】等谨案

圣祖仁皇帝圣训六十卷雍正九年

世宗宪皇帝恭编乾隆六年

皇上御制序文刊布凡三十二类总一千九百余

则篇帙视

列圣为富盖我

圣祖仁皇帝道符

帝綽

命自

天申

景祚延洪卜年久远六甲五子首末循环与天运相

始终故

神功

圣德史不胜书

实録数盈千卷而

貽留大训亦纪载独繁伏考周易有曰日月得天而能久照四时变化而能久行圣人久于其



道而天下化成

宝祚绵长故

彝训最为详备此诚帝王之盛轨也然其故有不止於此者昔虞舜鸣韶凤仪兽舞而皋陶扬拜犹期以慎宪省成虑其始勤而终惰也使历年久远而暇豫之念或萌则怠气所乘又安能於天下之事一一为之衡量於在廷之臣一一为之启导今跼读

圣谟所为保泰而持盈谨小而慎微者六十一年殆

如一日然则

圣训之独多固在

享国之永亦在

政之勤矣周公告诫成王历举太戊武丁祖甲文

王之寿考而归本於无逸

圣人之心固异世而同符也乾隆四十八年八月恭

校上

总纂官【臣】纪昀【臣】陆錫熊【臣】孙士毅

总校官【臣】陆费墀

# 卷一

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷一

圣孝

康熙元年壬寅八月庚午

上谕礼部朕惟君国之道必崇夫孝理化民之务首重乎尊亲钦惟我

圣祖母昭圣慈寿恭简安懿章庆皇太后仁承天德顺协坤仪佐

皇祖太宗文皇帝肇建丕基啓

皇考世祖章皇帝宅中定鼎朕纘荷鸿图恭承

懿训仰惟恩德爱戴弥殷

母后皇后懋昭淑范克嗣徽音表正六宫母仪四海母后温恭慈惠诞育藐躬圣善之德并隆尊显之仪宜备粤稽古制询於佥谋恭上

圣祖母皇太后徽号曰

昭圣慈寿恭简安懿章庆敦惠太皇太后

母后皇后徽号曰

仁宪皇太后

母后徽号曰

慈和皇太后尔部即择吉以闻

康熙四年乙丑九月己酉以

大婚礼成加上

太皇太后

皇太后徽号

诏谕天下曰朕惟帝王抚有四海必首隆孝治以端教化之源是以子孙相承而庆流奕叶也  
钦惟我

圣祖母昭圣慈寿恭简安懿章庆敦惠太皇太后佐皇祖太宗文皇帝肇兴大业啓

皇考世祖章皇帝式廓洪图

圣母仁宪皇太后克嗣徽音母仪茂着朕纘膺丕绪夙夜兢兢仰荷慈帟并弘训育兹者遴选  
贤淑作配朕躬属当嘉礼之成宜进尊称之典谨告

天地

宗庙

社稷於康熙四年九月二十五日率诸王贝勒文武羣臣恭奉册宝加上

圣祖母昭圣慈寿恭简安懿章庆敦惠太皇太后徽号曰昭圣慈寿恭简安懿章庆敦惠温庄  
太皇太后

圣母仁宪皇太后徽号曰

仁宪恪顺皇太后崇两宫之显号洽万国之懽心祉貽孙子宏昭式谷之源礼备尊亲大锡覃  
恩之典

康熙六年丁未十一月戊午

诏谕天下曰朕惟自古帝王建极绥猷保民图治莫不以懋昭先德祇尽孝忱为务朕纘承丕  
基躬亲庶政恭惟

世祖章皇帝功德兼隆当崇配享暨

圣祖母太皇太后

圣母皇太后恩勤备至宜尽显扬是用上稽前典下協輿情谨告

天地

宗庙

社稷率诸王贝勒文武羣臣於康熙六年十一月朔有七日冬至恭祀

上帝十六日如夏至仪恭祀

皇地祇并奉

世祖章皇帝配享十七日恭奉册宝加上

圣祖母昭圣慈寿恭简安懿章庆敦惠温庄太皇太后徽号曰

昭圣慈壽恭简安懿章庆敦惠温庄康和太皇太后加上圣母仁宪恪顺皇太后徽号曰

仁宪恪顺诚惠皇太后庆礼兼行鸿恩广逮率由旧章覲扬前烈之高厚永膺纯嘏覃敷怙冒之恩慈彰孝道於千秋孚德心於六合布告天下咸使闻知

康熙九年庚戌闰二月庚戌

上谕礼部

慈和皇太后诞育朕躬未遂孝养思慕之忱每切於怀虽已上

尊諡今应升祔

太庙配享

皇考典礼关系重大其应进

諡号着议政王贝勒大臣九卿科道会同详议以闻

丁巳

上谕礼部

皇考升遐倏历十载罔极之思时恫於怀

山陵在望未一展祭尤切凄怆朕拟於今岁八月恭行谒陵礼又奉

太皇太后旨思念情殷亦欲诣

陵朕敬遵

慈命躬侍以行应行典礼尔部详议以闻

五月丙辰朔

慈和皇太后升祔

太庙礼成

诏谕天下曰朕惟自古帝王以孝治天下莫不显扬母德追崇配享以为绍先啓後之本朕纘承丕绪九载於兹恭惟我

皇妣孝康慈和庄懿恭惠崇天育圣皇后光赞

皇考成缔造之丰功诞育藐躬啓昌隆之景运徽音远播厚德弘施

庙祀未崇朕怀罔极是用上稽前典下協輿情祇告天地

宗庙

社稷於康熙九年五月初一日率诸王贝勒文武羣臣恭奉册宝加上

皇妣尊諡曰

孝康慈和庄懿恭惠崇天育圣章皇后升祔

太庙鸿仪既举恩赦宜施隆侑飨於千秋广孝思於万国布告中外咸使闻知

九月丙辰

上谕礼部

太祖高皇帝创建鸿图肇兴景运

太宗文皇帝丕基式廓大业克弘迨

世祖章皇帝诞昭功德统一寰区即欲躬诣

太祖

太宗山陵以天下一统致告用展孝思因盗贼未靖师旅繁兴暂停往谒朕以藐躬纘承鸿绪上托

祖宗隆庥天下底定盗贼戢宁兵戈偃息每念

皇考未竟之志朝夕寢食不遑宁处本欲先诣

太祖

太宗山陵再诣

世祖山陵因奉

太皇太后慈命以

世祖升遐十年未得一诣

陵寢於本年八月前往朕是以躬侍

太皇太后先诣

孝陵展谒礼成言还今欲仰体

皇考前志躬诣

太祖

太宗山陵以告成功展朕孝思着议政王贝勒大臣内院九卿科道掌印不掌印各官会议具奏

康熙十年辛亥正月甲子

上谕礼部朕仰体

世祖章皇帝遗志欲躬诣

太祖

太宗山陵展祭以告成功前命议政王贝勒大臣等会议议政王等以去年各处多有水旱灾荒且为时甚迫应用之物预备不及请暂行停止今思

太祖

太宗创业垂统功德隆盛

山陵在望刻不能忘去年恭谒

孝陵礼成今已数月若再久延孝思莫殫朕怀靡宁兹当海内昇平欲乘此恭谒

福陵

昭陵以告成功用展孝思事关大典着议政王贝勒大臣内阁九卿科道各官会议具奏尔部即遵谕行

九月辛未

上往盛京谒

陵礼成文武各官宴賚有差召八十以上耆民赐饮谕侍臣等曰朕展谒

山陵惓惓在念今得至发祥重地拜谒

陵寝用展孝思祭礼已成朕怀大慰又

谕守

陵总管副总管等曰尔等职司祀典凡一应祭品必亲加?视务尽诚敬副朕孝思

康熙十一年壬子正月庚午

上诣

太皇太后宫问安

太皇太后曰我因偶患微疾欲往赤城汤泉汝若同往恐悞国事可不必往

上奏曰

太皇太后驾幸汤泉臣若不随往侍奉於心何安至国家政事已谕内阁着间一日驰奏一次不致有悞

十二月丁巳

上谕学士传达礼曰朕昨诣

太皇太后宫问安

太皇太后谕云予虽在宫壺

太宗行政亦略知之彼时开创甚重骑射方今天下太平四方宁谧然安不忘危闲时仍宜训练武备至於在朝诸臣奏事岂无忠诚入告者然不肖之类假公行私附己者则为引进忤己者即加排挤亦有之为人君者务虚公裁断一準於理则事无差失矣朕绎

慈训人君之道诚莫要於虚公裁断之一言也

康熙十二年癸丑二月己未

上谕学士传达礼曰尔衙门所进翻译大学衍义一书朕恭呈

太皇太后御览奉

慈谕云人主居四海臣民之上所关甚钜然代天理物端在躬行致治兴化必先修己此书法戒毕陈诚为切要尔特加意是编命儒臣翻译刊刻更令颁赐诸臣予心欣悦特?内帑白金千两可即赉予在事诸臣朕仰遵

慈旨颁赐尔等其钦承之

五月乙亥

上谕学士传达礼曰朕因

太皇太后圣体少有违和不时省问昨躬奉汤药幸已大愈朕心方慰顷又进滋补之剂矣



七月壬午

上谕大学士图海等曰

太宗文皇帝实录钜典攸关今命卿等董率各官重加纂辑务期敬慎将事速竣大典以副朕继述先猷显扬

祖德之意

康熙十三年甲寅二月乙未朔

上谕讲官喇沙里等曰朕从前赏赐出征官兵奉太皇太后慈谕特出宫中撙节银两为赏赐之用见在调遣禁旅啓行期迫恐伊等措办艰难赏赐本无定例亦宜格外加恩今又蒙

太皇太后谕令将宫中缎匹银两赏给官兵此诚太皇太后至德弘恩尔等职司记注故谕知之

康熙十五年丙辰正月乙未

诏谕天下曰朕惟帝王绥理万方首崇孝治尊亲之典因事加隆至建立元储懋敦国本尤必推原懿德上晋徽称此历代不易之盛轨也钦惟我

圣祖母昭圣慈寿恭简安懿章庆敦惠温庄康和太皇太后佐

皇祖太宗文皇帝肇造丕基啓

皇考世祖章皇帝恢弘大业

圣母仁宪恪顺诚惠皇太后母仪茂着克嗣徽音朕奉事慈闈并承训育绍基图治宵旰靡宁兹者祇遵

懿命册立皇太子礼成仰惟垂裕之仁式举显扬之典谨告

天地

宗庙

社稷於康熙十五年正月十一日率诸王贝勒文武羣臣恭奉册宝加上

圣祖母昭圣慈壽恭简安懿章庆敦惠温庄康和太皇太后徽号曰

昭圣慈壽恭简安懿章庆敦惠温庄康和仁宣太皇太后圣母仁宪恪顺诚惠皇太后徽号曰

仁宪恪顺诚惠纯淑皇太后庆礼告成恩纶宜沛崇仪显号昭令范於千秋锡类推恩洽懽心於四海布告中外咸使闻知

康熙二十年辛酉十二月丁酉

上谕礼部献岁

太皇太后壽届七袞洵臻景福诸王大臣应行庆贺礼仪各视官爵为差其庆贺日期尔部择吉以闻

庚子

上谕礼部朕惟戡定本啓佑之恩显扬备尊亲之礼成功既告盛德宜彰所以展孝忱昭庆典也逆贼吴三桂背恩反叛数年以来朕仰承

圣祖母昭圣慈壽恭简安懿章庆敦惠温庄康和仁宣太皇太后暨

圣母仁宪恪顺诚惠纯淑皇太后慈训剿除叛乱克奏敕宁思上答乎弘仁应进崇夫显号谨加上

太皇太后徽号曰

昭圣慈壽恭简安懿章庆敦惠温庄康和仁宣弘靖太皇太后

皇太后徽号曰

仁宪恪顺诚惠纯淑端禧皇太后播徽音於四海介景福於万年尔部择吉具仪以闻

康熙二十二年癸亥四月丙子工部题修

孝陵五空桥甬道估计工价银两

上曰

陵寢关系重大前监修各官草率修理因致损坏今若以节省之故估价短少钱粮不敷将旧

存砖石充用恐不坚固宁使价值宽余务令永远坚固着重修

陵寝堂司官详勘议奏

康熙二十四年乙丑正月癸酉

上以孟春诣

太庙致祭毕

谕内阁学士席尔达太常寺卿葛思忒等曰往见赞礼郎宣读祝版至朕名声辄不扬父前子名礼经所载朕对越之次惟惧诚敬稍有未至无以昭格神灵为子孙者通名於祖父岂可涉於慢易嗣後俱高声朗诵无庸顾忌

九月乙亥先是

上驻蹕博洛和屯闻

太皇太后圣体违和星夜回銮亲奉汤药夜半尚未就寝

迨

太皇太后圣体康宁奉

慈谕幸白塔寺将行大雨近侍奏曰道路泥泞请俟少霁

行

上曰近因

圣祖母偶尔违和朕心深切忧虑今已痊愈甚为庆幸何惮此一往不以仰慰

慈衷乎遂冒雨行

康熙二十六年丁卯十一月壬寅

上谕刑部朕奉

太皇太后朝夕承懽祇遵

慈训竭诚奉养今者

圣躬偶尔违豫朕夙夜滋惧寢食靡宁仰冀

上天眷顾俯垂默佑惟思好生以迓

天庥寬大以延遐壽所有内外问刑衙门见监重辟人犯除十恶死罪及贪官光棍不赦外其余监候死罪重犯槩行减等发落以昭朕祈

天永佑至意

甲辰

上谕大学士等曰自

太皇太后圣体违和以来多方医治病势渐增朕夙夜忧惧兹欲躬祷

郊坛保护

慈躬康宁大学士随同九卿等奏曰

皇上圣孝之诚必当感格

穹苍臣等愚见似不必诣

坛致祭

天心自为默佑

上复谕曰自

太皇太后违和以来朕在宫中无日不竭诚默祷今太皇太后病势渐增朕心益加恐惧惟有竭抒忱悃叩祈上天之眷佑耳可即将此旨传谕诸臣

十二月乙巳朔

上率诸王贝勒贝子公等及文武官员自

乾清宫步诣

天坛致祭祝文曰臣仰承

天佑奉事祖母太皇太后高年荷庇藉得安康今者疹患骤作一旬以内渐觉沉笃臣夙夜靡宁寝食捐废虔治药餌徧问方医罔克奏效五内忧灼莫知所措窃思

天心仁爱覆帔无方矧臣藐躬夙蒙

慈养忆自弱龄早失怙恃趋承祖母膝下三十余年鞠养教诲以至有成设无祖母太皇太后断不能致有今日成立罔极之恩毕生难报值兹危殆方寸溃迷用敢洁蠲择日呼吁

皇穹伏恳

悯念笃诚立垂

昭鉴俾沉痾迅起遐算长延若大数或穷愿减臣龄冀增太皇太后之寿读祝版时

上涕泪交颐陪祀诸王贝勒贝子公等及文武官员无不

感泣祭毕

上即诣

慈宁宫侍疾

甲寅内阁及部院衙门官员公同具疏请

皇上少节劳瘁

上曰朕自

太皇太后违豫以来心怀忧虑日侍左右检方调药亲视饮饌

太皇太后宁憇之时朕惟隔幔静俟席地危坐一闻太皇太后声息即趋至榻前凡有所需手奉以进因此昼夜不能少离

太皇太后屡有

慈旨命朕回宫少宜自爱朕念幼蒙

太皇太后抚养教训三十余年罔极深恩难以报答今见病体未痊五内焦灼莫知所措朕躬寝处何暇顾计当此时不竭尽心力少抒报答之忱异日虽欲依恋

慈闱岂易得耶

己巳子时

太皇太后崩於慈宁宫

上擗踊哀号呼天抢地哭无停声饮食不入口王以下文

武羣臣公疏奏请节哀

上不允随谕曰朕览自古帝王居丧持服以二十七月易为二十七日惟魏孝文帝欲行三年之丧朕平日读史至此常羡慕之今非欲迈古贤君祇念朕甫八岁

世祖章皇帝即宾天十一岁

慈和皇太后又崩逝藐兹冲龄音容未尽记忆未获尽孝至今抱憾仰赖

圣祖母太皇太后鞠养教诲以至成立今遽遭大故五内溃迷回思早丧

怙恃益增痛伤哀疚靡尽今持服二十七月少慰罔极之痛朕独持服宫中於政事毫无旷废不令臣民持服一切俱不禁止如此可以遂朕本怀朕哀恻即可少止诸

王大臣等奏曰

皇上至德纯孝亘古莫比但古者以日易月为不易之典

诚以帝王之孝与臣民不同愿

皇上仰遵

遗诏博稽古制上思

天地

祖宗付畀之重下慰羣臣百姓仰赖之忱以礼节哀易月

之典守而勿更

上谕曰朕事

太皇太后三十余年竭尽衷诚无稍违拂近者

圣体违豫三十余日衣不解带必诚必敬朕之此志期在必遂否则贵为天子富有四海亦奚以为尔等其详议之诸王大臣等闻

谕皆感悚呜?又奏曰

皇上一身为

郊坛

宗庙

社稷所寄托每当祭享伏见

銮舆亲莅竭诚尽敬古者祭为吉礼必於除服後举行皇上以

太皇太后之故若使

郊

庙神灵少有弗歆即

太皇太后在天之灵亦必不安且君臣兆姓本属一体若皇上持服宫中臣民安然即吉甚非一体之义况皇上奉事

太皇太后三十余年晨昏孝养即违豫以来昼夜忧勤罔

非孝思今乃於

慈闱遗命反不曲遵恐有虚

太皇太后惓惓之意臣等不揣愚贱敢以固请

上谕曰朕意已定不必更奏

是日

上谕礼部朕孝服用布旧制国有大丧自宗室公以上服素帛今孝服俱改用布宫内年幼皇子公主一体持服

康熙二十七年戊辰正月辛巳

上谕礼部

大行太皇太后圣德母仪昭示万国昔奉我

皇祖太宗文皇帝赞宣内政诞育我

皇考世祖章皇帝顾复劬劳受无疆休大一统业暨朕践阼方在冲龄仰荷我

圣祖母训诲恩勤以至成立晨昏依恋三十余年方期洵享遐龄茂膺繁祉詎意适遭违豫奄忽上宾朕哀疚之深五中摧绝昊天罔极报德实难緬维厚泽深仁信足炳传简册非荐隆号莫展哀诚宜恪遵彝宪恭上

尊諡垂示无穷以慰朕尊亲之意着内阁翰林院詹事府会同拟奏其应行典礼尔部详议以闻

戊子

上谕九卿詹事科道等曰朕遭

太皇太后崩逝欲持服二十七月立志甚坚诸王大臣及百官士民再三陈奏情辞恳切不得已勉从所请中心歉仄因幕居乾清门外以尽哀诚今乃又请回宫不过以朕躬为念身为天子岂不自爱但人孰无祖父母父母为子孙皆当尽孝何分贵贱朕孝治天下思以表率臣民垂则後禩今距释服之期为时甚近若从所言以致异日稍留遗憾恐非诸臣爱君之意诸王大臣激切奏恳已有谕旨不允卿等其仰体朕心勿复言庚寅先是诸王大臣及士民等奏请以日易月之疏未奉

俞旨至是

上谕曰朕以薄祜幼失

怙恃幸依



圣祖母膝下如见

皇考妣音容今遭遇弃痛念

慈恩悲哀并集欲持服二十七月仰答

圣祖母鞠育深仁兼报

皇考妣劬劳大德诸王大臣及各官等援引历代成例坚请再三并称

郊

庙祀典不宜久辍升祔大礼及时举行且士民伏阙披沥衆情谓国恤淹久有妨民业朕反覆思维不得已以礼抑情勉从所请

戊戌

上谕大学士明珠内务府总管班第等曰自

太皇太后违豫

皇太后尽孝侍奉甚为劳瘁

太皇太后宾天复哀痛太过

慈颜清减昨者朕诣

皇太后宫问安见癯瘦更甚积劳成疾服药调理朕心深为忧虑明日

太皇太后一月之祭尔等可奏请不必前往

三月庚子

上谕从前诣

两宫请安皆於起居注记档今诣

宁寿宫请安朕因不忍过

慈宁宫故从啓祥门行走但此系宫禁之地外官无由得知後每次请安着令太监传谕敦住仍令起居注记载其不忍由隆宗门行走之故亦令谕侍郎库勒纳知之

康熙三十八年己卯三月乙酉

上驻蹕苏州府江南江西总督张鹏翮等率苏州府官员

士庶进表庆贺

万壽节

上谕曰朕往岁万壽节犹照常行礼

太皇太后宾天以後遂不复受贺此日但斋戒独处观书写字而已且朕平居原不喜宴乐在京时诸王大臣每遇万壽节辄请如前行礼朕皆不允今巡幸至此若受庆贺则非朕初意矣衆意諄切朕已知之不必再请

康熙四十一年壬午七月庚戌朔

上驻蹕热河闻和硕温宪公主薨日晡未进膳扈从诸大

臣奏曰

皇上闻公主讣过哀此时尚未进膳恐

圣躬太为劳瘁奏入

上传谕曰公主系已嫁之女朕尚可寛释但

皇太后自幼抚养忽值此变

皇太后伤悼弗胜膳尚未进朕亦何心进食乎

康熙四十九年庚寅正月壬午先是

上谕礼部蟒式舞者乃满洲筵宴大礼至隆重懽庆之盛典向来皆诸王大臣行之今岁

皇太后七旬大庆朕亦五十有七欲亲舞称觴是日於皇太后宫进宴

皇太后升座乐作

上近前起舞进爵

康熙五十六年丁酉十一月癸丑

上驻蹕汤泉

谕大学士等曰汤山至德胜门四十余里德胜门至大内将及十里此间设立腰站二处各派部院贤能司官一员笔帖式一员如此则朕遣人请

皇太后安竝

皇太后差人至朕处俱不致迟悞矣

十二月甲申诸皇子传

谕曰

皇太后病势渐增朕承欢奉养历数十年不幸值此朕躬虽抱病此心未能稍释顷亲往请安朕体甚觉委顿

皇太后倘有不讳朕自当竭力以尽礼节耳

乙酉诸皇子传

谕曰昨日朕足背浮肿不能转移因

皇太后病势大增用手帕纏足乘软舆诣

宁壽宫朕捧

皇太后手奏云

母后臣在此

皇太后张目畏明以手障光视朕执朕手朕心悲痛欲在宁壽宫守视因病体万不能支而出朕若居於素所寝处之地心甚不安因於苍震门内设立帷幄以居衣不解带朕数日来徧身沈重中心烦燥不能成寐三鼓时稍寝即醒醒时头晕随又起坐至五鼓始寝半刻朕欲竭力

尽礼似此形势甚恐不能支持益滋不安耳

丙戌大臣等奏

圣体违和仰祈节劳保摄奏入

上曰

皇太后倘有不虞朕当力疾尽礼尔等各有父母勿过为劝阻朕益伤悼益增疾矣是日酉刻

皇太后崩於宁壽宫

上拊膺哀号即行割辫孝服用布哭泣弗辍诸皇子屡次

叩请始回苍震门内

丙午诸王大臣等公奏明日

大行皇太后殡宫行大祭礼

圣躬近日方稍愈请今晚不必亲诣

梓宫前哭奠

上谕曰二十一日二十二日朕本欲亲诣致祭因二十七日欲亲往释服是以未去自二十三二十四日以後朕躬比前较愈尽可往矣诸皇子大臣屡次劝止倘朕今可以去而不去他日回想岂非遗憾乎今朕必亲去将此谕衆知之

康熙五十七年戊戌三月壬戌诸王大臣合词具奏

皇太后大事将满百日诸礼俱毕请照礼部所请於十四

日薙发

上谕曰方

皇太后大事

梓宫未出之前朕立意欲曲尽乃心不幸身病不能支持难以勉强诸事未尽朕心抱恨无穷

又思当此之时止有孝敬朕之人竝无爱恤朕之人尊长辈已无存者此等处每以无可与言为伤兹距四月初七日为日无几着过四月初七日薙发

康熙五十九年庚子十二月甲辰诸王贝勒贝子公满汉文武大臣谨奏

皇上御极六十年普天大庆恭请行庆贺典礼

上谕大学士等曰朕素性不喜行庆贺礼是以元旦惟照例行礼停止筵宴虽万壽日亦久不行庆贺礼今王大臣等为朕御极六十年奏请庆贺行礼钦惟

世祖章皇帝因朕幼年时未经出痘令保母护视於紫禁城外

父母膝下未得一日承懽此朕六十年来抱歉之处正月初七日

世祖章皇帝忌辰二月十一日

孝康章皇后忌辰朕何敢於正月初七二月十一日以前行庆贺礼此所奏不准行

庚申

上谕大学士等曰诸王大臣为朕在位六十年奏请庆贺而於典礼之大者并未议及朕在位六十年皆

祖宗积德陰佑所致幸而六十年来一无所失应先往盛京

三陵行大祭礼但朕今年近七旬不能亲谒

三陵应遣皇子等恭代告祭俟上元节後朕亲往孝陵恭行大祭典礼尔满汉大臣会议具奏其祭陵撰文即将朕旨纂入

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷一

## 卷二

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二

圣德一

康熙六年丁未七月己酉

上躬亲大政诏谕天下曰朕以冲龄嗣登大宝辅政臣索尼等谨遵

皇考世祖章皇帝遗诏辅理政务殚心効力七年於兹今屡次奏请朕承

太皇太后之命躬理万几惟

天地

祖宗付托至重海内臣庶望治方殷朕以凉德夙夜祇惧天下至大政务至繁非朕躬所能独理宣力分猷仍惟辅政臣诸王贝勒内外文武大小各官是赖务各殚忠尽职洁已爱民任怨任劳不得辞避天下利弊必以上闻朝廷德意期於下究庶政举民安早臻平治凡我军民宜仰体朕心务本兴行乐业安生以迓休宁之庆政在养民敢虚

天地生成之德时当亲政恒念

祖宗爱育之心布告天下咸使闻知

康熙八年己酉正月戊申

上谕工部前奉

太皇太后谕谓乾清宫交泰殿栋梁朽坏宜撤旧重建以为朕宫

慈命谆复朕不敢违但陶唐茅茨不剪夏禹宫室是卑其母事华丽止令朴质坚固以称

太皇太后惓惓至意

八月辛未

上谕吏部前京察处分满尚书侍郎等因无事故被革俱给还原官令其候补今思满汉诸臣被革相同朕原无异视应一体施恩京察内有汉尚书侍郎被革者察明议奏

康熙九年庚戌二月癸未

上谕刑部向来定例流徙尚阳堡宁古塔罪人於六月十二月停遣余月皆令发往今思自十月至正月俱严寒之候所徙罪人贫者殊多衣絮单薄无以御寒罪不至死而冻毙於路甚为可悯继自今流徙尚阳堡宁古塔罪人自十月至正月及六月俱勿遣

闰二月庚寅

上谕工部朕经行城外见道旁枯骸惻然可悯或因尔部修治道途以致暴露亦未可知其令有司掩埋并行各省凡髑骼悉为收瘞

四月乙未浙江巡抚范承谟疏言仁和县知县丁世淳以继母刘氏年老呈请终养吏部议覆定例父母年七十以上者终养竝无终养继母之例

上曰既有终养之例岂可分别生母继母丁世淳准其终养

康熙十年辛亥三月壬子朔

上谕年幼诸王曰闻尔等恃威行事岂果有所利耶夫无益之威逞之何用尔等皆朕懿亲人自敬畏至於所属在外官员原为国家治事理民尔等若勒索其财物彼何所取而应奉耶宜以时娴习骑射暇则读书毋徒溺於嬉戏也

是日

上谕和硕安亲王曰尔在诸王中以齿则高以行则长若年幼诸王率意妄为尔其训饬之

四月壬午朔吏部题镶黄旗拖沙喇哈番阿喇密故无子弟承袭罢世职其母年老无依应给半俸嗣後均照此例若系继母不准给予

上曰继母亦母也其与生母一体给之着为令

九月辛未

上往盛京谒

陵礼成

谕户部刑部奉天系

祖宗发祥重地奉天府宁古塔等处除十恶死罪不赦外凡已结正未结正死罪俱着减等其军流徒杖等罪俱着宽释自山海关至奉天府所属地方康熙十年十一年分正项钱粮俱着豁免

康熙十五年丙辰五月丁亥

上谕兵部据宁夏提督赵良栋疏报逆贼犯宁夏河东诸堡俱被胁从今闻招抚相继投诚朕思河东各堡因地狭民稀不能敌贼一时被胁诚非得已其槩从宽宥该提督仍加意抚绥以副朕惠爱元元至意

七月己酉

上谕兵部吉安一郡逆贼盘踞日久小民被胁蓄髮者多此不过畏死曲从耳且劳师讨贼原以为民若大兵所至将蓄髮者槩行诛戮殊非朕抚恤残黎至意倘有据守城池山寨执持兵械抗拒不降者仍诛剿之其余俱着免死俾得自新尔部通行晓谕各将军一体遵行

康熙十七年戊午二月甲辰

上谕兵部广东兵变时被掠男妇子女可令平南王尚之信总督金光祖等严行察出令人民识认悉皆发还俾其父子夫妻完聚粤西平定之日将军莽依图傅宏烈等亦各察明被夺人口遣还原籍

閏三月丙寅

上谕户部朕巡视京畿见八旗亡故军士葬地窄狭邱墓累累亦有竟无莹地者皆因郭外近地价值腾贵故不易得本朝军士奕世効力行间殒命疆场或身被重伤在家老死皆家业贫穷至无葬地朕每触目甚为悯恻作何拨给地土俾八旗贫苦兵丁俱获葬所令议政王贝勒大臣详议以闻

四月戊子

上谕兵部吴三桂背恩倡乱伊所属人员向沐国恩甚久其中不无被胁者韩大任等既经投诚仍令议叙加恩其同来护军甲兵皆国家素所豢养之人若辈父母妻子俱?贼中可遣发令归滇中俾得完聚其续至者尔部逐一问明或有愿归者奏闻并发



乙未

上谕户部前命尔部清察地亩以给出征死亡兵丁葬地必平原高燥之处方可若地势卑湿不堪为坟莹虽拨给何所用之又须与道路相近若道路太远则贫家难以趋赴矣至於官员秩卑小民贫乏者皆资地亩为生若取伊等之地拨给兵丁又致伊等失业可查内务府所管地亩及诸王大臣地亩详加丈量有溢於正额者给与兵丁以副朕优恤至意

康熙十八年己未四月丙戌

上谕兵部湖南广西已经底定滇黔指日荡平凡在京在外大小文武官员内有家口?於贼中者有子身投诚家口仍在彼地者有前以抗贼被害而家口尚有遗留者大兵到日一一清察务加保全俾之得所听其家属完聚尔部即通行传谕各路大将军将军督抚提镇等遵行

七月庚申

上谕户部工部朕御极以来孜孜求治期於上合天心下安黎庶夙夜兢惕不敢怠荒乃於本月二十八日巳时地忽大震皆因朕躬不德政治未协大小臣工弗能恪恭职业以致陰阳不和灾异示儆深思愆咎悚息靡宁兹当力图修省以迓

天庥念京城内外军民房屋多有倾倒无力修葺恐致失业压伤人口五城御史不能逐户细察止听属员开报於朕加恩轸恤之处不得均沾实惠着另遣满汉御史详加稽察其穷苦兵丁出征在外房屋毁坏妻子露处无力修葺朕心更为悯念该部即行令八旗都统副都统参领亲行详察毋致遗漏

八月甲子

上谕内阁户部官员兵丁房屋墙垣顷因地震塌毁甚多一时不能修葺四品官员以下现食半俸此一次仍行全给其护军拨什库披甲当差人役钱粮着即支与两月令其修理

庚辰

上谕户部通州三河等处遇地震压死者甚为可悯户工二部会同将旗下及民人房屋并寺庙被压之人速察明数目遣司官四员前往验视动支帑银带往有主收殓者给予银两无人承认者着所遣司官同地方官设法埋瘞

十二月丙寅

上召大学士等至懋勤殿

諭曰君臣誼均一體勢分虽悬而情意不隔安危欣戚无不可相告语者堂陛之誼固宜如是也迺者朕体初平殿廷不戒被毀於火尔诸臣因朕偶恙复覩此灾爰主心切必谓朕当過於忧虑朕披阅经史颇明大道朕之一身上受

祖宗之付托下系臣民之瞻仰为任匪轻宁不自爱惟是今秋有地震之变又各处饥饉洊臻寇盜未息此朕早作夜思中心惶惧寢食靡宁者至於殿廷告灾乃

上天致警敢不夙夜祇畏修省厥愆然其所关止属朕躬临御之所但得海宇清晏置斯民於衽席之上则朕今所居较诸前代茅茨土阶尚或过之矣岂至以露处为虑哉朕自五齡即知读书八齡踐阼统蒞万方

太皇太后尝问朕何欲朕敬对曰臣无他欲惟愿天下乂安生民乐业共享太平之福而已当时左右实共闻之自昔迄今谨持此心兢兢业业恒如一日可以质诸寤寐倘有政治失宜皆朕躬之咎从不诿过臣下惓惓之意兹与尔等悉之

康熙十九年庚申八月癸未先是吴三桂反平南王世子尚之信从贼及归正仍隐与弟之节等纠党诱杀都统王国栋谋乱事觉下议政大臣等集议论罪

上諭议政王大臣等曰尚之信谋为叛逆卿等集议论罪如律但平南王尚可喜航海归诚効力行间镇守粤东着有劳绩及吴逆叛乱坚守臣节不肯从逆为逆子尚之信所逼愤恨殒命朕每念及深为惻恻其妻舒氏胡氏从寬免死竝免籍没尚之孝尚之璋尚之隆等俱从寬免革职枷责尚之信不忠不孝罪大恶极法应立斩姑念曾授亲王从寬赐死其余逆党尚之节李天植等悉按律正法

康熙二十年辛酉七月甲子

上諭吏部兵部凡官员祖母母竝妻缘事者即议鞭责折赎於大体不合如果事犯重大不妨削其封诰治罪若鞭责折赎小过或将伊夫或伊子孙品级俸禄议罚尔部会议定例具奏

八月丙申

上諭刑部商民领吴逆资本者甚多隱匿者亦或有之若据告追究恐无赖之徒借此诈害富民有累百姓商民为四民之一富民亦国家所庇藏富於民不在计此铕两以後有首告者俱不准行

九月壬申

上諭户部积贮为国家大计岁运漕米充实京仓最为紧要旗丁人等挽运勤劳宜加存恤朕顷巡行近畿至通惠河一带见南米漕船旗丁人等资用艰难生计窘迫恐其苦累难支以致

沿途迟滞贻误仓储所关匪细前以军需浩繁漕运额设钱粮节经裁减今应作何酌复着详议以闻

十二月癸巳九卿詹事科道等以滇南荡平请加上

尊号

上谕曰尔等以大憝既除寰宇底定奏请上朕尊号朕思曩者平南王尚可喜奏请回籍时朕与阁臣面议图海言断不可迁移朕以三藩俱握兵柄深恐日久滋蔓酿成不测故决意撤回不图吴三桂背恩反叛八年之间外内骚动兵民交困赖

上天眷佑

祖宗福庇逆贼荡平倘复再延数年百姓不几疲敝耶忆尔时惟有莫洛米思翰明珠苏拜塞克德等言应迁移其余竝未言迁移则吴三桂必致反叛也议事之人至今尚多试问当日曾有言吴三桂必反者否及吴三桂倡叛四方扰乱多有退而非毁谓因迁移所致若彼时朕谕过於人将会议言应撤者尽行诛戮则彼等含冤泉壤矣朕素不肯谕过臣下即部院事有错误朕亦自任朕自少时以三藩势焰日炽不可不撤岂因吴三桂反叛遂谕过於人耶今乱贼虽已削平而疮痍尚未全复君臣之间宜益加修省息兵养民布宣德化务以廉洁为本用致太平若遂侈然以为功德崇上尊称滥邀恩赏实可耻也和硕裕亲王福全等再三陈请

上复谕曰顷九卿等以逆首既除四方底定奏请上朕尊号朕自御极以来日夜孜孜以乂安生民为念乃逆贼吴三桂一倡变乱遂致涂炭八年当吴三桂初叛时散布伪割煽惑人心各省兵民相率背叛此皆德泽素未孚洽吏治不能剔厘所致幸赖

上天眷佑

祖宗威灵满洲兵士之力逆渠授首奸党悉除地方平靖独念数年之中水旱频仍灾异叠见师旅疲於征调被创者未起闾阎敝於转运困苦者未苏且因军兴不给裁减官员俸禄及各项钱粮并增加各项银两仍未复旧每一轸念甚歉於怀若大小臣工人人廉洁俾生民得所风俗淳厚教化振兴天下共享太平之福虽不上尊号令名实多如一切政治不能修举则徒上尊号朕断不受此虚名也朕自幼读书览古人君行事始终一辙者甚少尝以为戒惟恐几务或旷鲜克有终以故宵衣旰食祁寒盛暑不敢少间偶有违和亦勉出听断或中夜有机宜奏报未尝不披衣而起朕非不知燕息自怡盖所爱不在一身总为天下生灵之计政事务求当理官职务在得人期於家给人足百姓乐业而已今吏鲜洁清之效民无康阜之休君臣之间全无功绩可纪倘复上朕尊号加尔等官秩则惟有负愧耳何尊崇之有至於

太皇太后

皇太后加上徽号诏赦天下理所宜然其上朕尊号之事断不可行乃朕实意非粉饰之词也自今以往大小臣工宜各洗心涤虑砥节励行休养苍黎培复元气尔等可向九卿各官悉谕朕意不必再行陈请

康熙二十一年壬戌二月甲午外藩王贝勒贝子公台吉等请上

尊号

上曰朕自御极以来夙夜孜孜勤求化理期於中外乂安生民乐业今逆寇虽已荡平治化尚未孚洽前诸王大臣等请上尊号已经有旨这外藩王等所请亦不准行

四月丁酉

上谕大学士等曰朕巡幸沿边地方见设立界限处坟墓毁损枯骨暴露者甚多朕心悯焉夫掩骼埋胔王政所重可令盛京将军徧察而瘞埋之

五月丁巳

上谕户部兵部工部从前盛京守奉

陵寝及山海关等处城守章京员缺俱令其子弟顶补自停止此例悉由京师补授顷朕以昭告成功展谒

永陵

福陵

昭陵因周视所历地方见道里辽远往返艰难若章京员缺尽从京师补授则家口迁移重为贫窶者之累且将前任章京房屋田地掣给新补之员以致前官孤孀无倚不能回京如欲即留彼处则田庐既空资生何策困苦日甚深用悯恻嗣後盛京守奉

陵寝及山海关等处城守章京员缺不必自京补授着於伊等子弟内令该将军选择贤能者具题引见顶补以免往返迁移之苦倘伊等子弟无人堪用别有补授发往之员可另拨田屋给与其前任章京田屋仍行留给不必掣出令其孤孀得所

六月辛卯

上谕大学士等曰自古圣主每遇水旱灾祲未有不行?祷者今亢旱已甚朕欲虔诚斋戒亲行祈祷尔等查例具奏

八月己卯翰林院奏经筵讲章

上曰经筵所以讲学修德大典也讲章须有劝戒箴规之意乃称啓沃今讲章内有道备君师功兼覆载二语太过其易之

康熙二十二年癸亥闰六月庚申

上谕刑部人命关系重大凡现审人犯自宜蚤取口供速行完结庶不致无辜久禁囹圄淹滞毙命其中有应行详审及等候质对者或暂行监候或羈禁各门该管官员亦当严加稽察不时照管毋令狱卒及守门人等借端需索恣行凌辱虽各犯有应得之罪若未死於法先死於狱既非宪典亦干

天和朕心尤为不忍向来在外各衙门审理人犯或系监毙或在路物故凡一起内至三人以上者定有处分之例今思内外刑狱事属一体嗣後在内各衙门及各门监禁人犯一起至毙几人以上者作何处分着九卿詹事科道详议以闻

十月丁未九卿詹事科道以海寇底定请加上

尊号

上曰加上尊号典礼甚大台湾属海外地方无甚关系因从未向化肆行扰掠滨海居民迄无宁日故尔兴师进剿即台湾未顺亦不足为治道之缺朕观古来史册盛世无屡赦之事此时虽颁赦加恩小民未必均沾实惠治天下之道但求平易宜民而已何用矜张粉饰且吴三桂剿灭後颁赦未久今又以昇平行赦殊觉太烦朕但愿以平易之道图久安长治不愿烦扰多事可将朕意传谕九卿詹事科道知之大学士等随奏台湾虽在

海外乃海贼历年占据凭恃其险蒙

皇上指授方略剿抚兼行海贼遂尔向化神功圣德超越

千古非加上

尊号无以慰臣民仰戴之愿

上曰海贼乃疥癬之疾台湾仅弹丸之地得之无所加不得无所损若称尊号颁赦诏即入於矜张粉饰矣不必行

康熙二十三年甲子六月庚戌

上巡幸口外侍臣奏曰

圣驾往幸牧马地方请乘便过乌阑哈達等处其地水草肥美但柴薪稀少膳房所用已经预备其余官军令各带柴薪前往

上曰凡事岂可独为朕一人计要当为衆人计也朕所需用岂致有悞惟恐军士穷乏不能携带柴薪以致窘迫设使衆人劳苦朕有何乐即今天下偶有一省水旱朕必遣官支发仓库即行赈济虽边疆海岛之远朕尚惻然加念岂有随从军士令其枵腹跋涉乎在尔等有管军之责亦应体恤羣下也

十月丙辰

上幸金山乘沙船渡扬子江风浪恬静舟行甚速谕侍臣曰自兵兴以来恢复岳州长沙多得舟楫之力今海宇承?昔时战舰仅供巡幸渡江之用然安当思危治不忘乱朕乘此舟未尝不念艰难用武之时非以游观为乐也

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二

## 卷三

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三

圣德二

康熙二十四年乙丑四月辛丑

上谕太医院朕研究经史之余披阅诸子百家至黄帝素问内经诸篇观其义蕴实有恻隐之心民生疾苦无不洞瞩其後历代医家虽多著述各执已见若难经及痘症诸书未能精思极论文义亦未贯通朕甚惜之当兹海宇昇平正宜怀保吾民跻春台而登壽域尔等可取医林载籍酌古准今博采羣言折衷定论勒成一书以垂永久副朕轸恤元元至意

十月庚戌

上谕掌膳等官曰天下之物力有限当为天下惜之今酥油乳酒供给有余尔等会同庆丰司酌量收取足用则已不可过多蒙古甚穷乏取者减少则彼贫人日用可以恒足矣

十一月乙酉大学士等奉

命撰拟蠲免河南湖北及直隶山东被水州县钱粮谕旨进呈中有海宇昇平等语

上曰今四方虽定民生未尽悦安朕宵旰不遑勤求闾阎疾苦思得一利民生之事惟恐行之稍迟致民失所孜孜不已庶几渐见太平且古帝王已治益求其治已安益求其安朕深自省惕常虑始勤终怠不克底於化成若遽谓昇平而泰然自足非朕勤求上理之初意也自後谕旨中凡此矜张盈满之言勿复拟入

康熙二十五年丙寅二月己酉以

文华殿告成经筵前一日例应祭

先圣先师於传心殿具奏

上谕大学士等曰

先圣先师道法相传昭垂统绪炳若日星朕远承心学稽古敏求效法不已渐近自然然後施

之政教庶不与圣贤相悖其躬诣行礼以彰景仰之意

康熙二十六年丁卯正月戊子

上谕黑龙江将军萨布素等曰自雅克萨城解围以来闻军士中有患疾者此皆属满洲精兵朕甚悯焉今特遣医二人齎药治之至罗刹虽与我对垒但我兵攻雅克萨城从未诛戮其人如城中有患疾之罗刹亦听其就医使还彼国传布德意

丙申喀尔喀两翼汗及七旗济农台吉等疏请上

尊号

上谕曰喀尔喀诸汗贝勒等戴朕向来仁恩恪恭敬顺请上尊号具悉悯忱但诸汗贝勒等宜仰体朕一视同仁无分中外至意谨识朕谕和之旨自兹以后无相侵扰亲睦雍和永享安乐更胜于上朕尊号也况前者内外诸王贝勒大臣等请上尊号未经允行此所奏请亦不准行着理藩院行文晓谕

五月庚辰

上因天旱诏谕天下曰朕统御天下念切民生夙夜图治罔敢少懈迩来岁每不登民食寡乏今兹仲夏久旱多风农事堪虑此由敷政不均宽严过当或土木工兴或民瘼不达事机之失上干

天和阴阳不调灾孰大焉朕用是夙夜靡宁减膳撤乐清理刑狱求言省过斋居默祷虽雨泽薄降尚未沾足皆因朕之凉德不能上感

天心之仁爱兹当布德行仁赦过宥罪特从宽大用广好生应天以实诞施眚灾肆赦之恩敷政在宽聿昭嘉与维新之化布告天下咸使闻知

癸巳

上谕九卿等曰京师为天下根本之地殊属紧要乃数月不雨虽秋成尚远而目前旱乾朕甚忧之今欲亲行祈祷尔等大小臣工亦宜尽诚斋戒夫求雨乃以为民朕之焦劳岂为一身之计只念穷檐一岁不登即至失所不但朕心不忍尔等皆国家大臣亦何忍坐视应各矢至诚毋循故事

康熙二十七年戊辰二月壬子

上谕宗人府自古帝王展亲睦族列爵锡封原欲选贤建能旌别淑慝俾咸知劝勉庆流奕世



此国家之常经獎劝之至意也朕笃念亲亲恩礼罔替年至十五即行受封但谊属本支必皆  
飭躬砥行端良醇谨益自刻励动不踰则始无忝於宗潢今亲王以下奉恩将军以上年至十  
五不问贤否概予封爵以致视为典故罔知激劝嗣後亲王以下奉恩将军以上子孙应俟其  
年至何岁作何辨其贤否定其品级等第始应授封着议政王贝勒大臣及亲王以下奉恩将  
军以上会同确议具奏

七月癸巳

上以楚省裁兵夏逢龙叛乱

敕諭巡抚丁思孔曰楚省督标裁兵煽乱无知兵民或被迫胁或为招诱一时入其夥党官兵  
一到若不分别加诛朕心深为不忍应速行开示此等原系食粮营卒各有室家均属朝廷赤  
子乃为一二奸徒煽惑自新无路情属可悯今特开一面以广好生如有悔罪投归即行免罪  
仍准安插务令得所果能将贼首擒献或杀贼来归者仍与论功叙録毋得心怀疑畏尔奉敕  
諭即通行晓諭务令翻然悔悟争先投首早平鼓噪夥党奠安民生副朕寬大矜全至意

康熙二十八年己巳四月己卯先是

上以雨泽愆期间九卿等政事得失令详议陈明至是九

卿等奏

皇上仁恩浩荡蠲免钱粮慎重刑狱诸事尽善臣等实无

可言

上諭曰自去秋以来雨雪不能沾足闻直隶山西山东以至江南浙江皆旱心甚忧之屡諭九  
卿或有未当及应行之事令其陈奏曾不得一朕思政事失於下则灾患应於上如影响然尚  
书洪范曰僭恒阳若蒙恒风若去岁将旧任诸臣罢斥甚多择其有品有守者用之至於在外  
督抚司道等官近亦颇有令闻似应风雨以时以此观之所关必在於上非由他故诸臣肯直  
言乎至祈雨一事朕非不留意前此屡率诸臣祷於

天坛幸皆遇雨此

天爱苍生於朕毫无与焉目今诸臣诚心祈祷与朕无异若能切直言事是即所以召甘霖也  
朕一身之识见精力不敢自恃惟尔诸臣之勤慎是赖明示朕怀与诸臣共悉之

五月庚戌大学士九卿等奏曰近闻山东河南大雨沾足直隶大名诸府皆有雨京城昨晚亦  
已得雨

皇上於宮中日日?禱忧劳过甚请稍舒

睿怀颐养

圣躬

上曰朕可与他人比耶先人而忧後人而乐理固宜然近因久旱无雨忧劳过甚以致羸弱人或可欺天亦可欺耶日前祈雨朕虽未躬往而每次祈祷朕皆竭诚斋戒荷

天之眷得降雨泽此後雨泽沾足朕庶解焦劳也又命礼部侍郎张英传谕诸臣曰朕从来览观载籍备悉古帝王遇灾修省之道所以深加儆惧遇有灾变即小心兢业朕之忧虑恒在衆人之先今畿辅地方亢旱日久念系根本之地故朕心甚忧惕寢食靡宁耳可传谕诸臣知之

九月壬子大学士伊桑阿等进纂辑政治典训四册

上曰朕御极三十年来惟兢兢祇畏常存始勤终怠之虞孜孜不已每思满损谦益之戒今阅此书增愧於怀况比年不登民生未遂正当君臣上下协心同虑抚绥万邦夙夜黽勉尚且不暇岂容自矜自伐以重已过违道取誉以务虚名欲将此书停止编摩卿等议之

十二月乙酉

上谕礼部今岁直隶地方亢旱小民粒食艰难已经蠲免钱粮兼发帑金仓粟及准输助米穀賑济但三冬雨雪鲜少朕心仍切焦劳即进膳馐亦为损减无非轸念民生自竭诚惓惓明年正月祈穀祝文着该衙门更换将朕肫恳恤民之意切实撰写进览

康熙二十九年庚午二月甲戌

上谕大学士九卿詹事科道曰尔等诸臣称雨泽沾足固当懽悦但去年大旱民困未苏昔汉文帝为三代以下令主贾谊犹以处厝火积薪之上而谓无危为喻以今较之可无虑乎且今虽得雨不知夏秋若何其当远虑深思愈加轸恤何得称庆

康熙三十一年壬申十月庚子

上谕大学士等曰近日光禄寺奏停荐新芽茶凡有类於此者俱宜停止其各省庆贺表笺每次遣官齎送不惟驿递烦扰而齎送官员亦属劳苦朕思凡物解京均於地方百姓有累省一件如去一病今将表笺停其每次遣官齎送或应照朝鲜国一年一次彙送凡事皆由督抚具题或着督抚彙收一次齎送尔等会同该部议奏

康熙三十二年癸酉二月甲申

上谕大学士等曰宗族之始皆一祖所生当力敦亲睦共相爱恤扶持以为生也今见诸王以下略无亲睦之谊或者同为宗室以他祖父之名名其子若孙者有之朕意此後入八分公以上诸吉凶事会集之礼仍照旧行其未入八分公以下至於闲散宗室吉凶之事亦宜定会集仪式止令本翼会集若皆令八旗会集则不胜其烦矣如遇丧事则一旗之中为之服别旗惟去其纓又闲散宗室中有极贫者一有吉凶之事诸王以下闲散宗室以上各以其意量为资助在与者既不以为难而受者亦良有所益其会集时视其身之品级以下者一体会集闲散宗室无品级者则视其父之品级会集凡会集不至者有司察参如此则皆相识而相亲矣又宗室中见在名字有相犯者宗人府悉行察改自兹以往每岁所送宗室人名亦即详察其有犯者驳之令改尔等将朕此旨同满洲尚书侍郎宣示诸王及闻散宗室令其定议以闻

康熙三十三年甲戌二月庚午兵部以佐领佛伦等分拟正陪带领引

见补授顺承郡王属下散骑郎员缺

上曰王年幼左右宜用老成此散骑郎拟正之人与今日引见补授护卫之人皆童稚耳少年相聚何以导王为善都统希佛历时甚久且系所属大臣可召来切责之

康熙三十四年乙亥四月丙辰

上谕大学士等曰平阳府地震朕心深为儆惕或政事有应行应革者可传集九卿问之其平阳府属见任京官之人欲归视家室者不必开缺着给假往视

六月庚子

上谕大学士伊桑阿阿兰泰曰数日间雨水过多若连绵不止民田恐致被损朕听政事无日不念切民生今雨水如此或人事有所未尽着传集九卿詹事掌印不掌印科道将应行应革事宜各抒所见以闻

是日

上谕礼部尚书张英曰数日来雨水过多虑伤田禾四月内又有平阳府地震之灾或者陰盛所致朕思天时与人事恒相感召未可谓灾沴为天时适然之数全不关於人事也尧舜之时犹有都兪吁咈盖古之圣人已治而益求其治已安而益求其安故兢兢业业始终如一朕朝夕以此儆惕於衷三十余年以来未尝一日稍自寬假亦有请问日理事者朕不以为然惟存恒久之心时时乾惕耳朕思地方间有荒歉正可动人警戒之念古人所谓遇灾而惧也朕於宫中费用从来力崇俭约期以有余沛恩百姓若非撙节於平时安能常行蠲赈之事耶

七月壬午

上谕吏部兵部各省督抚提镇官员间令来京陛见原欲以地方情形及兵民生计面加谘询具有深意近见来京各官辄以进川马等物为辞多所置办虽经却还但恐其在任购买致贻地方官员兵民之累朕本欲询兵民生计召令前来若反致累兵民殊失朕之初意且川马如果需用朕自颁特旨令出产地方办解何须进献着通行严禁

十二月辛丑

上谕大学士九卿等曰朕抚御宇内无日不念切国计民生比年直隶各省时遇旱潦又平阳府有地震之灾朕屡?帑金仓粟赈济蠲免钱粮百姓虽未至於流离恐未尽安生业各省绿旗官兵防御劳苦深宜体恤至奏献罪人虽罹法网亦可悯惻朕夙夜孜孜轸念於中者久矣今欲特颁诏旨广沛恩施思岳渎诸神皆所以福佑斯民宜遣官?行致祭严饬地方大小官吏务期洁已奉公抚绥百姓绿旗官兵粮饷多有虚冒剋扣应行稽核各省积年逋欠及带徵钱粮概与豁免除贪官污吏行间犯罪与十恶等死罪外一切罪犯咸加赦宥令其自新尔等会议具奏

乙巳

诏谕天下曰朕君临寰宇子育元元惟以薄海昇平人安物阜为念或身处宫禁之中或巡历郊圻之内勤求民隐宵旰弗遑故历岁以来减赋蠲租省刑有过凡有關於治理务实见於敷施顾迺者畿辅郡县灾伤叠告而山西平阳府属复有地震之异虽赖所在仓廩素有积贮及时周赈幸免化离而朕心祇惕不敢以水旱灾沴视为气数适然谓必政事之失宜方致陰阳之有忒反躬循省深儆予辜夫图治之道莫先於养民逮下之仁莫重於寬恤兹特诞沛恩膏肆弘赦宥茂迎庥祉丕愜輿情安民则惠覃敷益下之恩御衆以寬式广好生之德布告天下咸使闻知

丁未户部题乌喇解送貂鼠缺额应将该管官议罪

上曰数年来因捕貂者衆故不足额以此议处是无辜获罪若不得佳者朕但少御一裘何关紧要且貂价甚贵而又非必用之物朕亦不甚需之

康熙三十五年丙子十一月己卯

上谕议政大臣等曰天下当以仁感不可徒以威服今朕原无征噶尔丹之意皆噶尔丹所自取且噶尔丹凶暴朕惟待以寬仁噶尔丹奸狡朕惟示以诚信尝览经史云惟仁者无敌今噶尔丹穷迫已极遣格垒沽英前来乞怜朕意仍欲抚之诸臣奏曰此真天地好生之心实

从古所未有也

上曰古之将帅虽善用兵多戮已降或其身不得善终或子孙不昌此皆好杀之明戒也又古

之人主或穷兵黩武好大喜功朕意不然惟愿宇宙雍熙四海昇平家给人足各得其生而已噶尔丹使人格垒沽英可仍遣回

十二月甲申

上谕大将军费扬古曰噶尔丹被我军击败後散者散降者降故朕复亲临塞外欲相机而行今观陆续降人及格垒沽英之言噶尔丹穷蹙是实朕不忍悉加屠戮不如抚而活之故於尔未至之前朕即降旨招降也

康熙三十六年丁丑正月甲戌

上谕户部理藩院屡年以来察哈尔八旗官兵从征効力甚苦伊等向无俸粮自今察哈尔官员着比照京官俸量减给与尔等作速定议具奏即於二月支俸时给之五月癸卯大学士等以荡平噶尔丹奏请上

尊号

上曰朕览史书帝王事业贵始终如一不以尊号为贵上世无论矣即明代亦无受尊号者後人并不非之朕自御极以来不曾念及一己只为天下生民计夙夜焦劳惟恐一时怠慢不克有终况噶尔丹之灭由於

上天之笃佑

祖宗之福佑衆将士之勤劳也朕何有焉

皇太后崇加徽号允宜朕之尊号不必加亦不必再奏六月庚戌诸王贝勒贝子公文武满汉官员及远近士民赴畅春园请上

尊号

上谕曰朕御极四十年虽自始至终孜孜不倦而吏治尚未澄清民生尚未丰裕士卒尚未休息风俗尚未淳朴且旱潦灾异亦复相仍方今外寇既靖正宜休息生养徒加尊号何益於治朕荡平噶尔丹机宜未尝有失苟天下共能知之朕愿足矣崇上尊号不必行毋复再奏

十一月丁酉

上谕大学士九卿等曰兹因地震示警朕深切悚惕念致治之道无如爱民生重民命朕总理几务於一切闾阎生计及人命事情罔不殚精研究在外直隶各省亲民之官务访求民间疾苦实心爱养其关系人命案件必详审实情俾无冤抑在内大小官员咸宜勤慎奉职力改前

愆以共副朕实图修省弭灾之至意

康熙三十七年戊寅十二月庚戌

上谕宗人府近日朕传集诸王及闲散宗室於景山校射者将以劝惩贤否也及试以射善射者颇多朕心甚悦其有品秩之宗室俱为王府护卫官职有迁转之阶惟闲散宗室虽有干济之才亦无路上进兆姓中凡有才者尚选择録用而朕宗室中之才干者不获登用良可惜也尔衙门将宗室中材力壮健长於骑射者详查奏闻朕将授为阙廷侍卫职官视其効力若材力果优勤於供职即授以参领副都统职任安於庸劣者方罢斥之家贫无力者一并查奏朕将筹其生计焉

康熙三十八年己卯十月丙戌大学士等以朝审情实各犯八十三人请

旨

上谕曰人命至重今当勾决命在须臾尤不可不详慎尔等於此情实各案既已阅讫各有所见皆当尽言又

谕曰此等虽皆当死然朕犹於当死之中曲求可生之路不忍轻毙一人念淮扬百姓频被水灾朕怒焉伤之河患不除夙夜不能暂释於怀且百姓既被水灾存者必至流离转徙田多不耕赋安从出来年钱粮当於今年预为蠲免庶灾黎於水退时可以各归故乡安其生业

康熙三十九年庚辰三月丁未

上谕宗人府总领府事和硕简亲王雅布曰宗室觉罗等之女有愿与朕养者朕养而嫁之有女年长父母不能遣嫁者朕亦代为嫁之着查明奏闻

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三

# 卷四

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四

圣德三

康熙四十一年壬午十二月壬辰诸王贝勒贝子公满汉文武大臣官员及直隶各省士民以

皇上五十万寿请上

尊号

上谕曰朕即位四十余年无刻不以民生休戚为念远迩安宁为本虽庆云景星嘉禾瑞草天书麟凤之奇总无关于黔黎亦无系于朕心侈言祥瑞贻讥史册何裨治理朕以实心为民天视天听视乎民生后人自有公论若夸耀功德取一时虚名大非朕意不必数陈康熙四十二年癸未十二月乙酉山东巡抚王国昌疏言东省水灾蒙

皇上截漕发帑差官赈济万姓懽呼吁请代题谢恩

上曰王国昌疏称小民感戴祝颂等语朕自御极以迄于今但以民生为念未尝一刻不廑诸怀民无灾伤各得其所小民虽不行祝颂朕心自恻闻今山东直隶河南谷价腾贵朕方切轸念此所奏已知之

康熙四十三年甲申八月庚午

上谕大学士及讲官等曰臣下如有欺蒙朕断不姑宥此外若为朕躬服食诸事从未答责一人昨往钓鱼处膳房所备止有肉肴竟忘携带饭食诸皇子及近御侍从俱欲答之朕止之曰彼无心偶忘携带耳此乃小事可宽宥之

十一月壬戌

上谕大学士等曰朕尝阅书史自古大臣得始终善全者少朕今御极四十余年大学士卫周祚冯溥杜立德李蔚宋德宜王熙等俱得全功名而考终命者皆朕竭力保全所致也朕从不多生一事但穆然清静处之以和平故诸臣皆得享其福也

康熙四十五年丙戌二月丁巳

上谕大学士等曰今岁山东河南山西等省雨水均调已经奏报惟近京一带去岁三冬少雪今春复无雨泽顷二十七日地又微震一切政事或有当更改处尔等与九卿会同酌议具奏尔诸臣行事若有缺失亦当各自反己力加省改

三月丙寅

上谕大学士等曰朕观前史汉因灾异而重处宰相此大谬也夫宰相者佐君理事之人倘有失悞君臣共之竟诿之宰相可乎或有为君者凡事俱付托宰相此乃其君之过不得独咎宰相也

十月乙巳

上谕户部国家钱粮理当节省否则一遇灾荒蠲免其军饷河工等项经费必致不敷前光禄寺一年用银一百万两工部一年用银二百万两因朕力崇节俭今光禄寺一年止用银十万两工部一年止用银二三十万两矣

康熙四十六年丁亥十月乙酉蒙古诸王贝勒贝子公台吉等各率所部进献马驼

上命却之谕曰朕今教养尔等人皆富庶物尽蕃滋尔等竭诚进献朕心嘉悦即与收纳无异嗣後尔等其益勤生计图维滋息始副朕爱养至意

康熙四十七年戊子八月辛未

上命侍卫伍什常壽等传谕诸大臣曰近日闻诸阿哥常挾辱大臣侍卫又每寻衅端加苦毒於诸王贝勒等诸阿哥现今俱未受封爵即受封後除伊属下人外凡有罪过亦当奏闻候朕处分何得恣意妄行乎朕为天下元后凡事但遵大义而行无罪之人未尝枉法处治八议内三品以上官员虽犯死罪不遽拟绞而必奏闻者所以敦国体非但恤臣下也伊等不遵国宪横作威势至令臣仆无以自存是欲分朕威柄以恣其行事岂知大权所在何得分毫假人如裕亲王恭亲王皆朕兄弟也於朕之大臣侍卫中曾敢答责何人耶臣仆有获罪者朕并不轻宥然从未有轻听人言横加戮辱之事且

太祖

太宗曾降训旨戒勿滥行捶楚荼毒无辜煌煌

实録纪载甚明嗣後诸阿哥如仍不改前辙许被挾之人面诘其被挾之故稍有冤抑等情即赴朕前叩告朕且欣然听理断不罪其人也至於尔等有所闻见亦应据实上陈若一切隐而不奏即尔等之罪矣



十月甲辰

上亲书谕旨示诸皇子大臣等曰昨日诸大臣侍卫等奏请调养朕躬朕念君臣一体有怀宜即尽言故特举朕素念及不遂朕意之处一一明谕朕每思自古帝王抚世承平历年久远未有如朕者朕无日不向皇太子允祲言治理天下爱育黎庶维系人心之事慕宋孝宗之孝养高宗语允祲曰将以政事付汝朕当择处水土佳处时闻汝之令名以优游养性迨後见其所行不善难托重器遂絶此望古来为君甚难兢兢业业犹有错悞今朕年已老幸际衆心胥戴万国咸宁之时愈加畏惧

宗庙社稷天下黎元皆系朕躬朕宁敢不慎重弘业置诸磐石之安乎迨至彼时衆自知有所倚赖也此意极深即朕亦不自喻岂可徧喻衆人乎尔诸臣知朕精诚无私深加体念各勤职业不妄生事则朕易於图治而天下庶绩亦咸理矣所谓各勤职业者即文臣尽忠不爱钱武臣为国不惜死之类尔诸臣诚能如是则朕怀自畅朕体自安矣若不敬慎所行而欲朕怀宽慰此非忠爱之实心也特谕

康熙四十九年庚寅四月辛酉九卿等议覆金都御史屠沂条陈节俭一疏

上谕大学士等曰禁止奢僭而崇尚节俭极当於理朕近查宫中人数

皇太后宫及朕所居正宫不过数百人较之明代宫人则减省多矣先是光禄寺供应宫中用度每年用银七十万两有余朕渐次节省不使濫溢一年止需七万两矣理藩院向来每年赏赐供应外藩宾客用银八十万两今裁减浮费一年止需八万两矣户工两部前此每年所用钱粮其数过多今十日一次奏闻用过数目所需钱粮已极少矣朕用钱粮节省如是因臣民僭用妄费从前屡有禁约今若又行禁约徒有法令滋繁而已究无补於事也盖法令非不详尽皆由臣下奉行不善而然步军统领顺天府府尹地方该管官员果实心遵行何至如此乎

十月癸未

上谕大学士九卿等曰江南亏空钱粮两次命张鹏翮察审朕意地方虽有不肖之官侵蚀钱粮未必多至数十万两前朕南巡时曾有谕旨凡沿途所用之物悉出内帑预备未尝丝毫取诸官民督抚等官不遵朕旨肆意那用以致亏空朕若不言内外诸臣谁敢言者但彼任

事之人离任者已多若将因公那用责之新任官赔补朕心实不忍也至俸工银两有限即逐年扣补亦难清理且官无俸禄役无工食必致私派以累民朕为天下生民计蠲免各省钱粮已逾万万免此四五十万之银何足惜乎朕总理机务垂五十年事无大小凡臣下情隐无不灼知洞鑒朕屡次南巡地方官员预备纤夫修理桥梁开濬河道想皆借用帑银原冀陆续补足而朕三次南巡为期相隔不远且值蠲免灾荒所徵钱粮为数又少填补不及遂至亏空如此之多尔等皆知之而不敢言也即如纤夫一项虽取用於田亩而所用既多伺候日久势必给与口粮工价安得无费至於修造行宫亦必借用帑银前者朕巡视溜淮套工程至彼处见

有舍宇三间虽云俸工银两所造然必先借用库项後方抵补尔等岂肯明言其故乎至欲将三年俸工抵补亏空夫三年之内地方官员或陞迁或调用或革退或亡故以从前各官那用之亏空而将後来者之俸扣补於理不顺朕心实为不忍至於胥吏贱役若不给与工食此辈何所资生必至累民今部中每遇一事辄议令地方官设法料理皆掩饰美名实则加派於地方耳朕非但为百姓亦为大小诸臣保全身家性命朕南巡时闻龙潭地方建造行宫恐致累民曾谕总督阿山令其拆毁至他处建造行宫朕皆未之知也总之此不欲累民之念可以自信亦可见信於天下後世朕历年蠲免天下钱粮至数万万有余今此项亏空若令补垫亦不为多然岂忍以此累地方乎至於查明欸项亦非难事钱粮册籍皆有可考地方官借因公那用之名盈千累百馈送於人若加严察隐情岂不毕露朕意槩从寬典不更深求今海宇昇平国用充足朕躬行节俭宫中用度甚为省约计明朝一日之用足供朕一月之需今即因数次巡幸用钱粮四五十万亦不为过明後年天下钱粮以次尽行蠲免若留此亏空之项以为官民之累甚非朕寬仁爱养嘉与维新之至意也

康熙五十年辛卯三月辛卯诸王贝勒贝子公满汉文武大臣官员及直隶各省士民以

上御极五十年请上

尊号

上曰朕自幼读书历观经史持身务以诚敬为本治天下务以寬仁为尚此心此念恪守五十年夙夜无间即纖悉细务不敢稍有怠忽尝观古昔帝王君临天下之久能持终者盖鲜朕今春秋渐高血气渐衰而朝乾夕惕实与日俱增正当恪慎保终孜孜为万姓图治安之时也盖朕之御极年久皆

祖宗厚德景福积累貽留之所致至於请上尊号特虚文耳於朕躬毫无裨益史书所载加上尊号等事徒为先儒所讥有何善处而欲行之也

康熙五十一年壬辰七月丁酉户部题原任西安正蓝旗骁骑校巴布叩阍言伊兄萨尔布善曾抚养和硕安亲王之子塞棱额田产家人等俱为塞棱额占据入在包衣佐领下审问皆虚应将巴布枷责以年老折赎

上谕大学士温达曰此事所议不明

世祖皇帝时将裕亲王恭亲王付与殷实官员抚养及至分封将抚养官员产业给与二王具题朕未允行大阿哥曾付与内务府总管噶鲁三阿哥曾付与内大臣绰尔济抚养分封时拟将伊等产业给与具题朕俱不准行盖主上子孙付与属下人员抚养者特欲令其成人长大并非欲占其产业也抚养之人将主上子孙兢兢业业侍奉抚养能成人长大即其功也及长大成人之後又占其产业籍其人口不但於理不合即受彼抚养之人亦於心不安五旗多有此事此风断不可长凡事当以理断之不可图小利图小利则与大体有碍设令将朕子与尔

抚养之及长成分封时将尔产业给与将尔人口给为奴仆尔心服乎前下嫁与阿禄科尔沁巴特麻之县君曾启奏献伊三佐领朕谕云朕乃天下之主在彼在此俱为朕之臣庶若取至京师反损坏其旗分故不准行蒙古王等闻之无不感激流涕土默特有七佐领该扎萨克无後至今朕豢养闲居彼处前曾奏请编在察哈尔旗下朕未允行後又奏请陪送公主朕亦未行此皆朕至公无私之意今萨尔布善将宗室塞梭额抚养成人反将其产业占据人口入在包衣佐领下为奴可乎原本着发还

十月己巳礼部题康熙五十二年恭遇我

皇上六旬大庆中外臣民莫不欲竭尊亲之戴上无疆之颂其应行典礼臣等谨会同大学士九卿詹事科道详议具题

上曰朕御极以来惟欲万国乂安上则敬

天法

祖下则垂令名於後世历尽忧勤荡平险阻自古帝王在位不久论者往往归於别故不知帝王一日万几实不堪其劳忧惧所迫以致享年不永也昔帝尧固辞华封之祝朕在位五十余年壽届六十今忧劳倍增血气渐惫惟恐愈久而力不支愿不遂惟日兢兢惕励而已并无祈天永命之意也览礼部所奏悉属虚文朕惟愿臣清子孝兄友弟恭人人皆读正书勉尽职业国安民治盗贼宁息各以至诚实意为朕六袞庆祝朕心甚喜此外仪文朕无所好所奏不准行

康熙五十二年癸巳二月庚戌

上谕领侍卫内大臣大学士九卿等曰赵申乔陈奏皇太子为国本应行册立朕自幼读书凡事留意纖悉无遗况建储大事朕岂忘怀但关系甚重有未可轻立者昔立允禔为皇太子时索额图怀私倡议凡皇太子服御诸物俱用黄色所定一切仪注几与朕相似骄纵之渐职是之故索额图诚本朝第一罪人也宋仁宗三十年未立太子我

太祖皇帝并未预立皇太子

太宗皇帝亦未预立皇太子汉唐以来太子幼冲尚保无事太子年长其左右羣小结党营私鲜有能无事者人非圣人谁能无过安得有克尽子道如武王者今衆皇子学问见识不後於人但年俱长成已经分封其所属人员未有不各庇护其主者使即立之能保将来无事乎且为君难为臣不易古来人君穷兵黷武者有之崇尚佛老者有之任用名法者有之朕御极五十余年朝乾夕惕上念

祖宗遗绪之重下念臣民仰望之殷乾纲独断柔远能迓体恤臣庶毫无私心当吴三桂叛乱

时已失八省势几危矣朕灼知满汉蒙古之心各加任用励精图治转危为安是以数十年来海宇宁靖今欲立皇太子必能以朕心为心者方可立之岂宜轻举即臣僚为国为民念兹在兹先忧後乐者实不易得太子之为国本朕岂不知立非其人关系匪轻朕将允礽从幼教训迨後长成变为暴虐无所不为不知忠孝不识廉耻行事乖戾有不可言者推其故皆由风狂成疾迷惑所致此疾有二十余载矣如人醉後伤人醒时知悔今以长醉不醒所为过恶身不自知伊之仪表及学问才技俱有可观今一至於此非风狂而何自废而复立以来朕尤加意教训心血耗尽因伊狂疾终不痊愈故又行废斥孟子云父子之间不责善责善则离离则不祥莫大焉大学云人莫知其子之恶盖父之於子严不可宽亦不可诚为难事如朕方能处置得宜耳尔诸大臣俱各有子凡人幼时犹可教训及至长成一诱於党类便各有所为不复能拘制矣立皇太子事亦未可轻定特召集尔衆大臣明示朕意赵申乔所奏着发还

三月戊寅朔

上谕诸王贝勒贝子公大学士九卿詹事科道等曰朕昨回宫见京城内外为朕六十壽诞庆贺保安祈福者不计其数朕实凉德自觉愧汗若先知之必谕令停止今虽难违衆志而因此夜思达旦朕为天下万国苍生之主万姓安即朕之安天下福即朕之福若雨阳时若家给人足则朕安寝饱食可以却病延年此朕所求之福也尔等传谕凡有祝延万壽者必以雨阳时若万邦咸宁为先朕虽年老然夙夜匪懈履薄临深之念与日俱增岂敢稍自满假乎

乙酉

上谕大学士等曰朕闻各省民人祝万壽来京者甚衆其中老人更多当春时寒暖不均又人非土着或不服水土亦未可定尔等可传谕汉官等老人中倘有一二有恙者即请拨太医调治以称朕爱养耆老至意

十二月甲午兵部题台湾换班官兵遭风坏船及溺沉兵器应令地方官速行赔补

上曰海洋寬广遭风坏船非人力所能为也若遇贼时船被烧夺理应赔补若此等遭风损坏亦令赔补太为冤抑嗣後有遇贼不能擒杀船坏被夺捏报遭风者除弁兵议罪外照例赔补若果被风损坏沉溺之船应免其赔补其沉溺兵丁等因公身死即幸而登岸者亦死中幸脱之人殊可悯惻着地方大臣酌量加恩以示鼓励

康熙五十三年甲午六月癸未

上谕刑部朕避暑塞外驻蹕山庄素称清凉之地尚觉烦热想京师自然更甚朕时以民生疾苦为念今天下承平农商乐业惟有罪之人拘系囹圄身被枷锁当兹盛暑恐致疾疫軫念及此不胜惻然应将在京监禁罪囚少加宽恤狱中多置冰水以解郁暑其九门锁禁人犯亦着减其锁条至枷号人犯限期未滿者暂行释放候过暑时照限补满尔部即遵谕速行以副朕法外施仁至意

十二月戊子

上谕大学士等曰直隶各省州县官或革职或被参解任或身故者妻子尚能回籍其县丞主簿典史驿丞等微员革职解任身故者无力回籍羈留异乡不免冻馁以致累及妻子即使犯罪至死亦与妻子无涉殊属可悯且如各地方鰥寡孤独不能度日尚设立养济院以育养之此等微员理应抚恤嗣後将伊等作何令回原籍尔等与九卿会议以闻

康熙五十五年丙申五月壬戌

上谕署理内务府总管事务散秩大臣关保曰去年直隶所属地方水涝未得丰收目今京师又旱朕心深为忧虑自明日为始朕於宫中每日进膳一次先人而忧後人而乐庶可感召天和也

甲子大学士嵩祝摺报京师下雨日期

上曰宋儒有言求雨得雨旱岂无因此意甚深今虽下雨但雨势未必远及有何可喜之处求雨断不可止必处处沾足方可停止也

康熙五十九年庚子正月己卯诸王大臣等奏

皇上御极六十年请行庆贺典礼

上谕曰朕在位五十九年皆由

上苍眷佑

列圣福德之所致也见在西陲用兵军民劳苦去岁正月朔日食海洋飓风飘没官兵船只山左东三府黎民饥馑人心风俗未尽淳官箴政事未尽理此正君臣孜孜求治之时庆贺之事着停止

康熙六十一年壬寅十月戊寅大学士九卿詹事科道等以来年恭遇

万壽七旬大庆详议庆贺典礼合词具疏奏请

上谕大学士等曰览所奏皆过於实事朕以冲龄即位赖世祖章皇帝定鼎以来深仁厚泽建不拔之业至今八十年四海昇平有自来矣朕自幼读书每览前代帝王忿懣忧患累其内机务纷纭劳其外年岁不久景祚不长者未尝不拊髀长叹朕凉德亦不过如此幸得历逾花甲年登古稀须眉皓白总理万几当此之际翼翼小心惟恐善後之策不能预料保泰图安夙夜兢兢况今西陲用兵士卒暴露转运罢敝民生乏食物价腾贵正宜君臣同寅协恭乂安万姓

永致太平自古庆贺多者後人不取况实无益乎朕御极六十余年元旦之外未尝受贺惟六十壽时三月十八日进表行礼今卿等所请无庸多议

大清圣祖合天弘运文武睿哲恭俭寬裕孝敬诚信中和功德大成仁皇帝圣训卷四

# 卷五

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五

圣学

康熙九年庚戌十月丁酉

上谕礼部帝王勤求治理必稽古典学以资啓沃之功朕於政务余闲惟日研精经史念经筵日讲允属大典宜即举行尔部其详察典例择吉具仪以闻

康熙十二年癸丑二月丁未

上谕学士傅达礼等曰人主临御天下建极绥猷未有不以讲学明理为先务朕听政之暇即於宫中披閱典籍殊觉义理无穷乐此不疲向来隔日进讲朕心犹然未愜嗣後尔等须日侍讲读阐发书旨为学之功庶可无间

三月甲戌

上谕学士傅达礼曰朕以修葺宫殿明日移驻瀛台暂留数日夫进讲所以致知蓄德期於日新未容少间讲官其日至瀛台如常进讲又

谕曰学问之道在於实心研索使视为故事讲毕即置之度外是徒务虚名於身心何益朕於诸臣进讲後每再三紬绎即心有所得尤必考正於人务求道理明彻乃止至听政之暇无间寒暑惟有读书作字而已因

御书一行赐观曰人君之学不在此朕非专工书法但暇时游情翰墨耳

五月壬申

上谕学士傅达礼等曰学问之道必无间断方有裨益以後寒暑不必辍讲

九月甲戌

上谕讲官熊赐履曰朕观尔等所撰讲章较张居正直解更为切要熊赐履奏曰臣等章句小儒不过敷陈文义

至於明理会心见诸日用则在

皇上自得之也

上曰讲明道理乃为学切要功夫修己治人方有主宰若未明理一切事务於何取则又

谕曰学问之道毕竟以正心为本熊赐履奏曰

圣谕及此得千古圣学心传矣

己卯

上谕讲官熊赐履曰大学格物二字包括无余但其间有根本有切要非泛骛於器数之末为支离无本之学也

又

谕曰天地古今大本大原只是一理故曰一以贯之然则博文约礼工夫合当如是

十月戊戌

上谕讲官等曰人心至灵出入无乡一刻不亲书册此心未免旁骛朕在宫中手不释卷正为此也

十一月壬申

上谕侍读学士喇沙里曰朕在宫中博观典籍见宋儒周敦颐太极图义理精奥实前贤所未发朕尝极意探索究其指归可命学士熊赐履编修叶方蔼张英修撰韩菼等各撰太极图论一篇朕亲览焉

康熙十三年甲寅九月壬戌朔

上谕学士傅达礼曰日讲关系重大日月易迈恐致荒疎虽当此多事之时不妨乘间进讲於军事无悞工夫不间则裨益身心良非浅鲜尔衙门议奏寻翰林院奏曰

机务繁重请间一日进讲

上曰军机事情有间数日一至者亦有数日连至者非可限以日期其仍每日进?以慰朕惓惓向学之意



康熙十五年丙辰二月己未

上谕讲官喇沙里徐元文曰嗣後经筵讲章称颂之处不得过为溢辞但取切要有裨实学其谕各讲官知之

十月癸酉

上谕讲官喇沙里等曰经书屡经讲读朕心业已熟晓通监一书事关前代得失甚有裨於治道作何拣择撰拟讲章进讲尔等议奏

康熙十六年丁巳五月己卯

上谕大学士等曰帝王之学以明理为先格物致知必资讲论向来日讲惟讲官敷陈讲章於经史精义未能研究印证朕心终有未慊前曾谕内阁诸臣或朕自讲朱注或解说讲章内阁诸臣奏称朕宜随便发明书旨不必预定规程今思讲学必互相阐发方能融会议理有裨身心以後日讲或应朕躬自讲朱注或解说讲章仍令讲官照常进讲尔等会同翰林院掌院学士议奏

癸卯

上谕讲官等曰尔等进讲经书皆内圣外王修齐治平之道朕亦孜孜详询每讲之时必专意以听但学问无穷不在徒言惟当躬行实践方有益於所学尔等仍愈加直言毋有隐讳以助朕好学进修之意

康熙十七年戊午五月己未

上谕讲官等曰讲章内言敬者德之聚朕思诚敬一理敬又为诚之本也

康熙十九年庚申六月甲申

上以御书赐大学士等谕曰朕万几余暇留心经史时取古人墨蹟临摹虽好慕不衰未窥其堂奥岁月既深偶成卷轴卿等佐理勤劳朝夕问对因思古之君臣美恶皆可相劝故以平日所书赐卿等方将勉所未逮非谓书法已工也卿等其知朕意又以

御书赐学士等谕曰尔等日侍讲筵夙夜匪懈啓沃之暇每以朕书为请朕万几余闲研精典籍间取古人墨蹟临摹尔等既为文学侍从之臣即有成就德业之责故因所请辄以颁赐其悉朕意

十月丁未

上御懋勤殿亲讲易经噬嗑卦辞讲官库勒纳叶方蔼等

进所撰乾坤二卦总论

上览毕谕曰卦爻之义原各不同即如噬嗑一卦中四爻主用刑者言初上二爻主受刑者言每爻各有取义必得总论发挥方觉全卦之义了然诸卦俱可仿此撰进

康熙二十一年壬戌五月庚午

上御乾清宫讲官牛钮等进讲睽卦象象毕

上曰讲义云一国非之而不顾天下非之而不顾此必认得道理真乃为无弊否则反为乖戾矣

康熙二十二年癸亥八月庚子朔

上谕讲官等曰朕每旦未明求衣坐待部院奏事既毕然後入讲不惟迟延晷刻亦且稽悞工夫自後於未啓奏前进讲方得从容议论多所发明自是讲官待漏宫门

甫辨色

上已御经筵矣

辛丑

上谕讲官等曰经筵关系大典必君臣交儆上下相成方有裨於治理向来所拟经筵讲章但切君身此後当兼寓训勉臣下之意庶使诸臣皆有所警省

壬戌讲官进讲易丰卦三节

上曰彖传讲章云骄心一生何所不至故圣人惕之以忧此所发明极是满招损谦受益圣人久安长治之道只在能持满而已

十月辛酉

上谕讲官张玉书曰日用常行无非此理自有理学名目彼此辩论朕见言行不相符者甚多终日讲理学而所行之事全与其言悖谬岂可谓之理学若口虽不讲而行事皆与道理脗合此即真理学也

康熙二十三年甲子三月丁亥

上谕大学士等曰朕前奉

太皇太后诣五台山览观山川形势一一亲历其境每台所制碑文出自一时结构尔等可详加斟酌近见汉人中有自负才高所作文不容人点窜此习俗之可鄙文之所以不工也

四月庚子

上御乾清宫亲讲易乾卦亢龙有悔一节讲毕

谕讲官等曰亢龙有悔一节何以注在不应讲之列天道人事亢则有悔易中所言无非此理正宜以此为戒不必避忌以後系辞讲章不分应讲与不应讲俱以次逐节进讲

十一月乙丑

上南巡泊舟燕子矶读书至三鼓侍讲学士高士奇奏请

宜少节养

上谕曰朕自五龄即知读书八龄践阼辄以学庸训诂询之左右求得大意而後愉快日所读书必使字字成诵从来不肯自欺及四子之书既已通贯乃读尚书於典谟训诰之中体会古帝王孜孜求治之意期见之施行及读大易观象玩占於数圣人扶阳抑陰防微杜渐垂世立教之精心朕皆反覆探索必心与理会不使纤毫扞格实觉义理悦心故乐此不疲耳

康熙二十四年乙丑四月辛卯

上谕大学士等曰从来道德文章原非二事能文之士必须先明理而学道之人亦贵能文章朕观周程张朱诸子之书虽主於明道不尚辞华而其著作体裁简要晰理精深何尝不文质灿然令人神解意释至近世则空疎不学之人借理学以自文其陋岸然自负为儒者究其意解不出庸夫之见真可鄙也

康熙二十五年丙寅闰四月己未

上谕翰林院掌院学士库勒纳张英曰尔等每日将讲章捧至乾清门预备诣讲筵行礼进讲为时良久妨朕披览功着暂停止春秋礼记朕在内每日讲閱其诗经通监讲章俱交与张英令其齎至内廷

康熙二十六年丁卯四月己未

上諭大學士等曰史事所關甚重若不參看實錄虛實何由悉知他書或以文章見長獨修史宜直書實事豈可空言文飾乎如明代纂修元史限期過迫以致要務多漏且議論偏謬殊乖公正俟明史修成之日應將實錄並存令後世有所考據從來論人甚易自處則難若不審己之所行而徒輕議古人雖文詞可觀亦何足道朕嘗博覽羣書於古之聖君哲后未敢漫加評騭也

康熙二十八年己巳二月甲子

上南巡至江寧府民王來熊獻鍊丹養身秘書一冊諭扈從諸臣曰朕於經史之余所閱載籍多矣凡鍊丹修養長生及師巫自謂前知者皆妄誕不足信但可欺愚民而已通經明理者斷不為其所惑也宋司馬光所論甚當朕有取焉此等事朕素不信其擲還之

乙丑

上駐蹕江寧幸觀象台

諭學士李光地曰郭守敬儀器不可行於今由不知恒星與天動故也自古史志歷法多不可信質之以理類空言無實如熒惑退舍之說天象垂戒理則有之若果退舍後來推算者以何積算

康熙三十一年壬申正月甲寅

上御乾清門召大學士九卿等至

御座前

上取性理展閱指太極圖謂諸臣曰此所言皆一定之理無可疑論者又指五聲八音八風圖曰古人謂十二律定而後被之八音則八音和奏之天地則八風和而諸福之物可致之祥無不畢至其言樂律所關如此其大而十二律之所從出其義不可不知如律呂新書所言算數專用徑一圍三之法此法若合則所算皆合此法若舛則無所不舛矣朕觀徑一圍三之法用之必不能合蓋徑一尺則圍當三尺一寸四分一厘有奇若積累至於百丈所差至十四丈有奇等而上之其為舛錯可勝言耶因取方圓諸圖指示諸臣曰所言徑一圍三止可算六角之數若圍圓則必有奇零其理具在目前甚為明顯朕觀八線表中半徑勾股之法極其精微凡圓者可以方算開方之法即從此出遂用方圓諸圖逐一

驗算無不脗合又

諭曰黃鐘之管九寸空圍九分積八百一十分是為律本此舊說也其分寸若以尺言則古今尺制不同自朕觀之當以天地之度數為準至隔八相生之說聲音高下循環相生復還本音

必须隔八此一定之理也随

命乐人取笛和瑟次第审音至第八声还本音

上曰此非隔八相生之义耶以理推之固应如是又谕曰算数精密即河道闸口流水亦可算昼夜所流分数其法先量闸口阔狭计一杪所流几何积至一昼夜则所流多寡可以数计矣又

命取测日晷表以

御笔画示曰此正午日影所至之处遂置乾清门正中令

诸臣候视至午日影与

御笔画处恰合毫髮不爽诸臣等奏曰臣等今日仰承圣训得闻所未闻见所未见不胜懽庆之至

康熙三十三年甲戌五月甲寅

上谕翰林院朕流览载籍见分类诸书虽各有所长尚多未备唐类函可谓详赡然唐以後典故艺文亦未采録可依唐类函体例自唐迄明辑成完书以资观览

闰五月戊辰

上谕大学士等曰古先圣贤所着训词於学者砺行之道读书之法居官治民之事无不该备果能孳孳行之自有无穷之益

康熙三十六年丁丑七月甲午

上谕殿试读卷诸臣曰作文者无不论理然徒能言而不能行亦奚益哉朕观性理一书大指只一诚字人可不以诚自勉乎

康熙四十一年壬午五月丙午

赐大学士九卿翰林詹事科道官一百四十余员御书有差

谕曰寻章摘句华丽词非帝王之本朕四十余年惟日兢兢未尝暑刻稍释万几自警有始无终之诮念兹在兹也政事稍暇颇好书射历年以来所积临摹字幅以赐卿等

十月壬午翰林院侍读学士陈元龙等遵

旨各书绫字一幅进呈

上谕曰学书须临古人法帖其用笔时轻重疎密或疾或徐各有体势宫中古法帖甚多朕皆临閱有李北海书华山寺碑字极大临摹虽难朕不憚劳必临摹而後已朕素性好此久历年所毫无间断也

康熙四十二年癸未四月戊戌

上发出大学士熊赐履所呈明神宗熹宗以下史书四本谕大学士等曰朕自冲龄即每事好问明时之太监朕皆及见之所以彼时之事朕知之甚悉太监魏忠贤恶迹史书仅记其大略而已犹未详载也明末之君多有不识字者遇讲书则垂幔听之诸事皆任太监办理所以生杀之权尽归此辈也又

谕曰此书所载杨涟左光斗死於北镇抚司狱中闻此二人在午门前受御杖死太监等以布裹尸出之至於随崇祯殉难者乃太监王承恩因此

世祖章皇帝作文致祭并立碑碣此书载太监王之心从死明系错悞至於本朝兴兵声讨之故书内并未记载可问熊赐履王鸿绪等

康熙四十三年甲申六月丁酉

上谕讲官等曰古今讲道学者甚多尤好非议人彼亦徒能言之而言行相符者盖寡是以朕不尚空言断不肯非议古人何以言之盖人各有长短弃短取长始能尽人之材若必求全责备稍有欠缺即行指摘此非忠恕之道也故孔子当时惟节取人之善隐讳人之短凡事求诸己不非诸人是岂可少容私意於其间乎又人见讲道学之人或不见用辄为太息以为果见用必有可观此亦徒见其空言而云然也若果见用言行亦未必相符惟宋司马光编辑资治通鉴论断古今尽得其当而後之论者反未尝置诸讲道学之列司马光乃宋朝名相言行相符由此以观不在空言也故君子先行後言果如周程张朱勉行道学之实者自当见诸议论若但以空言而讲道学断乎不可朱子洵称大儒非泛言道学者可比拟也

七月乙卯

上谕大学士翰林等官曰朕自幼好临池每日写千余字从无间断凡古名人之墨蹟石刻无不细心临摹积今三十余年实亦性之所好即朕清字亦素敏速从不错悞凡批答督抚摺子及朱笔谕旨皆朕亲书并不起稿其事之稍有关系者虽岁月经久亦不遗忘故批发之旨俱存所司朕处全无底稿也

八月庚午

上谕大学士等曰朕览过之书虽日月间隔不甚遗忘今虽年岁稍增而记性更进即目前陈列诸书内欲稽考某卷某字但指令近侍取之亦可即得不至错悞大约存心清虚不但事不遗忘於养生亦为有益

十一月己亥

上谕钦天监初一日日食朕用仪器测验午正一刻十一分初亏未初三刻二分食甚申初一刻复圆查七政历未初三刻二分日月合朔新法推算必无舛错之理此舛错或因悞写字画或因算者忽略将零数去之太多亦未可定着详察明白具奏

壬戌

上谕大学士等曰明史关系极大必使後人心服乃佳宋史成於元元史成於明其中是非失实者多是以至今人心不服有明二百余年其流风善政诚不可枚举今之史官或执己见者有之或据传闻者亦有之或用稗史者亦有之任意妄作此书何能尽善孔子圣人也犹言知我者其惟春秋乎罪我者其惟春秋乎孟子又言尽信书则不如无书当今之世用人行政规模法度之是非朕当自任无容他诿若明史之中稍有一不当後人将归责於朕不可轻忽也是以朕为明史作文一篇尔等可晓谕九卿大臣

康熙四十四年乙酉十一月壬申大学士等以鄂罗斯贸易来使齎至原文及译出之文进呈

上閱之谕大学士等曰此乃喇提诺托多乌祖克鄂罗斯三种文也外国之文亦有三十六字母者亦有三十字五十字母者朕交喇嘛详考视之其来源与中国同但不分平声上声去声而尚有入声其两字合音甚明中国平上去入四韵极精两字合音不甚紧要是以学者少渐至弃之问翰林官四声无不知者问两字合音则不能知中国所有之字外国亦有之特不全耳

康熙四十五年丙戌十月丁未

上谕大学士等曰翻译之事大有关系向年纂修实录所译朝鲜表文满汉文意皆不相符前大学士图海杜立德呈朕亲览朕两年苦心寻译始得将文义完美作史之事殊为重大一字不可轻易增减也

康熙四十六年丁亥六月己酉

上谕大学士等曰朕观医书与儒书不同儒者之书皆言五伦之理作文者据以发挥虽文之优劣各由乎人然其理总不出五伦之外若医书开一方於前又列数方於後果此一方尽善

则彼数方者又何用乎以此揆之彼着医书之人已自不能无疑也至药性宜於心者不宜於脾宜於肺者不宜於肾好服补药者犹人之喜逢迎者也天下岂有喜逢迎而能受益者乎朕从不服药至使人推摩亦非所宜推摩则伤气朕从不用此法朕之调摄惟饮食有节起居有常如是而已

康熙四十八年己丑十一月庚寅

上问大学士等曰尔等知山东碣石等山脉从何处来乎李光地奏曰大约从陕西河南来

上曰不然山东等山从关东长白山来即如山海关与山东登莱相对渡海不过二百里中系海套凡山东泰岱诸山来脉俱从长白山来来龙甚远不知里数至於济水伏流三处其实不止济水凡水发源处多是伏流黄河九曲其实不止九曲其大曲有九其小曲不知有几千黄河从崑仑来未到积石亦是伏流即如长江之水书云岷山导江似乎江源在岷山其实不在岷山亦从崑仑来也伏流到岷山更不伏流矣此等事读书人未必能尽知也

康熙四十九年庚寅三月己巳钦天监奏京城及各省月食分数

上曰朕尝习算法天文地理靡不详究月食三分以上者例当入奏不及三分者不奏此疏言云南四川两省月不食因地之体圆月之所食被其所掩而人不见若以不见之故而即书不食则人不知之矣

乙亥

上谕大学士等曰朕留意典籍编定羣书比年以来如朱子全书佩文韵府渊监类函广羣芳谱并其余各书悉皆修纂次第告成至於字学并关切要允宜酌订一书字彙失之简略正字通涉於泛滥兼之四方风土不同南北声音各异司马光类篇分部或有未明沈约之声韵後人无不訾议洪武正韵虽多駁辨迄不能行仍依沈约之韵朕尝参閱诸书究心考证凡蒙古西域洋外诸国多从字母而来音由地殊难以牵引大抵天地之元音发於人声人声之象形寄於点画今欲详略得中归於至当增字彙之阙遗删正字通之繁冗勒为成书垂示永久尔等酌议式例具奏

康熙五十年辛卯二月辛巳

上御经筵谕大学士等曰从来经筵之设皆帝王留心学问勤求治理之意但当期有实益不可止饰虚文朕观前代讲筵人主惟端拱而听默无一言如此则虽人主不谙文义臣下亦无由而知之若明万历天啓之时何尝不举行经筵特存其名耳何裨实用朕御极五十年听政之暇勤览书籍凡四书五经通监性理等书俱曾研究每儒臣逐日进讲朕辄先为讲解一过遇有一句可疑一字未协之处亦即与诸臣反覆讨论期於义理贯通而後已盖经筵本系大典举行之时不可以具文视也



四月甲戌

上谕大学士等曰朱子全书凡天文地理乐律历数俱非泛然空论皆能确见其所以然之故朕常细加寻绎欲求毫厘之差亦未可得即如径一围三畸零之数讲论已自通彻尚有留待後人参考之语其虚心不自是如此黄钟之管朕曾试过葭管飞灰未经候验但南北地形高下不同一时难於定准今如畅春园距京城观星台地形便微有不同至於各省或同此一时未必同此一刻矣

十月辛未

上谕大学士等曰天文历法朕素留心西洋历大端不悞但分刻度数之间久而不能无差今年夏至钦天监奏闻午正三刻朕细测日影是午初三刻九分此时有舛错恐数十年後所差愈多犹之钱粮微尘杪忽虽属无几而总计之便积少成多此事实有证验非比书生作文可以虚词塞责也

康熙五十一年壬辰十月癸亥

上谕大学士李光地曰尔曾以易数与衆讲论乎算法与易数迢合朕在渊鉴斋凡閱诸书必求其实曾将算法与朱子全书对较过今人看正书者少宋儒讲论性理亦未尝不作诗赋但所作诗赋皆纯厚朱子以苏轼所作文字偏於粉饰细閱之果然若看圣贤讲论性理诸书虽赋性鲁钝及至日就月将定有裨益

康熙五十二年癸巳七月乙卯

上谕大学士等曰今算法律吕等韵探究本原皆已明晰黄钟为最要凡数学以及斗斛尺度无不系乎其中也

九月庚午

上谕大学士等曰朱子全书四书注解刻竣可速颁行又谕曰孟子云排淮泗而注之江朱子谓淮水不入江古今水道不同当时淮水或有入江之迹後來湮塞亦未可知孟子必无错处李光地奏曰臣等止知导淮自桐栢

会於泗沂东入於海

皇上此论诚发千古所未发也

上曰尔等传谕九卿有真实留心性理正学之人各举所知

康熙五十三年甲午四月癸酉

上谕和硕诚亲王允祉等曰古历规模甚好但其数目岁久不合今修历书宜依古之规模用今之数目为善

十月己巳朔

上谕和硕诚亲王允祉等曰北极高度黄赤距度於历法最为紧要着於澹宁居後每日测量

康熙五十四年乙未三月乙丑

上谕领侍卫内大臣等曰朕常讲论天文地理及算法声律之学尔等闻之辄奏曰皇上由天授非人力可及如此称誉朕躬转掩却朕之虚心勤学处矣尔等试思虽古圣人岂有生来即无所不能者凡事俱由学习而成务学必以敬慎为本朕之学业皆从敬慎中得来何得谓天授非人力也

康熙五十五年丙申三月乙巳

上谕大学士等曰朕常立小旗占风并令直隶各省凡起风下雨时一一奏报见有京师於是日起西北风而山东於是日起东南风者古人云隔里不同风此言最确又尝考验雷声不出百里之外易云震惊百里若霹雳则不过七八里也至於礮响竟闻二三百里从前芦沟桥演礮天津皆闻之此其验也书籍所载虽不可尽信然亦有凿凿可凭者书中云北方苦寒之处冰结十丈春夏不消今果有其地又渊监类函有云碯鼠有重至万筋者今亦有之其身如象其牙亦似象牙但稍黄耳此皆与古书相符者也又

谕曰地理上应天文宋儒云天下至大不可执中国地方推算其言甚精而有理中国山脉皆由崑仑而来彼地方四面有江土人呼崑仑为枯陇又云疆地推算天象中国与瀚海俱在赤道四十五度之内四十五度之南水皆向南而东流四十五度之北俱向北流此皆天文地理相合之处也

康熙五十六年丁酉四月乙未

上谕大学士等曰朕每读书至风不鸣条雨不破块二语不能无疑所谓雨阳时若是矣若雨竟不能破块可乎点缀文章无所不可如讲到实际不能无议也即如东南西北之风朕细加体验俱从旁来下雨亦有时候每月十八二十二二十四等日朕留心占验往往有雨惟京师雨泽每年至四月或略愆期耳陰晴雨雪地方时候各有不同如云南贵州四川广西等处从未以旱潦报荒朕御极以来每年北地之雪不过三四寸许从未见有盈尺者昔年南巡在浙江曾见有尺许之雪此外从未之有也

七月戊辰

上谕大学士等曰朕前閱

太宗文皇帝实錄所载战败明朝满贵何云龙马登云孙祖壽四总兵时天正大雾人覩面不相见敌营大礮鸟枪施放不絕树木枝叶皆毀

太宗文皇帝恐我兵受伤遣副都统觉罗艾塔往视艾塔回奏曰敌之火礮鸟枪止损树木我兵并无伤者可见

上天佑护非人力所能至也夫天象最难揣测而机之所动亦可预知朕少年时在兴安岭上行茂林中雷声渐迅乃避出茂林震雷忽作少顷雷止遣人往视树木皆为所击此乃朕亲历之事也大学士等奏曰向者

皇上驻蹕汤泉时传谕作速移出树林甫经移定迅雷立

至衆人无不惊异

上因谕左都御史徐元梦等曰朕尝留心格物之学如霹雳礮形质各殊随地而异今各蒙古瀚海沙漠等处尝拾得铜铁或如枪头或如箭鏃锥刀之类者盖雷斧也雷书云雷斧铜铁为之盛京乌喇诸地则皆石色微青黑而通明映之莹如玻璃其在西洋者石色沉綠明澈无异此雷楔也博物志云人间往往得石形如斧刀名霹雳楔者是已又有雷墨雷鑽雷鎚不过以状异名要皆金石质也唐人杂记谓玉门西有雷庙国人年年出鑽以给雷用是诚谬言夫雷火所至万物俱化斧楔乃雷气之所化耳其或金或石者随地气而使然也

八月乙酉

上谕大学士等曰朕徧览明代实錄未錄实事即如永乐修京城之处未记一字史臣但看野史記錄错悞甚多朕又览史记汉书亦仅文词之工记事亦有不实处即如所载项羽坑秦卒二十万夫二十万卒岂有束手待毙之理乎

十一月丙子

上谕大学士等曰为君之道要在安静不必矜奇立异亦不可徒为夸大之言程子曰人不学为圣人皆自弃也此语亦属太过尧舜之後岂复有尧舜乎昔人有言孟子不足学须学顔子此皆务大言不务实践者朕自幼喜读性理书中千言万语不外一敬字人君治天下但能居敬终身行之足矣

康熙五十八年己亥二月乙卯

上諭內閣學士蔣廷錫曰皇輿全覽圖朕費三十余年心力始得告成山脉水道俱與禹貢相合爾將此全圖并分省之圖與九卿細看倘有不合之處九卿有知者即便指出看過後面奏

十月壬子

上諭內閣學士長壽曰朕覽邵子聲音圖於各國聲音有不能該括處朕於聲音之學究心二十余年雖未親至鄉里而鄉里人之聲音無不悉知即如清字之音有漢字所無者漢字之音亦有清字所未備者朕將此聲音圖討論多日欲該括各國聲音斷乎不能朕以為性理精義內邵子聲音圖宜仍用漢字其清字圖可以不用蒙養齋修書舉人王蘭生諳曉音韻之學爾與之商酌觀其意見如何並將此旨與漢大臣同閱

大清聖祖合天弘運文武睿哲恭儉寬裕孝敬誠信中和功德大成仁皇帝聖訓卷五

## 卷六

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷六

圣治一

康熙八年己酉六月戊寅

上谕户部朕缵承

祖宗丕基乂安天下抚育羣生满汉军民原无异视务俾各得其所乃愜朕心比年以来复将民间房地圈给旗下以致民生失业衣食无资深为可悯嗣後圈占民间房地永行停止其今年所已圈者悉令给还民间尔部速行晓谕示朕嘉惠生民至意至於旗人无地亦难资生应否以古北口等边外空地拨给耕种其令议政王贝勒大臣确议以闻

康熙九年庚戌十月癸巳

上谕礼部朕惟至治之世不以法令为亟而以教化为先其时人心醇良风俗朴厚刑措不用比户可封长治久

安茂登上理盖法令禁於一时而教化维於可久若徒恃法令而教化不先是舍本而务末也近见风俗日敝人心不古器凌成习僭滥多端狙诈之术日工狱讼之兴靡已或豪富凌轹孤寒或劣绅武断乡曲或恶衿出入衙署或蠹棍诈骗善良萑苻之刼掠时闻讐忿之杀伤叠见?罹法网刑所必加诛之则无知可悯宥之则宪典难宽念兹刑辟之日繁良由化导之未善朕今欲法古帝王尚德缓刑化民成俗举凡敦孝弟以重人伦笃宗族以昭雍睦和乡党以息争讼重农桑以足衣食尚节俭以惜财用隆学校以端士习黜异端以崇正学讲法律以儆愚顽明礼让以厚风俗务本业以定民志训子弟以禁非为息诬告以全良善诫窝逃以免株连完钱粮以省催科联保甲以弭盗贼解讐忿以重身命以上诸条着通行晓谕八旗并直隶各省府州县乡村人等切实遵行

康熙十一年壬子八月癸丑

上谕礼部帝王致治首在维持风化辨别等威崇尚节俭禁止奢侈故能使人心淳朴治化休隆近见内外官员军民人等服用奢靡僭越无度富者趋尚华丽贫者互相效尤以致窘乏为

非盗窃诈伪由此而起人心嚣凌风俗颓坏其於治化所关非细今应作何分别务行禁止着九卿科道会同严加确议定例具奏

十二月戊午

上谕讲官等曰汉官中有以言官风闻言事请者朕思忠爱之言切中事理患其不多若不肖之徒借端生事假公济私人主不察必至倾害善良扰乱国政为害甚钜

又

谕曰从来与民休息道在不扰与其多一事不如省一事朕观前代君臣每多好大喜功劳民伤财紊乱旧章虚耗元气上下诟詈民生日蹙深可为鉴

康熙十二年癸丑三月癸酉

上谕学士熊赐履等曰从来民生不遂由於吏治不清长吏贤则百姓自安矣天下善事俱是分所当为近见寸长片善便自矜夸是好名也又

谕曰有治人无治法朕观人必先心术次才学心术不善纵有才学何用

癸未

上谕讲官等曰从来君臣一心图治天下不患不治朕与诸臣何可不交勉之

八月癸亥

上谕讲官等曰致治之道不宜太骤但须日积月累久之自有成效朕平日读书穷理总是要讲求治道见诸实行不徒空言耳

十月乙巳

上谕讲官等曰人主势位崇高何求不得但须有一段敬畏之意自然不至差错即有差错自能省改若任意而行漫不加谨鲜有不失之纵佚者朕每念及此未尝一刻敢暇逸也

十二月辛丑

上谕八旗都统副都统六部满尚书等曰满洲乃国家根本宜加轸恤近见满洲贫困迫於逋负者甚多赌博之风禁之不止皆由都统副都统佐领等不加怜悯而训导之以至於此且满洲习俗好为嬉戏凡嫁娶丧祭之仪过於糜费不可枚举蒙古崇奉喇嘛罄其家貲不知顾惜

此皆愚夫偏信祸福之说而不知其终无益也我

太祖

太宗之世亦此满洲也其时都统副都统佐领诸臣以今较之相去何如彼时行兵出猎诸役亦未尝少於今时然而不为逋负所迫食用饶裕者人能节俭故也尔等若能各修厥职不负委任禁嬉戏无益之事劝善惩恶则自然感化矣近见争夺佐领纷纷控告但知希图荣贵而不知爱养所属之道又或舍佐领下另户家长不令披甲而偏徇私情令奴仆披甲者甚多宜槩行严禁或二三佐领或四五佐领酌量归并令闲散满洲披甲则满洲壮丁各得食粮庶可稍资生理尔等其详议以闻

康熙十六年丁巳五月癸巳

上谕讲官等曰君子进则小人退小人进则君子退君子小人势不竝立孟子所谓一暴十寒於进君子退小人亲贤远佞之道最为明快人君诚不可不知也

康熙十七年戊午正月丙申

上谕广东巡抚金僑曰广东地方当用兵之後尔至彼处务加意抚绥保靖岩疆惠养百姓军中粮饷固属急需而民生疾苦尤宜体恤必令兵民相安方为两全之道至驿递关系军机最属紧要水陆两路务须安置得宜毋致骚扰驿站貽累地方尔悉心料理以副朕委任之意

九月癸卯

上谕讲官等曰朕观高宗传说谆谆以纳海辅德为言可见自古君臣必一德一心至诚感孚为上者实心听纳以收明目達聰之用为臣者实心献替以尽责难陈善之忠然後主德进於光大化理跻於隆平後世君臣之间徒尚虚文中鲜实意治不逮古职此故耳

康熙十八年己未八月戊子

上谕九卿詹事科道等曰自古设立台省原系朝廷耳目之官上之则匡过陈善下之则激浊扬清务求知无不言言无不尽乃称厥职近见言官徇私好名者不可胜数朕自临御以来每期言路诸臣化其偏私实陈得失辅登上理顷有以风闻言事请者试约略论之如今之章奏已见施行者虽不明言为风闻何尝不是风闻今若开风闻之条使言事者果能奉公无私知之既确言之当理即当敷陈何必名为风闻方入告也倘生事之小人恃为可以风闻入告但徇己之好恶必致擅作威福以行其私彼言之者既无确见听之者安能问其是非故曰无稽之言勿听弗询之谋勿庸正所以诫言之无据谋之自专也况天下之大臣民之衆导之以理晓之以法待臣下须寬仁有容不因细事而即黜之所以体羣工也用人则随才器使无求全责备之心盖以人材有不齐也若关天下之重朋党徇私之情皆国家可参可言之大事不但

科道而已有志之臣民槩可以言之何在区区风闻之言能斂戢奸贪之志气哉治国家者在有治人不患无治法耳

己丑

上谕大学士等曰自古帝王治天下之道因革损益期於尽善原无数百年不敝之法果属不可行者自应参酌时宜归於可久至於制度既定事可遵行不宜议论纷纭朝更夕改近阅奏章亦有不思事之可否但欲徒为更张或粗识数字即为大言準之事理殊属茫昧如徒逞空言无补实用其谁不能且明末一切事例游移不定上无道揆下无法守以致沦亡此皆尔等所亲见亦衆所共知今後凡条奏本章尔大学士等务加详酌

辛卯

上命吏部侍郎哲尔肯屯泰传

谕九卿詹事科道等官曰今将科道两衙门本章情弊无益国计民生之处一一讲晰卿等必有至公之论但有所见即直言无隐即如科道条陈一事部议准行又有科道官言其不可者倘朝更夕改何以取信於天下如举才能一事人之材具不一有能理繁者有操守好者有练习事务者自古选贤任能为治之大道与论俸不同其法未尝不善即

世祖章皇帝时亦曾行之偶有徇私作弊之人将不肖寡廉者荐之因一人而其法遂坏自朕亲政以来如盐差关差数行更换以後条陈不知又改几次也又如户部销算钱粮一事因督抚所报不合时价故部议駁回而科道辄有言者以为督抚地方大臣断无虚估价值肥己行私凡有销算皆不应駁查及部议已经准督抚之销算不行再駁则科道又以督抚冒破钱粮如草豆马匹等项事事皆有虚冒部中不行详查槩徇情面由此观之应駁不应駁何者为是两说俱无定论是皆大者余难悉述由此观之风闻言事明末之陋习此例一开恐有不肖言官借端挟制罔上行私颠倒是非诬害良善等弊嗣後如有大奸大贪参劾得实朕法在必行决不姑贷

十月甲子

上谕浙江巡抚李本晟曰近来兵民多不能调和尔宜尽心料理每见各省督抚料理事务所见止在一省不能通行凡事应悉心区画从天下大计起见李本晟奏曰目前惟兵饷最急民富则国裕民贫则兵饷无从而办

上曰百姓足君孰与不足百姓不足君孰与足古今不易之理也

康熙十九年庚申三月甲寅



上谕讲官张玉书等曰人品邪正固在臣下而监别全在人主从来人心多伪最为难知倘人主明有未至必不能使其无遁情也

四月庚申朔

上谕大学士等曰近因饥民就食者多增设粥厂恐四方饥民因此而来者愈众反致流离道路殊属可悯作何设法令其各归原籍不致失所饥民内有疾疫死亡者尤属可悯交与五城作何给以药饵医治拯救向来乞食饥民不许入内城今应否听其出入至於用兵地方殉难诸臣恤典原该事平酌议今应否即与举行去岁三冬无雪今春无雨刑狱淹禁人犯恐有冤抑应否即行清理以上数事皆朕意念所及尔等会同各部院详议具奏此外如有应行应革关切时务者可各抒所见一并议奏

康熙二十年辛酉三月丙子

上谕大学士等曰国家事务关系重大必当敬慎详审今自京所奏政事三日彙送一次朕恐一时有不及检尔等其详阅之学士亦公同理事之官如有意见亦应陈说毋谓大学士等阅毕即缄默不言旧例批红本?出之事内有不合尚令啓奏今虽已发本章尔等务加公同详阅

康熙二十一年壬戌五月丙子

上谕大学士等曰朕观部院衙门大小官员俱分班啓奏甚或一部分作数班朕与尔等皆每日晓起而部院官员分班啓奏殊非上下一体励精图治之意嗣後满汉大小官员除有事故外凡有啓奏事宜俱着一同啓奏都察院衙门及科道官员无逐日啓奏本章着每日黎明齐集午门如满汉部院官员有怠惰?避者即行察参又大小各衙门满汉官员虽该衙门无啓奏事宜亦着每日同啓奏官员黎明齐集午门俟啓奏事毕同散有怠惰?避不於黎明齐集者亦着都察院及科道官员察出参奏

七月己酉

上谕吏部图治首在安民劝善莫先惩恶必咨询康访责有专官而後民隐得以上闻奸顽为之敛戢近闻直隶各省地方多有绅衿势要土棍豪强及旗下凶恶人员并庄头等纵暴恣行武断乡曲有司畏威而不敢问大吏徇隐而不能纠非特遣大臣巡察难以祛除积弊直隶为畿辅重地尤宜首先澄清可遣大臣一员前往会同该抚巡历地方有势要豪强旗人庄头大为民害者廉访确实恶迹指名题参重加惩处以警奸徒用安良善副朕移易风俗爱养民生至意

八月庚子九卿议准土司田舜年请开矿采铜

上曰开矿采铜恐该管地方官员借此苦累土司扰害百姓应严行禁飭以杜弊端

九月乙丑

上谕大学士等曰朕御朝太早各官於三四鼓趋赴朝会殊为劳瘁自今以後朕每日御朝听政春夏以辰初刻秋冬以辰正刻为期啓奏各官从容入奏九卿詹事科道原系会议官员仍每日於啓奏时齐集午门如有年力衰迈及偶患疾病俱向本衙门说明免其入奏齐集此外各衙门官员及部院司属官员俱停其每日齐集着各赴本衙门办事每月常朝仍应照旧行尔等可即传谕

康熙二十二年癸亥四月乙亥

上谕大学士等曰边疆提镇久据兵权殊非美事兵权久握心意骄纵常来朝见则心知敬畏如吴三桂耿精忠尚之信辈亦以不令来朝心生骄妄以致反叛此等事关系甚大况边陲将士惟知其统辖之主不习国家法度曩者朕曾降敕於广西将军马承?马承荫跪受敕旨诸人皆惊曰我将军亦跪人耶即此观之兵权不可令久擅也

八月辛亥刑部议奏正蓝旗副都统孙塔哈与都统鄂托浑论事争詈副都统方额徇孙塔哈均拟降革有差

上曰凡事必各出所见互相论辨则是非方明情理可得若止为首之人独理事务更无他人与之争辨岂有不致错悞者乎副都统与都统乃敌体共理事之官非属官比也今因一争詈之事坐孙塔哈如此重罪自此以後为副都统者又谁敢与都统折辨即如部院衙门之事止有尚书立议侍郎知其非而緘默不言可乎孙塔哈人尚可用在军前颇有効力之处从寛降三级留任罚俸一年方额革去所加级留任

甲寅议政王大臣等议八旗兵丁贫无妻室者官给资婚娶无房屋田土者令八旗王以下官员人等以上分拨住房田土

上曰所议尚未尽善每房四十间拨给一间如在住室墙垣之内恐有未便或别所房屋或空地筑室拨给居住庶不涉於强派其皇庄地土未经议及亦非公私一体之谊应令一并丈量若亲王以下富户以上空闲园地房屋情愿捐输入官者着该部奏闻分别议叙

十月癸亥

上谕吏部朕夙夜孜孜勤求治理务期纲纪整肃吏治澄清庶绩咸熙民生乐业以几郅隆之化部院衙门事务屡加申饬近皆修举职业勉力清厘惟在外直隶各省督抚衙门积习相沿未尽整饬一切事务不能恪恭勤励实心办理督抚为地方大臣果能洁已率属中正无私则大法小廉交相儆惕吏治自当振兴闾阎克臻康阜且纠劾官员关系激劝必莅任既久贤否洞知方可据实指参贪劣知儆向来督抚有入境即行纠参者既未夙悉官评止据下属揭报即行题参则所劾未尽得实徒为具文塞责果系真知灼见自当不时指参何必拘定迟速又

广西四川地处边疆官员赴任每多迟悞悬缺久待料理乏人着九卿詹事科道会同详议以闻

康熙二十三年甲子二月甲寅

上谕大学士等曰朕凡裁决政务必求至当故於部院奏章虽小事亦未尝不尽心详酌近见户刑二部奏事至为繁冗是皆钱粮刑名所关若丛集一时不加详阅恐有遗悞前此奏章俱三日一送自今令两日一送以便从容详览

三月丁亥

上谕大学士等曰文章贵於简当可以施诸日用如章奏之类亦须详明简要明朝典故朕所悉知其奏疏多用排偶芜词甚或一二千言冗长堆积动盈几案人主詎能尽览势必委之中官中官复委於门客此辈何知文义讹舛必多奸弊丛生事权旁落此皆文字猥杂以至此也

五月丙子

上谕九卿詹事科道等曰御史卫执蒲奏请御门听政或以五日或以二三日为期其意盖欲君臣之间政事余暇稍得休息也夫致治之道务在精勤励始图终勿宜有闲朕自躬亲庶政宵旰弗遑二十余年以来凡用入行政事无钜细罔不殚心筹画早夜孜孜有如一曰

郊

庙裡享必躬执祀事间有不亲诣之时皆非不得已至於内殿斋居几微悉谨左右瞽御咸所稔知在朕未明求衣辨色视朝日与大小臣工率作省成欲使庶绩咸熙以几至治近念尔诸臣奏事勤劳少展御门晷刻俾得从容入奏实非自图便安迩年海宇敕宁政事渐简顷复谕部院事务应归并者酌量会疏以奏务期简要速结自此民生日康刑清政肃部院章奏不期省而自省矣若必限定三日五日为奏事之期非朕始终励精之意也

九月癸未

上谕大学士等曰近见部院诸臣每於朕谕令议奏之事皆首以上谕极是回奏朕命诸臣会议者但欲事得其理观衆议相符否耳竝非必以朕言为是令诸臣遵议也尔等可将此旨晓谕诸臣嗣後宜各抒所见勿复因循陋习

十月丁未

上南巡驻蹕沂州先是一应奏章俱三日一送行在进呈御览是日迟久不至

上待至夜分数遣问内阁传

谕曰奏章关系国政最为紧要朕於巡幸之次昕夕披览未尝稍有稽留前此齎本官迟滞业已处分今日何又淹久未至耶母拘时刻至即呈进朕将宵兴省览是夜

漏下四鼓奏章始至比呈进

上即起详览彻曙

十一月乙丑

上谕讲官等曰朕於政事无论大小从未有草率完结者每在宫中默坐即以天下事经营筹画於胷中简任督抚之时又必详加察访盖一方大吏贤能自能表率僚属今贪墨之风未尽除然激劝澄清正欲使之潜移默化也

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷六

# 卷七

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷七

圣治二

康熙二十四年乙丑三月辛酉朔

上谕大学士等曰服色久经定例禁止近见习俗奢靡服用僭滥皆由所司各官视为具文并未实心稽察以致不遵定例嗣後必切实奉行时加申饬务期返朴还淳恪循法制以副朕敦本务实崇尚节俭之意

五月癸未九卿等以佾都御史姚绶虞奏请自今凡大朝之期及大雨大雪俱不啓奏其大寒大暑亦宜酌定问数日一御门应如所请

上谕大学士等曰朕莅阼以来孜孜图治罔有暇逸惟期裨益国家乂安兆庶用臻上理非不自知劳苦也但念庶务殷繁一日万几若从所请未免始勤终怠且恐不及详察致有疎略舛错於政事得失所关匪细自後大朝之期一切章奏交送内阁遇大雨雪临时请旨其祁寒盛暑之时各部院果无应奏事宜方许暂止啓奏朕始终不欲一念倦怠晏安自便也

十二月丁亥朔四川提督何傅疏请武官照文官例离任守制

上谕大学士等曰孝者治天下之本理应丁忧且武官久任非宜在昔唐朝藩镇骄蹇跋扈皆由久典兵权故耳丁忧之例既定自不致久任矣又

谕曰武臣久握兵权原非良法前令提镇陛见亦此意耳设要地岩疆当需才之日何妨临时酌议况丁忧有关孝道何分文武其令画一定议具奏

康熙二十五年丙寅五月甲申朔

上谕大学士等曰朕惟自古帝王抚御羣臣百姓政教修明治化流畅与其绳以刑罚使人怵惕文网苟幸无罪不如感以德意俾民蒸蒸向善不忍为非书称协和万邦黎民於变时雍又称临下以简御衆以寛唐虞盛时

从欲风动效验章章如是朕尝心慕隆古力行教化冀以感?天良偕之荡平正直之道而人情器伪风俗颓敝明罚敕法国宪不可以已虽尝屡行矜恤絶去烦苛终思尚德缓刑乃为至治

之极轨自康熙元年以来中外臣民习染浇风争事诈伪公行贿赂贪冒营求因缘请托作奸犯科顽钝者恬弗知耻奸黠者愍不畏法以致是非乖谬纲纪渐弛朕亲政以後洞悉奸弊加意厘剔振饬宪章务使违律干纪之衆莫能匿慝法无旁贷人无遁情庶几禁遏顽豪杜塞侥幸近见罹於罪网者渐觉减少但革面未能革心畏罪不如知耻原夫立法之意本欲使人难犯今因法令严密羣心日夕恐惧不宁辄思苟免苟免之心切则弥缝之弊深巧伪愈滋亦未可定今欲崇尚德化务存惇大荡涤邪秽一切令之自新除前经审拟完结各案及关系宫殿陵寝河道工程侵欺正项钱粮不议外其内外见今发觉一应枉法得赃行贿与受人员仍革职止免拟重辟照例定罪追赃其此等未经发觉者悉与宽免有以谕前事参奏讐告者一槩不准自谕以後中外臣民须洗心易虑省改前非守法奉公敦厉廉耻以副朕使人寡过之至意再有干犯自难曲宥至於旗下闲散官员人等及民间豪恶党类竝无职任乃揽说公事交结衙门妄行讹诈贿嘱关通实繁有徒朕皆稔悉嗣後益当恪遵法纪勿蹈故辙如怙终不悛发觉之时从重治罪决不宽贷尔法司即通饬内外大小各衙门八旗及内府佐领晓谕知悉一体遵行

六月辛巳西安将军希福等请撤回汉中驻防兵部议不准

上曰荡平以来汉中驻防原属无益朕不忍使兵民交困其轮班戍守及永远驻防俱令停止

康熙二十六年丁卯十月丙午朔

上谕大学士等曰黑龙江官兵口粮关系至重屡次转运米石并黑龙江墨尔根地方接续所种米数宜加察明自盛京等处广运米石以为久远裨益之计此皆当周详区画又发遣彼处游手无事之人甚多其口粮作何酌给前至黑龙江一带乃径直通衢往来转输断不至稍有阻滞如蔡毓荣等巨富之人竝殷实之家槩予口粮殊觉未当彼处汉军皆着察出披甲当差游手无事之人可分设官庄广开田亩以为恒产令户兵二部贤能司官迅往逐一察明到日确议具奏

康熙二十八年己巳十二月癸亥朔

上谕大学士等曰朕览书籍边外诸处各蒙古等在明代时屡侵边境即於伊各蒙古内亦互相战鬪不得宁谧

太宗文皇帝统驭以来各蒙古皆安静矣如朕所见三十年来各蒙古俱获安生极其恬息彼等欢欣称道谓从来未闻有如此太平令我诸蒙古安然共享昇平者皆出自圣恩所赐伊桑阿奏曰

皇上视天下百姓尽如赤子故使内外之民各得其所如

此

己卯

上谕大学士九卿詹事科道等曰今岁京畿小民餬口维艰虽数经蠲免钱粮散给赈济而雨雪尚未及时朕心未安兹虽值新正令节朕轸念小民生计弥切忧勤尔等亦宜体朕轸恤民生至意共加惕厉时廑乃心今当封印之时慎勿各图逸乐每日皆齐集午门前以救灾恤民之道详悉计议

康熙二十九年庚午四月丁丑

上谕大学士等曰蒙古稟性怠惰不能深计生业往岁小旱即致饥窘朕初意赈赡乏食之人所需有限及观散给米谷之数至多凡人生业各自勤勉必筹画终岁之计撙节用度方可不致穷困若每藉赈赡终於生聚无益今正当暄和之时遣通晓蒙古事务重臣会同外藩之诸王贝勒贝子台吉等作何逐家教谕令其各勤生业旗内贫人作何养赡俾安乐利凡此数者当令其规画久远详细商酌着议政王大臣会同确议以闻

十月己未

上谕大学士部院大臣等曰今朕躬已愈但因灼艾未御乾清门耳朕听政三十年来无日不见诸大臣共相谏议今处宫中虽日理奏章未尝废事而与诸大臣悬隔思之如有所失且旗下引见题补诸事恐致壅滞向有大臣奏事乾清宫之例自明日始仍如常进乾清宫啓奏

壬戌户科给事中何金蔺疏言请定御门之期或三日或五日事应面奏者仍面奏请

旨至寻常奏章俱交内阁照例送进

上曰朕惟致治务在精勤久道期於无斁朕躬亲庶政早夜孜孜靡敢暇逸冀与大小臣工共图熙绩据奏用人行政条例具举寻常奏章日烦临御臣谊难安请酌定御门之期等语朕三十年来每晨听政面见诸臣谘询得失习以为常今若行更改非励精求治初终罔间之道且与诸臣接见稍疎朕衷亦深眷念此奏不准行康熙三十年辛未五月丙午工部等衙门议覆古北口总兵官蔡元疏言古北口一带边墙倾塌甚多请行修筑应如所请

上谕大学士等曰蔡元所奏未谙事宜帝王治天下自有本原不专恃险阻秦筑长城以来汉唐宋亦常修理其时岂无边患明末我

太祖统大兵长驱直入诸路瓦解皆莫敢当可见守国之道惟在修德安民民心悦服则邦本得而边境自固所谓衆志成城者是也如古北喜峯口一带朕皆巡阅槩多损坏今欲修之兴工劳役岂能无害百姓且长城延袤数千里养兵几何方能分守蔡元见未及此其言甚属无益谕九卿知之

八月乙未

上巡幸塞外驻蹕乌喇岱

谕扈从诸臣曰昔秦兴土石之工修筑长城我朝施恩於喀尔喀使之防备朔方较长城更为坚固也

康熙三十一年壬申五月癸酉兵部议覆两广总督石琳等疏称黎人地方丁田无多不便设立州县总兵官吴啓爵所奏於黎人地方筑建城垣添设官兵之处应无庸议

上曰阅琼州舆图周围皆服内州县而黎人居中如果此处应取古人何为将周围取之而在内弹丸之地反弃而不取乎不入版图必有深意创立州县建筑城垣有累百姓部议不准良是

康熙三十三年甲戌五月戊戌工部以

天坛一带挑沙铺路给过工价缮摺呈

览步军统领凯音布奏曰新修之路听人照常行走不久又坏应派綠旗兵看守令往来之人止走两旁勿行中路

上曰如此禁约殊与朕意不合修葺道路者专以便民也派兵看守不许行走则修之何用若云禁行中路则看守之人必并禁及两旁殊於行人不便仍听人照常行走後若毁坏令步兵稍稍葺治

康熙三十四年乙亥十二月甲午大学士伊桑阿等奏

圣躬灼艾未愈时际严寒乞暂停

乾清门听政

上曰朕每日听政从无间断闲坐深宫反觉怀抱不适尔诸大臣面奏政事朕意甚快体中亦佳今灼艾视前已愈国政紧要朕仍照常御门听理或遇大风甚寒之日自另有旨

康熙三十六年丁丑闰三月甲午

上驻蹕宁夏绅衿军民人等奏请

御制圣训勒之贞珉光垂万世



御制碑文曰諭宁夏文武官员兵民人等朕体天育物日以治安为念虽身在宫庭而心恒周四海顷因指画军务不憚勤劳远莅宁夏无非为荡涤寇氛绥义生灵计也缘边千余里土壤硤瘠惟宁夏洪流灌输诸渠环匝巡览所至甚愜朕怀夫农桑者衣食之本积储者殷阜之源尔官吏宜董劝父老子弟三时力田以尽地利比屋勤殖以裕盖藏纵使岁偶不登亦可以无忧匱乏若夫秦风健勇自昔为然其在朔方尤胜他郡尔等或职居将领或身隶戎行尚各厉精锐以効干城御侮之用斯国家有厚赖焉至於忠信慈惠服官之良轨孝弟齿让生人之大经法纪不可不明礼教不可不肃勿以地处边陲而不治以经术勿以习尚气力而不泽以诗书总期上率下从庶几驯臻雅化兹乘輿返蹕距灵朔虽远而睠念塞垣如在几席尔等诚能敬体朕言将吏协恭兵民咸理生聚日益厚风俗日益淳则疆圉实有攸裨朕心亦用深慰慎勿视为具文辜朝廷惓惓牖导之意钦哉

康熙三十七年戊寅十一月甲申

上諭大学士等曰朕初亲政时满洲无有鬪毆持刀杀人之事以後渐有犯者及今此风日甚可见习俗浸薄必使还淳归厚斯为善耳先时满洲往往轻毙其家人朕乃立为差等之罚今此风则少息矣

丙戌

上諭大学士等曰朕君临天下无分内外视同一体夙夜勤劳政事凡有益於民者务求必济至於絕域荒陬之蒙古等无不抚育使各安其业咸遂其生近者巡幸所经敖汉柰曼阿禄科尔沁扎鲁特等处见其水草甚佳为孳生蕃息之地而蒙古等渐至窘迫者由其牲畜被盜不敢夜牧故耳朕察知其情曾着原任郎中李学圣往翁牛特员外郎喇都浑往策妄扎卜主事奢冷往敦多布多尔济等处以教育之此三处盜賊屏息渐得生理以此观之其他处蒙古亦应照此例着才能之人教养一二年则蒙古得遂其生矣如其不然虽赏赐频仍而蒙古不善营生有何裨益况蒙古王等各私其所属诸凡问罪尽不得其当必遣内地官员教导一切事务始得就理尔等将朕此諭晓示八旗宗室觉罗满洲蒙古汉军内或见任官或革职之人或平人有愿往教养蒙古者着伊等往彼教育消弭盜賊若遇彼处盜案即与该旗王等会同审理使伊等住一二年即便撤回诚能副朕諭旨効力勤谨朕当加不次之恩尔等即遵諭行

十二月甲辰云贵总督王继文来京陛

见

上諭大学士等曰督抚乃封疆大臣陛见之时应将司贤否小民疾苦详明陈奏以裨治理夫民之苦乐皆系於官之贤否官贤则民安否则民之困苦无所底止矣是以考察官吏以獎勵廉洁为要今云南贵州总督王继文入覲竝不陈奏及此如广西提督李林盛居官甚优前者陛见所奏絕无隐讳问及广西武弁贤否皆从公敷陈其言朕皆书而志之矣

丁巳

上命原任内阁学士黄茂等教养蒙古

谕之曰蒙古之性懒惰田土播种後即各处游牧谷虽熟不事刈获时至霜陨穗落亦不收敛反谓岁歉又因盗贼衆多将马畜皆置之近侧夜则圈之宿处以致马畜瘦毙生计窘乏且蒙古王贝勒贝子公等俱各承袭父爵年在童穉率皆不能教育所属安辑民人兼之族类性贪见所属有马牛刀带诸物亦必索取遂至困苦难存四散餬口不能禁止亦不能收集是以人皆穷乏尔等至彼查明实无生计者赈给之至於劝善惩恶尤为要务应会同蒙古王扎萨克等严禁盗贼如挈获系该旗下者尔等即同取供情实立刻正法示惩又必加意鞠讯勿得枉杀无辜蒙古地方多旱宜教之引河水灌田朕巡幸所至见张家口保安古北口及宁夏等地方皆凿沟洫引水入田水旱无虑朕於宁夏等地方取能引水者数人遣至尔所朕适北巡见敖汉柰曼等处田地甚佳百谷可种如种谷多获则兴安等处不能耕之人就近贸易贩余均有裨益不须入边买内地粮米而米价不致腾贵也且蒙古地方既已耕种不可牧马非数十年草不复茂尔等酌量耕种其草佳者应多留之蒙古牲口惟赖牧地而已且敖汉柰曼等处地方多鱼伊等捕鱼为食兼以货卖尽足度日此故宜知之凡有利益朕不时指示尔等当尽心勉励以副朕意其王贝勒等尔等宜与和好凡事相商相敬有训诲之处须服其心驯致协睦蒙古性情怠玩愚蠢者固多然亦朴直但董理教导得宜此辈亦易从也

戊午

上谕大学士等曰兴起教化鼓舞品行必以孝道为先节妇应加旌表孝子尤宜褒奖八旗岂无孝子其居官殷实者行孝乃分内事耳贫人克尽孝道诚为非易如有身处贫寒能尽孝於父母者察明奏闻

康熙三十九年庚辰三月甲午朔

上命通政使司左通政张格等教养蒙古

谕之曰蒙古性情怠惰愚蠢贪得无厌不可以内地之法治之顺其性以渐导方能有益初到时亦不可即行给助始若过优後恐不继宜视其困乏渐行补助且蒙古惟信喇嘛一切不顾此风亟宜变易倘喇嘛有犯法者尔等即按律治罪令知惩戒

康熙四十一年壬午正月丙午理藩院题青海贝勒纳木渣尔厄尔德尼请於大草滩等处游牧议不准行

上曰贝勒所请亦是彼处诚难居住该衙门应议贺兰山等处水草茂盛准其游牧竟不准行亦属不合但其疏请大草滩地方游牧此系内地人民杂处岂可令伊等居住虽四十九旗蒙古从未有令内地游牧者该衙门若如此议伊等亦难於再请矣

五月丙申

上谕大学士等曰顷御史刘子章条奏二事一言各省应设恤刑官夫地方督抚皆朕简任之臣倘不堪任用则诸事无一可委者况督抚尚不可委用岂恤刑小吏反能雪其冤抑乎若置恤刑是徒增地方供应以累小民矣添设官吏全无裨益着还其奏一言莅外任者毋令多带家口所奏良是汉人所带有限汉军有多至数百人者亦有令旗下闲散人随去者允宜禁飭其令九卿确议以闻

闰六月戊子

上谕大学士等曰凡人谨慎循分犹恐人伺其隙而攻之若多事妄行岂能守其成业至於彼此挟讐阴行诬陷尤属可畏急躁之徒不过陷人於一时能陷则陷之不能则已阴险之人一时不能陷後必曲为设计害之其行事尤为狠毒若此等人不特不能荣其身且殃及其後朕听政四十余年凡若此者断不能欺朕也

辛卯

上谕大学士等曰人有言部中定例不一不知应遵何例此皆不谙事者国家诸务恃有成例苟无成例何所遵行曩者部中常有欲为人宽免而故从重论者朕以所议太过駁回彼即从中宽释朕灼知其弊槩不允行此风今已息矣

康熙四十三年甲申八月乙未

上谕大学士等曰广西道御史吕履恒参直隶巡抚李光地於秋审之事任意决断夫直隶各省秋审事件督抚按律定罪具奏之後九卿议覆或奉旨改缓决次年督抚按律仍以情实具奏而完结者有之或九卿督抚以缓决可矜具奏而情罪可恶奉旨改为情实者亦有之秋审人犯皆应正法之重囚督抚依律具奏乃其分也若核其情由酌量处置皆出自上裁凡人命案件部院大臣以及督抚岂有不查律例任意决断者此等情由吕履恒未必尽知此本着发还

康熙四十五年丙戌三月丁亥

上谕大学士等曰近览科臣郑际泰条奏不谙事务其言八旗兵丁盼望赏赉宜加恩赐前朕大赉兵丁乃赦诏覃恩也今无故而屡加赏赉则兵丁必骄矣因兵丁冀望而即行赏赉若屡有冀望即屡加赏赉乎郑际泰又言当设饭廩赈贫民夫设立饭廩赈济在冬月则可若春间农务方兴贫民俱至饭廩就食则无租田耕种之人矣岂不悞农事乎况聚集数千贫民在一处赈济万一劫夺骤起何以止之朕是以前遣官数百员往山东分行赈济方能有裨赈济之事可轻言乎

康熙四十六年丁亥九月丙辰

上谕大学士等曰部院事务已完未完科道官员每月竝不察奏是以钱粮命盗等案动即经年累月直至事完题奏时始称逾限一并题参嗣後一应钦件交与某官审理及已完未完该督抚等四季奏闻如部发案件其已完未完亦着本部查明四季奏闻如此则事务不至迟延矣

十二月戊戌

上谕大学士等曰顷因刑部彙题事内有一字错悞朕以朱笔更改发出内外各衙门奏章朕皆详览外人不知或谓本章甚繁岂能徧阅朕当用兵之时一日有三四百本章尚皆详览今一日之中仅四五十本章而已览之何难故凡奏章内见有错字必行更改其翻译有不合者亦必行更改发出

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷七

# 卷八

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷八

圣治三

康熙四十七年戊子闰三月甲午

上谕大学士等曰前命直隶各省督抚将钦件部案限内完结及未完结之处逐季奏报是以迩来盗案按限具题者甚多可传谕吏部将逐季奏报之事见在某省已奏某省未奏着即查明具奏

康熙四十八年己丑十月丙午

上谕大学士等曰赵申乔为人苛刻参劾武官甚多武官与文官不同即尔等文官能一无所取乎已即不取能禁家人一无所取乎尔等自思之当各自知之也且武官穷苦若至一无所有一旦有事则弓刀马匹人人向巡抚求助彼岂能尽给乎故抑武人是明代陋习武人粗卤不宜抑之太甚凡治天下之道当以和平为贵也

康熙五十年辛卯五月己酉

上谕大学士等曰朕理几务年久閱本甚速凡一应奏摺及绿头牌顷刻即能徧閱前尚书穆和伦数次奏事意朕未加详閱复行奏请朕将事内缘由指明穆和伦乃默然无言而退且朕閱事不止於速凡一经目断不遗忘一应奏章及彙题案件无不详閱有差悞字句朕必以朱笔更改?出

六月乙亥

上谕大学士等曰先曾令各部院彙题案件每十日十五日内务须彙题一次谕旨甚明从前彙题案件殊多壅积朕催促具奏俱已完结今看彙题之事又多有逾限具奏者着再行严饬

十二月丁卯左都御史赵申乔奏请禁止创建寺庙

上曰近见直隶各省创建寺庙者甚多建造寺庙则占据百姓田庐既成之後愚民又为僧道日用凑集银钱购买贫人田地给与以致民田渐少且游民充为僧道窝藏逃人罪犯行事不法者甚多实扰乱地方大无益於民生者也着各省督抚及地方官除原有寺庙外其创建增

## 修永行禁止

康熙五十一年壬辰二月壬午

上谕大学士九卿等曰朕览各省督抚奏编审人丁数目竝未将加增之数尽行开报今海宇承平已久户口日繁若按见在人丁加徵钱粮实有不可人丁虽增地亩竝未加广朕凡巡幸地方所至询问一户或有五六丁止一人交纳钱粮或有九丁十丁亦止二三人交纳钱粮诘以余丁何事咸云蒙皇上洪恩竝无差徭共享安乐优游闲居而已此朕之访闻甚晰者前云南贵州广西四川等省遭叛逆之变地方残坏田亩抛荒自平定以来人民日增渐次开垦或沙石堆积难於耕种者亦间有之而山谷崎岖之地已无弃土尽皆耕种矣由此观之民之生齿实繁朕欲知人丁之实数不在加徵钱粮也今国帑充裕屡岁蠲免辄至千万而国用所需竝无遗悞不足之虞故将直隶各省见今徵收钱粮册内有名人丁永为定数嗣後所生人丁免其加增钱粮但将实数另造清册具报岂特有益於民亦一盛事也直隶各省督抚及有司官编审人丁时不将所生实数开报者特恐加徵钱粮是以隐匿不据实奏闻岂知朕竝不为加赋止欲知其实数耳嗣後督抚等倘不奏明实数朕於就近直隶地方遣人逐户挨查即可得实此时伊等亦复何词耶

五月壬寅

上谕大学士等曰湖广百姓往四川垦地者甚多伊去时将原籍房地亩悉行变卖至满五年起徵之时复回湖广将原卖房地亩争告者甚多巡抚潘宗洛以此情由曾缮摺啓奏嗣後湖广民人有往四川种地者该抚将往种地民人年貌名姓籍贯造册移送四川巡抚令其查明其自四川复回湖广者四川巡抚亦照此造册移送湖广巡抚两相照应查验则民人不得任意往返而争讼可以止息矣又

谕曰山东民人往来口外垦地者多至十余万伊等皆朕黎庶既到口外种田生理若不容留令伊等何往但不互相对閱查明将来俱为蒙古矣嗣後山东民人有到口外种田者该抚查明年貌姓名籍贯造册移送稽察由口外回山东去者亦查明造册移送该抚对閱稽查则百姓不得任意往返而事亦得清厘矣

九月庚子

上谕大学士等曰红苗等居深山之中自古以来竝未向化鄂海等宣示德泽尽行招抚殊属可嘉今红苗等输诚削发投顺地方文武官员务仰体朕无分内外咸俾尽享昇平无不乐业至意将红苗等安插得所从容化导倘有不肖官员将红苗侵蚀扰害者该督抚即行指名题参从重治罪

康熙五十二年癸巳三月壬寅

上命大学士等传谕直隶各省庆贺万寿节衆老人曰书称文王善养老孟子云五十非帛不煖七十非肉不饱帝王之治天下发政施仁未尝不以养老尊贤为首务近来士大夫只论居官之能否而移风易俗之实政入孝出弟之本心未暇讲究朕因今日之盛典特宣此意若孝弟之念稍轻而求移风易俗其所厚者薄而其所薄者厚矣尔等老人比回乡井之间各晓谕邻里务先孝弟倘天下皆知孝弟为重此诚移风易俗之本礼乐辞让之根非浅鲜也昨日甘霖大沛田野沾足朕心大悦尔等无悞农时速回原籍特谕

四月甲寅左都御史赵申乔奏请农忙之时京城地方亦应遵例停讼

上谕大学士等曰农忙停讼之言听之似乎有理而细究之实无裨益赵申乔总未知事之本源耳天下之民非独农人商贾涉讼即废生理百工涉讼即废手艺地方官不滥准词状於应准者准之即行结案则不失农时

讼亦少矣若但四月至七月停讼而平日滥收民词案牒堆积冬季词讼迟至次年五六月而後审理虽停讼何益康熙元年间去明代不远明之官员太监尚有存者朕闻其君常处深宫不与臣下相见而惟与宦?相处既不读书亦不勤政所以上下之情壅蔽不通民间疾苦竟罔闻知朕理天下五十余年周知民隐一切讼事皆有代告说合之人暗司其事地方官於此等人应严加惩治孔子云听讼吾犹人也必也使无讼乎无讼之本竝不在停讼为大臣者当先忧後乐凡事周详筹画实心办理乃能利益民生赵申乔谓农忙之时应行停讼倘四月至七月数月之间或有光棍诈骗害良善则冤向谁诉耶且自八月以後正当收获竝非闲时果如伊言亦不应准词状至如南方四月收麦北方五月收麦福建广东十一月布种二月收获五月布种十月收获四季皆农时也如此等处岂终岁停讼乎赵申乔居官固清但性多疑所属州县每疑其贪诈书云用人勿疑朱子曰疑人即自疑今朕所用大臣朕曷尝疑之凡督抚有才者未必有守有守者未必有才然自恃清廉妄事纷更则民即受其害矣读书之人务先明理当以克己为要有过则改无容掩饰惟有益於民之事朕即允行否则断乎不行也

六月丁酉

上谕大学士等曰今督抚俱报地方之事甚善观前史坏事皆生於隐匿明时贼情俱隐匿不闻以致四方情形全然不知朕临御年久凡事莫不豫为筹画旱涝之灾民之疾苦自古所有之事若果督抚凡事奏闻不为隐匿豫为防备虽有事亦复何虑又

谕曰岳拜自陕西来奏云陕西省免五十一年钱粮甘肃卫所应徵之米未免请将此米免徵朕言汝度兵饷之米足与不足再奏彼回算果不足一如朕言彼今无法繕摺具奏请酌分数量减因昔赵申乔有奏请免右卫钱粮之事故彼援此具奏但为彼之声名耳兵饷关系紧要朕不斟酌即据奏寬免可乎

七月乙卯

上谕大学士等曰部院官员内还有办事好者但於事不甚留心未免疎略朕总理万几经历劳苦当烦剧时日閱二三百件事今只二三十件事閱之何难昔年少时能步行四五十里今虽有年尚可步行十数里凡事皆在历练耳

辛酉

上谕大学士等曰朕自幼与旧时大臣同理国事至十三岁亲政颁恩诏时有奏悞赦一人者大学士李蔚奏云业已悞矣听之便朕曰有人听其悞犹可也若杀人听其悞可乎李蔚喜极涕零奏云圣谕诚可昭垂万世臣甘待罪曩朕与辅政大臣等共理政时红批已发科抄之事常有取回换本改批发出者冯溥为给事中奏云凡事在内当即详定已批出者不可反汗遏必隆鳌拜皆粗卤即欲罪冯溥朕以红批奏章所关甚要冯溥言是因於本上批奖之自此遂无取回之事

十月丙子户部议原任偏沅巡抚潘宗洛题请垦荒展限应行文接任巡抚查明详议

上谕大学士等曰凡督抚条陈地方事务应以实奏潘宗洛奏湖南荒田五百余顷今天下户口甚繁地无弃土湖南安得有如许未垦之田着差户部司官一员会同湖广总督额伦特就潘宗洛奏疏内所有州县亲身查勘详明具奏如此则伊所奏虚实即可知矣又

谕曰湖广陕西人多地少故百姓皆往四川开垦闻陕西入川之人各自耕种安分营生湖广入川之人每每与四川人争讼所以四川人深怨湖广人或有将田开垦至三年後躲避纳粮而又他往者今四川之荒田已尽开垦果按田起税则四川省一年内可增钱粮朕意国用已足何必苛求且先年人少田多一亩之田其值银不过数钱今因人多价贵一亩之值竟至十数两不等即如京师近地民舍市廛日增居址连亘毫无空隙此皆朕与尔等所亲见者也今岁不特田禾大收即芝蔴木棉皆得收获如此丰年而米粟尚贵皆由人多地少故耳又

谕曰朕巡幸时见直隶自苑家口以下向年永定河冲决之处今百姓皆筑舍居住斥卤悉变膏腴不下数百顷皆未尝令起科也今江南一带河堤至遥堤间有二三里者亦有六七十丈者其空地先皆植柳以备河工取用今彼处百姓尽行耕种亦竝未令起科昔黄河泛涨时遥堤之内水常灌入不得耕种自清水畅流以来河底刷深水必长至二丈才能及岸今皆成沃壤矣大凡浊水与清水合流方可无壅决之患如直隶永定河一交冬令水即渐涸或有壅沙高出河身及夏秋水发不由故道而行遂至横散四溃湮没民间田庐朕计度河工情形自引芒牛河之水入於永定河冬春虽水小不能行舟而仗此引流故道不至淤壅至水发时清水合流水力大故河底刷深无冲决之患矣大学士李光地奏曰永定河为害明时糜费金钱二三百万卒无成效

皇上开引芒牛河之水所费不过千金遂成万载奠安之

利



上曰凡人力能为者朕犹能虑及之去年赵申乔条奏河南黄河近岸被冲田亩请查明数目蠲免钱粮黄河东岸刷则西岸之田出西岸刷则东岸之田出被冲之田应免钱粮则新出之田不应取钱粮乎今年浙江提督吴郡陛见时朕谓吴郡云闻浙江海中渔船甚多凡此等船进海口时防汛官兵索钱方令入口其中有不聊生之穷人不得入海口从此遂为海贼观此则海贼即内地渔人是官兵迫而驱之海中为贼者也吴郡乃惊异奏云皇上圣明洞鉴万里臣当竭力禁约近闻此弊未絶朕於吴郡下此谕旨特欲使提镇等咸知之今遣官勘验湖南荒田亦此意尔总之督抚不可侵部院之权部院亦不宜刻求督抚之非凡事宜用中不可一偏也又

谕曰各方水土不同种桑止宜江浙北方气寒不能养蚕人之不习水土亦然南方人不能居口外犹口外人不能居南方然以理论则皆同此所谓性相近也

康熙五十三年甲午四月乙亥

上谕礼部朕惟治天下以人心风俗为本欲正人心厚风俗必崇尚经学而严絶非圣之书此不易之理也近见坊间多卖小说淫词荒唐俚鄙殊非正理不但诱惑愚民即缙绅士子未免游目而盬心焉所关於风俗者非细应即通行严禁其书作何销毁市卖者作何问罪着九卿詹事科道会议具奏

六月丙子

上谕大学士等曰太监等不可假以威权事发即杀之朕御极之年去明代不过二十年万历时太监以及官员朕俱曾任使伊等向朕奏明末时事谓流贼自南而来将兵尽发往保定从流贼从居庸关入跳越京师南关

攻城城内无兵只太监百姓官员家人防守七日城即陷平日太监等专权人主不出听政大臣官员俱畏惧太监以致悞事此辈性情与常人异只足备宫中使令耳天下大权惟一人操之不可旁落岂容假之此辈乎又万历年间太监奏库内积银二百万两有余应入大内遂尽收养心殿後掘窖埋藏後欲取用已无有矣所以我朝耆旧常言明代蓄积徒资太监侵盗耳今我朝库银有数千万两若掘窖埋藏亦安所用朕尝谓汉大臣云明代以争议河套事曾杀大臣此一小事何致杀戮大臣若当此时朕只须遣一笔帖式一拨什库事即定矣汉大臣皆相顾惊愕朕幸宁夏过鄂尔多斯地方谓松阿喇布王云尔等祖宗不过欺侮汉人遂据河套耳若朕则自横城坐船带粮从鄂尔多斯之後抄出据守尔等将若之何松阿喇布王瞿然奏云今内外一家皇上奈何出此可畏之言回銮时朕由横城坐船计二十一日至湖滩河朔已将马匹发往陆路此二十一日率步行围猎打鱼而回又

谕曰朕自幼读书听政已久治国之道莫要於寛舒今天下承平无事凡属老幼无不欢欣鼓舞以为得生斯世皆有福之人也

七月己未

上问学士关葆曰尔曾居蒙古一年用汉人之道可治蒙古否关葆奏曰不可

上曰拂人之性使之更改断乎不可譬如陕西江南百姓令其易地而居则不但彼处田土此不能耕此处器械彼不能用即水土亦多不服惟天赋忠孝之性无有异同虽穷荒僻壤亦有至忠至孝之人不可以地论也

康熙五十五年丙申四月乙巳

上谕领侍卫内大臣等曰闻热河米价甚贵每石至一两七钱扈从人等复行齐集采买则米价愈加腾贵官兵每月既得钱粮若复给口粮未免重复但以所给钱粮买米又恐不敷着将热河之仓及唐三营仓所贮之米发出设立一廩每石定价银一两卖与随驾官兵令各该管之人查视不许多买自无转卖之弊而於官兵亦大有裨益矣

五月乙丑

上驻蹕热河

谕扈从诸臣曰今岁米价甚昂顷曾降旨将八月所放之米令即支給日前雨水之时应於未雨之先即将此米给与衆人始为有益今年四月前甚旱既雨之後又恐多雨都统副都统参领等於此等处未必能实心筹画倘雨过多道路泥泞车辆难行势必至米粮潮湿抛弃於军民全无实惠着将此旨传示八旗都统等

九月甲申

上谕大学士等曰闻山西陕西今岁收获较往年甚丰但西边见有军务沿边一带地方钱粮及旧欠钱粮应予蠲免其在军前绿旗兵丁所借钱粮免其坐扣今岁湖广收成亦好湖南大熟湖北微不及江西虽觉稍旱究亦无妨江浙素称丰富朕前巡幸南方时米价每石不过六七钱近闻竟卖至一两二三钱如此民何以堪今江浙两省被灾地方钱粮作何蠲免之处尔等详议具奏前张伯行曾奏江南之米出海船只带去者甚多若果如此亦有关系洋船必由乍浦松江等口出海稽查亦易闻台湾之米尚运至福建粿卖由此观之海上无甚用米之处朕理事五十余年无日不以民生为念直隶今岁米价稍昂朕发仓粮二十万石分遣大臣巡视散赈米价即平小民均沾实惠若内而九卿科道外而督抚提镇悉体朕轸念苍生至意则天下无不理之事矣

十月辛亥

上谕大学士等曰朕访问海外有吕宋噶罗吧两处地方噶罗吧乃红毛国泊船之所吕宋乃

西洋泊船之所彼处藏匿盗贼甚多内地之民希图获利往往於船上载米带去并卖船而回甚至有留在彼处之人不可不豫为措置也

壬子

上谕大学士九卿等曰天下事未有不由小而至大小者犹不可忽大者益宜留心尔等在衙门或能办理事务或以清白自持亦止为身计耳其关系封疆大事未必深思远虑也即如海防乃今日之要务朕时加访问故具知原委地方督抚提镇亦未能尽悉也朕南巡过苏州时见船厂问及咸云每年造船出海贸易者多至千余回来者不过十之五六其余悉卖在海外齎银而归官造海船数十只尚需数万金民间造船何如许之多且有人条奏海船龙骨必用铁梨笏木此种不产於外国惟广东有之故商人射利偷卖即加查讯俱捏称遭风打坏此中情弊速宜禁絶海外有吕宋噶罗吧等处常留汉人自明以来有之此即海贼之藪也官兵出哨或遇贼船四五只官兵船止一二只势不能敌舵工又不奋力向前将领亦无可如何不过尾追而已何能剿

灭耶张伯行曾奏江浙之米多出海贩卖斯言未可尽信然亦不可不为豫防出海贸易海路或七八更远亦不过二十更所带之米适用而止不应令其多带在东洋可使贸易若南洋商船不可令往第当如红毛等船听其自来耳且出南洋必从海坛经过此处截留不放岂能飞渡乎又沿海礮台足资防守明代即有之应令各地方设立往年由福建运米广东所雇民船三四百只每只约用三四十人通计即数千人聚集海上不可不加以防范台湾之人时与吕宋地方人互相往来亦须豫为措置凡福建广东及江南浙江等沿海地方之人在京师者尔等可加细询朕令广州将军管源忠浙闽总督满保两广总督杨琳来京陛见亦欲以此面谕之海外如西洋等国千百年後中国恐受其累此朕逆料之言又汉人心不齐如满洲蒙古数十万人皆一心朕临御多年每以汉人为难治以其不能一心之故国家承平日久务须安不忘危尔等俟管源忠等到京後会同详议具奏

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷八

# 卷九

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷九

圣治四

康熙五十六年丁酉四月丁酉

上谕大学士等曰从前工部及光禄寺每年动用钱粮数十余万近俱节省减至数万但节用之事有益於此即无益於彼近来舖户招买颇有难於办理者以此故耳如欲禁止江浙养蚕织帛亦甚易然衣布者多则布价更昂於帛亦未可知朕记前曾禁貂皮而诸项皮张竟与貂皮同价总之天下事托诸空言则易见诸实事则难行文与办事固不同也

十月己亥

上谕大学士等曰自古人主多厌闻盗贼水旱之事殊不知凡事由微至钜豫知而备之则易於措办所以朕於各省大小事务惟欲速闻之也即如各省来京之人从福建来者朕以浙江米价询之自江南来者朕以山东米价询之伊系经过之地必据实陈奏即彼省大吏知不可隐亦皆实奏米价既已悉知则年岁之丰歉亦可知矣

庚戌

上谕大学士等曰朕近日精神渐不如前凡事易忘向有怔忡之疾每一举发愈觉迷晕天下至大一念不谨即貽数百年之患尔等大臣又皆年老须发尽白有奏事不能起者办事有悞或推耳聋年迈者如此则事必致貽悞古人虽云无为而治人主不过总其大纲然一日二日万几岂皆大纲乎书中之言多不可凭二十一史朕皆曾披閱悉属笔底描摹无足徵信所以读书与行事截然不同尔等以为我读书报皇上亦是虚文务在尽心勉力庶不致有悞天下之事

十一月辛未

上御乾清宫东暖阁召诸皇子及满汉大学士学士九卿

詹事科道等入

谕曰朕少时天禀甚壮从未知有疾病今春始患头晕渐觉消瘦至秋月塞外行围蒙古地方

水土甚佳精神日健颜貌加丰每日骑射亦不觉疲倦回京之後因

皇太后违和心神忧瘁头晕频发有朕平日所欲言者今特召尔等面谕从来帝王之治天下未尝不以敬

天法

祖为首务敬

天法

祖之实在柔远能迓休养苍生共四海之利为利一天下之心为心体羣臣子庶民保邦於未危制治於未乱夙夜孜孜寤寐不遑寬严相济经权互用以图国家久远之计而已自古得天下之正莫如我朝

太祖

太宗初无取天下之心尝兵及京城诸大臣咸奏云当取太宗皇帝曰明与我国素非和好今取之甚易但念中国之主不忍取也後流贼李自成攻破京城崇祯自缢臣民相率来迎乃翦灭闯寇入承大统昔项羽起兵攻秦後天下卒归於汉其初汉高祖一泗上亭长耳元末陈友谅等竝起後天下卒归於明其初明太祖一皇觉寺僧耳我朝承席

先烈应

天顺人抚有区宇以此见乱臣贼子无非为真主驱除耳今朕年将七旬在位五十余年者实赖

天地

宗社之默佑非予凉德之所致也朕自幼读书於古今道理粗能通晓凡帝王自有天命应享寿考者不能使之不享寿考应享太平者不能使之不享太平自黄帝甲子至今四千三百五十余年称帝者三百有余但秦火以前三代之事不可全信始皇元年至今一千九百六十余年称帝而有年号者二百一十有一朕何人斯自秦汉以下在位久者朕为之首古人以不矜不伐知足

知止者为能保始终览三代而後帝王践阼久者不能遗令闻於後世寿命不长者罔知四海之疾苦朕已老矣在位久矣未卜後人之议论如何而且以目前之事不得不痛哭流涕豫先随笔自记而犹恐天下不知吾之苦衷也自昔帝王多以死为忌讳每观其遗诏殊非帝王语气并非中心之所欲言此皆昏瞽之际觅文臣任意撰拟者朕则不然今豫使尔等知朕之血

诚耳当日临御至二十年不敢逆料至三十年三十年不敢逆料至四十年今已五十七年矣尚书洪范所载一曰寿二曰富三曰康宁四曰攸好德五曰考终命五福以考终命列於第五者诚以其难得故也今朕年将七十子孙曾孙百五十余人天下粗安四海承平虽不能移风易俗家给人足但孜孜汲汲小心敬慎夙夜不遑未尝少懈数十年来殫心竭力有如一曰此岂仅劳苦二字所能该括耶前代帝王或享年不永史论槩以为侈然自放耽於酒色所致此皆书生好为讥评虽纯全尽美之君亦必抉摘瑕疵朕为前代帝王剖白盖由天下事繁不胜劳惫之所致也诸葛亮云鞠躬尽瘁死而後已为人臣者惟诸葛亮一人耳若帝王仔肩甚重无可旁诿岂臣下所可比拟臣下可仕则仕可止则止年老致政而归抱子弄孙犹得优游自适为君者勤劬一生了无休息如舜虽称无为而治然身歿於苍梧禹乘四载胼手胝足终於会稽似此皆勤劳政事巡行周历不遑宁处岂可谓之崇尚无为清静自持乎易遯卦六爻未尝言及人主之事可见人主原无宴息之地可以退藏鞠躬尽瘁诚谓此也昔人每云帝王当举大纲不必兼总细务朕心窃谓不然一事不谨即貽四海之忧一时不谨即貽千百世之患不矜细行终累大德故朕每事必加详慎即如今日留一二事未理明日即多一二事矣若明日再务安闲则後日愈多壅积万几至重诚难稽延故朕莅政无论钜细即奏章内有一字之讹必为改正发出盖事不敢忽天性然也五十余年每多先事绸缪四海兆人亦皆戴朕德意岂可执不必兼总细务之言乎朕自幼强健筋力颇佳能挽十五力弓发十三握箭用兵临戎之事皆所优为然平生未尝妄杀人平定三藩扫清漠北皆出一心运筹户部帑金非用师赈饥未敢妄费谓此皆小民脂膏故也所有巡狩行宫不施采缡每处所费不过一二万金较之河工岁费三百余万尚不及百分之一幼龄读书即知酒色之可戒小人之宜防所以至老无恙自康熙四十七年大病之後过伤心神渐不及往时况日有万几皆出自裁每觉精神日逐於外心血时耗於内恐前途倘有一时不讳不能一言则吾之终身遗语岂不可惜故豫於明爽之际一一言之可以尽一生之事岂不快哉人之有生必有死如朱子之言天地循环之理如昼如夜孔子云居易以俟命皆圣贤之大道何足惧乎近日多病心神恍惚身体虚惫动转非人扶掖步履难行当年立心以天下为己任许死而後已之志今朕躬抱病怔忡健忘故深惧颠倒是非万几错乱心为天下尽其血神为四海散其形既神不守舍心失怡养目不辨远近耳不分是非食少事多岂能久存况承平日久人心懈怠福尽祸至泰去否来元首丛脞而股肱惰至於万事隳坏而後必然招天灾人害杂然竝至虽心有余而精神不逮悔过无及振作不起呻吟牀榻死不瞑目岂不痛恨於未死昔梁武帝亦创业英雄後至耄年为侯景所逼遂有台城之祸隋文帝亦开创之主不能豫知其子炀帝之恶卒致不克令终又如丹毒自杀服食吞饼宋祖之遥见烛影之类种种所载疑案岂非前轍皆由辨之不早而且无益於国计民生汉高祖传遗命於吕后唐太宗定储位於长孙无忌朕每览此深为耻之或有小人希图仓卒之际废立可以自专推戴一人以期後福朕一息尚存岂肯容此辈乎朕之生也竝无灵异及其长也亦无非常八龄践阼迄今五十七年从不许人言祲符瑞应如史册所载景星庆云麟凤芝草之贺及焚珠玉於殿前天书降於承天此皆虚文朕所不取惟日用平常以实心行实政而已今臣邻奏请立储分理此乃虑朕有猝然之变耳死生常理朕所不讳惟是天下大权当统於一十年以来朕将所行之事所存之心俱书写封固仍未告竣立储大事朕岂忘耶天下神器至重倘得释此负荷优游安适无一事婴心便可望增加年岁诸臣受朕深恩何道俾朕得此息肩之日也朕今气血耗减勉强支持脱有悞万几则从前五十七年之忧勤岂不可惜朕之苦衷血诚一至如此每览老臣奏疏乞休未尝不为流涕尔等有退休之时朕何

地可休息耶但得数旬之怡养保全考终之死生朕之欣喜岂可言罄从此岁月悠久或得如宋高宗之年未可知也朕年五十七岁方有白须数茎有以乌须药进者朕笑却之曰古来白须皇帝有几朕若须鬓皓然岂不为万世之美谈乎初年同朕共事者今竝无一人後进新陞者同寅协恭奉公守法皓首满朝可谓久矣亦知足矣朕享天子之尊四海之富物无不有事无不经至於垂老之际不能寛怀瞬息故视弃天下犹敝屣视富贵如泥沙也倘得终於无事朕愿已足愿尔大小臣邻念朕五十余年太平天子惓惓丁宁反复之苦衷则吾之有生考终之事毕矣此谕已备十年若有遗诏无非此言披肝露胆罄尽五内朕言不再

甲戌

上谕大学士等曰朕莅政五十余年海内昇平皆恃衆大臣为朕股肱耳目朱子亦云为政在於用人大小臣工俱宜实心任事直言勿隐方为社稷苍生之福为大臣者当识大体不可琐屑刻薄朕待大学士尚书侍郎以至小臣各有等级若待大学士与小臣无异即非礼也又如翰林等作诗写字作古文或时文联皆因材器使未尝求全责备也

乙亥八旗都统等因豁免公库扣除银两率领兵丁谢

恩

上曰小人得财则喜用尽则怨见今八旗得见旧日风景者已无其人而能记忆祖父之遗训者亦少以致风俗日奢人心不古嗣後务期悔改以副朕谆谆训诫至意

丙子

上谕大学士等曰柔远能迩之道汉人全不理会本朝不设边防以蒙古部落为之屏藩耳蒙古终年无杀伤人命之事即此可见风俗醇厚若直隶各省人命案件不止千百固缘人多亦习尚浇漓使然也

康熙五十七年戊戌正月辛酉

上谕大学士等曰诸臣陈奏国家之事辄用称颂套语於朕躬并无裨益朕历年夏月避暑九月回銮所积四月内口外不能办理之事日夜办理必在岁内完结至次年开印又复速为办理无致壅积今自五十六年四月至今所积事务应作何办理之处诸臣当切实指陈国家事务所关甚大岂可潦草完结若朕置事务不理诸臣又谁能担任朕每念及中心惕然嗣後当尽删除称颂套语将有益於朕躬之处速为指陈使事务不致壅积可以知诸臣之实心报効而朕之病体亦得调护矣

四月庚辰

上谕大学士等曰京畿一带历年以来二月内或大雪大雨故麦苗滋长田禾尚可耕种今岁二三月间天时亢旱麦苗渐黄且有妨耕种朕忆国有大丧之年多遭水旱及今不可不豫为准备尔等会同九卿詹事科道详议或政事尚有缺失宜尽心讲求雨泽亦应祈祷朕躬虽尚未愈为天下忧更加兢惕尔等勿视为故事也

十一月戊戌

上谕大学士等曰朕从前屡谕诸臣及科道官员各省有应行奏闻事件随闻随即缮摺具奏非令其纠参不过欲知之早耳朕虽闻之亦不即声明或未详确亦不即治罪也即如去年河南凶犯亢珽等扰害地方妄行不法朕他有所闻即特颁谕旨遣大臣拏获审结今岁闻

江南地方起蛟即传谕讯问陕西地震即差大臣散赈彼处人民咸谓皇上注念小民加意轸恤少有灾异有闻即便施恩不令失所近日湖广地方有奸宄之徒捏造妖言煽惑愚民放火劫掠曾经总督满丕奏闻朕即谕令审结此皆因朕闻知方传旨遣人如无所闻何由降旨料理耶且各省兵丁空粮甚多康熙五十二年大赏天下兵丁时曾谕散赏诸臣逐一按名散给其遣往诸臣因不认识兵丁不能清查顶冒以致所有空粮隐匿尚多不独远省为然即直隶近省空粮亦不胜数豢养兵丁特为备用而设平日将空乏之兵不行补足不行训练临时欲用纵有募补之兵累万亦何济乎此事朕甚虑之前岁朕闻往吕宋噶罗吧之人甚多恐其生事曾谕查明作何设法令回内地自从议奏之後闻於来船附回者颇衆此系外洋於内地毫无关涉而朕留心访询者竝无他故不过欲知地方情形人数多寡以便整理耳且各省文官私派加耗武官空粮等事朕颇得闻知则人皆知畏惧可以悛改於事大有裨益此等有关地方事务及官员贤否诸臣何尝不知即邻省大吏亦未尝不知或系师生亲友或系同年或因子弟亲戚在伊省居官故彼此相隐不以上闻何以防微杜渐嗣後九卿大臣科道官员凡有关地方事务及官员贤否有所闻即缮摺具奏若所闻未确不妨即以所闻未确之处一并声明可传谕九卿

康熙五十八年己亥四月辛亥

上谕大学士九卿詹事科道等曰朕临御以来一切机務必皆躬亲从不敢稍自暇逸但少壮时精力有余不觉其劳今气血渐衰精神渐减办事殊觉疲惫写字手亦渐颤仍欲如当年事事精详则力有不能若草率办理此心又所未安从来书生论历代帝王多指摘过失谓其安享富贵耽於逸乐朕披閱史书历观古来帝王因深知为君之难即朕六十年宵旰勤劳虽金石为质亦应消耗况气血之身乎又如诗文一事皆出朕心裁内

书房翰林辈不过令其校对誊写耳见今在位大臣年老者大约与朕年相仿衙门办事不过一二时辰即可归寓安息有疾亦可告假且有托病偷安者同列与司属岂能强之入署乎如去年考试武进士赵申乔在朕前睡去侍卫屡次唤醒朕前尚且如此在衙门办事时可知矣今天下大小事务皆朕一身亲理无可旁贷若将要务分任於人则断不可行所以无问鉅细朕必躬自断制早夜焦劳而心血因之日耗也但年力虽衰而志意始终如一仍未少懈自朝



至於日昃坐卧起居曾无片晷余闲勉强支持心劳力竭尔诸臣曾无一人为朕弔勉抒诚者或有不肖之徒见朕精神气血渐不如前因以为奸亦未可定此诸臣俱应留心者也朕前冬曾有谕旨尔诸臣未必记忆理应不时省閱今部中之事错悞亦有如恩诏援赦刑部逐件具题殊非旧例部院衙门如此类颇多朕欲不悉心详閱得乎又如总督鄂海题请蠲免甘肃米石草束章奏甚长朕字字细览所拟票籤错悞朕曾删去改批发出总之诸臣徒事虚文见朕躬烦劳不过云皇上理宜静养似此皆如画饼有何实济耶又凡有论说诸臣不过敷陈颂扬套语如励精图治健行不息圣不自圣安愈求安之类若与不读书者言之甚觉可听朕读书明理凡事皆身体力行此等粉饰浮词六十年中盈溢於耳久已厌闻尔等务须实心任事尽去虚文於国家方有裨益也

康熙六十一年壬寅十月甲寅

上谕领侍卫内大臣侍卫等八旗都统前锋统领护军统领副都统参领等大学士学士九卿詹事科道直隶巡抚守道等曰朕临御天下六十余载年至古稀

太祖高皇帝时大臣官员幼时及见三分之一

太宗文皇帝时大臣官员犹见其半

世祖章皇帝时大臣官员俱曾全见明万历泰昌天啓崇禎时大臣官员及旧太监亦曾有及见者朕凡事留心询问故於前朝诸事知之甚悉御极以来尝思事多变

易皆难豫定惟寬平公正因时制宜一切未尝豫执已见孔子云寬则得衆信则人任焉朕宵旰忧劳无刻不以民生为念凡政事利弊必推求其故近见天下钱粮各省皆有亏空陕西尤甚其所以致此者必有根源盖自用兵以来大兵经行之处督抚及地方官惟期过伊地方便可毕事因资助马匹盘费衣服食物甚多仓卒间无可设法势必那用库帑及撤兵时又给各兵丁马匹银两即如自藏回来之将军以及兵丁沿途所得反多於正项动辄万金人但知取用而已此等银两出自何项竝无一人问及也官之亏空钱粮者俱已题参离任其亏空银两追比不能即得新任官又不代完此项银两终无着落故用兵之地历年钱粮奏销朕悉从寬缓正为此也前蕩平三逆原任布政使徐惺所用兵饷至四十余年尚不能清完朕念皆系军需那用将未完银两俱从寬免盖寬缓则州县力舒上可不悞国帑下可不病民力去年陕西督抚题参亏空各官奏请将此亏空银两追出以充兵饷後追比不得伊等无可奈何巡抚噶什图密奏欲加通省火耗以完亏空此摺朕若批发便谓朕令加徵若不批发又谓此事已曾奏明竟自私派定例私派之罪甚重火耗一项特以州县官供应甚多故於正项之外略加些微以助其不足原属私事若公然如其所请听其加添则必致与正项一例催徵将肆无忌惮矣所以将噶什图奏摺申飭批发第陕西督抚既不能追比亏空又不敢请拨钱粮倘有紧要军机焉能不致迟悞朕因交与议政大臣动户部库帑解送矣又如賑饥一事自应於夏麦无收之後散賑方於百姓有益今各省每於三四月间或遇有冰雹或雨泽愆期即借此以为青黄不接具题请賑冒销仓谷及至五六月时民间乏食而仓中已颗粒无存矣且今年陕西地

震因言仓粮朽烂奏请蠲免夫地震何至粮朽此皆州县官借端开销耳今各省虽有亏空而陕省尤属紧要特传集尔等面谕其噶什图所奏亏空钱粮一摺交与九卿詹事科道确议具奏

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷九

# 卷十

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十

敬天

康熙七年戊申五月壬子

上谕吏部等衙门朕亲政以来孜孜图治期於民生乂安事臻上理乃今年自春徂夏雨泽愆期兹复太白昼见

天象屡示儆戒朕甚惧焉今力图修省弥加敬慎励精勤政以答

天心其在内各部院官理应各尽乃职公廉自効副朕信任之意今惟瞻徇情面图润私家不念国计但求便已有负倚任在外督抚提镇以下各官原欲令其绥理地方抚恤军民咸令得所近见大吏朘削卑官卑官虐害军民滥行科派脂膏竭尽甚至逃亡此皆内外大小各官不务公廉有违

天意以致灾异频见嗣後务须洗心涤虑痛改前非如仍因循旧习不行更改事经察出从重治罪

乙卯

上谕吏部等衙门近见天气亢阳祷雨未应风霾日作禾苗枯槁倘仍不雨秋成无望民生何赖皆由内院六部都察院大臣不能公忠体国政事舛错及一切事务应完结者驳察耽延则例繁多任意轻重以致属员胥吏乘机作弊者甚多着即指名参奏从重治罪其才庸不能办事者亦着参奏黜革勿得徇情姑留如经朕知或被旁人纠参将该管官治罪不贷刑部督捕等衙门狱讼牵连日久不结令无辜沈冤狱底而拟罪引律偏用重条严刑酷罚以苛察为明深求为能积怨既深上干

天和垂示灾异宜加修省以为消弭之计至科道职司言责纠参建白必有益国计民生方应陈奏勿得苟且塞责各部院大小臣工尚其同心协力修举政事共挽

天心体朕惓惓求治之意

康熙十年辛亥三月庚午

上谕礼部今岁三春无雨风霾日作耕种愆期民生奚赖皆由朕躬凉德政治未洽大小臣工不能殚忠为国恪修职业瞻顾因循惟图自便偏私怠忽致干

天和朕用是夙夜靡宁深切儆惕今实图修省励精勤政体

上天仁爱之意感召休和为民请命内阁六部都察院等衙门大小臣工各有职掌皆宜体朕倚任之意共効赞襄持廉秉公克尽厥职洗心涤虑痛改前非以迓

天庥尔部即遵谕通行申飭

四月戊子

上谕礼部时已入夏亢阳不雨农事堪忧朕念切民生躬自刻责特颁谕旨戒飭各官修省祈求雨泽乃精诚未达霖雨尚稽朕昼夜焦劳不遑启处兹?诚斋戒躬诣

天坛祭告恳祈甘霖速降以济民生尔部即谕吉备物俟朕亲诣行礼

康熙十二年癸丑三月戊寅

上谕兵部尚书明珠曰朕初因修葺宫殿暂驻瀛台今天时方旱甚軫朕怀虽修葺未竣即日还宫修省

九月乙亥

上谕起居注官胡密色曰朕适诣

太皇太后宫问安

太皇太后问朕曰顷者地动尔知之否朕奏曰此乃天心垂异以示警也

太皇太后谕曰人君遇有灾异固当益加修省亦在平时用人行政敬承

天意耳朕仰绎

慈训诚为克谨

天戒之要也尔其书诸史册

己卯御史马大士疏言京师地震请

敕大小臣工实图修省

上曰变不虚生地动示警皆由政治未协朕心深为忧惕力图修省务期庶绩咸熙大小臣工其各洗心涤虑省改前愆恪供职业共回

天变

康熙十六年辛巳三月己丑

上谕礼部帝王克谨天戒凡有垂象皆关治理故设立专官职司占候所系甚重一切祥异理应详加推测不时具奏今钦天监於寻常节气尚有观验至今岁三月霜雾及以前星辰凌犯等项应行占奏者并未奏闻皆由该监官员冒昧疎忽有负职掌尔部即行察议具奏

康熙十七年戊午六月壬午

上谕礼部朕惟天人感召理有固然人事失於下则天变应於上捷如影响岂曰罔稽今时值盛夏天气亢阳雨泽维艰炎暑特甚禾苗垂槁农事堪忧朕用是夙夜靡宁力图修省躬亲斋戒?祷甘霖务期精诚上达感格

天心尔部即察例择期以闻

康熙十八年己未七月庚申

上谕吏部等衙门自古帝王抚御万方兢兢业业勤求治理必欲陰阳顺序和气迎庥或遇灾异示儆务省愆思过实修人事挽回天心兹者地忽大震盖由朕躬不德敷治未均用人行政多未允协内外臣工不能精白乃心恪尽职掌或罔上行私或贪纵无忌或因循推诿或恣肆虐民是非颠倒措置乖方大臣不法小臣不廉上干

天和召兹灾眚若不洗心涤虑痛除积习无以昭感格而致嘉祥朕力勤政务实图修省应行应革事宜令部院三品以上官及科道在外各督抚直言无隐其在京三品以上堂官并督抚提镇俱据实自陈毋得浮泛塞责仍通谕内外军民人等知之

是日

上召内阁九卿詹事科道满汉各官齐集

命大学士明珠等传谕曰朕因地震力图修省务欲挽回天意尔各官亦宜洗心涤虑公忠自

矢痛改前非爱民为国乃尔等全无报国之心於所善之人即以为善而奏闻所不合之人即不行奏请此等不公事情朕闻见最确犹望改过故不即行处分今见所行愈加贪黷习以为常且从前遇有灾变之事朕亦屡加申饬一时在朕前俱云钦遵申饬之旨究竟全不奉行前此大奸大恶之人朕重加处分尔等所明知也科道各官於大奸大恶之人未见纠参或因事体暧昧未有凭据难於举?此後科道各官如有确见即据实参奏若依然虚节如前所行奸恶巧为掩饰不加省改或事情发觉或经朕访出虽欲宽免国法具在决不贷宥其即传谕诸臣咸使知之

壬戌

上召满汉大学士以下副都御史以上各官集左翼门命侍卫传谕曰顷者地震示儆实因一切政事不协天心故召此灾变朕不敢诿过臣下惟有力图修省以冀消弭朕於宫中勤思召灾之由力求弭灾之道约举大端凡有六事尔诸大臣总督巡抚司道有司各官咸共闻知务期洗心涤虑实意为国为民斯於国家有所裨益即尔等亦并受其福庶几

天和可致若仍虚文掩节致负朕意询访得实决不为尔等姑容也一民生困苦已极大臣长吏之家日益富饶民间情形虽未昭着近因家无衣食将子女入京贱鬻者不可胜数非其明验乎此皆地方官吏谄媚上官科派百姓总督巡抚司道又转而馈送在京大臣以天生有限之物力民间易尽之脂膏尽归贪吏私橐小民愁怨之气上达於

天以致召水旱日月星辰之变地震泉涸之异一大臣朋比徇私者甚衆每遇会推选用时皆举其平素往来交好之人但云办事有能并不问其操守清正如此而谓不上干

天和者未之有也一用兵地方诸王将军大臣於攻城克敌之时不思安民定难以立功名但志在肥己多掠占小民子女或借名通贼将良民庐舍焚毁俘获子女攘取财物名虽救民於水火实则陷民於水火之中也如此有不上干

天和者乎一外官於民生疾苦不使上闻朝廷一切为民诏旨亦不使下达虽遇水旱灾荒奏闻部覆或蠲免钱粮分数或给发银米赈济皆地方官吏任意侵渔捏报虚数以致百姓不沾实惠是使民穷而益穷也如此有不上干

天和者乎一大小问刑官员将刑狱供招不行速结使良民久羈囹圄改造口供草率定案证据无凭枉坐人罪其间又有衙门蠹役恐吓索诈致一事而破数家之产如此有不上干

天和者乎一包衣下人及诸王贝勒大臣家人侵占小民生理所在指称名色以罔市利干预词讼肆行非法有司不敢犯其锋反行财贿甚且身为奴仆而鲜衣良马远胜仕宦之人如此则贵贱倒置所关非细以上数条事虽异而源则同总之大臣廉则督抚有所畏惮不敢枉法行私督抚清正则属下官吏操守自洁虽有一二不肖有司亦必改心易虑不致大为民害此事朕非不素知但以正在用兵之际每示宽容今

上天屡垂警戒敢不昭布朕心严行戒饬以勉思共回天意作何立法严禁务期尽除积弊着九卿詹事科道会同详议以闻

康熙十九年庚申四月庚午

上谕礼部农务为国家之本粒食乃兆姓所资必雨阳时若而後秋成可期自去冬以来雨雪未降今时已入夏甘霖尚稽久旱伤麦秋种未布农事深为可虞且失业之民饥馑流移尤堪悯恻或因政治未协致干

天和朕用是夙夜靡寧循省儆惕兹当?诚斋戒躬诣天坛亲行祈祷为民请命尔部即择吉具仪来奏

康熙二十一年壬戌六月己丑

上谕大学士等曰天时亢阳犹望雨泽之降今观亢旱已甚天行之愆乃人事之失如有应行应革事宜令九卿詹事科道官员会议奏闻

庚寅

上谕刑部时已季夏雨泽愆期迺来亢旱益甚农事堪忧朕思天人一理感格之道必有未孚且刑狱或有淹滞冤抑之气最能上干

天和内外大小问刑各衙门审讞案件恐有听断不公曲直颠倒以及草率怠忽任意迟延致无辜之人久羈狴犴尔部即通行申饬自後问刑各官凡应速结事情即为归结勿得借端稽缓苦累平民务期虚公明允详慎得情以副朕钦恤刑狱感召休祥至意

七月癸酉

上谕大学士等曰天道关於人事彗星上见政事必有阙失其应行应革者令九卿詹事科道会议以闻

康熙二十四年乙丑十一月乙酉

上谕大学士等曰今月朔日食十六日月食且比日积陰无雪朕思天象稍有愆违即当修省或施行政事有未当欵或下有冤抑未得伸欵尔等传谕廷臣详议奏闻

康熙二十七年戊辰三月丙申

上谕大学士等曰今时略旱矣而钦天监奏四月朔日食凡应行应革之事其令九卿詹事掌

印不掌印科道集议以闻

康熙三十年辛未十一月甲戌

上谕礼部自昔帝王敬天勤政凡遇垂象示儆必实修人事以答天戒顷钦天监奏推算日食当在康熙三十一年正月朔日夫日食为天象之变且又见於岁首朕兢惕靡宁力图修省惟大小诸臣务精白乃心各尽职业以称朕钦承昭格至意其元旦行礼筵宴俱着停止康熙三十六年丁丑二月壬午朔钦天监预奏日食分数

上谕大学士等曰日食虽人可预算然自古帝王皆因此而戒惧盖所以敬天变修人事也若庸主则委诸气数矣去年水潦地震今又日食意必陰盛所致岂可谓无与於人事乎可谕九卿如有人事应修改者悉以奏闻

十一月甲午

上谕大学士九卿等曰朕自临御以来早夜孜孜以敬天勤民为念不敢少有逸豫偶遇灾变则尤悚然靡宁今次地震朕心不胜兢惕方今外寇初平海宇无事而灾变示警不可不加修省朕披览前史如汉之文景宋之仁宗亦有此异因其克修人事遂获长享太平其他遇灾不警视为适然卒致衰替可为炯戒每见内外大小官员多图暇逸怠於职业能实体朕怀留心民事者甚少兹宜各殚乃忱共勤实政以为修弭之道一切政事有应兴应革者尔等可悉心讲求集议具奏

康熙四十七年戊子九月壬午

上谕大学士等曰朕曾因亢旱昼夜焚香恳祷

上帝至祀

圜丘之日立见感格大沛甘霖始知幽独之诚具在上天昭鉴中也後又值旱灾左右奏请朕仍前祷雨朕言今天下丰裕朕心之诚恐不及前

上天皆已鉴知不宜轻祷此朕不敢稍有虚伪之意故以此心告之诸臣自今以後益当与尔等加意图治耳

康熙四十九年庚寅四月丙午

上谕大学士等曰据钦天监奏立夏时巽方风起是日朕於宫中占验乃东北风起钦天监务取吉利者具奏不知此等事件应据实启奏何必避忌至各处风信不同或他处东风亦未可定且春秋志灾不言其应孔子书此之意所以示儆今但取吉利可乎本朝并未尝有所避忌



也尔等传谕钦天监知之

康熙五十年辛卯四月丁丑

上谕大学士等曰去岁冬雪应时入春以来雨泽沾足无风朕即向衆谕云交夏必旱秋月转恐雨水过多今观天时果旱云气方起即继以风自古人事有失必干

天和或政事未尽合宜或用人未能允当大小官员或有暗结党援以及残忍之人尚居职位囿囿中或有无辜凡若此等不能保其必无尔内阁会同九卿科道一一详问具奏

五月丙申

上谕大学士等曰朕自京师抱恙而出今尚需人扶掖而行又兼天时亢旱蚤夜焦劳以致寝食不安自古君臣之义甚重必上下一德相成然後能感

上天之心召致和气不在徒饰虚文务空名以从事也今当此亢旱之际我君臣应夙夜靡宁以为万民筹画生计大抵诸臣内实心以国家为念者固自不少而秉性奸恶亦不可谓无人惟尔诸臣宜仰体朕怀日存忧惕为羣黎竭诚祈祷庶几甘霖可冀早沛也

十一月乙未

上谕大学士等曰

天坛大祭朕亲诣行礼曾有谕旨嗣因朕躬少有违和大臣等再三奏请故下旨遣大臣恭代朕则照常斋戒两日今朕躬安好如常必亲祭方展诚心朕仍亲诣行礼大臣等不知朕意或又行奏请朕今年已六十行礼时两旁人少为扶助可也

康熙五十六年丁酉十月庚戌太常寺疏请致祭

天坛应遣大臣恭代

上谕大学士等曰朕自即位以来凡大祀皆躬亲行礼去年大臣等以朕年高恐致劳瘁请遣大臣恭代彼时朕躬尚能亲往行礼故不允所请今年入夏雨水稍不及时虑伤稼穡积闷之极身体甚是不安顷虽较前稍愈犹觉无力难以行礼祀典关系重大勉强而行略有错悞反非诚敬之意着如所奏遣大臣恭代

康熙五十七年戊戌五月庚戌

上驻蹕热河行宫

諭大學士等曰連日望雨近今西南風起雲生隨散理合祈求雨澤着交與該部速議令京師祈雨朕於此處俟部覆到日亦一体祈求

十月辛未

上諭大學士等曰十一月初一日冬至祀

天明日即應齋戒朕因腿足乏力來至湯泉身雖在此瞻望

郊壇不能釋懷爾等傳諭太常寺令將齋戒牌銅人照常送至乾清門朕在此照常齋戒其從祀人員齋戒務令恭敬

康熙五十八年己亥正月己卯

上諭大學士九卿等曰日食雖系一定交限可以推算且今歲元旦日食被陰雲微雪未曾得見但別省無雲之處必有見者況日值三始人事不可不謹政事或有缺失之處諸臣確議以聞

十一月乙亥

上諭大學士等曰敬

天尊

祖所關至重至大朕自御極以來凡

壇廟祭祀朕俱親詣行禮年來因多病足痛不能親往每遣大臣恭代孔子云吾不與祭如不祭朕自不能親詣甚切思慕欲得瞻仰

郊壇而非祭祀之日則典儀未備又非盡誠盡敬之禮今朕躬稍愈如南苑湯泉乘肩輿俱可行走今冬至齋戒之時朕足雖不得力潔誠之念有余擬於祭日朕躬親詣於祭祀之前升

壇瞻仰省視俎豆若可跪拜朕拜後退處更衣幄次俟恭代親王行禮畢然後回宮朕心始安已將此旨諭諸皇子爾大臣會同議奏此系創行之禮如大臣以從無此典或引據書史為言朕年已老在位六十年矣豈易得此例乎目今朕躬安好可以前往倘此數日內朕躬稍覺不能親往再傳諭停止未晚也尋大學士

等奏

皇上敬

天之心六十年如一日今

圣壽将届七旬足疾未愈时值严寒尤宜调摄仰恳依允

衆情停止

亲诣行礼

上命诸皇子传谕曰

天坛朕必亲往前者朕躬欠安偶未亲祭王以下公以上俱不斋戒此次着照常斋戒随朕前往不必随朕行礼朕行礼时不必赞礼作乐俟拜毕至更衣幄次命亲王偕衆行礼礼毕朕乃回宫朕躬亲往之处着书於祝文内

诸臣又奏本月十二日

皇上躬诣

天坛十一日

御太和殿视祝文香帛

圣躬未免太劳恳祈

皇上暂停亲视令内阁恭捧送往

上曰朕照常亲视祝版

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十

# 卷十一

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十一

法祖

康熙八年己酉六月戊子

上谕宗人府自古帝王建国亲亲贤贤义在并重我太祖

太宗

世祖以来笃念本支敦睦九族咸加爱惜欲其成立以共膺福祿也朕思罪有大小法有轻重宗室犯罪遽行革除宗室朕心不忍除

世祖章皇帝时定案外自顺治十八年以後凡宗室有犯罪革除宗室者着将情节一并查明具奏

九月己未

上谕理藩院昔我

太宗皇帝遣发王师获额哲等以归念其为察哈尔林丹汗之子乃元朝苗裔不忍废絶特沛殊恩加封和硕亲王迨额哲既没以其弟阿布柰袭封王爵阿布柰宜思世受恩眷竭诚图报乃上负国家豢养之仁累失外藩朝贺之礼情罪重大理宜削封但念

皇祖太宗

皇考世祖优容抚恤之意不忍夺其封爵其以阿布柰之子布尔尼仍袭封和硕亲王

康熙十年辛亥四月乙酉

上谕内阁翰林院致治之道无过法祖鉴於成宪乃罔有愆钦惟

太祖高皇帝开天垂统

太宗文皇帝式廓鸿图规模弘远启佑无疆朕御极以来景仰

先猷时切仪型之念

世祖章皇帝时曾命儒臣纂修

太祖

太宗圣训虽具藁进呈未经裁定颁布兹特命总裁纂修各官悉以前式分别义类重加考定勒成全书朕得以朝夕观览是训是行亦俾子孙率由无斁尔等膺兹委任须恪恭勤励务期早竣以副朕观光扬烈至意

康熙十七年戊午五月甲寅

上谕大学士等曰朕观古来帝王如唐虞之都俞吁咈唐太宗之听言纳谏君臣上下如家人父子情谊浹洽故能陈善闭邪各尽所怀登於至治明朝末世君臣隔越以至四方疾苦生民利弊无由上闻我

太祖

太宗

世祖相传以来上下一心满汉文武皆为一体情谊常令周通隐微无有间隔一游一豫体恤民情创作艰难立万世不易之法朕虽凉德上慕前王之盛事凜遵

祖宗之家法思与天下贤才共图治理常以家人父子之谊相待臣僚罔不兢业以前代为明鉴也

康熙二十一年壬戌十二月壬午

上谕兵部国家抚定寰区削平逆乱必资将士之力我太祖

太宗训诰戎兵申严纪律信赏必罚惩劝维彰其时行间将帅争自奋励所向奏功後因历年既久奉行少宽人情不无怠弛朕御极以来恪守

祖宗成宪每於戎政兵机加意整饬自逆贼叛乱各路将帅统兵征剿行间功罪屡经奏报朕念我国家军法自昔严明稽核殿最务从详确频颁诏旨炳如日星今逆贼殄灭武功告成振旅班师正分别功罪昭示惩劝之时因思军法固不可宽功罪自宜相抵必酌量重轻情法允协庶俾羣心悦服激励将来凯旋将帅内见在应议者有直抵云南建立功绩人员应详察功

过准其相抵虽未至云南果立有大功亦应准抵其未至云南及并无大功者仍照军法处分尔部即遵谕行

康熙二十四年乙丑五月庚午

上谕兵部侍郎勒布等曰从来国家承平军事不宜废弛太祖

太宗时兵器整齐坚锐今器械虽鲜明恐用时未必坚利此系尔部职掌嗣後可详加点閱以副朕不忘武备之意

康熙二十八年己巳五月壬戌礼部右侍郎张英等以编纂孝经衍义告成进呈

御览

上曰孝经一书

皇考世祖章皇帝以孝为万事之纲五常百行皆本诸此命儒臣博采羣书加以论断名曰孝经衍义朕继述先志特命纂修今书已告成着刊刻颁发以副

皇考孝治天下至意

九月戊戌

上谕大学士伊桑阿等曰昔

太宗皇帝以次收定四十九家蒙古复欲全收喀尔喀未及行而

太宗皇帝宾天今闻喀尔喀国内饥荒互相杀掠朕欲普天万国皆得其所一体加恩特遣大臣收集流亡使之安插得所

康熙二十九年庚午三月乙未

上谕礼部等衙门

太祖

太宗肇造丕基永垂谟烈神功圣德千古莫伦

世祖统一寰区弘开景运治化綦隆光昭天壤且当时勲旧翊赞勤劳若不及时彙辑成书恐

岁久人湮诸臣事蹟致滋阙略应即行编纂昭示奕?应行事宜着内阁翰林院会同详议具奏

四月乙丑

敕谕纂修

三朝国史总裁官大学士等曰朕惟帝王肇基垂统绥御万方峻业弘谟必勒诸简册传示无穷所以炳耀丰功宣扬至治甚盛典也我

太祖高皇帝诞膺宝籙鼎命维新缔造丕图规模弘远太宗文皇帝道隆作述运启休明式廓祯符燕贻景祚世祖章皇帝统一寰区化成治定中和懋建声教遐敷惟列祖之相承冠百王而首出鸿猷峻德巍焕难名纬武经文昭垂无斁举凡戡乱安邦之略立纲陈纪之宜用行政之方牖民成俗之本布於方策历久弥新创制显庸灿然明备即当时勲旧诸臣翊赞王室宣力四方亦莫不托附风云懋彰劳绩唯从龙而应运信昭代之多才朕夙夜绍庭思闡

先烈爰命儒臣恭修

三朝国史尔等其督率在馆诸臣荟萃琅函博蒐掌故折衷至当裁订成书毋尚浮夸而乖情实毋徇偏见而失公平毋过质略而意不周该毋务铺张而词多繁縟务期事归确核文极雅驯勤以董成敏而竣事庶几垂型万世传信千秋以覲耿光以扬大烈称朕意焉康熙三十五年丙子四月乙未领侍卫内大臣索额图等奏传闻噶尔丹远遁请

皇上班师

上召领侍卫内大臣公舅舅佟国维等谕曰朕以噶尔丹侵扰喀尔喀及外藩蒙古故秣马厉兵整军运饷分路进剿曲尽筹画告祭

天地

宗庙

社稷务期剿灭噶尔丹而还自兵丁以至厮役无不思灭噶尔丹者况尔大臣俱系情愿効力告请从军之人乃不奋勇前往逡巡退後可乎倘有存退後之心者朕必诛之尔等视朕为何如人我

太祖高皇帝

太宗文皇帝亲行仗劒以建丕基朕不法

祖行事可乎我师既至此地指顾间噶尔丹可擒可灭而肯巽懦退缩乎且大将军费扬古兵与联军约期夹击今联军失约即还则西路之兵不可问矣还至京城何以昭告

天地

宗社乎佟国维等叩首谢罪

康熙三十六年丁丑九月乙未理藩院题喀尔喀故贝子阿南大之妻欲将贝子与其第三子丹津承袭今其长子滚楮克又呈请効力相应请

旨

上曰蒙古人欲各为扎萨克不相统属朕意伊等若各自管辖愈善昔

太宗皇帝招徕蒙古随得随即分旗分佐领封为扎萨克各有所统是以至今安辑宜如阿南大之妻所请令其第三子承袭贝子其长子滚楮克倘欲另为扎萨克亦可封之

康熙三十八年己卯六月辛酉理藩院题盗马贼犯图萨应拟正法

上谕曰往者塞外多盗近朕遣人教养蒙古申严法禁盗贼屏迹四十八旗各获生理风俗稍醇而图萨独先犯禁决不可恕且此法非朕创之也

太宗文皇帝时因蒙古等无房舍墙垣法令若轻则马匹难养故尔定法以警匪类耳

康熙四十二年癸未七月乙巳朔

上临和硕裕亲王福全丧哭奠毕自苍震门入景仁宫诸

王大臣齐集宫门奏请

驾回乾清宫少息

圣体复幸塞外避暑

上谕曰朕但恐

皇太后过哀朕心不安耳俟王殡後朕再起程至於居便殿者非自朕始乃

太祖



太宗之旧典也

丙午

上传谕次日临裕亲王丧诸王大臣齐集後左门叩首再

四劝止

上谕曰

太宗时颖亲王之丧

太宗亲临数次载在

实録此皆尔等所知颖亲王系

太宗之侄况裕亲王乃朕之亲兄乎此朕效法

祖宗并非太过朕昨因暑天劳顿今日未往明日必当再临尔等不必恳奏

康熙四十七年戊子九月壬午

上谕大学士等曰朕閱

实録

太宗皇帝统大军抵北京击败明兵凯旋之时诸大臣竞进曰臣等随从至此本图建立功业今奈何薄城而不取

太宗皇帝曰今取此城甚易当视天意何如嗣後北京为流贼所据我诸王佐

世祖皇帝直取北京统一寰宇逮於朕躬历二代六十五年今天下治安率土人民咸享太平之福此亦朕恪守

祖业夙夜勤劳之所致也

康熙四十九年庚寅四月乙巳

上遣都统苏满等往蒙古会盟

諭之曰會盟之事肇自

太宗文皇帝三年一次遣大臣會盟朕遵行已久爾等前往不得生事蒙古漸次皆已富饒亦無大事或有小事來訴爾等但從公審理而已至蒙古饋爾等馬匹勿得收受亦不得買其馬匹

大清聖祖合天弘運文武睿哲恭儉寬裕孝敬誠信中和功德大成仁皇帝聖訓卷十一

## 卷十二

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十二

文教

康熙八年己酉四月戊寅

上临雍释奠

敕谕国子监祭酒司业等官曰朕惟圣人之道高明广大昭垂万世所以兴道致治敦伦善俗莫能外也朕缵承丕业文治诞敷景仰先哲至德今行辟雍释奠之典将以鼓舞人才宣布教化尔等当严督诸生潜心肄业诸生亦宜身体力行朝夕勤励若学业成立可裨任用则教育有功其或董率不严荒乃职业尔等系师生难辞厥咎尚其勉之毋忽

康熙十六年丁巳三月庚寅

上谕翰林院掌院学士喇沙里等曰治道首崇儒雅前有旨令翰林官将所作诗赋词章及真行草书不时进呈後因吴逆反叛军事倥偬遂未进呈今四方渐定正宜振兴文教翰林官有长於词赋及书法佳者令缮写陆续进呈

康熙十七年戊午正月乙未

上谕吏部自古一代之兴必有博学鸿儒振起文运阐发经史润色词章以备顾问着作之选朕万几余暇游心文翰思得博学之士用资典学我朝定鼎以来崇儒重道培养人材四海之广岂无奇才硕彦学问渊通藻瑰丽可以追踪前哲者凡有学行兼优文词卓越之人不论已仕未仕令在京三品以上及科道官员在外督抚布按各举所知朕将亲试録用其余内外各官果有真知灼见在内开送吏部在外开报督抚代为题荐务令虚公延访期得真才以副朕求贤右文之意尔部即通行传谕

康熙十九年庚申四月己卯

上谕翰林院掌院学士叶方蔼曰尚书纪载帝王道法关切治理朕留心研究期於贯通讲幄诸臣讲解明晰深有裨於典学着将尚书讲义刊刻颁行

康熙二十一年壬戌十二月壬辰

上諭大學士覺羅勒德洪等曰國子監乃國家養育人才之所近聞司教之官不將監生嚴加約束教誨縱之遊戲又其甚者閑雜之徒任行出入竟以國子監為遊戲之地矣爾等傳祭酒司業等官嚴行禁止

康熙二十三年甲子三月癸巳

上諭大學士等曰滿漢文中書筆帖式系旗員進身之階應加選擇嗣後部院各衙門中書筆帖式缺出俱令考試補授如是則人人鼓舞勤於誦習而學問優長之人必衆矣

四月丁巳翰林院刊成日講易經解義進呈

御覽

上曰易經闡發天人理數道統攸關朕朝夕披玩冀造精微講幄諸臣殫心剖析有裨典學其即頒行用廣勵臣庶期臻一道同風之治

乙丑

上諭講官等曰講章辭取達意以確切明晰為尚如本文敷衍太多則篇末未免重複大約詮次本文原在了徹聖賢意旨而篇末該括數語又貴闡明理道務去陳言朕閱張居正尚書四書直解篇末俱精實之義無泛設之詞今後所撰詩經講章亦須體要備舉期於盡善八月庚戌吏部題補國子監助教員缺

上曰助教官員職掌教習廩監官生應選優於文學者補用若用文學庸劣之人何以表率生徒以後着吏部考取仍將試卷送內閣閱看具奏

十一月丙子

上諭大學士等曰闕里系聖人之地秉禮之鄉朕幸魯地致祭

先師特闡揚文教鼓舞儒林祀典告成講明經書文義窮究心傳符合大典應行事宜爾等會同各部院集議以聞

己卯

上過曲阜將詣闕里先

命國子監祭酒阿禮瑚致祭於啟聖公祠黎明

上御辇设卤簿进曲阜南门诣

圣庙至奎文阁前下辇由甬道旁行至大成殿行三跪九叩首礼四配十哲两庑从官分献乐舞间作礼毕

上幸诗礼堂衍圣公孔毓圻等行礼毕监生孔尚任进讲大学圣经首节举人孔尚鉉进讲易经系辞首节讲毕

上命大学士王熙宣谕衍圣公孔毓圻等曰至圣之道与日月并行与天地同运万世帝王咸所师法下逮公卿士庶罔不率由尔等远承圣泽世守家传务期型仁讲义履中蹈和存忠恕以立心敦孝弟以修行斯须弗去以奉先训以称朕怀其祇遵勿替又

谕大学士等曰至圣之德与天地日月同其高明广大无可指称朕向来研求经义体思至道欲加赞颂莫能名言特书万世师表四字悬额殿中非云阐扬圣教亦以垂示将来又

谕曰历代帝王致祭阙里或留金银器皿朕今亲诣行礼务极尊崇至圣异於前代所有曲柄黄盖留供庙廷四时飧祀陈之以示朕尊圣之意

是日

上驻蹕兖州府西关

谕大学士明珠曰周公大圣人制礼作乐垂示万世今庙在曲阜应行致祭此系重大典礼其遣恭亲王长宁及礼部尚书介山偕往以示朕尊崇元圣之意

十二月辛丑浙江道御史梅鋐条奏科场事宜

上谕大学士等曰疏中所言发榜太速似属有理凡人精神有限卷牒浩繁岂能一一徧閱竟有试卷未经考官点閱者倘致实学沦弃岂不可惜况弊之有无亦不在发榜之迟速宜令展寬日期细加校閱以无虚国家求才至意

康熙二十四年乙丑二月丁酉

上谕吏部国家设立翰林院衙门原以储养人材娴习文学以备顾问必淹贯经史博极羣书方克谙练体裁洞悉今古敷词命意典贍弘通悉登制作之林用佐右文之治始为称职今将翰林各官特行考试朕亲加详閱分别次第以示劝惩

康熙二十五年丙寅四月甲午

上谕礼部翰林院自古帝王致治崇文典籍具备犹必博采遗书用充秘府盖以广见闻而资掌故甚盛事也朕留心艺文晨夕披览虽内府书籍篇目粗陈而裒集未备因思通都大邑应有藏编野乘名山岂无善本今宜广为访辑凡经史子集除寻常刻本外其有藏书秘录作何给值采集抄写尔部院会同详议务令搜罗罔舛以副朕稽古右文至意

闰四月戊午

上谕大学士等曰世间全才未易得但能於性理一书稍加观览则愧怍之处甚多虽不能全依此书以行亦宜勉强研求明晰义理若祇泥辞章字句有何裨益

庚申

上谕礼部翰林院自古经史书籍所重发明心性裨益政治必精览详求始成内圣外王之学朕披阅载籍研究义理凡厥指归务期於正诸子百家泛滥诡奇有乖经术今搜访藏书善本惟以经学史乘实有关系修齐治平助成德化者乃为有用其他异端詖说槩不准收录

甲子

上谕浙江提督陈世凯曰自古武职名臣如郭子仪李靖等皆读书明理熟谙经史乃能保守功名克全臣节嗣後武职官员应阅览书籍讲明忠孝大义着该管官勤加劝谕

康熙二十六年丁卯十月壬戌

上谕大学士王熙等曰乡试为抡才大典出题理宜详慎今年各省乡试主考朕未尽知於开列中酌量分遣今览各省所进题名录中其题目多有未当如福建三场策问台湾事宜一道於地方情形形势毫未通晓乃茫昧命题殊为悖谬其余各省亦未尽当尔等详加校閱察出参奏於是察看福建云南河南三省第三场策问命题词义多有未当均属悖谬部议将主考王连瑛等分别各降级调用从之

康熙三十二年癸酉四月壬辰

上谕大学士等曰翰林官以文章为职业今人好讲理学者辄谓文章非关急务宋之周程张朱何尝无文章其言如是其行亦如是今人果能如宋儒言行相顾朕必嘉之即天下万世亦皆心服之矣传谕翰林官知之

康熙三十六年丁丑十月己酉

上谕宗人府礼部国家乐育人才振兴文教将使海内英隽之士靡不蒸蒸蔚起矧宗室子弟系托天潢岂无卓越之姿足称令品允宜甄陶獎拔俾克有成考诸前史以公族应举入仕者

代不乏人今属籍所载日益繁衍除已授爵秩人员外闲散子姓素无职业诚恐进取之途未辟致向学之意渐隳嗣後八旗宗室子弟有能力学属文奋志科目应令与满洲诸生一体应试编号取中如此则赋质英异者咸服习於诗书而学业成就者不阻抑於仕进凡属宗支人人得以自效而於朕兴贤睦族之至意亦用是以允愜焉

康熙三十九年庚辰六月丁亥

上谕大学士等曰考试举人进士特为得人耳若行贿赂缘而得之本源不清欲冀他日为忠臣良吏得乎今朕意欲凡系大臣子弟另编字号令於此中较閱选择其文之优劣则大臣子弟之堪中者既得入选又不致妨孤寒之路如此则於考试一事大有裨益尔等议奏康熙四十一年壬午五月丁亥礼部议覆五经博士程衍祀请给程子祭田应不允

上谕曰程子宋之大儒祀典不可有缺但给与祭田或为其子孙之不肖者变鬻则祀典仍缺其令该巡抚藩司善为酌处务令程氏子孙世世奉祀永远无缺

六月戊午

御制训饬士子文颁发礼部命勒石太学其文曰国家建立学校原以兴行教化作育人才典至渥也朕临御以来隆重师儒加意庠序近复慎简学使厘剔弊端务期风教修明贤才蔚起庶几棫朴作人之意乃比来士习未端儒教罕着虽因内外臣工奉行未能尽善亦由尔诸生积锢已久猝难改易之故也兹特亲制训言再加警饬尔诸生其敬听之从来学者先立品行次及文学学术事功源委有叙尔诸生幼闻庭训长列宫墙朝夕诵读宁无讲究必也躬修实践砥砺廉隅敦孝顺以事亲秉忠贞以立志穷经考义勿杂荒诞之谈取友亲师悉化骄盈之气文章归於醇雅毋事浮华轨度式於规绳最防荡轶子衿佻达自昔所讥苟行止有亏虽读书

何益若夫宅心弗淑行已多愆或蜚语流言胁制官长或隐粮包讼出入公门或唆拨奸猾欺孤凌弱或招呼朋类结社要盟乃如之人名教不容乡党勿齿纵幸逃褫扑滥窃章缝返之於衷能无愧乎况乎乡会科名乃抡才大典关系尤鉅士子果有真才实学何患困不逢年顾乃标榜虚名暗通声气夤缘诡遇罔顾身家又或改窜乡贯希图进取器凌腾沸网利营私种种情弊深可痛恨且夫士子出身之始尤贵以正若兹厥初拜献便已作奸犯科则异时败检踰闲何所不至又安望其秉公持正为国家宣猷树绩膺後先疏附之选哉朕用嘉惠尔等故不禁反复惓惓兹训言颁到尔等务共体朕心恪遵明训一切痛加改省争自濯磨积行勤学以图上进国家三年登造束帛弓旌不特尔身有荣即尔祖父亦增光宠矣逢时得志宁俟他求哉若仍视为具文玩愒勿儆毁方跃冶暴弃自甘则是尔等冥顽无知终不能率教也既负栽培复干咎戾王章具在朕亦不能为尔等宽矣自兹以往内而国学外而直省乡校凡学臣师长皆有司铎之责者并宜传集诸生多方董劝以副朕怀否则职业弗修咎亦难追勿谓朕言之不豫也尔多士尚敬听之哉

己未

上谕礼部训饬士子文若令各府州县学宫一体勒石恐有不产石州县地方或致借端扰派应俟国子监勒石後以掇本彙颁各省转发所属学宫一体遵行九月壬子礼部议覆外帘监试御史节什等题监生庄令舆俞长策试卷作五经文字与例不合应无庸议

上谕曰所作五经文字若俱浮泛不切自不当取中若能切题旨文理明顺一日书写二万余字实为难得庄令舆俞长策着俱授为举人准其会试嗣後作五经文字不必禁止作何定例着九卿詹事科道详议具奏康熙四十二年癸未四月庚辰读卷官等以殿试卷进呈

御览

上谕曰较定前後名次必须凭文论定若稍存私意人心即不悦服况尔诸臣从考试出身回思当日考试之时本心更不可失

康熙四十三年甲申三月庚戌

上谕吏部教职官员必文义明通方称厥职近见直隶各省教职官内不谙文义者甚多如此何以训士着行文直隶各省该抚将各属教职官通行考试分别具题嗣後俱照此例不时考试

康熙四十四年乙酉三月壬戌

上谕提督江南学政张廷枢曰朕比临幸松江道经青浦据该邑贡监生员孙鋐等奏称青浦之北地名孔宅自汉时至圣苗裔避地至此奉至圣衣冠环壁葬焉恳请颁赐匾额朕念

孔子乃万世之师既有遗迹亟宜表彰因於万几之暇亲书圣迹遗徽匾额以示尊崇

先师之意可选良工摹刻颁发

康熙四十九年庚寅正月庚寅

上谕侍卫拉锡等曰满字既有清文监蒙古字书亦应纂辑着交与教习唐古特书之官员阿尔必特祜乾清门侍卫拉锡等翻译会同蒙古侍读学士中书等修成满洲蒙古合璧清文监一部一边写满洲字一边写蒙古字其引经处俱行裁去若有伊等不知之处着问八旗年老通晓蒙古书之人

康熙五十年辛卯十月甲子吏部议覆顺天乡试榜过期有违定例应将正主考都察院左都御史赵申乔等各罚俸三月



上曰直隶各省生员举人增额既多赴试者较前倍衆考试官不能细心徧閱草率录取以致遗失佳卷此皆因出榜之期太近故耳如出榜多展数日则考试官得以详閱试卷庶不致有遗珠之叹尔等问九卿具奏赵申乔等着免议处

康熙五十一年壬辰二月丁巳

上谕大学士等曰朕自冲龄笃好读书博览载籍每见历代文士着述即一字一句於义理稍有未安者辄为後人指摘惟宋儒朱子注释羣经阐发道理凡所著作及编纂之书皆明白精确归於大中至正经今五百余年学者毫无疵议朕以为孔孟之後有裨斯文者朱子之功最为弘鉅应作何尊崇尔等会同九卿詹事科道详议具奏

康熙五十二年癸巳四月甲寅

上谕大学士九卿等曰主试之人衡文取士必当除去偏见选拔佳士若以偏见閱文则人心不服上科京闈乡试虽无交通贿赂之弊而所中之卷不佳且有少年稚子徼幸入彀即题目应出各种乃得佳文今岁京闈乡试所出七题皆系理致士子偶有一二语合主司之意者遂获登录其同考官选文荐閱又皆揣摩主司之意场中士子未能各展其长而实学之人多被摈不录者职是故也

十月乙酉

上谕读卷官大学士等曰三年乡会试原期得实学真才自必以研究经书义旨为根本盖四书五经皆圣人讲理明道之书贯始彻终无非精意近见乡会试俱择取冠冕吉祥语出题每多宿构幸获致读书通经之士渐少今後闈中题目应不拘忌讳庶难预作揣摩实学自出着九卿会议具奏

康熙五十三年甲午四月癸酉

上谕吏部教官有教养士子之责员缺甚属紧要嗣後掣选教官者应取至京师令大臣面试方可补授

七月己酉

上谕礼部直隶各省学臣文武乡试两关後闲居候代毫无所事嗣後新学臣於乡试之年秋间点出限十月终到任则旧学臣免旷职之愆新学臣得以从容考试矣

康熙五十四年乙未正月甲子

上谕大学士九卿等曰科场中不可出熟习拟题朕常讲易及修定天文律吕算法诸书人人

皆知必预拟此类题目若闈中亦以此命题则人皆可以拟题幸进实学何由而得再房官亦属紧要若房官有弊主考亦无如之何今可将一房卷令不同省房官二人同閱如一人有情弊发觉後二人并坐则各知畏慎互相纠察矣部院司官凡进士举人出身者例应分房若学问不堪何以衡文取士伊等宜加考试近来五经中式殊无实学不过手敏多写数千字耳十七八岁童子皆能之甚无益也可着停止

二月己丑

上谕直隶巡抚赵弘燮曰朕每年春间行幸水淀近见民生虽不能家给人足比之往时似觉差胜但村庄之中诵读者尚少朕思移风易俗莫过读书况畿辅之地乃王化所先宜於穷乡僻野皆立义学延师教读以勉励孝弟可望成人矣尔即遍示村庄俾皆知朕崇文好学之深意特谕

康熙五十五年丙申三月丙辰

上谕大学士等曰朕观今人皆能勤於读书昨将各部院司官轮班引见出题考试完篇者甚多即不能诗文之人所书出身履历亦甚明顺若不知文义如何居官办事今读书之人甚多大是好事

【附】武科

康熙三十二年癸酉四月壬辰

上谕兵部武乡会试旧例射的以八十步为则太远善射者不能多中人才或致遗弃嗣後改为五十步以中二箭为合式

康熙三十三年甲戌九月丁亥

上谕大学士等曰朕閱今年武闈试录江浙人中式者多山西河南两省各中一人如此恐致遗失人材武进士之文不过熟记成语抄写旧套而已论文取中必致不均而人材亦多遗漏必以马步箭俱优人材出衆者为佳耳

十月庚子

上谕大学士等曰天下武举会试者或其人材可用骑射亦优而以不合式之故遗而不录者有之朕意殊为悯恤令兵部宣示有愿効力再试者具呈候该部请旨再行考试遴选交火器营令其熟习戎事於会试时照常考校既悉知其人亦便於拔取有超羣者即与录用如此则人材不致遗弃於考试良有裨益矣

康熙四十八年己丑十月壬寅

上閱试武举骑射技勇

谕大学士及兵部大臣等曰八旗汉军以文职用者多以武职用者少嗣後武科乡会试当令八旗汉军应考即增额无多而精壮技勇者可得矣

癸卯

上谕大学士及兵部大臣等曰考试武举进士乃国家大典视近科所取之人武艺勇力渐不如前此事所关甚大当扩考试之典以备用即今在内部院司官笔帖式兼武职而历陞堂官者不少在外提督总兵官由行伍出身者甚多何地无才现今八旗监生为护军骁骑者俱有入文场考试之例直隶各省綠旗营兵千总把总及年满千总不但人材壮健善骑步射其中有兼通文艺愿入场就试者可分别令就武乡会试即於某人充伍为弁之地就近乡试不必令回原籍至云南贵州广西等远省赴京会试者亦酌定中额不使虚费跋涉以示鼓励如此则綠旗官兵内有才力者俱得入彀而武举进士亦得实有才力之人其於武乡会试大有裨益矣至福建广东两省不拘举人进士生员监生兵民内深谙水性熟习水师营务之人有愿附巡哨船舰出洋効力擒斩盗贼建立功名者着该督抚查明保奏康熙四十九年庚寅七月庚寅兵部议覆肃州总兵官路振声请增陕西武举中额一疏

上谕大学士等曰陕西人材壮健者甚多又令兵丁一体乡试武举额数若少则有才者不免遗漏以致壅滞着将武举中额照原数增二十名

九月辛亥兵部议覆太原总兵官马见伯疏请选定武经七书又祭

文庙时武臣请照文臣一体行礼俱不准行

上谕大学士等曰武经七书朕俱閱过其书甚杂未必皆合於正所言火攻水战皆是虚文若依其言之断无胜理且有符呪占验风云等说适足启小人邪心昔平三逆取台湾平定蒙古朕料理军务甚多亦曾亲身征讨深知用兵之道七书之言岂可全用孟子云仁者无敌又云天时不如地利地利不如人和此是王道与其用权谋诈伪无稽之言不若行王道则不战而敌兵自败矣王道二字即是极妙兵法从古穷兵黩武皆非美事善战者皆时至事迫不得已而後用兵也昔吴三桂反时江南徽州所属叛去一县将军额楚往征之有人献策於贼云满洲兵不能步战若令人诱至稻田中即可胜之矣岂知满洲兵强勇争先未及稻田已将诱者尽杀之此献策之人亦为我兵所杀今於武经七书内作何分别出题及论语孟子一并出题之处着九卿定议具奏嗣後祭

先师孔子时令武臣与文臣一体行礼於理甚合着照马见伯所请行

康熙五十二年癸巳十一月壬子

上谕大学士等曰近见直隶各省考取武进士额数或一省偏多或一省偏少皆因不知其弓马武艺止凭文章取中以致骑射娴熟谙习韬略之人多有遗漏嗣後考取进士不必拘定额数俟天下会试武举齐集京师令该部将各省赴试到部武举照例考试弓马将合式武举等实数查明预行奏闻朕计省之大小人之多寡照考取文进士例按省酌定取中武进士额数考取时就本省卷内择佳者照所定数取中如此则学习武艺弓马优长者不致遗漏矣

甲寅

上谕大学士等曰文武考试虽曰两途俱系选拔人才而习文之内亦有学习武略善於骑射者习武之内亦有通晓制义学问优长者如或拘於成例以文武两途不令通融应试则不能各展所长必致遗漏真才嗣後文童生生员举人内有情愿改就武场考试者武童生生员举人内有情愿改就文场考试者应各听其考试如此则各得施其所学文武两途皆得真才矣着九卿詹事科道议奏

十二月辛卯礼部等衙门遵

旨议覆文武生员举人有愿改考者准其互考

上曰改考亦属佳事但恐武生记文数篇希图侥幸者多学臣於文生员不敢全卖至武生全无公道此弊朕皆知之嗣後武考文举不中者若再令考试则弊生矣将朕旨传谕督抚等官考一次不中者即着停止互考令归原学考试

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十二

## 卷十三

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十三

武功一

康熙十二年癸丑十二月丙辰

上谕议政王大臣等曰今吴三桂已叛荆州乃咽喉要地关系最重着前锋统领硕岱带每佐领前锋一名兼程前往保守荆州以固军民之心并进据常德以遏贼势前往官兵若沿途住歇秣马必至迟悞着派户部贤能司官於每日宿处齐备草豆应付

丁巳

上谕西安将军瓦尔喀曰四川与滇接壤今吴三桂已反尔可率副都统一员悉领骑士选拔将领星驰赴蜀凡自滇入川险隘之地俱行坚守大兵不日进剿云南俟我师临境贼势渐分倘有可乘之机尔即与提督相机进讨至西安等处朕当刻期遣发禁旅前来驻防

康熙十三年甲寅正月己丑

上谕兵部湖南鄖阳地界三省中多旷土山谷厄塞奸民易於啸聚且逆贼或乘间侵犯应预防之着於鄖阳特设提督一员驻兵弹压

二月乙巳

上谕都统觉罗朱满等曰前谕尔等统兵镇守武昌岳州等处兹念长沙乃武昌咽喉又为武冈宝庆等州郡水陆要路接壤粤西尔等若进驻长沙既兼防水陆之冲更可壮粤西之势尔等启行日可即移檄广西将军提抚使知我兵已赴长沙保固湖南令伊等亦各守疆土朕遥度兵势似宜如此至军中情形或有难行之处当相机调度不必拘泥虑违朕旨

甲寅湖广总督蔡毓荣疏报长沙副将黄正卿参将陈武衡以城叛降贼

上谕宁南靖寇大将军多罗顺承郡王勒尔锦曰都统觉罗巴尔布护军统领伊尔度齐额司泰等兵抵荆州是时常德澧州尚未有变理应稍休马力速赴常澧以戢兵民乃迟久不前以

致常澧相继皆陷今长沙亦有变可俟都统鄂内等兵至荆州令其镇守荆彝诸处即令都统巴尔布等进兵攻取常澧又襄阳为我师来往之冲蜀寇必窥之地王军前汉军都统副都统可酌率官兵留镇襄阳

庚申

上命都统觉罗朱满守岳州谕之曰岳州为水陆冲要亟宜固守令都统尼雅翰等率水陆兵竝进以备应援尔前往岳州竝趣尼雅翰等速行

辛酉

上谕吏部兵部陕省系边陲要地西控番回南通巴蜀幅员辽阔素号岩疆兹逆贼吴三桂煽乱滇黔四川从逆秦省地处隣封恐有奸徒摇惑以致人心不宁虽督抚提镇等官各尽乃职但军务繁重必须专遣大臣假以便宜相机行事方可绥靖中外保固边疆刑部尚书莫洛前任秦督深得军民之心谙晓地方情形兹特授为经略率领满兵驻劄西安一切应行事宜不由中制兵马粮饷悉从调发文武各官听其选用吏兵二部亦不得掣肘其巡抚提镇以下官员悉受节制

三月壬申

上谕宁南靖寇大将军多罗顺承郡王勒尔锦等曰朕览都统觉罗巴尔布等奏议於八月进兵恢复疆土朕思云贵地方尚未可轻进必俟四川全定始可进取其湖南地界南连粤西东抵江右近闻长沙副将降贼战船尽为贼有今当相机速取常德以断长沙後路使贼兵彼此不及应援我师进逼长沙则贼非来降即弃城遁矣如此不但使贼兵胆落百姓亦早得归耕也若不及今进兵使贼势渐增妨民稼穡将来我兵深入刍粮转运区处倍难朕据理揆度如此兵在千里之外岂能一一指示但民心易致动摇广西音信阻隔倘江西更有贼警势必遣发禁旅不惟馈饷浩繁且恐兵民之心又生叵测尔等前出师时皆言进取云贵之期不过八月今贼犹未至而已叛之长澧常德诸处亦欲待至八月设各处再有变者王将分兵以讨否乎分之则兵单以次剿取则马疲今惟先取常德长沙以寒贼胆方为制胜王宜集衆议以行

又

谕曰比闻逆贼吴三桂身至常德王所统兵马进取常澧之时狡寇知不能敌或出全力冒死以犯岳州武昌亦未可料王若进兵当密示将军尼雅翰都统朱满各於所向之地酌其远近约期共举庶几万全其荆州武昌两地军机互相关白务宜回顾武昌王等仍相机以行

四月丁未

上谕大将军多罗顺承郡王勒尔锦等曰镇南将军尼雅翰奏前使云南大臣还至武昌携吴

三桂奏疏报顺承郡王朕思吴三桂素行狡诈此中疑有诡计如吴三桂服罪请降王及将军等仍议招致之益加警备毋堕奸谋即吴三桂束身归命其官属当益加防范毋分兵力务相机前进

五月己巳

上谕大将军多罗顺承郡王勒尔锦等曰岳州水陆诸路兵力单弱可於荆州甲兵每佐领再拨二三名择大臣经战者领之星夜赴援岳州如尼雅翰朱满巴尔布等尚未破敌须援兵既集始可进攻非谓伊等不能击贼正欲兵多力厚大创贼衆耳若四川已平当分兵三路进取云贵贼中兵将有来归者赦其前罪厚加恩养其以此徧行晓谕至贼兵各路入犯分我兵势又声言渡江狡情叵测恐我兵侦探日久或致懈弛虽贼所不至之处亦宜严加防御

壬辰

上谕平南王尚可喜总督金光祖提督马雄等曰逆贼孙延龄奏称督提二臣诱其都统王永年谋为不轨故不得已剪除王永年此系潜通吴逆故饰辞诬奏耳然孙延龄虽叛其所部兵曾随定南王効力国家豢养有年恐大兵到日槩行诛戮朕心不忍前有旨如孙延龄改过来降亦从宽宥尔等不可因此遂缓进剿机宜必孙延龄果悔罪归诚尔等仍受降具奏其所属弁兵感念国恩或杀孙延龄或率衆迎降者从优议叙即只身归者亦收留恩养其出示晓谕之

六月甲午朔

上谕平南将军赖塔浙江将军图喇总督李之芳巡抚田逢吉提督塞白理等曰耿精忠作逆蹂躏地方大干国法已遣发大兵於浙江江西广东三路进剿但念其祖父曾宣力累朝泊耿精忠之身遽至覆亡宗祀斩絶朕心殊为不忍因遣人齎敕往谕如耿精忠乞降赦免前罪仍恩遇如初尔等不可因此遂悞进剿机宜必耿精忠果悔罪输诚尔等乃受其降若仍执迷不悛其藩下官兵有心存忠义者或擒斩耿精忠或率衆来降俱优加恩赏即只身自归者亦收留抚恤

壬子

上谕经略莫洛曰朝天关诸处关系最要应拨兵防守以为犄角且粮艘至彼递相护送似乎有益至汉中虽有满兵犹恐单弱又朝天关外尚有别路可通汉中倘我兵深入奸宄窃发据守鷄头关诸险亦属可虑一切机宜经略当酌量以行念保宁未复我师恐益加劳顿粮饷实系要务当相继挽运勿使匱乏

戊午

上谕兵部浙江四川宜遣王贝勒贝子公等前往剿贼所以遣王等行者非谓从前在川在浙诸将军才不及也以诸王贝勒皆朕懿亲臂指可使足壮声威耳其授和硕康亲王杰书为奉命大将军同固山贝子傅喇塔率兵往浙江授多罗贝勒董额为定西大将军同固山贝子都统温齐辅国公绰克托率兵赴四川

八月丁酉

上谕福建总督郎廷佐曰入闽之日海寇宜用抚耿精忠宜用剿或用间其相机以行

辛亥

上谕护军统领桑额曰江右为粤东咽喉江浙唇齿所关綦重今兵民之心尚持两端若不先灭地方小丑大兵难以前进至袁州吉安赣州尤属要地应令满洲兵驻袁州相机进取长沙否则固守地方庶三府可保无虞将军当亲统重兵以行毋使兵力单弱致有疎失

己未

上谕议政王大臣等曰闻岳州三面临湖贼於陆路一面浚濠筑垒拒守颇坚难以进取应令将军尼雅翰率兵赴江西与副都统甘度海合兵并率袁临镇兵由袁州进取长沙夹攻岳州相度机宜以行

九月戊辰

上谕宁南靖寇大将军多罗顺承郡王勒尔锦曰朕手谕与王者再所言似合机宜又两遣侍卫往未见王回奏满汉兵宜加抚恤馈饷亦不易若何进战一在於王今所在蠢动岂不可虞大将军出征进止调度必待中旨於古未闻因王等与贼相持朕不自暇逸屡有敕谕冀或有一当耳非朕欲从中制也王等始出兵时兵亦不为不足今四路进讨王亦知之四川兵取朝天关平阳关在保宁与贼相距与岳州同王等勿以四川兵将抵贵州湖南兵可缓进保宁较岳州城更坚也康亲王进剿闽贼虽屡奏捷朕不为喜吴三桂乃贼渠惟破岳州澧州方可喜耳王等初至军前言马未肥又言天热多雨难行今当可行之时王等规取岳州或渡江取澧州或令将军尼雅翰往江西取长沙此三事王与贝勒诸将帅熟议以闻勿惟朕谕与议政大臣之议是从勉建良策欣闻捷音

十月丁未

上谕兵部工部武昌汉阳一带沿江之地俱属重要防御之策不可不豫宜於沿江要害多筑墩台环列火礮令诸军更番汛守以固省会又武昌临江所在湖汊甚多宜亟设江汛战船多制火礮并招募鸟枪兵一千名为战守之用



十一月庚申朔

上谕兵部河南府乃四达之地距潼关郿襄皆近驻师其地则所在有警俱可策应其遣副都统四格等率每佐领骁骑三名往驻河南府

十二月丙申

上谕定西大将军贝勒董额等曰览将军赫业等奏经略莫洛於十一月二十八日帅兵启行莫洛所统系绿旗兵巴蜀山路险恶满洲大兵若不相继进恐贼轻视汉兵首尾互击难以策应此谕到日尔等即兼程进兵接济莫洛所统之兵速定昭化勿得迟缓贻悞大计又大兵粮饷关系甚重其令陕西督抚多发官兵水陆防护以次相继勿悞军需运至广元交将军席卜臣等转运军前毋得怠忽

乙巳

上谕陕西总督哈占曰适据贝勒董额等报提督王辅臣标下官兵叛变随即遣官齎谕招抚尔身肩重任加意安辑应通行晓谕念伊等倡乱官兵皆因蜀道险远粮饷不继以致畏死情迫顿生变乱谁肯甘心从逆自造衅殃其不得已之情朝廷具已洞悉今特遣官前来安抚谕旨明如皦日伊等各有父母妻子恒产如能遵旨来归官职如故愿为兵者仍许入伍愿归农者令回原籍安插尔哈占系信任特用之臣务体朕至意速行抚谕早定地方

戊申

上谕议政王大臣等曰陕西兴安州西近汉中北接潼关东南直逼郿襄最为要地今秦中有警特遣大臣镇守其令云贵总督鄂善副都统希佛率兵一千赴兴安保固汉中诸处至襄阳与兴安地系接壤应令张犄角之势有警则互相应援如襄阳谷城兵力单薄着大将军顺承郡王等酌量增兵协守

壬子

上谕王辅臣曰近据总督哈占奏称进剿四川军中噪变尔所属部伍溃乱朕闻之殊为骇异朕思尔自大同隶於英王後归入正白旗

世祖章皇帝知尔赋性忠义才勇兼优拔於侪伍之中置之侍卫之列继命尔随经略洪承畴进取滇黔尔果能殚心抒忠茂着功绩遂进秩总戎宠任优渥迨及朕躬以尔勲旧重臣岩疆攸赖特擢秦省提督来京陛见面加讯问益悉尔之忠贞天稟猷略出羣朕心深为嘉悦特赐密谕言犹在耳想尔犹能记忆也去冬吴逆叛变所在人心怀疑观望尔独首倡忠义举发逆札擒捕逆差遣子王继贞驰奏朕召见尔子面询情形愈知尔果不负朕知疾风劲草於今见之後尔奏请入覲面陈方略朕以尔忠悃夙着深所倚信且边疆要地正资弹压是以未令来

京经略莫洛奏请率尔入蜀朕以尔与莫洛和衷共济毫无嫌疑故令尔同往建功兹兵变之後面询尔子始知莫洛於尔心怀私隙颇有猜嫌致有今日之事则朕之知人未明俾尔变遭意外忠荃莫伸咎在朕躬於尔何罪朕之於尔谊则君臣情同父子任寄心膂恩重河山以朕之惓惓於尔知尔之必不负朕也至尔所属官兵被调进川征戍困苦行役艰辛朕亦悉知今变起仓卒情非得已朕惟加矜恤竝勿致谴顷已降谕令陕西督抚招来安插并遣尔子往宣朕意恐尔尚怀犹豫兹特再颁专敕尔果不忘累朝恩眷不负平日忠忱翻然悔悟敛戢所属官兵各归队伍即令率领仍还平凉原任已往之事槩从寬宥或经略莫洛别有变故亦系兵卒一时愤激所致竝不追论朕推心置腹决不食言勿心怀疑畏有负朕笃念旧勲之意

康熙十四年乙卯正月辛酉

上谕兵部逆贼吴三桂据守岳澧诸处恃有长沙衡州之粟耳今安亲王率师往江西令一到南昌即简江西军中马匹由袁州取长沙断贼粮道夹攻岳州又

谕曰今日事势先灭吴逆为要安亲王宜留兵守江西亲统大兵或由袁州或由吉安乘便进剿湖广攻取长沙倘未易下即令此兵扰贼耕种截其挽运取资於敌不但我兵无转输之劳而岳州粮尽贼可坐困吴逆自不能久据常澧矣其移文安亲王速行

壬戌

上谕议政王大臣等曰王辅臣兵变虽下赦诏招抚犹恐未即归诚扰害百姓今将军席卜臣等兵已抵汉中送诣军前马匹留汉中者亦甚多贝勒董额等其固守要害简诸军中愿自効力者付贤能大臣蹶王辅臣後如王辅臣归顺即令此兵仍回汉中倘或抗拒则相机剿定

癸酉

上谕总督哈占巡抚杭爱曰据尔等奏称王辅臣兵变致经略标下绿旗兵丁惊溃等语朕思秦省兵士旧在行伍者戍守着劳新行召募者骤经调遣今俱随征远出深軫朕怀事出意外必非无因念其变起仓卒情非得已未忍加罪尔等即宣谕朕意速行招抚愿归营者随便入伍愿归农者加意安插前罪一槩不究其官兵人等父母妻子现在原籍者俱行宥释竝不株连念伊等皆朕赤子特布寬典予以自新勿得执迷不悟自贻伊戚尔等广行晓谕以副朕抚绥招徕之意

是日

上谕兵部先因王辅臣兵变令岳州官兵速进今王辅臣既具疏悔罪虽未即降而大兵云集秦地已可无虞宜行文贝勒尚善若岳州可取即速进兵如势有未便不宜轻动前已敕安亲王由袁州取长沙度其将到相机前进

是日

上谕贝勒董额总督哈占曰王辅臣虽具疏悔罪正恐借此以缓我师乘间为固守计若王辅臣果听命待罪我兵但守疆界脱或扬言投诚而仍肆扰害势将蔓延尔等即相机剿御

丁丑先是

上谕议政王大臣等曰兰州近边要地应速遣兵驻守今保宁大兵已回西安达里善巴图鲁兵亦将至西安其将西安现在兵每佐领下拨四五名以上令将军阿密达副都统鄂克济哈夸代率赴兰州剿御逆贼并防阶州文县等处至是大将军贝勒董额奏称兰州宜遣兵防守但保宁还卒铠甲不备达里善巴图鲁兵兼程而来恐难骤遣今将西安兵发往倘王辅臣由陈仓断我栈道自秦州平凉一时来逼深为可虞

上谕曰据报逆贼已逼兰州若不遣兵速援贼将猖獗临巩被陷势难猝定兰州距秦州不远我兵若往兰州则秦州便可袭取而平凉诸贼亦可首尾夹攻阿密达等以文到之日即速赴兰州保固三边倘逆贼中道阻截即攻取平凉或夺路前赴兰州其相机以行贝勒等速备马匹器械给保宁回兵其达里善巴图鲁之兵应给与马匹以备剿御

乙酉随征总兵官党塞上京告兴安兵变

上命党塞齎敕往谕兴安军士曰据党塞面奏王怀忠平日待下贪苛行事乖戾众心不服以致激变朕以尔等随征四川剿杀贼寇戮力劳苦今仓卒之变出於万不得已非夙图悖乱者比是以未忍加罪特颁宽典嘉与维新已降敕大将军贝勒总督宣谕今又令总兵官党塞齎敕明布朕意将尔等从前罪愆槩行赦宥其各归营伍剿贼树功以图後效勿怀疑惧以负朕宽宥恩抚至意倘仍观望稽迟或听奸宄煽诱之言肆意妄行则国有明法勿遗噬脐之悔

戊子大将军安亲王岳乐奏称江西所在贼扰臣若帅师前往长沙则江西兵单可虑今或进取长沙或先灭江西诸贼请

旨遵行

上谕曰逆贼吴三桂久据湖南奸宄乘势窃发滇黔川闽遂尔沦陷广西陕西逆孽猖獗湖南一隅为贼根蒂四方羣寇所观望必速灭吴三桂底定湖南则各地小丑闻风自散今荆州兵未能渡江而岳州兵又难骤进王抵江西宜由袁州直取长沙一以断贼饷道一以分贼兵势一以扼广西咽喉一以固江西门户乌合之众自当瓦解荆岳大兵即可乘机直进况宁羌告变川贼必通杨洪二贼窥我郧襄扰我南邓侵我荆州後路揆其大势进兵湖南断不容缓且南方卑湿延至夏月霪雨连绵大兵坐守日久不但战马多毙粮饷亦恐不继是进取湖南不再计决矣王宜将江西要地速行整理稍稍就绪即进取湖南勿得坐视致悞机会

五月甲戌

上谕兵部欲平陕西诸寇必先取秦州欲取秦州必须大礮今海尔图等率兵护送红衣礮与贼相持於仙逸关恐诸将各自拥兵互相推诿致悞军机其令周有德海尔图为统领前赴贝勒军又

谕曰时方炎暑安亲王酌留官兵固守建昌等处率大军暂回南昌养马俟秋凉或取湖南或攻福建候旨以行将军额楚副都统席布等应速平广信贼临分水关阳为前进断仙霞後路斯时康亲王即令将军赖塔等兵攻取仙霞或康亲王兵与额楚等兵两路竝进夹攻江山县贼寇二王亦宜遥为声援以赴机会

七月丙午

上以叛逆王辅臣再疏陈奏有蒙恩念及兵民槩从赦宥但如何安抚天语未及在事兵将未免瞻顾等语

特谕诸将曰前颁敕谕炳若日星且秦州等处投诚官兵已安插得所逆贼王辅臣岂不知之若果归顺当遣伊子王继贞或标员齎奏乃槩不遣发而本内词语又复骄倨明系借端推诿希冀缓兵着将军侯张勇速赴秦州会同大将军贝勒董额等酌量留兵防守秦巩等处速行进取平凉提督陈福速取固原夹攻平凉将军毕力克图统领官兵速往会将军阿密达军前都统海尔图等速运红衣礮赴平凉仍固守陇州断贼後路癸丑靖逆将军侯张勇奏称闻大草滩夷人乘虚窥伺乞回驻庄浪以便兼辖

上谕曰秦州巩昌兰州诸处虽次第恢复而底定全陕惟在速取平凉逆贼王辅臣一日不灭则秦省百姓一日不安将军侯张勇应同大将军贝勒董额等会商速定平凉不宜回驻庄浪如夷人果显然作恶扰害边民即令总兵官孙思克回甘州防御

八月己未陕西总督哈占奏称兴安叛兵与蜀寇合将逼西安请分诸将军兵应援

上切责之曰始王辅臣叛朕以兰州要地关系三边令哈占发兵镇守哈占称西安要地不便分兵致兰州诸处沦陷三边摇动继哈占复以西安要地屡疏请兵因将荆州大兵陆续调赴西安遂致荆州彝陵兵力单弱又延安为诸路要冲曾命鄂善周有德等驻守哈占又诳奏鄂善等兵少留之西安致延安陷没哈占封疆大臣每当议事不一体筹度但於己身所在常欲重兵自卫不求速定地方貽悞匪小今又称叛兵与蜀寇合欲分诸将军兵悉赴西安是哈占但知有西安置他处於度外矣且蜀寇何能便与兴安叛兵合即至西安不过因诸将齐赴平凉故为声扬欲乱我军心分我兵势耳诸将当益急攻平凉勿得稍缓王辅臣未灭西安潼关亦宜增兵剿御

十月甲戌

上谕兵部顷大将军贝勒董额等报兴安贼衆犯商州大峪口川贼谭弘救平凉皆因王辅臣未灭我兵俱集平凉故诸贼乘隙侵犯欲分我兵力以援王辅臣今董额等官兵至平凉日久自宜作速攻取设使平凉未破而四川与兴安之贼俱至大兵往来路阻後虽恢复平凉亦复何益若平凉破王辅臣灭则贼应援之念絶而窥伺商州之计亦阻陕西无可虞矣由平凉南山俯视城中甚悉若据南山放红衣礮城中贼衆自不能支董额等速夺南山以取平凉可也

十二月戊午定西大将军多罗贝勒董额以官兵攻平凉沟深地险城未能速下具奏

上谕曰逆贼久踞平凉皆因有粮可恃若断其饷道则贼自穷平凉西北通固原要路大将军贝勒等宜速断截以困毙之

壬戌

上谕安亲王岳乐曰招徕逆贼克取福建令大将军简亲王副将军希尔根将军额楚总督董卫国等相机以行至於进攻长沙剿灭吴逆惟王是赖但恐逆贼觐知我兵进取长沙固守袁吉阻我兵行王或扬言取道别路出其不意或合兵前进或兵分数道在王必有定见其悉心筹画万全务速行之

大清圣祖合天弘运文武睿哲恭俭寛裕孝敬诚信中和功德大成仁皇帝圣训卷十三

# 卷十四

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十四

武功二

康熙十五年丙辰正月辛卯

上谕大将军贝勒董额将军侯张勇总督哈占等曰秦省不能即定皆平凉未下王辅臣未灭之故目前攻取平凉最为紧要尔等宜相机公议速定平凉断贼饷道绥靖地方

二月壬戌

上谕兵部大将军贝勒董额等屯兵平凉日久贼寇尚未剿灭城池尚未恢复夫秦省不能即定川贼尚在窥伺者皆由王辅臣未剿灭平凉未克取故也其以都统大学士图海为抚远大将军率每佐领护军二名亟赴陕西总辖全省满汉大兵断贼饷道剿灭平固逆孽速靖地方大将军抵平凉时尽收将军敕印遇有分遣酌量给付贝勒董额以下悉听大将军节制

乙丑

上谕议政王大臣等曰见驻宁夏满洲蒙古大兵无人统辖其仍授都统毕力克图平逆将军印止以所部前锋赴宁夏统辖满洲蒙古大兵镇守地方俟草青时酌调鄂尔多斯兵协力进取平固

己巳

上谕兵部据平南王尚可喜疏报贼犯惠州肇庆等处省会危急朕思粤省要地倘有疎失为害不小顷虽调遣江西兵仍恐单薄今以兗州每佐领骁骑兵一名蒙古兵七百名调赴江宁其见驻江宁每佐领骁骑兵一名蒙古兵六百名及驻防徽州池州满洲蒙古兵七百名令将军哈尔哈齐统领驰赴粤东如有稽迟坐以失误军机之罪其哈尔哈齐所用平寇将军印留付副都统科尔科代镇守江宁其徽州池州余兵七百名恐难扞御地方或令见驻安庆提督移镇池州或拨苏州驻防五百甲兵往驻徽池将军总督等公同酌量调遣至山东兗州戍防不可无兵大将军图海所统兵内分每佐领一名往山东驻守俟盛京兵到时遣发图海军前

辛未

上谕兵部前命康亲王杰书为大将军平定闽省伊奏先灭浙寇再进福建即允其请後授贝子傅喇塔为将军进取黄岩乃借称修桥造船展转迁延为日甚久屡下诏严催始取黄岩前赴温州时会言红衣礮至即取温州今据伊报称礮已齐集而温州之得与未得竝未声明师行犹豫若此何时始得入闽王贝子率领大兵驻浙江旷日持久以致师老饷匱今温州如尅期可取即当速行进取倘不能即克宜酌量分兵留守王亲统大兵即克取福建如仙霞岭路险难进或由分水关入或别从何道而进当相机作速进兵福建一定则江西之兵可以全力剿贼而吴三桂亦可指日灭矣王贝子系朕懿亲大小将弁皆素所信任当各効心膂奋力前驱如仍瞻顾不前则师益老饷益匱贻悞大事莫此为甚王等其勉副委任乘此事机作何进止速议以闻

甲戌

上谕兵部贝勒尚善等统领大兵往驻岳州将及二载竝未移师前进作攻城破贼之势因循坐守令师老财匱今因大将军安亲王由袁州进取长沙湖南逆贼遂欲分我大兵之势来犯江广前据报岳州贼衆分遣往援彝陵等处则岳州贼势已分贝勒尚善贝子章泰公兰布皆朕懿亲委以重任都统朱满护军统领额司泰副都统路什阿晋泰前锋统领噶尔辟等皆以胜任擢用巡抚韩世琦提督桑额亦以才干着称擢付封疆重任今岳州满洲蒙古兵为数不少又提督桑额标下士卒颇多湖南贼势既分即应整理甲兵为进取岳州之势可取则取不可取须覘贼虚实或发兵过岳州攻长沙贼出即击杀之使逆贼之势溃乱不能分扰他处则江西广东可以少息而大将军安亲王亦从容克取萍乡进图长沙矣尚善等竝不思剿灭贼衆恢复地方负朕委任之意又不切行侦探逆贼情形度有机会奋力前进贼兵分援各处安坐罔闻止知自守汛地各保身躯不能少进尺寸若谓逆贼深其濠塹多用火器以伤我军如值大雨之时其火器尚可用耶总之不实心任事致贼得以任意应援贻悞军机莫此为甚若仍前不改逆贼何日得灭地方何日得平尚善等以文到日即宜作攻取岳州发兵长沙之势以分贼力倘有机可乘速行进取又

谕曰吉安为进通广东要地今闻吉安为贼将高大杰等所围应速发兵救援着见驻江宁将军哈尔哈齐於率赴广东兵内选其半驰往南昌与大将军简亲王喇布副将军希尔根等会商即於所带兵及南昌兵内酌量派出领赴吉安破贼解围通入广之路此路既通哈尔哈齐仍率兵赴粤其所留江宁之兵交贤能夸兰大俟兗州兵到即令遄往其吉安情形竝移文大将军安亲王知之以便随机策应

戊寅

上谕兵部今大将军安亲王将贼固守之地攻破贼已丧胆宜即乘机直取湖南但我兵进取湖南时逆贼吴三桂或撤诸处贼兵往长沙抗拒亦未可知着行文荆岳大将军王贝勒等飭勒兵马时加侦探乘机进剿

辛巳

上谕兵部今贼兵声言断关山道关山险要之地将军席卜臣总督哈占宜相地方缓急调各隘官兵往守关山将军侯张勇兼程速回同将军佛尼勒等堵剿出犯秦巩之贼自後一切军机大将军董额等一面奏闻一面具报大将军图海知之

三月癸巳

上谕兵部今逆贼吴三桂分遣贼兵应援长沙大将军安亲王兵已经深入赴援之贼甚多恐相持迟延时日贝勒尚善等宜乘机速行攻取岳州倘未可取则分兵径过岳州絶贼饷道若虑岳州兵力单薄可调武昌兵以资防守其彝陵等处贼势既分顺承郡王勒尔锦贝勒察尼等或攻破彝陵上流贼衆或整理舟师以张渡江之势俾贼溃乱不能救援长沙一带倘有机会可进即渡江酌量速进至南漳逆贼既经退回即调南漳诸处大兵赴荆州并力破贼大将军王等仍量留官兵同总兵官刘成龙防守南漳

辛丑

上谕议政王大臣等曰安亲王军已深入湖南亟宜添发大兵应援今大将军图海兵尚在怀庆应以戍守河南兵每佐领骁骑一名选才能者署为夸兰大领赴岳州其参领胡世巴额勒布暂驻怀庆再发京师每佐领骁骑一名与盛京兵一千五百名合为一营令参领达汉泰沙礼领之抵河南日以盛京兵五百名留与胡世巴等防戍河南余令达汉泰等率赴岳州前大将军贝勒尚善等奏请添发每佐领兵四名便可分遣由云溪驿赴长沙今所发禁旅竝河南盛京兵已足每佐领四名之数此兵未到时若长岳二郡尚未恢复大将军贝勒等酌拨官兵速援长沙与大将军安亲王合兵攻取平定湖南其盛京兵一千名速添发大将军图海军前

四月庚申

上谕兵部今吴啓镇尚之信受吴三桂伪将军号总兵苗之秀等相继以叛总督金光祖等降贼广东变乱则江南江西殊属可虞若闽粤诸贼会犯京口等处则江南兵单难以防御且江西告急自江南往援甚便官兵不可不增其调大将军图海所领盛京兵一千名及驻防兖州每佐领骁骑一名遣赴江南发京城每佐领兵一名驻兖州其江南满洲蒙古兵令将军华善用平寇将军印统辖以学士萨海署副都统科尔科代为参赞副都统杨凤翔以安南将军印驻防京口其遣赴江南之兵到日将军华善王之鼎及参赞大臣督抚等会同整饬军马以待调遣寻大将军简亲王喇布果请兵援江

西

上谕曰粤东之事如此则长沙宜急攻取今贝勒察尼总督蔡毓荣既回荆州则自河南发往荆州之兵可速遣赴岳州贝勒尚善亦分兵自陆路趋长沙与安亲王协力进取简亲王等应即令将军哈尔哈齐额楚等速取吉安与将军舒恕等合兵御闽粤诸寇以继安亲王大兵之後



五月癸巳

上谕兵部今闻南安饷缺闽粤诸寇来犯赣属地方赣州既危应速取吉安合兵剿贼简亲王等亟檄将军哈尔哈齐额楚提督赵赖等克取吉安会合将军舒恕额赫纳之兵扑灭闽粤诸寇竝檄舒恕等酌量倘可由赣攻吉即分兵夹攻之

六月丙辰

上谕兵部闻贼船七十余只自衡州来泊苍头舖又贼兵三千来犯攸县逆贼知安亲王进取长沙欲断大军後路窥伺袁州亦未可定江西既发有江南大兵省城又有总督驻守简亲王喇布副将军希尔根其以文到之日即檄无事地方官兵赴袁州驻镇剿御贼寇

戊辰

上谕兵部近览大将军简亲王喇布总督董卫国等奏称尚之信背恩反叛逆贼孙延龄马雄等分路来寇江西袁州诸处闽贼亦乘机侵犯江西逆贼吴三桂部下高大杰死守吉安大兵尚未克复等语见在江西兵力单弱分布剿御防守地方又欲接应大将军安亲王兵实难支应贝勒尚善请分岳州兵遣发江西大有裨益今阿晋泰韩世琦虽往长沙其自京师?出每佐领兵四名见到岳州可将兵合计量留防守其余官兵即令起程竝严飭将弁兼程速往

十月壬申

上谕兵部据征南将军穆占疏请令大将军图海率兵同赴湖广再於荆岳彝陵兵内拣选发往以灭吴逆并进取四川云南朕思陕西兵随征各处勤劳备至运粮民多苦累若复进取四川恐征剿转输兵民重困平凉虽已底定军中缺乏马匹新附兵心犹未大定大将军图海及新附兵不便调往湖广且荆州诸处有大将军顺承郡王勒尔锦贝勒尚善都统鄂内宜理布等统兵驻守又大将军安亲王岳乐统率大兵围困长沙前令穆占率兵抵湖广日将荆州诸处兵每佐领配足十名又添拨蒙古兵及陕西湖广绿旗兵随往兵力不为单薄今宜仍遵前旨施行迨克复地方其应设镇守官兵调遣机宜与各将军总督提督等议行着大将军安亲王顺承郡王贝勒等探知穆占何处进兵即相机应援

十一月辛卯

上谕兵部醴陵陷贼顷者贼又声言犯萍乡诸处朕思醴陵萍乡为安亲王大将军後路所关非细副都统席山虽已赴袁州仍恐兵力单弱今闽省已定建昌诸处似可稍纾大将军简亲王及副将军希尔根总督董卫国等量调建昌抚州乐平饶州南昌等处满汉官兵速赴袁州萍乡诸处同副都统席山杨古代总兵官赵应奎等协力剿贼疏通道路仍间道移会安亲王若可发长沙兵量行速发夹剿

丙申

上谕大将军顺承郡王勒尔锦等曰尔等故违指授迟延时日以致逆贼得间四出应援今荆岳之兵安处日久马皆肥壮着将军穆占速赴湖广简选荆岳彝陵士马由岳州趋长沙接应安亲王兵若长沙军无虞或出彝陵或取岳州或由荆州渡江便宜进发

十二月己巳

上谕兵部贼众来援吉安又声言犯萍乡贼帅马宝等率贼兵已至永新安福竝欲为吉安救援朕思逆贼吴三桂知我荆岳大将军等断不进兵故身往常德调集贼众并力於长沙吉安将军穆占速选荆州士马相机前进以分长沙吉安贼势平定湖南大将军简亲王喇布等严饬所部保固疆圉

康熙十六年丁巳正月庚寅抚远大将军都统大学士公图海奏称二月进取汉中兴安将军侯张勇以为宜俟秋成再举

上曰大兵即克复汉中兴安须设重兵重兵一设则运饷维艰若俟夏秋进取又顿兵旷日虚糜粮糗今将军穆占方剿吴逆机不可失图海等其暂停汉兴之役留满洲蒙古兵一万同绿旗兵防守秦州诸隘分兵五千遣大臣一人统赴荆州到日顺承郡王等量留官兵防守荆州彝陵诸处乘穆占由岳州长沙进取湖南时相机渡江破贼

庚子

上谕兵部简亲王喇布疏报来援吉安贼众宵遁或因将军穆占进兵长沙闻风掣回或谋潜袭袁州俱不可料今吉安已调建昌诸处官兵简亲王喇布等宜乘机速行攻取吉安至於袁州所系甚大宜分兵固守勿致疎虞总督董卫国其檄令总兵官赵应奎协力防御

三月甲申

上谕议政王大臣等曰今闽地悉定大将军安亲王围困长沙已久将军穆占复帅师进剿将军鄂内统兵水陆赴岳歼灭吴逆荡平诸寇在此一举康亲王宜及兵威大振之时分遣官兵同耿精忠兵进取潮州其进剿留守机宜速议以闻又大兵分路进击逆贼不暇窥贛其授署副都统莽依图为镇南将军精简士马夹攻广东以副都统额赫纳署副都统穆成额参赞军务令侍郎舒恕量留甲兵同巡抚佟国桢总兵官哲尔肯镇守贛州诸处至江西建昌诸路大兵俱已撤赴吉安简亲王军士卒甚众酌拨每佐领兵三名合在贛大兵令莽依图共选每佐领兵六七名俟康亲王所议俞旨到贛即率之前进

乙巳

上谕议政王大臣等曰据荆州坐塘笔帖式报贼犯远安旋复退回逆贼或因我兵进取长沙岳州虚声牵制亦未可知大将军顺承郡王勒尔锦等应作进兵之势扬言渡江以疑贼兵寻定远平寇大将军和硕安亲王岳乐等奏逆贼吴三桂纠聚贼众死守长沙

上曰勒尔锦等作速勒兵临江再令图海整饬陕西满汉官兵进扼汉中要路移檄声言进兵以分贼势倘机有可乘即行进剿

丙午

上谕扬威大将军和硕简亲王喇布等曰尔等将王府佐领下兵及大兵内选有马者每佐领三名速发赣州此兵到日将军莽依图等即选足每佐领七名速赴韶州仍与尚之信相闻令立图内应袁州乃安亲王 大兵後路其以满洲兵每佐领四名以上及自安庆发往绿旗兵一千竝付额楚俾赴袁州屯驻为安亲王後继前所送马及礮抵袁州付与来迎官兵额楚仍添兵护至长沙其吉安新复简亲王可偕多诺统每佐领兵三名及自安庆发往绿旗兵五百名竝城守官兵驻镇吉安更拨每佐领兵一名添发赣州令侍郎舒恕统领防守其余缺少马械之兵竝绿旗官兵付副将军希尔根提督赵赖令回南昌整缮候调简亲王同理事官麻尔吉酌遣干员齎谕招抚原任贵州提督李本深巡抚曹申吉广西提督马雄将军孙延龄等孙延龄果否身死竝着侦探的信奏闻

四月戊午抚远大将军都统大学士公图海奏称臣令驻防秦州宝鸡官兵进逼礼县驿门诸处随移檄声言大兵分路进剿今欲亲统重兵深入四川但恐时多霪雨输挽艰难当俟机会酌量前进

上曰今将军穆占协剿长沙贝勒尚善与将军鄂内水陆攻岳故逆贼吴三桂亲赴长沙集诸路贼兵死守湖南我兵若乘此机各路进剿则吴逆指日可灭计在陕官兵为数甚多当此逆贼势分之时若不进逼四川则坐糜粮饷殄贼无期大将军公图海其仍遵前旨速行进?

五月乙巳

上谕兵部前安亲王岳乐等疏请红衣礮随已发往今闻袁州到长沙道路险阻运礮夫役既多为费实繁若礮一到即得长沙则解送固宜倘难猝拔则送亦何益今安亲王兵久入湖南马多致毙已自京拨马陆续发往今将军穆占率精兵会剿犹未克取长沙与贼对垒如故我兵甚众刍秣无多即马到长沙势必坐致疲瘦不堪驱策可令马匹暂停袁州红衣礮暂留南昌温代先赴安亲王岳乐将军穆占等军前详议以闻

六月辛酉

上谕各省王贝勒大将军将军总督巡抚提督等曰逆贼吴三桂背恩倡乱散布伪劄诱惑兵民迫胁官吏以致生民涂炭所在骚然今各路大兵剿抚竝行平凉福建广东等处相率平定

文武大小官员兵民人等俱被恩赏安插得所惟湖南四川云南贵州官员兵民人等仍陷贼中未得归正念此等俱受国恩必非甘心从贼盖有怀忠义之心而无脱身之路者亦有身被迫胁惧罪疑畏者今大兵云集不日荡平贼寇玉石难分朕心深为不忍今特颁敕谕概示招徕凡在贼中文武官员兵民人等悔罪归正前事悉赦不问仍照常加恩或有擒杀贼首投献军前及以城池兵马来归者仍论功优叙尔等即宣布晓谕以副朕宽仁矜全之意

庚午

上谕奉命大将军和硕康亲王杰书曰据笔帖式塔穆哈图报潮州刘进忠已於本月初六日投诚今刘进忠复遗书吴三桂为平南王尚之信举发是刘进忠投诚本非真心不过势穷就抚耳又总兵官刘炎所遗吴三桂书亦皆搜获其心迹与刘进忠略同此等皆心怀反侧久留潮州必致生变若果已投诚康亲王等即托言欲与相见以计撤回留驻福州设或迟疑不至速行奏闻刘进忠等既撤则令将军喇哈达以兵之半守漳泉都统赖塔率其半守潮州仍令尚之信遣原任潮州总兵官王国栋尽率其标兵诣赖塔处协守

七月丁酉

上谕兵部将军穆占速行分道进剿湖南其进兵机宜仍行奏闻又大将军贝勒尚善等前奏须得鸟船始可破贼已命江苏巡抚慕天颜督造今将军穆占即统兵到岳州亦必俟鸟船告竣然後进攻度鸟船到彼正当隆冬水涸难以前进若俟来年水长进兵势必坐守岳州虚糜日月穆占宜勿赴岳州以兵会简亲王规取衡永诸处遏贼後路如此则粤东得以宽缓而粤西欲降者亦可乘间来归穆占等其即率岳州官兵速赴茶陵攸县与简亲王兵合协力进取衡永诸处

九月丁酉

上谕议政王大臣等曰逆贼吴三桂凭江湖之险抗拒大兵为日已久若不速行剿灭湖南民困无有已时闻逆贼多备鸟船战舰死拒我师我师亦宜倍制鸟船沙船多载粮米由岳江入洞庭尽占江湖断贼粮道夹攻岳州如事属可行应遣贤能大臣官员会同督抚尅期造船多设水师营兵同大兵齐进期於一举灭贼但增船破贼事关紧要大将军顺承郡王勒尔锦贝勒尚善等身在地方与贼逼近应否举行着速议以闻勒尔锦等议逆贼造船未已长江关系最重目今贼舟渐增若豫行添造鸟船沙船以载数月之米甚属有益

上命添造鸟船六十艘沙船二百艘户部尚书伊桑阿赴江南同该抚速行督造俟船将告竣量发绿旗官兵前往

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十四

# 卷十五

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十五

武功三

康熙十七年戊午正月庚辰征南将军都统穆占奏称吴逆自茶陵失守馈饷不给军士胥怨民多远避但茶陵等地方新复亟须坚守臣俟安亲王等诸路兵知会到时相机进取湖南若逆贼韩大任等逸入楚境江西大兵宜追蹙至湖南庶贼可扑灭新复地方亦得无虞

上曰前命平南王尚之信率兵赴韶州会将军额楚等由乐昌进宜章郴永其进兵可否尚之信等尚未奏知穆占所领陕西荆岳诸处将士皆经简择平定湖南惟此精兵是赖兹当逆贼穷蹙之时即宜速定湖南殄灭凶丑不可待尚之信等兵坐失机会至江西大兵现在征讨韩大任平贼之後自有措置岂可悬揣即行指示穆占亦不必待江西兵至湖南即鼓行灭贼亟靖疆场安亲王亦宜速遣提督赵国祚赴茶陵其逆贼地方失守军怨民遁情形可移会荆岳长沙大将军王贝勒等知之

二月辛未

上谕兵部傅弘烈既以兵少请济师平南王尚之信可发精锐万人多备火药火礮速赴广西应援将军赖塔会同靖南王耿精忠选藩下兵千人竝刘进忠标兵五千人付与都统马九玉亦令疾趋广西从莽依图傅弘烈等并力破贼莽依图傅弘烈以谋勇兼备竝见倚任宜共相和洽同心协衷谋济国事满汉兵士务令辑睦俟尚之信马九玉等兵及前所调将军额楚等兵至或一路进发或满洲绿旗分二路进发公同详酌定议以闻

三月戊寅

上谕兵部顷以江西底定因命大将军简亲王进取永州宝庆遣将军舒恕防守韶州南雄相机而行又令平南王尚之信发兵赴广西调将军额楚等自肇庆赴梧州今诸路竝进灭寇恢疆正在今日总督金光祖又称贺县开建乃粤东门户最为紧要地方守此二处则兵饷可由封川挽运今閱报文将军莽依图傅弘烈自平乐回军倘莽依图等还至肇庆德庆俾贼得据贺县开建为死守之计则复图进取良属不易梧州诸处将不可保即恐东粤亦或至动摇莽依图等宜固守贺县开建诸处如遇有机会可乘即行前进金光祖督运粮饷以给大军毋致有悞

甲申

上諭议政王大臣等曰岳州前後船艘多於賊數倍合此船破敵何難之有乃尚善統大兵駐岳已經數年未一大創賊寇今大將軍安親王岳樂既克平江江西湖廣道路已通俟公溫齊等兵與陝西調往之兵抵岳州日尚善可率所部大臣及每佐領兵五人赴長沙駐守令安親王率所部大臣選每佐領兵五人恢取岳州其進取岳州時應遣將軍鄂內率舟師前進陸地則令滿漢官兵實土蘆囤排列挨牌進逼賊壘晝夜火攻俾賊水陸應援不暇江之南岸石首縣城即宜攻取令水陸兵連營江岸或另立一營扼湖之險更於南潯港地方水陸立營斷賊後路安親王總統官兵相機剿援庶為有濟不必令舟師往泊君山無用之地若准此而行斷賊餉道必能克取岳州矣

乙酉

上諭议政王大臣等曰韓大任既抵福州其江西追剿官兵度已回汛大將軍簡親王宜乘此機會統率大兵亟剿湖南逆賊一應機宜可與將軍穆占定議或并力會剿或分道進發相機速行一面奏報尋征南將軍都統穆占奏請令簡親王兵與臣所部兵會合一路自茶陵取郴州耒陽諸處即自永州渡江直向衡州

上曰簡親王整頓軍馬速與穆占會合詳加籌畫令江西萬無他虞保固茶陵諸處及大將軍安親王後路然後會師一路進發平定湖南其護軍統領哈克山追剿韓逆直抵福建軍士馬匹羸乏可將現在南昌馬一千解至簡親王軍前均給缺馬軍士又

諭曰今逆賊侵犯潯州諸處梧州高州所關最要將軍莽依圖可駐鎮梧州若遇高州諸處有警即行應援將軍巡撫傅弘烈整頓士馬俟進兵平樂桂林與將軍額楚都統勒貝署副都統穆成額同行如兵力未足許於莽依圖等兵內量調前進

丙戌

上諭撫远大將軍都統大學士公圖海曰卿前疏言秦地遼濶留守兵單今當進取漢中興安之期度果萬无一失有易復之機仍行進取但秦地所系重大卿等親率大兵前進而王進寶孫思克等倚任諸臣俱在戎行脫行後更有他虞殊難遏御宜暫停漢興之役固守所在要害廣布恩威從事招撫俟後有可取之機再行奏聞閏三月辛丑朔揚威大將軍和碩簡親王喇布奏報麻爾吉等抵吉安稱孫延齡為吳三桂所殺馬雄病死

上曰馬雄孫延齡雖死其餘黨尚踞粵西理事官麻爾吉等仍同簡親王軍偕行以朕赦罪論功之意概行曉示其被脅從賊之人有悔罪投誠者即行招撫

丁巳

上谕兵部今当逆贼震动之际穆占急宜进兵郴州耒阳以分贼势耒阳诸处克复即於上游渡江断贼归路与安亲王协力剿寇如江未可渡则作渡江之势略定沿江北岸地方以张安亲王大军声势

庚申

上谕兵部据将军穆占奏伪将军林兴珠赴大将军安亲王军前投诚逆贼俱无固志岳州长沙相距颇近贝勒尚善必已闻知前尚善等疏称俟添造鸟船皆至前破湖贼今方逆贼震讦之时若有隙可乘不必俟船齐备即以现在船只进攻仍录穆占所奏示尚善及顺承郡王知之

己巳定南将军额駙华善奏称茶陵为江西门户重地将军穆占留兵甚少恐吴逆乘间自衡州出犯安仁攸县诸处请增发大兵为防御计

上曰茶陵攸县关系江西全省将军穆占因闻安亲王渡江故率兵深入乃安亲王实未渡江倘逆贼间道来侵江省可虑简亲王与将军华善前锋统领希佛学士萨海等共商镇守茶陵诸处以兵付护军统领哈克山由穆占进兵之路急行追及并力破贼穆占军前声息及逆贼情形简亲王不时奏报

四月甲戌

上谕议政王大臣等曰韩大任之兵新经招抚不宜聚处一军着大将军康亲王参赞大臣将军耿昭忠及该督抚提等详议将抚提标旧兵与新附之兵相参配合以足兵额其统辖官员着该督选择题补

五月庚子朔

上谕兵部詹事宜昌阿奏称水陆大兵进攻岳州贝勒尚善等宜熟计万全以期速克既克之日即乘虚速取常德澧州诸处勿令贼得为备尚善等前以所在逗留贻悞大事今宜殫心竭力勉图自効毋得仍蹈前辙玩日稽时

六月壬辰

上谕兵部览大将军简亲王等奏逆贼以大队犯永兴有必死之形由我军每佐领一二人或数百人所在遣防兵势太分以致失利将军穆占大将军简亲王其速收可缓之地所有防兵还驻要害会合羣力大创永兴贼锋务期剪灭凡摧寇破贼必审已量力可击则击之如贼衆我寡即宜调集诸路合为一军壮其声势以图攻剿倘株守新复城池以已经驻镇憚於旋师迟留疑畏於大事殊无所济尔部明白移文速传示穆占简亲王知之

乙未

上谕征南将军穆占曰今逆贼既并力郴永将军穆占可尽撤闲地防兵击败犯郴贼寇保固广东江西勿致疎虞并令大将军安亲王速遣兵赴大将军简亲王军至日简亲王等大振军威剿除郴州永兴之贼更令广东韶州总兵官尚之瑛遣副将一员率乐昌绿旗兵二千速赴郴州听穆占随宜调遣仍授和硕额驸华善将军印驰至永兴总统镇守以署副都统多诺参赞军务至於硕岱等失利即宜逮系严加处分但因穆占调取官兵所在分防致兵力单薄遂尔失机其悞事之罪穆占及硕岱俱不可辞硕岱等各暂留原任立功赎罪

是日

上谕康亲王杰书等曰顷闻海澄援师退回朕心甚为被困官兵忧之此非寻常事宜奋力急为救出切勿迟疑畏难满汉官军闲散人及厮役有能倡率冲敌直过潮沟抵於海澄救出被困官兵者准克复上等府城例从优议叙给以官职将军以下将士即从前屡有失利退缩之罪俱从寛宥不必顾恋城池但使被困官兵得出即为克奏肤功也大将军康亲王将军赖塔喇哈达总督姚启圣提督石调声等概行晓谕满汉官兵期慰朕怀

丙申

上谕兵部将军穆占大将军简亲王克复永兴茶陵等九州县之地我兵立营及贼垒所在令详悉绘图具奏岳州水陆驻兵形势并贼所立营亦令詹事宜昌阿详悉绘图具奏

七月甲辰

上谕议政王大臣等曰据福建所报海贼刘国轩等攻取同安水陆犯泉州前大将军简亲王奏永兴诸处贼势稍退已饬将军穆占撤闲地之兵镇防险要而大将军安亲王所遣援师已抵攸县岳州大兵复水陆齐举贼欲深入能不惧归路阻絶耶向以永兴警急江右可虞因令署副都统岳尔多率师赴江西今闽中事迫岳尔多仍率师赴福建并移文江浙督抚将军等速各拨马千匹给岳尔多兵俾兼程驰往副都统马思文自京率往汉军兵四百名亦与岳尔多同行移文大将军康亲王备夫船於浦城迎取大兵勿致有悞将军王之鼎标兵六百名不必率往福建可仍留京口现今所发汉军兵一千令副都统官保率赴江西南昌俟陕西所遣兵至江西视何处当用即协力从事竝移会将军穆占大将军简亲王知悉

是日

上谕兵部福建海逆猖獗事势急迫因令前赴江西署副都统岳尔多仍率兵赴福建江西关系重大其传示将军穆占大将军简亲王等今前进击贼尚非至急惟击退侵犯永兴诸处逆贼俾不能进薄江西福建乃为最要穆占等其同心详酌力御贼寇保固江西使万无一虞以副朕怀



辛酉

上谕兵部顷因海逆猖獗侵犯漳泉已调靖南王耿精忠侍郎达都率潮州兵往援今若撤还副都统尚之璋则潮州止余总兵官马三奇驻守宜令尚之信速趣提督侯袭爵前赴潮州并量发官兵以补尚之璋之缺同侯袭爵马三奇协力固守又

谕曰海逆犯漳泉事在迫急浙江总督李之芳巡抚陈秉直量留兵守浙江而於各营兵内酌便抽选二三千人遣往延平至浙江兵丁屡经调发福建浙地兵力单薄该督可召募有资力壮健兵丁五千人分隶各营

壬戌

上谕安远靖寇大将军多罗贝勒尚善曰我船甚多诸将亦衆公温齐副都统杭奇德业立等似宜酌遣一员於陆路贼虽各路赴援谅皆小舟少有巨艘况巨艘非旦夕可成我沙船兵亦宜抽调陆地调时毋令贼觉诸路调来绿旗之兵酌量令屯九贵山或贝子章泰或公温齐副都统杭奇以一人驻守立营之时仍宜兼顾三眼桥地方贼若遁走即宜进剿盖兵贵神速也贝勒等视贼得毋藐忽贼虽非我敌犹必慎为之防至岳州一克即宜分兵往取湘陰长沙前虽有敕旨命克复岳州之後即进取常德澧州今思深入常澧贼或袭我後馈饷不易渡马亦难总宜临时相机而动至於贼船仅四十余我船甚多宜载火器於小舟乘夜扰之勿使宁息近岳州安塘笔帖式报我兵夺贼一船复沉其一船詹事宜昌阿身在彼地嗣後一切应报事宜可悉奏闻

八月甲申

上谕议政王大臣等曰今日之事岳州最要不可不速行攻取乘此民心讐贼羣相内向之时朕欲亲统六师躬行伐罪若逾此机恐满兵不耐水土因而挫锐所遣诸将军破贼无期後虽勉图终成掣肘国家所赖在於金谋此外如有早戡逆乱救民水火之策竝宜预筹尔等其详议之

九月辛丑

上谕议政王大臣等曰览大将军简亲王等奏逆贼吴三桂已死渠魁既殒贼必内变诸路将军宜乘时各统大兵分路进剿克复疆圉永兴贼既遁去简亲王宜由茶陵赴安仁进逼衡州其永兴官兵劳苦已久可驻茶陵诸处暂息自陕西调来副都统夸岱所领每佐领兵二人不必遣赴茶陵即留岳州军前大将军贝勒察尼等务水陆夹击速取岳州

戊申

上谕兵部吴三桂已死诸逆溃变之际宜急取岳州动支如许钱粮营造舟舰入湖三月余况

将军林兴珠献策甚明俟湖水尽涸我船与贼船俱无所施彼时多掣舟师无不足用我之战舰兵卒颇属有余岂可推诿使大事中阻今宜於南靖港君山高家庙诸处俱立营垒断贼粮道务须困取岳州至於君山高家庙诸处既需大队应令副都统官保所率之兵毋往江西改赴岳州听贝勒察尼调遣如舟师必难久顿湖中其速以状闻

甲子

上谕兵部乘此逆贼惊扰之时大兵亟宜前进剿抚竝用绥定疆圉授平南王尚之信为奋武大将军统兵赴永兴郴州诸处会合大将军简亲王将军穆占等并力同心以图进取将军莽依图额楚傅弘烈总督金光祖等各驻本汛相度机宜规定广西应给尚之信敕印准满洲大将军等例遣内阁官员齎往

十月丙申湖广巡抚张朝珍奏称各路军前投诚官兵发臣标効力者甚衆其间臧否莫辨请以臣标投诚効力各弁竝嗣後自军前?来官兵分布安插於江南河南内地

上曰今值剿抚竝用之时若以现在武昌投降官兵安置江南河南诚恐後此来归者必致疑畏不前大将军顺承郡王贝勒察尼等其勿令若辈聚处随宜分布安置於湖广诸处俾各得其所

十一月辛亥

上命加山东按察使何毓秀太常寺卿工部郎中张光岳太仆寺卿奉天府治中佟啓圣通政使司左通政安邱县知县胡端通政使司左参议行人司行人崔啓元鸿胪寺卿武乡县知县齐漳通政使司左参议各齎

敕谕往诸路大将军军前招抚陷贼官员兵民

敕曰自逆贼吴三桂煽乱以来所在官民多被诱惑故陷身贼中莫能自拔朕已洞悉情形屡颁敕谕广示招徕开其自新之路今逆首吴三桂已伏天诛念在彼胁从文武官员兵民人等皆朕赤子素受国家恩养必非甘心从逆或志存忠义迟回待时或势被迫驱无由归化朕甚悯焉兹特命尔等齎敕往陕西大将军长沙大将军岳州大将军征南将军扬威大将军荆州大将军等军前特行招抚尔等曩在滇黔素多亲识易於开导必相信从须宣布德音相机劝谕务令陷贼人员翻然悔悟争先来归有密谋内应擒斩贼渠及率领兵民献城纳款者俱赦其前罪论功叙録加恩安插俱令得所煌煌谕旨昭如星日尔等奉兹委任务须殚心筹画勿失事机或亲身径前招抚或先遣人晓谕後乃亲往俱同各将军等酌量而行若招抚成功量功大小从优议叙加恩尔等其勉图报効以副朕定乱安民至意

康熙十八年己未正月甲子

上谕兵部顷笔帖式马尔赛去时令其传谕诸将军今岳州既经克复应发兵一枝从荆河口渡江立营於华容石首之地以为根基若由华容石首前往常德澧州一路水潦难行且诸将军亦曾奏此路水泽甚多艰於前进今在岳州满汉官兵甚多宜乘贼未及固守湘陰之先水陆竝进乘机急取湘陰即望长沙进发若少迟疑观望则贼坚守城池湘陰江中水洲恐贼立营其上预备火器我舟师欲过甚难不可不乘其未及坚守城池江洲之先急取湘陰也岳州地最险阻偏师足守其取湘陰往长沙应令贝子章泰署前锋统领杭奇率每佐领满洲甲兵十名提督桑额总兵官万正色全率所部兵并多发绿旗兵整備大礮鸟枪火器水陆夹攻着行文大将军贝勒及安亲王等知之

二月戊辰安塘笔帖式报大将军安亲王岳乐已复长沙今亟进取衡州

上谕贝勒察尼等曰贼失岳州长沙诸要地正当惊惶骚动之时乘机进取衡州击灭逆贼殊为要务宜将岳州所有大兵并船礮速行多拨增发大将军安亲王军前大将军贝勒察尼等除先遣总兵官张忠标兵外今更速发满洲大兵多拨船礮迅赴长沙此剿灭衡州贼衆较诸处不同所调岳州舟师火器早至一日於大事有一日之益调遣船礮官兵如或稍迟使贼江中置桩预为坚守阻我舟师致迟进取衡州事机则皆贝勒察尼悞之也谕到贝勒察尼即拨舟师火器速发安亲王军前於灭贼机宜勿致有悞其大将军简亲王等亦已率兵进取衡州两军相合之後总用大将军安亲王印信协力剿灭逆孽恢复衡州诸路如有分兵之处仍各用大将军印信施行

甲戌先是海逆郑锦乘耿精忠叛窃据漳泉诸郡後耿精忠降诸郡以次收复郑锦屡败仍遁入海而厦门金门犹为所据

上欲乘胜荡平海逆乃厚集舟师规取厦门金门二岛以图澎湖台湾又以曩时征取厦门金门曾用荷兰国夹板船

特谕荷兰国王令具夹板船二十艘载劲兵协力攻取二岛至是奉命大将军和硕康亲王杰书等议奏战舰水师未备荷兰国舟师又不能预定来会时日海贼现据海澄厦门之固势难急图

上曰征剿海寇调发满洲绿旗官兵甚多福建经制兵外又增兵数万授水陆提督为将军以统之宜乘此兵力速行进讨若如大将军康亲王所奏需以岁月则供亿烦费必将撤还大军海寇何由残灭其令康亲王会同将军总督巡抚提督等详议以闻

是日

上谕平南王尚之信等曰今长沙岳州诸处俱已恢复伪将军总兵文武官员船舰兵卒来归者甚衆又彝陵州对岸之镇荆山盘踞贼寇尽行潜遁分逐诸路溃败之贼多所斩戮大将军顺承郡王等已渡江平定湖南安亲王又进取衡州诸处宜乘此各路贼寇涣解之际平定广

西大将军平南王尚之信将军莽依图舒恕额楚傅弘烈总督金光祖等勿失事机速定广西

乙亥

上谕大将军和硕康亲王杰书等曰剪灭海寇事綦重要其令江南浙江总督京口将军发江浙战舰各百艘於进剿期内送至福建仍许福建增兵二万大将军康亲王等并檄荷兰国迅调舟师务令如期而至

庚辰

上谕议政王大臣等曰今岳州彝陵之贼以舟来降长沙之贼焚舟溃遁诸处贼寇困蹙逃窜无有舟楫宜固守荆襄乘机速灭贼党贝勒察尼酌留官兵於岳州水陆齐进速会顺承郡王军合力亟取常德沅州镇远等处至恢复常德诸郡之後顺承郡王勒尔锦贝勒察尼等会同安亲王简亲王等作何进取云贵定议具奏其大兵进讨云贵宜设将军总督巡抚提督随大兵进征吏兵二部开列应补者以闻

三月庚戌

上谕奉命大将军和硕康亲王杰书等曰顷因定海舟师少已特增兵今荷兰国人为寇所阻何以不行扑灭俾得前行音问既未能通舟师必不能如期而至如此则我兵遇有机会可不俟荷兰舟师即进剿耶抑必俟彼船至日方举事耶兹以剿荡海寇增调师旅修理战舰糜费军饷甚多大将军王等宜规取厦门金门速靖海氛不必专候荷兰舟师

四月壬午

上谕议政王大臣等曰览学士孔郭岱等奏报广西悉已底定宜速移文令简亲王及穆占等之兵不必进广西但莽依图舒恕额楚等兵力稍单简亲王及穆占等兵内选有马精兵每佐领三人或四人遣前锋统领希佛率赴莽依图等军前於通云贵要路宜从何路协力前进公议进发至於广西现无官兵平南王或宜同大兵前进或宜驻广西适中要地亦同将军大臣等共议而行其彝陵兵徒尔坐守似属无用宜整缮甲兵自归州巴东作进兵状以制之巴尔布本在彝陵即遣彼往归州巴东効力并令都统噶尔汉等率兵同总督杨茂勲提督佟国瑶等前进宜由何路协力扑灭山贼或规取兴安听其酌量而行

康熙十九年庚申正月戊戌

上谕议政王大臣等曰进取四川以满洲大臣为後应最为要策宜令将军吴璠继将军王进宝军之後将军鄂克济哈继将军赵良栋军之後陕西已有将军张勇提督孙思克巡抚杭爱巴锡等镇守宜令大将军图海帅师前赴汉中接济进蜀诸军粮饷鄂克济哈率汉中满兵驰往合之吴璠官兵均分统率以为王进宝赵良栋後继转饷源源不絕相随而进

丁未

上谕议政王大臣等曰将军赵良栋攻克白水坝青川招抚龙安成都指日可复将军王进宝亦分兵三路於正月初旬进逼保宁逆贼王屏藩等困迫必各溃遁其移檄严饬杨茂勲徐治都等乘机急取重庆夔州剿御逆寇如迟延观望悞此事机严治其罪

甲寅

上谕议政王大臣等曰将军赵良栋等军深入四川保宁重庆夔州诸处速宜平定将军吴璠王进宝等军虽抵保宁必於蟠龙山相对立营果尔则恐稽时日今宜面蟠龙山分兵坚垒别遣一军渡昭化江壁锦屏山下满汉兵合势以规取重庆夔州若下重庆诸处则保宁贼兵归路阻絶可计日而克假使贼衆势迫来降则民免重困而全蜀亦不久大定矣

二月辛酉朔

上谕议政王大臣等曰今成都保宁皆已恢复宜乘此机会速定云贵四川既平湖广已属内地其令顺承郡王勒尔锦贝子准达都统范达礼等尽率所部兵泝流而上规取重庆顺承郡王等即於重庆驻守将军吴璠鄂克济哈与赵良栋等同进取云贵吴璠鄂克济哈於顺承郡王军中简精锐马兵将之前行总督杨茂勲提督王之鼎驻守成都将军王进宝驻守四川徐治都还军守彝陵荆州等处

丁卯

上谕议政王大臣等曰成都保宁顺庆诸府今已恢复四川底定湖广大兵今正分道进定云贵其广西满洲緑旗大兵休息日久亦当乘机速进大将军简亲王留每佐领兵一人於桂林其余官兵尽率之往屯柳州大将军平南王可驻守贵县将军莽依图马承廕都统马九玉总督金光祖等可各率所部官兵并酌调平南王藩下官兵分道进取云贵

庚辰

上谕议政王大臣等曰今四川底定大兵宜速赴重庆进取滇黔否则逆贼复犯重庆亦未可料其移文吴璠鄂克济哈即驰赴重庆精简士马进取云贵

三月癸卯

上谕兵部顷简亲王喇布奏马承廕反叛恐此贼自广西侵犯广东今闽疆悉定可令将军赖塔即率满兵二千驰赴潮州防守广东全省

己酉

上谕议政王大臣等曰今枫木岭辰龙关俱已恢复四川广西悉皆底定云贵不日可平若行招抚更可速定云贵人民得早安其生张起龙本吴三桂属下之人宜使招抚云贵可赏其罪着捧敕前往

七月辛卯

上谕兵部初马承廕及所部官兵背叛蹂躏疆土扰掠生民罪恶已极後见湖南平定广西恢复穷迫请降朕欲生民早获宁息悉贯前罪封以伯爵授为将军仍令管兵标员亦分营补用及大兵规取云贵无故背恩复叛致悞征讨大事今因兵败势蹙复窘急来归令内阁学士萨穆哈速往拨满汉官兵押送马承廕及标下守备以上官来京其标兵令督抚提镇等分隶各营汰其老弱回兵亦宜散置切勿令其党聚广东诸处被难人民详察遣还故土提督哲尔肯可屯驻柳州

八月庚申

上谕兵部厦门金门诸处悉设兵镇守福建大兵宜量行撤还将军喇哈达副都统马思文率千人守福州副都统纪尔他布倭申巴图鲁率千人守漳州两军悉令喇哈达统辖余兵一千令尚书介山侍郎吴努春率之回京

又

谕曰闽省近海要区总督提督标下可各设五营兵五千人巡抚标下设二营兵千五百人至通省防守兵依旧额留五万一千七百五十人余一万九千九十五人俱行裁汰提督驻镇海澄其铜山厦门诸处分设总兵官副将镇守现在水师留二万人其余五千人亦行裁汰

己巳

上谕兵部广东省会地关重要合计广西现有大将军简亲王兵及将军莽依图兵与都统马缉等率往之兵每佐领共有二十八人今宜檄简亲王令简军中精骑每佐领五人俾副都统博济率之驰赴将军赖塔军协守广东省城并檄马缉速赴简亲王军至所撤福建兵已就道者令其来京如未啓行仍暂留福建总漕帅顔保现在江西吉安令率所部速赴广东视南雄韶州何地紧要酌量驻镇以安辑人心

壬申

上谕扬威大将军和硕简亲王喇布曰闻南宁距云南边界路仅七站向因逆贼尚之信马承廕背叛或未可轻进今若辈皆已无济复何所瞻顾而迟延也现在广西满兵每佐领几三十人宜精选强壮有马者十人益以绿旗官兵协力进剿贼可立破矣王其速图之进兵之时令巴尔堪哈尔哈齐为夸兰大责以军前报効

闰八月己丑

上谕兵部今进取云贵为期已近将军吴璠率兵进泸州取合江仍两路进取云南湖广大将军将军总督等宜速取贵州大将军公图海等趣所调陕西兵往四川海潮龙感戴国恩率衆献地先机効顺可嘉授为怀忠将军令统所部为前导破贼至贼帅张国柱李本深王会高啓隆俱系旧臣或一时迫胁降贼亦未可定宜如招马宝等例书赦罪敕驰驿发赵良栋相机招抚陕西四川督抚等速运粮饷毋悞两路大兵进剿机宜

九月乙丑

上谕议政王大臣等曰据将军噶尔汉等奏逆贼谭弘率衆至巫山谭弘小丑耳我兵但奋力进击彼自渐灭将军噶尔汉提督徐治都等其溯江而上速定疆圉大将军贝子章泰等果如前疏订期亟进克复贵阳贼势何至滋蔓今宜令章泰同将军蔡毓荣等於文到日速进取贵阳以图遵义四川诸将若能奋击云南贵州出犯之贼则谭弘无所逃匿自当摧陷今宜令专意进剿勿复观望前此曾命总督哈占驰赴将军吴璠军今宜令由保宁江直进破谭弘以会吴璠并行文大将军图海酌发军中满汉兵为之声援以分贼势至运饷四川不由彝陵江俱自陕西转运叙州兵饷度可无虞顷令护军统领佟佳等率增发四川满兵赴原指之地其汉军官兵一千人文到日即由荆门州一月内赴彝陵镇守着户部郎中额尔赫图驰赴彝陵趣将军噶尔汉等兵速灭谭弘诸贼额尔赫图凡事俱准苏赫臣例以行吏部郎中范承勲亦驰驿追及副都统张长庚军趣其兼程而往一月内抵彝陵范承勲仍自彝陵趣官兵追及噶尔汉等军与额尔赫图同趣官兵击贼

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十五

# 卷十六

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十六

武功四

康熙二十年辛酉正月丁巳

上谕贝子章泰等曰广西大兵已入滇境贝子章泰等兵宜乘机速行进剿今大兵秣马贵阳已经月余且铁索桥盘江最为要地提督桑额等既报逆贼欲据盘江贝子章泰总督蔡毓荣等不躬亲驰赴扼据要害扑灭贼寇止遣萨克察巴图鲁等率兵前往殊非事宜章泰等其亲统大兵迅往剿贼平定滇中勿失机会

丙子

上谕兵部今谭弘党羽俱已就戮万县诸地悉经收复将军噶尔汉其简选士马疾赴重庆尽统贝子准达军速定遵义副都统得尔德等兵亦听调用万县地处狭隘难以饲马可趋至重庆秣马而进噶尔汉军中効力有年困乏无马者悉令准达率还荆州至於夔州要地令提督徐治都率标兵暂驻防守总督哈占可率所属兵驰赴叙州府与大兵协力前驱剿贼

十二月己亥以逆寇荡平

诏谕天下曰朕纘承丕绪统御寰区仰惟

天地眷佑之庥

祖宗付托之重

圣祖母太皇太后慈训之殷蚤夜孜孜勤求化理期於兵革寢息海宇乂安不意逆贼吴三桂负国深恩倡为变乱陰结奸党同恶相援抗违诏令窃据疆土滇黔闽浙楚蜀关陇两粤豫章之间所在騷肆骋痛毒吴三桂僭称伪号逆焰弥滋负罪尤甚朕恭行天讨分命六师剿抚竝施德威互济或繫颈於阙下或骈戮於师中擒捕诛锄以次收服乃吴三桂既膺神殛逆孙吴世璠犹复鸱张踞六诏之一隅延残喘以拒命朕惟贼患一日不除则民生一日不靖策厉将士屡趣师期於是虎旅协心进逼城下贼衆计穷势蹙通款军门约日献城凶渠授首师克之日市肆不扰边境晏如捷书既至上慰



郊

庙

社稷之灵下抒中外臣民之愤神人胥悦遐迩腾欢念自变乱以来军民荼苦如在水火披坚执锐卒岁靡宁行齎居送千里相望被兵之地既罹於锋刃供亿之衆复困於徵输朕悯恤民艰不忍辄加额赋间施权宜之令用济征缮之需意在除残事非获已而身处宫寝之内外廛闾阊之依中夜屡兴盱食不暇怒焉思治八载於兹今羣逆削平疆圉底定悉剪历年之蠹贼永消异日之隐忧用是荡涤烦苛维新庶政大沛寛和之泽冀臻熙皞之风体覆载好生之德秋肃必继以春温法帝王更化之模义正尤期於仁育诞告天下咸使闻知康熙二十一年壬戌八月庚寅初鄂罗斯所属罗刹劫掠边境

上遣副都统郎谈公彭春等率兵往打虎儿索伦声言捕

鹿以覘其情形将行

上谕之曰罗刹犯我黑龙江一带侵扰虞人戕害居民昔?兵进讨未获剪除历年已久近闻蔓延益甚过牛满恒滚诸处至赫哲飞牙喀虞人住所杀掠不已尔等此行除自京遣往参领侍卫护军外令毕力克图等五台吉率科尔沁兵百名宁古塔副都统萨布素等率乌喇宁古塔兵八十名至打虎儿索伦一面遣人赴尼布潮谕以捕鹿之故一面详视陆路近远沿黑龙江行围径薄雅克萨城下勘其居址形势度罗刹断不敢出战若以食物来馈其受而量答之万一出战姑勿交锋但率衆引还朕别有区画尔等还时须详视自黑龙江至额苏里舟行水路及已至额苏里其路直通宁古塔者更择随行之参领侍卫同萨布素往视之

十二月庚子

上谕议政王大臣等曰据郎谈等奏攻取罗刹甚易?兵三千足矣朕意亦以为然第兵非善事宜暂停攻取调乌喇宁古塔兵一千五百名竝置造船舰?红衣礮鸟枪及演习之人於黑龙江呼马儿二处建立木城与之对垒相机举行所需军粮取诸科尔沁十旗及席北乌喇之官屯约可得一万二千石可支三年且我兵一至即行耕种不致匮乏黑龙江城距索伦村不远五宿可到其间设一驿俟我兵将至净溪里乌喇令索伦接济牛羊甚有裨益如此则罗刹不得纳我逋逃而彼之逋逃者且络绎来归自不能久存矣其命宁古塔将军巴海副都统萨布素统兵往驻黑龙江呼马儿

康熙二十二年癸亥七月癸未

上谕户部兵部海洋险远风涛不测自明代以来贼寇盘踞岛屿出没靡常为害已久本朝平定闽省逆贼郑成功窜伏海岛侵扰沿海一带地方虽屡经剿杀未尽根株逆孽遁踞台湾蠢尔游魂尚恣窥伺自滇黔底定贼寇殄除独兹海外鲸鲵犹梗王化必须用兵扑灭扫荡逆氛

庶海隅安全民生乐业特命施琅为水师提督统领舟师竝飭该督调度会商相机征剿今克取澎湖已扼险要台湾逆穴指日歼灭立见廓清凡进剿军前所需兵饷米折应用器械及修理船只豫备物料各项钱粮所关甚为紧要应差部院堂官一员前往会同督抚速为料理不拘何项钱粮尽见在者准其动用毋致贻悞

康熙二十四年乙丑正月癸未议政王大臣等请

敕直隶山东山西河南巡抚每省派熟习火器兵二百五十人竝选贤能官各四员豫备火器送京师至日增?萨布素军前协攻雅克萨城

上谕曰疏内不请发禁旅良是但直隶各省绿旗兵未历战阵且黑龙江火器甚多不须增用朕意选福建投诚善用藤牌官兵见在八旗及安插山东山西河南者五百人令台湾投诚左都督何佑等率往萨布素一应咨题多属支吾借端延滞度四月进兵不过刈取田禾事

必无成此皆遣发黑龙江狂悖之人从中沮议不欲成事萨布素出身微贱高视若辈母敢有违用兵所关甚钜宜周详筹画期於必克倘谋事草率复似明安达礼等退兵则罗刹将益肆披猖矣当自京城选贤能大臣一员统兵以行俟克取雅克萨之日班师又?盛京兵五百人代黑龙江兵守城种地出征兵还亦令还盛京种地事宜遣户部大臣一员督理所云早熟之谷即内地春麦今我兵亦多种春麦及大麦油麦霜降前六日皆得收获则不因师出而旷一年田功矣藤牌兵给马二千匹带往盛京盛京各佐领亦派马二千匹照旧制严督饲秣候京城马到更代北行至马喇等所养马皆预备於齐齐哈尔屯此间催趲月杪可到闻此路间有缺水处不免贻悞今自盛京抵乌喇自乌喇经新设驿站路直且近当从此径抵黑龙江沿途马匹或有倒毙马喇以所备者足数补送如此则我兵马匹无虞矣藤牌兵各带礮弹或十圆或二十圆以行其饷银兵月给二两官月给三两又

谕议政王大臣等曰兵非善事不得已而用之向者罗刹无故犯边收我逋逃後渐越界而来扰害索伦赫哲飞牙喀奇勒尔诸地不遑宁处剽刦人口抢掳村庄攘夺貂皮肆恶多端是以屡遣人宣谕复移文来使罗刹竟不报命反深入赫哲飞牙喀一带扰害益甚爰发兵黑龙江扼其来往之路罗刹又窃据如故不送还逋逃应即剪灭今仰副

天心大兵逼临雅克萨城姑再传旨罗刹云前屡经遣人移文命尔撤回人衆以逋逃归我数年不报反深入内地纵掠民间子女构乱不休乃发兵截尔等路招抚恒滚诸地罗刹赦而不诛因尔等仍不去雅克萨特遣劲旅徂征以此兵威何难灭尔但率土之民朕无不惻然垂悯欲其得所故不忍遽加歼除反覆告诫尔等欲相安无事可速回雅库於彼为界捕貂收赋毋复入内地构乱归我逋逃我亦归尔逃来之罗刹果尔则界上得以贸易彼此宁居兵戈不兴倘执迷不悟仍然拒命大兵必攻破雅克萨城歼除尔衆矣如此宣谕後罗刹果回雅库为界即驻师於黑龙江设斥堠於雅克萨令疆圉帖然否则大兵酌量进止不如此宣谕今纵克取雅克萨城我进则彼退我退则彼进用兵无已边民不安尔等其详议以闻

四月乙未

上谕议政王大臣等曰黑龙江兵於是月起行五月中旬可至雅克萨城凡奏报军机自雅克萨至额苏里经黑龙江前来恐纤道迟延令理藩院侍郎明爱於杜尔伯特扎赖特派兵五百人竝索伦兵酌自墨勒根至雅克萨设驿奏报军机庶免贻悞明爱往来觉察驿夫粮食匮乏以索伦所贮米支給黑龙江以内每驿原设二十人应核减一半并入蒙古若蒙古兵五百人过多再为核减索伦効力勤劳传谕异日加恩以示鼓励

六月癸巳

上谕诸王大臣等曰治国之道期於久安长治不可图便一时当承平无事朕每殚心筹画即今征罗刹之役似非甚要而所关甚钜罗刹扰我黑龙江松花江一带三十余年其所窃据距我朝发祥之地甚近不速加剪除恐边徼之民不获宁息朕亲政之後即留意於此细访其土地形胜道路远近及人物性情以故酌定天时地利运饷进兵机宜不徇衆见决意命将出师深入挾伐然兵贵相机而动变化无穷惟恐诸将不遵朕指授致失机宜今收复雅克萨地得遂初心至於抚绥外国在使之心服不在震之以威近遣侍卫关保等往军前谆谕之曰兵凶器战危事古人不得已用之朕以仁治天下素不嗜杀尔其严谕将士毋违朕旨以我兵马精强器械坚利罗刹势不能敌必献地归诚尔时勿杀一人俾还故土宣朕柔远至意兹一一奉行朕甚嘉焉又

谕曰朕思凡事必周详审度方获实效不可轻率从事向者尚书明安达礼轻进至粮饷不继将军沙尔瑚达巴海等失计半途而归遂致罗刹骄恣而索伦奇勒尔鄂罗春等心怀疑贰朕询其失机情形一一详计今始奏功兵法云多算胜少算不胜詎可忽视且兵贵神速前逆贼吴三桂等叛朕思岳州系湖广门户遣人指示速战始克岳州遂一面进取四川以分贼势一面密谕大将军赖塔从广西趋云南於是诸省底定兵革休息然亦在将军等奋勉効力耳倘怠忽不奉行虽有良策亦何益焉

壬寅

上谕大学士勒德洪学士麻尔图图纳曰鄂罗斯入我边塞扰害鄂罗春索伦赫哲飞牙喀等处人民抢掠其家口虽屡肆凶暴朕不忍遽兴兵革故未即遣发大兵征讨数遣使晓谕鄂罗斯恃其辽远仍复抗拒益侵伐我边鄙之人肆虐不止用是遣大兵直抵雅克萨之城彼因困迫已甚而後归降爰遵朕命宥其困而後降之罪释之使还大兵迅速征行破四十年盘踞之鄂罗斯於数日之间获雅克萨之城克奏厥绩萨布素向来逗遛不进兵之罪应概从宽免又雅齐纳鄂山本获罪遣之人其所互告之事仍行察议今进剿官兵殊属劳苦令伊等暂回吉林乌喇地方於盛京打虎儿之兵酌量派往防守至雅克萨城虽已克取防御决不可疎应於何地永驻官兵弹压此时即当定议着大学士勒德洪学士麻尔图图纳同郎谈关保与议政王大臣等会议具奏

十一月甲戌

上大閱兵於王家岭先是

上諭兵部國家武備不可一日懈弛故事每歲必操練將士習試火礮爾部即傳諭八旗都統等整備軍容朕於十八日將親閱焉是日喀爾喀部落土謝圖汗子多爾濟厄爾德尼阿海台吉等以朝貢在京請於理藩院尚書阿喇尼轉奏曰臣等聞

皇上大閱甲兵遠方之人幸逢盛典願一觀軍容上曰從來撫綏萬邦在德教不在威武故兵不得已而用之今四海昇平偃兵不用然選練士卒簡閱軍器所以修武備昭法制也喀爾喀台吉既請往觀可允其奏至是八旗都統各率所部將士以軍禮分列至王家岭

上陞御座軍中吹螺發巨礮排槍竝發前後相繼聲絡繹不絕又命將士發紅衣巨礮及諸火器一時盡發聲震天地巨礮所擊樹侯欄牆莫不應聲而倒時阿海台吉及眾蒙古驚惧失色皆戰栗不止

上傳諭曰朕惟以寬仁撫馭欲使薄海乂安家給人足近者悅而遠者來此朕本懷也若兵為凶器非可輕試第念古來世際昇平不忘武備閱兵乃本朝舊制歲以為常無足驚惧也尋設布侯校射

上親射五發咸中次令諸王貝勒八旗善射者校射中的

者甚眾阿海台吉等相顧驚訝曰

皇上真神射也

康熙二十五年丙寅七月乙巳

上諭兵部理藩院我兵圍困雅克薩城羅刹勢迫死守今時序漸寒自墨勒根至雅克薩所設蒙古驛馬冬月飼秣維艱其免索倫打虎兒今歲貢賦俾之飼秣竝修整器械以備調用至蒙古每驛應設夫馬若干令明愛馬喇等定議移文索倫總管洪吉郎中滿丕等如數取用索倫打虎兒夫役與備養之馬又博鼎率往筑城種地官兵內選二百人俱暫留墨勒根亦候調用余悉遣還

八月丁丑

上諭黑龍江將軍薩布素等曰今天時漸寒河流將結宜每事籌畫豫為之備羅刹復來雅克薩城待援兵之至且冀我兵於流漸時撤回耳目前我兵雖掘壕防禦至隆冬冰合後船艦若何收藏馬匹若何飼秣敵兵來援若何撲剿勿令入城爾等其詳加籌畫密以奏聞

康熙二十九年庚午正月辛丑

上谕内大臣等曰朕於国家政务竭力勤求是非自任从不委於臣下即如迁移吴逆之事索额图奏称建议之人应请正法朕坚持独断必令迁移彼时十三省用兵数载天下大事皆朕一人独任亦曾推诿尔等乎前年湖广兵叛衆议纷纭朕谓此亦何难遂命绿旗兵丁即行剿灭又平定鄂罗斯之事满汉诸臣咸谓彼距中国道远难以成功朕谓此事断不可中止即遣大臣前往遵朕指示而行鄂罗斯随即欵服朕未尝自伐其功但不似尔等稍有功绩即有人代为表扬也朕乃万姓之主惟以兆庶未安此衷不能稍释至於无知之人妄生议论朕毫不介意也

四月甲子

上谕内大臣公舅舅佟国维等曰据阿南达奏言厄鲁特与拖多厄尔德尼战颇被杀伤其袭席北推哈滩巴图尔时两人共一骑有斩木为兵者且闻来侵昆都伦博硕克图而至今未到想已狼狈必有退回俄依之势阿南达欲带行礮竝禁军前往相机征剿朕非不知禁军足以克敌但路远艰於粮运朕前率察哈尔兵行猎见其人材壮健皆思効力可选精锐六百左翼令阿要率之右翼令博尔和代率之马驼牛羊於八旗大場内派出兵各攜五月粮再於汉军每旗选章京一员领行礮八门及礮手前往檄阿喇尼额赫纳知之

五月癸丑

上谕鄂罗斯使人吉里古里伊法尼齐等曰噶尔丹迫於内乱食尽无归内向行刦今乃扬言会尔兵同侵喀尔喀喀尔喀已归顺本朝倘悞信其言是负信誓而开兵端也尔等可疾遣善驰者二人归告尼布潮头目令伊遍谕鄂罗斯之衆

六月辛巳

上谕兵部噶尔丹追喀尔喀已进汎界朕将亲往视师出征诸王出喜峯口公苏努等所领之军随朕行令诸王先朕进发先檄知尚书阿喇尼等理藩院遣司官星驰以往其令议政王大臣集议

癸未

上谕兵部噶尔丹已至乌尔会河军宜速出其军中无火器者与前所发禁军兵及盛京兵俱应增发令议政王大臣速行详议

甲申

上将出师先遣理藩院员外郎阿尔必特祜达赖齎敕往谕噶尔丹

敕曰朕统御宇内怀柔万邦惟愿率土生民咸得其所相与协和无分中外夫兵凶器战危事互相讐怨无有已时非计也故遣尚书阿喇尼散秩大臣吴巴什扎萨克大喇嘛阿齐图绰尔济一等侍卫阿南达传谕令罢兵息战尔回奏云圣主施仁抚育令共相协和以享康泰我亦与焉伏愿指示安乐之策闻圣上将尽驱出喀尔喀之人不胜懽懽不敢以杀我弟多尔济扎卜为憾所奏甚明今乃闻尔复兴兵伐喀尔喀故遣尚书阿喇尼防境内之不靖者今乌朱穆秦遣使至尔所尔言中华与我一道同轨我不敢犯界内地方而又阑入汛界掠乌朱穆秦人畜是背前言而隳旧好也且朕前所遣伊拉古克三胡土克图等至今不归尔诚何意耶今遣员外郎阿尔必特祜达赖齎敕谕尔尔尚可以改图尔既入边我诸部王及贝勒台吉等行且兴兵击尔故亦遣来使止之恤尔至矣其速给还所掠归我使人尔其明白回奏

七月庚寅朔

上谕兵部本朝自

列圣以来战必胜攻必克所向无敌者皆以赏罚明法制严兵卒精锐器械坚利人思报国殚心奋勇之所致也今军行其令各该都统以下察核军实凡甲冑弓矢诸器械务令犀利坚好其盔甲俱系号带马驢尾书旗分佐领姓名其行也视大纛整队齐发有零星前後错行及醉酒者该管官立拏惩治其止也各按旗分队伍分列屯扎有前後错乱者罪及该管大臣马无印箭无名

各罚以银给拏获者窃取鞍辔什物马匹者视其多寡治罪失火者亦从重究惩官兵厮役所过百姓蒙古地方毋骚扰毋抢掠毋践踏有擅离营伍入村落山谷夺人财物者军法从事罪及本主及该管官军士厮役逃亡在汛界内立行察拏治罪如出汛界外该管大臣即遣官兵穷追务获立斩以徇如不能获则将往追将卒从重治罪其逃人之主及该管官一并严行察惩既出我境哨探斥堠务期严密如旷野交兵对阵见敌王贝勒贝子公大臣不按次序搀越前进及见贼兵寡弱不复请令冒昧前进者有功不叙仍治以罪其进也须齐列缓辔按队前行如自离其队而附人後或自弃其伍而入别行或他人已入而独留不进身死家没及重责革罚分别治罪如整齐而进击败贼兵厥功维均勿以略分先後致生争竞至彼不抗我军而奔溃则选精兵良马逐之列队蹑踪而进如前忽遇伏或贼兵有旁抄者则後队接战夫兵者所以讨逆而安顺也领军大臣果能严束其下不使良民受害朕不靳厚赏否则罚亦无赦凯旋之日有以兵器私售蒙古者本人治罪竝及该管官马乃大军急需须视水草善地小心护养起行时则留将卒察遗失之马视驢尾所系字樣交还原主如系疲马则开明马色数目交所在官司人民蒙古善行牧养报知兵部如有匿而骑用及杀之弃之者治以罪其遗失疲马之人亦开明马色报兵部存案恐官兵未能遍知尔部其刊布晓谕之

壬辰

上谕理藩院额赫纳军从某汛界达阿喇尼所较为捷近其谕阿喇尼等遣能员速往迎之兵力薄恐突遇敌兵也阿喇尼所驻地如有可虞渐移入内谨防斥堠又闻喀尔喀行刦驿马其

晓谕严禁之

癸巳安北大将军和硕恭亲王常宁奏臣既出喜峯口当由何道进兵

上曰视其道之近者往与大军会其出古北口之兵粮储多尔等未会之际粮宜节省出边後有助糗粮者听助籍其姓名以闻所助牛羊俱收牧及时以散给之炎暑军行恐人马劳苦其令昼止夜行

丙申

上谕内大臣舅舅佟国维等曰京城大军络绎出边阿霸垓阿霸哈纳苏尼特蒿齐忒等兵无所调用今不必赴尚书阿喇尼军前着於各旗形胜之地驻扎严防喀尔喀新来之衆妄行

壬寅噶尔丹遣达尔汉格隆奏言喀尔喀吾讐也因迫彼阑入汛界向在

中华皇帝道法之中不敢妄行

上因赐来使筵宴赏赉令齎

敕归谕之

敕曰据尔使人达尔汉格隆陈奏具见敬慎惓诚朕统御天下重信义而贱欺诳前以七旗喀尔喀彼此构怨与达赖喇嘛共议遣大臣谕和不意左翼兴兵妄动朕弗

之直也後喀尔喀为尔所败匍匐来归朕念普济衆生之意赐以米粮牲口所全活者无算喀尔喀何利於朕而施恩若是皆朕不忍生民之颠沛故耳是年出盟方分别七旗曲直昭雪扎萨克图汗之事欲仍前设立右翼议未及定尔兵已至乘虚骤入褫守汛界者衣服出言不逊朕亦不深责六月二十五日遣员外郎阿尔必特佑等问其故而阿喇尼等在边以尔公然阑入汛界守边责重不能容忍遽与尔战朕甚非之六月二十九日复遣郎中满丕齎敕谕尔及商南多尔济归取行粮而已岂有正事尚未议定即可言执土谢图汗泽卜尊丹巴胡土克图以畀尔乎此皆使臣设计脱身而为此言也尔谓与达赖喇嘛道法为一则当怜念衆生同心以安喀尔喀令七旗同享安乐以仰副朕意乃反肆杀戮拆人妻子离人骨肉阑入汛界掠及四佐领之人揆之道法可若是行乎恐达赖喇嘛未必使尔为此也西宁报至闻策妄阿喇布坦以尔罪告之达赖喇嘛将兴兵伐尔夫兴兵非美事也朕且将与达赖喇嘛共议调和而闻尔已驻兵乌尔会河故朕遣和硕裕亲王及皇子大臣量发满兵而往非讨尔也欲定议耳前者遣大臣往鄂罗斯议事亦发兵往议毕而回尔所夙知也为尔计其听达赖喇嘛言罢兵息战各享安乐既合衆心亦易毕事如仍以前事为辞妄行刼掠则隳败名教自尔始矣

癸卯

上谕都统瓦代等曰据关保奏噶尔丹於六月二十七日遣发其使人及我拨什库次日潜师遁去班第苏尔达等遣人躡视之噶尔丹兵果已北去朕之欲幸此军者以躬近行间便指示也今噶尔丹虽退而喀尔喀方且横行刼掠驿递及诸扎萨克马牛衣服乘此大兵集会朕乃亲往视师以靖喀尔喀之肆横俾知所畏忌事可一举而定也

辛亥

上谕裕亲王福全等曰尔军进止与哨探噶尔丹所在宜不时报闻今朕与尔相距仅三百里而往来之信常迟非军机所宜也其不时儆饬之

八月辛酉

上谕裕亲王福全及参赞王大臣等曰卿等奏报大败噶尔丹疏初三日已到此皆

上天鉴临

祖宗默佑诸王大臣尽心官兵効力之所致也朕闻之焚香谢

天不胜欣悦此後当何以穷其根株平其余党熟筹始末一举永清勿留遗孽其详议以闻

丁丑

上谕议政大臣等曰噶尔丹虽认罪立誓上书请降但人殊狡诈难以深信我大兵撤後背盟妄行亦未可定且谕噶尔丹敕内有厉兵秣马见俱整备之语仍宜?兵豫备万一有悖叛之信则夕闻朝发即可扑灭若待有变而後发兵缓不及事矣见在各佐领有喂肥马匹着每佐领派护军七名甲兵五名六名整顿备之其即会议寻议政大臣以豫备官兵人数启奏派出

上谕曰此军非为出征而派也以噶尔丹虽降而人殊狡猾不可深信万一叵测所以派出备之其以此故晓谕官兵知之

康熙三十三年甲戌四月己卯

上令班第策旺诺尔布夸色俄齐尔杜喇尔觐噶尔丹情

状

谕之曰尔等若往擒生口则起衅端矣姑探其动静可也惟以招抚和托辉特根敦戴青等为要尔至彼宣朕谕旨曰朕念噶尔丹与汝逼近常恐为汝害汝当移近席北推哈滩巴图尔纳木扎尔陀音阿里雅等远设哨探倘有警汝等同心并力而行於事乃有大济此为汝等虑也



席北推哈滩巴图尔等见在土喇游牧汝等不论居何地朕无所嫌况噶尔丹事平之时喀尔喀通国仍遣归故土也尔等无兵如得消息可即归来

七月癸酉

上谕领侍卫内大臣等曰尚书班第等疏言和托辉特根敦戴青遣人往探噶尔丹消息擒厄鲁特色楞以回据供云噶尔丹於去年春冬间二次遣人窥根敦戴青所居处今年正月来於库克朔东杭儿尔察克地方居住根敦戴青闻噶尔丹移营近彼前进遂亦向内移营於土喇之席北推哈滩巴图尔处观噶尔丹之前进情形当是图根敦戴青而来不遇则随其踪迹而求之来至土喇一带地方抢掠汛界之喀尔喀亦未可定今时会既佳马复肥壮可调宁夏归化城及右卫之兵循克鲁伦河於土喇等处往寻席北推哈滩巴图尔探彼情形消息若果噶尔丹来近土喇扰害喀尔喀我军有可乘之机将军等相机而行倘我师未至之先彼已过而前进则从後袭之赵良栋谙习军务郎谈前往时可与之偕行令赵良栋率宁夏火器营兵二百人宁夏兵即支宁夏之米归化城与右卫之兵即支湖滩河朔之米此时机会甚便断不可失尔等与议政王大臣会议以闻壬午兵部题建威将军希佛请将大同绿旗兵三千令总兵官率之与臣等同行又镶蓝蒙古旗分察哈尔兵近杀虎口居住其八旗察哈尔俱接壤而居丁壮整齐秋高马肥请将伊等前锋护军骁骑酌量派发时各旗遣至臣等军前

上谕大学士等曰绿旗兵若多发往则其马少且边外地方米粮何能运到朕前巡察边外时曾带古北口绿旗兵往沿途常赏赉食物赡养然去时犹可及观其回时情形甚惫随朕行走尚有苦累之处今希佛亦能如此赏给乎希佛每遇一事必生疑阻此番发往之满洲兵已有八千有此兵力所向无敌将军费扬古勲旧大臣今驻防归化城衆皆称赞军士亦皆心服都统郎谈边外行走熟练於此事无不能办者若又遣希佛往或致疑阻大事亦未可定此处关系甚大希佛着停其前往右卫新驻兵丁令将军希佛料理大同绿旗兵丁不必多发着大同总兵官康调元亲选五百名与将军费扬古一同前往至京城兵亦已预备察哈尔兵倘有紧要差遣即与所备之兵一同调遣不必发往

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十六

# 卷十七

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十七

武功五

康熙三十四年乙亥十月丙申

上谕议政大臣等曰传谕沙木巴戴青墨尔根济农值雨雪时噶尔丹侵掠其疆界亦未可定宜简发其兵并附近喀尔喀台吉之兵於诸处防守远置塘哨探听消息倘有噶尔丹之警敌势寡弱量力可击则以其兵击之若敌势衆多则设殿後之兵向归化城内地移营虽退入内地亦不譴责也凡有动静一面速报归化城将军一面奏闻

十一月庚辰

上谕内大臣等曰用兵之道以赏罚为要今日大阅朕将降敕以昭示劝惩敕曰本朝用兵以来所向无敌野战则胜攻城则克惟有弓矢剑戟为用自三逆叛後南方皆水田贼人虽用火器相持而凡遇之敌靡不摧败朕以故洞悉特立火器制备枪礮交发八旗由是我朝之神威益震於四域矣今噶尔丹游魂假息於喀尔喀左近肆行窃掠朕欲一举立殄是以整理诸路粮饷器械熟计而行是师之举与昔不同兹尔将卒厮役各当勉力倘遇敌奏凯而还朕必大沛殊恩阵亡者除照常给赐身价外护军则廕一子为七品官食俸骁骑则廕一子为八品官食俸如无子则照本身钱粮给其孀妻终老所借公库官银另加宽恤倘违军令勿得仍望如前矜宥

甲申

上谕西路督运光禄寺卿辛宝内阁侍读学士范承烈等曰挽输朔漠车辆甚为紧要尔等其会同山西巡抚动支正项钱粮速行备造勿致累民挽车兵卒给与行粮地方官有才具者任尔等选择带往其管兵官员与挽车人等亦必择精壮者用之

十二月甲辰

上谕兵部师出以律可奏朕功自我

太祖

## 太宗

世祖以至於今野战必胜攻城必克所向无前虽士卒世受国恩捐躯报効实由我朝军纪森严信赏必罚兼以兵马精强器械整齐之所致也朕今次军行特规酌旧制参以新谟爰着为令告我六师一大军出征本都统护军统领副都统参领等审视官兵甲冑弓矢暨一切军中器用务期坚利兵之盔尾甲背及战矢之干各记名其上马烙以印鬃尾处繫小牌书旗号佐领姓氏以为记号马不烙印追银二两箭不书名追银十两给举首之人一啓行时凡兵衆必各率行装按旗队以次前进不得零星散乱後先越走自出国门以至旋师当各遵守违者鞭责示警一在道毋离羣毋酗酒毋誼譁毋叫呼不遵者该管官即行捕责一所过地方不得扰害

居民及蒙古部落如侵犯子女掠夺马畜蹂躏田禾及擅离营伍入村庄山谷强取一物者兵丁厮役俱从重治罪其该管官及厮役之主一并议罪一边境以内凡兵役在逃立刻缉拏依定例治罪出边而逃该管大臣即发官兵务穷追捕以正军法设追缉不获往追人从重治罪伊主并该管官一并严处一下营务按旗列幕不密不疎如越旗乱次前後搀杂者将该管大臣官员分别治罪其兵役内有愍不畏法盗马上零星诸物者惩以鞭责盗马匹及鞍辔者视盗赃多寡按律治罪一出哨毋携大纛各带本旗颜色小旗远距大营设哨勤加巡视比暮则还就近地勿举火勿携帐一人一骑其马备鞍以待昼则近身牧放夜则刈刍拴喂设寇至探明即飞报大营若无寇妄报与寇近不知以致传报稽迟者主将该汛坐哨官兵立刻正法军前示衆一值夜巡徼官兵必张弓束服袴鞬并解甲囊以备不可怠忽无事人昏夜不得擅行行者必问如衣服器械有异即行擒拏苟贪睡偷安或人数缺少该管大臣察出严治其罪一与寇相近管兵将军大臣酌派前锋参领率兵往探务详审贼情虚实地势险易并严飭营中夜无燃火一对敌列阵时主将必度地据险寇或布野或结骆驼鹿角为营我军分列行间指明某队某旗当击敌阵某处战时鸣角进军战毕仍鸣角收兵官兵或弃其部伍混入他人部伍或轶出本阵往附他人尾後或逡巡观望逗遛不进照所犯轻重正法籍没鞭责革职至我军分阵进击某旗对阵敌坚不动即发所备援兵助击之又对面临阵时王贝勒贝子公大臣官员或不依次誼闐拥入或见敌寡不请擅进此一次功不议仍以罪论一敌阵动摇我军攻入当严禁官兵不得掠人畜财物如不遵军法贪行攫取者重惩不贷一敌败北即选兵马追之随派队伍接踵继进倘追兵堕其伏中或遇寇游兵我後兵与之接战前队兵仍行追进一师旋日当严行禁止凡军器不得售卖存留与诸蒙古违者从重治罪该管官一并议处一驼马为师行要需须择水草善地牧放夜则加意巡防起营时留官兵於後收察遗失驼马审其印烙牌记各交原主其疲乏者即於就近地方官或村庄居民或扎萨克蒙古处辨色登数交与饲养仍以其数报明兵部如有将遗失驼马隐匿乘用或因其疲乏委弃宰杀者严治以罪令驼马原主开明遗失疲乏驼马颜色数目亦报兵部登记一军精关系綦重凡出征官兵须各计口按日支领携带倘不如额查出即从重治罪一有职掌大臣官员原各有亲随兵卒不得复於大兵内抽取以分兵势如委署人员及官之原无亲随兵卒者许各抽一名一大兵存驻处毋令闲惰每日较射磨砺器械所颁军令不时宣谕令其详悉夫兵者所以讨逆安民朕不得已而用统兵大臣能体朕意严束属下官兵於所过边境内外不轻取一物使人民安堵如故奏凯日自行陞赏如纵官兵为非扰害生事者定加重处凡兹军令应通行晓谕各路官

兵如传示不到即将传示之人以军法从事尔部其以朕谕与前南苑所降之旨一并刊颁俾各凛遵毋忽

是日

上谕议政大臣等曰凡绿旗兵卒内有从本阵前进超入骆驼营鹿角营衆人接踵齐进杀败敌寇者第一名优陞千总其督战之员优陞二级擢用至绿旗将弁内有亲身超入骆驼营鹿角营败敌者优陞三级擢用着以用印空劄颁发将军提督总兵官凡绿旗官兵有显着劳绩者即照所定职衔填注给与

康熙三十五年丙子正月甲戌

上欲亲统大军往征噶尔丹汉大学士九卿科道等疏称

祈

皇上遣将授兵指示方略停止

亲征

上曰向年乌阑布通之役朕以策诱噶尔丹入距京师仅七百里许大兵已经击败乃竟中贼计致噶尔丹遁走彼时因朕躬违和未得亲至其地失此机会至今犹以为憾噶尔丹窜伏巴顔乌阑地方相距未甚辽远以是不憚勤劳亲莅边外相机行事此贼既灭则中外宁谧可无他虞假使及今不除日後设防兵民益多扰累所奏已知之

乙亥振武将军孙思克奏言臣同尚书图纳公议派陕西绿旗兵九千於二月初十日以内齐集甘州养马一月一同出边但甘肃地方苦寒请候青草发萌时出口再河西地方逼近蒙古应令提督李林隆酌量带兵驻扎甘州防守

上谕诸王大臣曰大将军费扬古兵於二月二十日前後进发将军孙思克兵亦应令於二月二十日前後自宁夏起程甘州肃州等处兵若调至宁夏路途遥远其到必迟见今宁夏有满洲兵一千汉军火器营兵五百应再增以西安满洲兵一千汉军火器营兵五百以足三千之数再宁夏榆林二总兵官标下绿旗兵共选派六千即令该总兵官带领同将军博济副都统阿南达等於二月二十日前後自宁夏起程令将军孙思克将伊标兵酌量选带速来宁夏如及期而至则一同进发倘或不及可隨後踵进其满洲汉军兵丁马匹未及喂肥着该将军总督等将存留满洲汉军并绿旗兵丁马匹内酌选肥健者更换付之其添给绿旗兵丁马匹并运米之骆驼马骡俱令於各营及驿马内选臚壮者给付一切事务令尚书图纳会同该总督巡抚提督等公商料理毋致有悞提督李林隆速往甘州驻扎酌量徵调官兵加意防守地方速檄知之

二月甲午

上谕领侍卫内大臣等曰前令黑龙江宁古塔盛京立刻备兵各居其地者恐噶尔丹知我三路大兵进剿惶迫东行是以使之预备今视口外来报情形亦有东行之状着萨布素立刻整備属下兵马远设侦探如有用盛京宁古塔兵之处许彼星速往召总辖调遣其左近蒙古亦当小心防备因萨布素所居悬隔恐报京声息不得闻知可将凡属噶尔丹之事口外报文一查开月日发与萨布素知之以便准备行事盛京宁古塔将军处亦着檄知

甲辰

上谕礼部兵部朕统御中外念切抚绥惟务休养民生未尝远事征讨比年以来海宇昇平閭閻乐业四方固已无事独厄鲁特噶尔丹荒裔狡寇肆逞凶顽自乌阑布通败遁之後不自悔祸仍行狂逞悖天虐衆违蔑誓言侵掠我臣服之喀尔喀潜入巴顔乌阑之地心怀叵测逆状已彰乘其窜伏近边自应及时扑剿倘目今不行翦灭恐致异日沿边防戍益累兵民声罪迅讨事不容已用是遣发各路大兵分道竝进朕特躬莅边外相机行事以衆击寡以正诛逆天意人谋无不允协此寇一殄则边尘荡涤疆圉辑宁内安外攘实在此举告祭

天地

宗庙

社稷并一切应行事宜着察例详议具奏

甲寅

上谕议政大臣等曰朕亲统六师前进法律须极严明师行之日军士俱先於郊次排列俟朕啓行後仍复入城按日逐旗而出务必队伍严整夸兰大参领等各率本营行装按队伍前进不得分散错乱倘马惊人墮致失马匹者令该夸兰大章京及护军校等亲往寻获中路军虽行尚俟西路消息倘值天雨即令驻扎其後队不必等候传示亦行屯驻凡一应细事该营之皇子及诸王大臣夸兰大等公同结案事关重大再行请旨凡遇敌兵令我军攻击朕必详审可攻之处始令前进必不以军士躯命为尝试如临阵遇敌不能奋勇败贼必治以罪前行之前锋倘望见敌兵必视有水草处驻扎以俟後队军至可通行晓谕八旗

四月己丑员外郎席保住奏报侍卫克什图主事保住奉使至噶尔丹所噶尔丹授之奏章令步行而回

上曰朕熟计噶尔丹情形久矣噶尔丹之心必以为今当春令马匹羸瘦此路既无水草沙碛瀚海又甚难行大兵势不能到至朕亲来彼万难料及故夺我使之马驼令步行而回不过欲坚彼部下蒙古之心示以不惧耳非欲使我兵迟延彼得远遁也朕先传谕大将军费扬古与

约师期今费扬古奏本月二十四日可至土喇若依期而至两路夹攻则噶尔丹在我掌握安能复脱若我兵先到彼必连夜逃遁费扬古兵纵少迟缓必至土喇地方噶尔丹以疲敝乍到之兵费扬古迎击可尽行殲灭观彼在我使者之前举动噶尔丹早已入我计中矣

戊戌

上谕抚远大将军费扬古曰朕所统军将至汛界时即差护军参领车克楚前锋侍卫祁萨木往克鲁伦左侧躡探声息今车克楚等还奏云臣等初九日到伊扎尔地方见有寇踪於是转回初十日遇沙津王所差鄂齐尔等言噶尔丹於本月初间自土喇向克鲁伦移营第三日我等归噶尔丹在达尔汉敖拉山以此揆之噶尔丹已近朕所统大军矣此寇乃极狡猾之人如败遁断不趋土喇必渡克鲁伦河或从俄依巴尔济赴塞棱格或绕巴颜乌阑之後设伏尔等两队兵见彼下克鲁伦若随踪而往未必不入其伏兵之中朕甚虑之特遣蓝翎侍卫殷济纳等谕尔可详询地里及彼脱逃之路小心堵御不可以彼向下流行而轻之特谕

己亥

上谕议政大臣等曰噶尔丹由克鲁伦河顺流已至伊渣尔厄尔几纳克地方我西来两路兵及中路兵俱近克鲁伦河矣噶尔丹势蹙或向东窜入亦未可知着盛京宁古塔兵前往索岳尔济山屯扎黑龙江兵亦赴彼会齐可速檄行

五月己未

上赐敕谕噶尔丹曰朕统御万邦惟以民命为重不喜杀伐尔厄鲁特喀尔喀向奉职贡尔等交恶构兵以来朕未尝偏徇而於尔有异视喀尔喀为尔所败投朕乞命如朕不救之则皆饥毙矣朕之济人非特於喀尔喀如此也凡诸国窘迫来归者朕亦一体救之已明谕尔数次尔奏章来索喀尔喀泽卜尊丹巴胡土克图土谢图汗言之不已朕始终不以喀尔喀为直曾谕尔此事非悬议所能结当会盟以讲之尔又以生计窘乏不能前来又以誓书所无之言屡向我使臣喇嘛支吾回奏阿喇尼巡行边塞猝遇尔兵不待朕旨遂与尔战因特遣王与皇子与尔会议尔属下人又先抗拒以致交兵其时所发他路之兵朕急遣人止之勿与尔战尔前年至巴颜乌阑遂掠喀尔喀之纳木扎尔陀音朕又特遣使问故约与议盟今朕与尔若不覲面定义不但尔国难存而我边民亦不得宁居因尔来既近故秣马缮备朕於三月初旬起行西路兵於二月十八日起行黑龙江兵於四月初六日起行盛京宁古塔兵於三月起行今朕大军已出汛界与尔逼近西路兵俱已到土喇河东路兵俱已溯克鲁伦河而来朕向崇礼义顺天理而行不恃势力戕灭他人朕果恃势力则竟不遣使统各路之兵而剿灭尔无所不可朕乃不忍生灵横被锋镝是以抒诚遣使朕与尔等覲面定义指示地界尔照旧贡献贸易则尔国安生而我边民亦安乃协朕保列国如赤子之意岂不休欤朕断不以计诱人切勿疑畏朕来欲与各处将帅阅兵已传令伊等勿战非虚言也尔如不信可留朕所遣使臣内一人在尔地倘各处兵进而攻尔尔可差所留之人止之一面遣尔前曾奉使为朕所识之人来奏朕统御万邦岂肯诱人而破灭之尔或妄动而去则虚朕美意而生灵有不利矣

癸亥

上以克鲁伦河为噶尔丹必争之地乃分布队伍躬在前锋前行於途次率数人登高执圆镜远望见东有额尔德尼拖罗海山西有山麓从巴尔代哈迤迤接河岸

上谕科尔沁土谢图亲王沙津达尔汉亲王班第喀尔喀车臣汗纳木扎尔王西第什里贝勒盆楚克贝子曰尔等各率尔属下蒙古十许人往据西方巴尔代哈山麓高处佯作全军从此经行之状敌人来犯勿与之战诱之前来敌若有备则大兵争先据河是日

驾抵克鲁伦河

谕各队领军大臣曰噶尔丹若据克鲁伦河我兵夺河交战犹稍费力今观其不於此拒战而竟逃窜是自开门户以与我也除此地外他处断不能拒我军审其情形必连夜逃遁矣当轻骑急追之

乙丑

上遣大喇嘛垂喇克查木苏格隆齎

敕往谕噶尔丹

敕曰朕惟治道原期有益羣生朕亲统大兵欲与尔共议俾羣生享其利益故至此与尔相近处两次遣使其到否未知尔何竟无一次遣人来也朕为天下大一统之主不肯罔人而行已经屡颁谕旨尔仍不信逃遁而去兵仗器皿尽皆抛弃尔所属之人乞降而来者甚多尔生计迫蹙朕所甚?尔前此无礼於朕使臣朕皆不介意将尔遗弃疾病之人与来归之人尽皆收养朕若存嗜杀之心岂肯收养尔所属之人尔仍不信遁去今西路大兵已至巴颜乌阑朕亲统大兵至克鲁伦河黑龙江盛京宁古塔等处大兵皆会集於克鲁伦河又断尔归路之大兵亦已至厄嫩巴尔查地方尔即欲遁去安可得乎朕不忍生灵之涂炭故复遣使前来并不欲将尔剿灭出自至诚尔试反覆思之若仍照旧职贡而来归顺可於丹济拉丹津俄木布阿拉布坦三人中速遣一人来特谕

丁卯

上谕议政大臣等曰噶尔丹亡命奔逃量已至巴颜乌阑矣若我全军追赶似不能及应选兵?骑追逐除喀瓦尔达所领前锋二百外其余前锋尽行派出满洲火器营兵及亲随护军亦尽派出着追至巴颜乌阑过巴颜乌阑以北不必前往诸王等所属之人若自有二十日口粮不用官粮亦令同往其同回之兵但留其至拖陵所需五日之粮将余粮着各旗大臣亲验给与前进兵丁

辛未

上谕大将军费扬古曰尔於十三日击败厄鲁特噶尔丹之事据厄鲁特降人奔第来告朕甚慰悦自五月初八日朕先士卒疾追五日噶尔丹窘迫抛弃器械甲冑锅釜帐房等物及羸病幼小乘夜遁窜朕亲率大兵追至拖诺山再欲往追因尔各路兵会合不远两军既会需米甚多恐至缺乏粮饷关系重大量此穷寇以尔兵自西而来此处又发兵夹攻即可剿灭於是朕统大兵回迎粮米以内大臣马思喀为大将军授之大兵凑给二十日粮随以带来牛羊遣继尔後又?运尔路兵粮留内大臣明珠於克勒河朔地方料理朕又给发马驼充运粮之用交与明珠将见到米粮陆续运至尔军运到汎界米粮甚多尔还师时由朕所行之路而来则米粮不致缺乏也

癸酉抚远大将军伯费扬古奏捷大学士伊桑阿张玉书恭捧诸王大臣文武官员庆贺表入奏

上曰朕为中外生民之主绥辑海宇爱养元元惟以率土又安为念厄鲁特噶尔丹扰乱边塞心怀狡谋逆天虐民不容不行剿灭朕亲统大军远出塞外声讨有罪噶尔丹闻风遁走希图幸脱适与西路大兵相遇大将军费扬古等奋勇力战大败贼衆擒斩无算尽获其人口牲畜从此边境宁谧不烦远事征讨四海苍生可共享昇平之福朕心深切喜悦

丙子

上驻蹕席喇布里图留牧汎界蒙古玉等行庆贺礼上谕曰尔等意中曾料朕此行可直抵克鲁伦立奏大功而还如是之速乎朕尊为天子富有四海此番出征朕日食一餐夙兴夜寐栉风沐雨每至一处朕皆步行及闻噶尔丹确信朕亲率前锋穷追凡此特欲速灭凶寇使尔等咸得安生故耳今噶尔丹已灭不但尔等永无侵扰之虞得享昇平之乐朕亦不复为尔忧劳矣

庚辰

上驻蹕塔尔奇喇赐留牧蒙古诸王贝勒贝子台吉等宴

及白金喀尔喀妻子老幼齐集

行宫东门叩谢再造之恩

上谕曰朕君临天下统御万邦本无分於内外即海隅荒陬皆吾赤子一体眷念厄鲁特噶尔丹逆天肆虐恃强凌弱掳掠喀尔喀等国朕不辞劳瘁亲统大兵征伐剿灭今厄鲁特之祸靖则朔方永清矣尔七旗喀尔喀自今以後各自乐业图报国恩以副朕家视天下之至意



六月乙未

上谕大学士等曰此番出征地方形势守亦可战亦可但得天时甚难兵早出则天寒无草乏水兵不能行迟出则天暑雨水多倘连日霪雨则樵采不敷必致窘乏此番兵出遇无水之地而得水无草之地而草生寒暑俱调此特

上天眷佑故灭寇而成大功并非人力之所能也其以是传谕九卿

八月甲午

上赐敕谕策妄阿喇布坦曰朕统御寰区遐迩一体仁育万民皆欲使之共享安乐朕躬为一统之主怀保万方獎善良惩凶逆未尝或爽先是尔陈奏噶尔丹之狡诈与侵害尔之实情诚心恳请眷恤朕嘉尔恭顺全受尔之贡献且以噶尔丹狂悖不靖阑入乌阑布通为朕偏师所败跪誓於威灵佛前後又背誓害我使臣掠喀尔喀阻止班禅胡土克图之来又至巴颜乌阑将为祸乱

其意显露因发三路大兵剿杀噶尔丹诸事降敕详谕矣朕亲统中路大兵近逼噶尔丹即欲率大兵剿灭之又不忍衆生横罹锋镝是以暂停扑剿遣谕噶尔丹使来会盟定议喀尔喀之事尔勿疑惧朕躬俟使臣覆奏遡克鲁伦河而上噶尔丹闻之心胆俱裂弃其子女庐帐釜铛什物遁去遇朕所遣堵截西路大将军费扬古兵於特勒尔济之地噶尔丹即来战大兵乃进击之噶尔丹不得旋踵遂大败斩噶尔丹之妻阿奴及厄鲁特二千余人丹巴哈什哈察罕西达里哈什哈等人二千余俱降尽获其人口马驼牛羊庐帐什物噶尔丹丹济拉丹津俄木布阿拉布坦等纷纷溃遁噶尔丹今已困穷矣尔向诚心肫笃请安进贡不絶於道与噶尔丹有不共戴天之讐噶尔丹穷凶极恶不可留於人世一刻尚存即为生民之不利务必剿除以安厄鲁特蒙古之生今或流行尔属下厄鲁特地方或奔往哈密地方如生擒噶尔丹则擒之来杀之则以其首来如此则尔向来恭顺之心益着而朕眷顾之恩益无穷矣

九月辛酉

上谕户部尚书马齐兵部尚书凯音布等曰噶尔丹窘迫已极近朕差阿南达以巴图尔额尔克济农之兵堵御其外恐噶尔丹乘虚往巴图尔额尔克济农行劫尔两部檄總兵官王化行如噶尔丹往彼处即率其兵往援并谕巴图尔额尔克济农知之

己巳抚远大将军伯费扬古遣郎中本什同卓力克图押护丹济拉所遣察哈代等入奏

上赐敕谕费扬古曰丹济拉虽云投降而噶尔丹之奏未至然彼虽不投降破败已极如或来降大将军可善言慰导令至归化城其时相与筹度措置特易易耳今自丹济拉以下凡所遣人至奏闻送至朕所噶尔丹若遣使来尔即与言尔等若往奏而归时愈寒冽必致冻毙尔可即归令噶尔丹来降其时我为尔奏恳我主亦不拂我言也此等情事一面奏闻一面更加周

防其周防事宜马匹最为紧要朕在军中见我军之勇健无可訾议而於防护马匹最觉疎虞万一诈称投降夤夜乘我不备驱马以出所系匪轻尔谕练行间事多阅历聊以朕意念所及书以谕焉朕一闻噶尔丹信息即以在京豫养之马令军士骑乘朕躬於九月十九日起程前往归化城此际常须奏闻情势为佳朕心喜悦欲亟闻彼中实音为此特谕

壬午

上谕内大臣苏尔达等曰据厄鲁特降人言噶尔丹往博罗乌纳罕空津扎巴哈等处地方度冬令丹济拉往就之所云博罗乌纳罕者乃扎萨克图汗旧居之地距汛界有四十余日之程大将军费扬古进兵之时右卫兵每人乘马一匹以驴骡负装其膳亦瘦料断不能到噶尔丹所在之地必自翁金等处因马瘦而还则徒劳无益朕所以使大同养马者正欲探实噶尔丹所在如立刻可行则於黑龙江六百兵内选前锋二百新满洲四百察哈尔兵一千全用肥健马驼充足米粮进剿乘其穷困可一举灭之噶尔丹业已尽破今我何故不深算剿灭之策而徒劳人马乎今速檄大将军费扬古不必进兵至来年青草萌时秣马以待视噶尔丹所往剿而除之此际当频遣厄鲁特降人招抚为要

十月甲申朔

上问喀尔喀多罗郡王塞棱阿海等喀尔喀厄鲁特构兵

之由

顾诸王大臣曰今日喀尔喀厄鲁特皆在朕直论其事彼皆向来贡献本朝之国两国交恶其曲不在厄鲁特而在喀尔喀喀尔喀先犯厄鲁特喀尔喀理曲是以其国为厄鲁特所破但厄鲁特假伐喀尔喀为名进我境内乌阑布通之地为我师所败已誓不复侵喀尔喀矣今又背誓入犯我汛界屯於克鲁伦之地则厄鲁特理曲是以朕亲统六师灭之天道昭然毫发不爽朕为天下万国之主宁有偏徇之理乎朕所以破厄鲁特者非为喀尔喀也喀尔喀王及厄鲁特降人皆跪奏曰蒙

皇上申明大义方知两国致败之由实我等所自取也甲辰先是昭莫多之捷有厄鲁特曼济受伤被擒至是曼济以其妻子在噶尔丹所求归

上命遣之至大将军费扬古处偕阿旺丹津齎

敕谕噶尔丹丹济拉等

敕曰朕统御天下要以中外一体为务往者乌阑布通之役尔等虽经败北朕尚欲与尔等会约以定喀尔喀之事故使命屡颁尔等乃违弃誓言抢掠纳木扎尔陀音竟至克鲁伦地方朕亲率师欲与尔会同定义遣使申谕尔复狐疑不信不亲见朕使及朕至克鲁伦尔遂望风奔

潰遇朕西路之兵尔先犯我顔行遂至丧兵败衄尽弃驼马牛羊子女庐帐什物尔衆寨桑台吉等接踵来降丹济拉格垒沽英车陵奔等寨桑十五人亦愿归服遣察罕哈什汉来陈奏惻诚朕已面谕遣还今朕又亲率六师远莅於此且各处调兵邀截尔等妻子马畜

诸物俱已散亡衣食已尽势迫无归况时渐严寒朕不忍尔属下厄鲁特妻子相失穷困冻饥而死特遣谕招抚今重复降敕尔等若悔前愆俯首向化朕一体加恩抚恤俾各得所尔部下厄鲁特亦得妻子完聚咸获生全朕断不念尔旧恶况尔部落人内有被我军所俘其父母妻子尚在尔处不忍分离愿归故土者朕皆恩赉赐之坐骑糗粮即令遣归使其骨肉完聚其欲内附不愿归者朕皆富贵之各得生养尔部人曼济重伤为我军所擒今曼济言其妻子尚在尔处因欲告归朕是以给之恩赏赐以坐骑糗粮使齎敕遣回尔地尔等思尚能永存有能收养尔等之人否其熟筹之今已无所归尔等可速领余衆抒诚归顺朕必令尔等家富身荣各遂生养惜此厄鲁特如许生灵被尔驱迫至於此极今若又不觉悟听信匪言则後悔莫追矣尔其勿疑勿惧特谕

己酉

上命和硕扎萨克图亲王长史马尼图等齎

敕招抚厄鲁特阿拉布坦丹津俄木布曰朕统御天下抚恤黎元务使人人各得其所先是尔厄鲁特与喀尔喀互相讐怨朕欲尔等和好已颁敕谕喀尔喀厄鲁特俱违朕谕自起战争喀尔喀既败来归朕为天下元后不忍坐视其灭亡於是纳之注其名籍酌量封为王贝勒贝子公扎萨克与以厚禄咸致富贵俾各得所噶尔丹乃不愿朕拯救天下生灵借喀尔喀为兵端阑入乌阑布通之地既被我兵所败虽诡誓遁逃朕犹数遣使颁谕令其会约以定喀尔喀之事噶尔丹违背誓言掠纳木扎尔陀音越克鲁伦而前朕亲统大军欲与会约特遣使往告噶尔丹狐疑不信不与一见及朕亲至克鲁伦即望风败遁遇朕西路官兵彼先逆战遂至大败子女牲畜尽被俘获丹巴哈什哈等先来抒诚後沙克朱木等接踵归附俱给以官职令其贵显足其衣食使之富有固已各得其所其来降之衆内有子女被我兵所

俘者皆行察出令其父子兄弟夫妇完聚今朕又亲统六师各路皆已调兵阻截噶尔丹倘不来降必穷之於其所往尔阿拉布坦丹津俄木布前虽附噶尔丹然皆非倡乱之人今归降之人皆云尔等与噶尔丹分析各居朕嘉尔犹知天道能自振拔怜尔之马畜等物散失衣食已絶特遣和硕扎萨克图亲王之长史马尼图多罗郡王昆都伦博硕克图之乌勒木济多罗郡王墨尔根济农之阿玉西又尔属下之喇嘛罗卜藏班珠儿亦愿招安尔等今同持谕前往其扎萨克图汗之子先经离散朕已收留觅尔岳母令与相会封为亲王食以厚禄频加抚恤顷又赐以牛羊马羣择地令其游牧使之得安生业享有富贵此显然之明验也敕书一到着即率尔部落来降前此依附噶尔丹之咎朕槩不介意必待尔以富贵显荣尔之部落亦使各得生业妻子完聚从容度日丹巴哈什哈等朕尚怜恤使之富贵况尔等乎若尔尚有疑惧今春策妄阿喇布坦之使来时称尔与策妄阿喇布坦甚善皇上若灭噶尔丹请勿讨阿拉布坦令其与我会合等语且策妄阿喇布坦屡遣使纳贡敬慎有加故朕亦深加怜恤尔若同丹津俄

木布往附策妄阿喇布坦处朕亦不穷诘尔其向朕使明白回奏倘於此二者不审一自处徼幸於厄克阿拉尔空汗洛齐斯希等处栖身苟免朕断不姑容必会同策妄阿喇布坦根敦戴青贝勒等尅期进讨尔其早作良图特谕

十一月乙丑

上谕议政大臣等曰视厄鲁特人携妻子来降则噶尔丹穷困已极但噶尔丹乃极狡之贼恐彼不得已来降乘我兵不戒窃夺零散喀尔喀财物逸去应着侍郎满丕郎中桑格前往善巴王汛界地方驻扎不时差人出汛界外侦探如有声息即收喀尔喀入汛界内越大将军营安插一面星速驰报前已有文檄知令满丕等到彼後口传旨谕大将军费扬古可也

丙寅抚远大将军伯费扬古奏请调太原满兵署抚标下骑兵共一千及大同杀虎口未出征骑兵五百速赴军前

上谕费扬古曰太原府兵未嫖行阵且至归化城殆将千里其绿旗兵止各乘一骑值此严寒即得到已不自支缓急用之必至悞事今拨火器护军一千礮手二百四十前锋二百六十共足尔所调一千五百之数为尔豫备目前马甚肥衣亦厚此系随朕亲兵故极嫖熟朝闻信息晚即可行朕暂驻蹕於此俟噶尔丹实信今若来降即星速遣至行在如有噶尔丹来降之信若不速撤汛界外喀尔喀信其降而坐待之则悞大事不浅矣近来丹济拉差人请降而又来袭粮饷可为明鉴今不得复悞当益详慎远虑可也

戊寅噶尔丹之使格垒沽英至

上命之近前

谕曰朕为天下之元后万国一家今日科尔沁诸王贝勒台吉及喀尔喀厄鲁特皆在此朕当公言之喀尔喀厄鲁特向皆职贡本朝之国朕初无偏徇喀尔喀土谢图汗执喀尔喀扎萨克图汗而杀之又杀尔主噶尔丹之弟其曲实在喀尔喀後喀尔喀为尔国所败前来归朕朕怜彼十万余身命失其生路受而养之凡有人穷迫来归者朕皆收养无分彼此不但喀尔喀即尔厄鲁特今为敌国有来降之人朕皆轸恤各使得生路量材授之官职虽被俘掳之人皆赎还其妻子完彼骨肉朕岂以喀尔喀厄鲁特有异视乎前以噶尔丹无故阑入我汛界侵内地蒙古朕遣兵败之於乌阑布通之地尔主噶尔丹窘极遁逃立誓不复犯汛界朕向以至诚待人故不遣兵穷迫尔主噶尔丹逆天背誓离其故巢窃伏克鲁伦地方侵掠纳木扎尔陀音朕不得已统兵出塞然仍再三遣使约噶尔丹会盟修好此朕不嗜杀人之心尔主不自引罪朕始整兵进讨噶尔丹不能抗我军威日夜奔逃适遇我西路豫堵之兵亦系噶尔丹先犯我军故我师乃进战大败之尔今穷困至此极者皆尔等自取非朕欲陵之也尔既奉使而来第公言之毋隐格垒沽英初与诸大臣言犹支吾巧辨及闻

皇上谕旨倾心悦服叩首奏曰诚天下之

圣主也

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十七

# 卷十八

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十八

武功六

康熙三十六年丁丑二月丙戌山西道御史周士星疏言噶尔丹计日就戮请

御驾不必再临沙漠

上谕大学士等曰览周士星条奏虽臣子之情当然但周士星未知其中之故耳噶尔丹凶恶一日不可姑留前在乌阑布通地方猖狂肆逆朕已遣兵败之犹不悔过复窃伏我克鲁伦地方朕亲统大军剿除略尽今穷困已极故乘此机会亲临塞外酌量调度前三逆反叛吴三桂煽惑人心遂致滋蔓竟至榆林等处朕日夜绸缪调遣大兵几费心力方得扑灭今荡平年久人遂视为易事且穷兵黩武好大喜功朕所深戒朕亦曾作诗发明此意着谕明周士星伊所奏虽不当朕亦不罪也

壬辰

上谕抚远大将军伯费扬古曰朕二月初六日出行十一日至宣化府观此际情形噶尔丹穷困已极虽欲降何易得至此地宁夏地方去噶尔丹所在萨克萨特呼里克之南格格特哈朗古特地方甚近故遣参领车克楚近御侍卫僧图等授以西安宁夏兵一百探视至於伊克敖拉伊等报二月初三日已起程矣为此谕知朕意以为将军孙思克博济等率兵三千出嘉峪关或进哈密或进巴尔库尔之路俟车克楚归如可行则一路三千兵出宁夏进新勘之路如不可行则以两路为一路择地而进殆可成功矣朕欲往宁夏视军中粮饷及诸情形尔之意何如为此谕尔商之主事保柱使於第巴报文并发尔知之

癸巳

上谕议政大臣等曰前既阵斩噶尔丹之妻阿奴喀屯今又生擒其子贼之本根已斩噶尔丹虽各处偷生其年老迈能延几何其子为我所获是乃天之所赐也凡用兵之道要在乘机噶尔丹穷迫已极宜乘此际速行剿灭断不可缓朕今亲临宁夏相度机宜调遣军士贼闻之必魂魄俱丧其部属亦必张皇而别部蒙古闻朕亲临宁夏各欲见功扼噶尔丹而图之彼若不自尽亦必为人擒献克成大事正在此举矣又

谕曰朕亲历行间塞外情形知之甚悉自古以来所谓难以用兵者是也其地不毛间或无水至瀚海等砂碛地方运粮尤苦而雨水之际樵?颇难区画不周岂可妄动朕今亲临宁夏凡有可用兵之地必详察行道水草全备马驼粮糗等物然後起程稍有可疑虽诸臣劝行朕亦不允也

庚子

上谕抚远大将军伯费扬古曰朕於十七日抵大同分析兵马十九日由边内起行赴宁夏今噶尔丹如此穷蹙断不至於用兵万一有噶尔丹前来声息须星速报闻朕当从宁夏进袭其後如噶尔丹属下人来降或遣使来当讯明速奏

三月丁巳

上谕议政大臣等曰朕至宁夏後方调甘肃兵前行似乎稍迟此时噶尔丹穷极之际西安满兵二千甘肃绿旗兵一千俱久在甘肃马亦肥矣机会不可失宜速进萨克萨特呼里克之地搜剿噶尔丹此满汉兵各带百日粮嘉峪关至萨克萨特呼里克地方甚近不必运粮如噶尔丹已遁此军计粮而归各赏银十两此外另有当行当奏之事孙思克博济阿南達等公议具奏其哈密擒献之俄摩克图哈什哈遣至伊等军中倘有可行之机即行进剿如噶尔丹已远遁则差俄摩克图哈什哈往谕之言我军非来征讨实来招抚尔可速降至遣宁夏兵驻郭多里巴儿哈孙地方备御之事当檄将军孙思克知之

壬戌

上谕议政大臣等曰凡调遣外藩兵马之事俱已交大将军费扬古如皆请旨而行则有仓卒军机必致迟悞嗣後俱听大将军便宜调遣

癸酉振武将军孙思克疏言奉

旨令臣等乘噶尔丹穷困之时带百日粮速往萨克萨特呼里克一带地方进剿但马匹未能齐备祈

敕兵部不论何项马匹速解甘州

上谕曰机会不可失孙思克博济等兵着即取伊附近绿旗兵之马如可不悞即令啓行一面奏闻如不能得则扣粮减兵即取所减兵之马驮粮而行自宁夏进剿之兵朕意不过二千或二千五百伊等如谓减兵则寡而难行着一处驻扎止令宁夏之兵进剿

闰三月辛卯

上谕议政大臣等曰朕曾以转运粮饷及随军安站之事与鄂尔多斯贝勒松阿喇布议之彼奏言当此有青草之候以臣等带来兵三千足供运粮安站之用应将白塔以外运粮安站事交松阿喇布同于成龙等商议而行白塔以内运粮安站事交总督吴赫管理其西安副都统阿兰台兵三百亦交与于成龙又马思喀带来之兵若祇自贲口粮一月则其余三月之粮及随军所运之粮为数甚多船运一次未必能完势必再运一次大兵岂能空坐久待应令马思喀兵各贲两月口粮外所余之米船装以运船装不尽者令大小官员均派带往若复有余令于成龙竭力运至白塔随军递运之米应至何处应止何地着大将军费扬古议政大臣与于成龙等会同详议具奏

壬辰

上谕内大臣等曰大兵起行之前当遣人招抚噶尔丹丹济拉此差不必遣本朝之人前与塞卜腾巴儿珠尔同擒者有噶尔丹乳母之子丹济扎卜再拨愿往之厄鲁特人贲敕而往一面遣使一面进兵达赖喇嘛身故已十有六年矣第巴指达赖喇嘛之语以诳噶尔丹彼信其诳自言为达赖喇嘛之教而恣肆横行以此等事明开敕内照样刊刻多印付丹济扎卜等遍行传示并遣使谕策妄阿喇布坦令乘此机会亦兴兵剿灭之

敕谕噶尔丹曰去冬命尔早降则予以富贵给以资产眷顾煦育之即尔所属厄鲁特之众亦各得见其妻子遂其生业故遣使偕格垒沽英往宣敕旨今使者喇木扎卜至览尔所奏谓未明朕旨观尔辞意一无真实而请给还来奔之厄鲁特岂惟厄鲁特之众虽尔子塞卜腾巴儿珠尔及尔乳母俱已被获今皆恩养与徽特和硕齐同居尔若来归即令尔子与尔相聚否则尔有何功遂还尔厄鲁特之众尔欲归降应及早来若不归顺徒迁延时日何益况达赖喇嘛已故朕亦知之曾严敕第巴第巴又遣尼麻唐胡土克图上表来贺捷且奏称达赖喇嘛已没十六年其再生後身年已十五岁则尔之指称达赖喇嘛以为护法欺诳众人者已显露矣尔所逃匿之地厄鲁特来降者多朕已悉知即使遁入洪郭罗险固之地诸路皆可进剿尔困迫若此尚何力拒守即今已无归所矣今岁即不擒汝来岁当即发兵追讨必不中辍汝其详审之

敕谕丹济拉曰朕为天下元后善善恶恶乃至理也去岁遣格垒沽英等归敕内开载尔名复使格垒沽英传谕今格垒沽英等来尔之辞意皆已备陈尔今能致噶尔丹来降必当封为贝勒畀以殊荣如不能致尔一身归顺亦能不失富贵况尔以下之人先降者皆释其罪显荣优养尔当悉闻已往之过槩不介意尔曾密奏若宥臣罪臣请投降故特专赐敕旨尽有前罪敕到其速降朕为大君岂改成命特谕

敕谕厄鲁特之台吉寨桑哈什哈并其众人曰朕无分中外皆欲其各安生理乐育昇平至於诛戮征伐原非本怀尔厄鲁特等附从噶尔丹所在侵掠虽有所得於人而已之祖父战死妻孥被掠者亦云众矣今所余之人不被创受伤者甚鲜死亡之余其存几何因从噶尔丹之故以至穷迫无归困苦已极屡颁谕旨命噶尔丹前来归顺则凡尔厄鲁特之众朕必俱加养育使之各得其所乃噶尔丹怙恶不悛并不以尔众为念不思归顺他日兵临则尔众难免俘戮



故特谕厄鲁特之衆尔若能各携族属妻子来降者朕皆养育使得其所前所降者已加豢养尔衆亦当闻之矣特谕

命工部侍郎常绶等齎

敕谕策妄阿喇布坦曰尔历来请安纳贡克恭克顺朕亦加眷顾恩施频及噶尔丹奸诡性成虽彼至戚靡不嫉害即将厄鲁特之四部喀尔喀之七旗致令破亡分裂又以追袭泽卜尊丹巴土谢图汗等为名侵我边境屡扰不已朕因於去岁数道遣兵亲行征剿直抵克鲁伦土喇地方大破噶尔丹阵斩甚衆其妻□被诛戮冬间复遣兵西出哈密地方获其子塞卜腾巴儿珠尔等今穷迫已极所属大小寨桑哈什哈等相继来降者不絶其余附从之人及寨桑等流离逃散俱欲投顺密报前来今噶尔丹仅余子身率领数人随处飘遁尔当亦闻之矣尔前奏称噶尔丹若近逼我土必竭力擒剿又言随圣上指示効力尽瘁等语噶尔丹凶恶已极有如魑魅断不可留今数道遣发大兵搜讨夫噶尔丹与尔素有深仇乘其困迫应起兵复仇进剿且达赖喇嘛久故第巴诈饰其尚在之状故严敕第巴而第巴大惧遣尼麻唐胡土克图来言达赖喇嘛亡故已十六年其再生後身已十五岁据实陈奏则噶尔丹所称护达赖喇嘛之法者其为欺诳衆人也明矣欲尔明悉故遣工部侍郎常绶内阁侍读学士伊道侍卫克什图等齎敕谕尔特谕

四月庚戌朔

上谕议政大臣等曰此地至两狼山一百二十里无水应於于成龙等未到之先集军中骆驼送米过此无水之地令内大臣明珠都统噶尔马王永誉押去到後着噶尔马王永誉留彼守米着明珠带回骆驼旧岁中路进兵各驿备米供给兵厮商贩故人不致饥此次进兵所关甚要凡事不得不周详筹画朕已遣往宁夏取米五百石矣俟到後留贮於此随运兵丁亦酌量留之着一大臣驻此管辖将此米从驿站陆续缓运每驿量留米俟回师之兵厮商贩乏粮者给之上驷院赶来马一千四百余匹亦留於此择水草善地牧放肥壮俟回师之兵有乏马者给之鄂克济哈仍驻宁夏凡驰报之事由新设边外驿站递送则路近而无悞总督吴赫船站照常安设船站以外令设蒙古驿站驰报军机

甲寅

上谕议政大臣等曰今诸事俱毕惟噶尔丹仅存各处逃窜大兵前进搜剿不久旋师路必由此当逐站置米师回乏粮者以米给之来降之厄鲁特青海来朝之台吉等俱由此来米粮马匹已留於此则驻此而理事者尤为紧要朕本欲驻此亲理其事但天下事大是以回銮着留侍卫内大臣索额图并都统阿锡坦噶尔马王永誉护军统领苏赫副都统巴赛等於此

甲戌厄鲁特降人诺尔布寨桑等以剿灭噶尔丹奏请行庆贺礼

上谕曰往者噶尔丹以追逐喀尔喀为名直入我扎萨克乌阑布通地方故朕命裕亲王及皇

长子率师往剿之噶尔丹大败使济隆胡土克图往复陈说自今以往不敢再犯边陲噶尔丹头顶威灵佛以誓此尔衆所共闻者也嗣後无故过土喇潜处巴颜乌阑地方掠我臣服之纳木扎尔陀音故朕亲率六师声罪致讨然犹不忍遂加诛灭再四遣使谕以和好而噶尔丹怙恶朕故整师进剿噶尔丹不能当我军威惊溃奔逃遇我西路大兵奋击大败之此皆噶尔丹违天背盟以致祸患及身国随以亡朕但思扫除残暴拯救羣生诚惓惓求符天理故大军所向无水之方灵泉霽沸不毛之地瑞草蕃滋山川效灵百神显佑闻噶尔丹所至之处必有烈风暴雨灾异频逢惊闻我军之来寝食俱废反复思维无计能逃穷急仰药而亡由此观之天可违乎其助顺恶逆亦显然矣夫与朕为敌者惟噶尔丹而已与衆何涉不惟噶尔丹在日尔等降者必加恩抚恤即今噶尔丹已死凡有降者朕亦如尔辈恩育岂忍异视?然噶尔丹之灭朕之大小官员当奏请庆贺尔辈素皆受恩於噶尔丹之人不当奏请

五月丙申

上谕大学士九卿等曰塞外情形不可臆度必身历其境乃有确见昔朕欲亲征噶尔丹衆皆不欲惟费扬古与朕欲讨之後两次出师衆愈不欲若非朕亲统大军追袭噶尔丹使之少留余息彼必复聚难以遽灭矣明时为恢复河套议论纷纭致大臣夏言曾铣受戮自朕观之此地无甚关系若控驭蒙古有道则河套虽为所据安能为患控驭无道则何地不可为乱蒙古游之地防之不可胜防专言收复河套亦何益乎至行师之道调军转饷必一人兼综其成事乃易济前西路进兵时将军博济孙思克等专管军务不与挽运专责地方巡抚等官转饷迨後粮饷稽迟兵丁困馁致有道殍顷朕自白塔至船站犹见有遗骸皆遣乡导沿途掩埋朕统大兵由中路进时多方筹画催督运饷比及旋师无一人受馁且支給西路之兵俱获全还又令沿途各站多贮米粮虽随营贸易之人皆不乏食此役宁夏之行料理粮饷悉有次第然後进兵所以直至回军供应皆足无或稍悞以此观之兵食两事断宜一手区画此後倘遇行师当永以为法朕又观塞外运粮最难昔唐宋及明嘉靖时皆用兵西陲不知当日作何转运之法朕此次宁夏之行不用车辆所需驼马骡驴悉自京城发往恐有不敷复给公帑采买预备一切什物皆由官运略不累民

癸卯礼部题请平定噶尔丹武功告成典礼

上谕曰喀尔喀厄鲁特原皆纳贡之国因其交相不睦屡谕和好乃仍构衅致起兵争噶尔丹曾破回子中之萨

马尔汉布哈尔哈萨克布鲁特叶尔勤哈思哈尔赛拉木吐鲁番哈密诸国其所攻取降服者一千二百余城乃习於战鬪之国也喀尔喀焉能抵敌是以七旗数十万衆一岁之中丧亡略尽喀尔喀之汗诺颜台吉等知朕豢养蒙古夙有厚恩悉皆款塞来归其时若不允其内附恩养得所必皆沦入於厄鲁特则尔时噶尔丹之势力不言可知矣允其内附而恩养之噶尔丹必假此衅端与我朝构难凡此情事皆经熟筹受纳喀尔喀非漫然而为之也噶尔丹假索取喀尔喀为名遂犯我汛界尚书阿喇尼率蒙古兵逆战於乌尔会之地我师大北噶尔丹乘势遂直抵乌阑布通距京师未及七百里斯时诸大臣及国家谙悉军务之人不在行间者少矣

适朕躬以违和还京左翼军虽能胜敌而右翼军不能制胜大臣而下以至军士阵亡被创者甚衆噶尔丹亦自知其无济归路遭罹瘟疫得还科卜多者不过数千人耳当是时即豫知其势虽大损必复称兵犯境六年以来乌阑布通之役时廑朕怀因是训练军旅谘访形势正经理武备之时噶尔丹果复举兵寇掠喀尔喀之纳木扎尔陀音於克鲁伦之地朕思此贼不可以寻常寇盗视之诏武臣三品以上咸陈灭贼方略会同详议举朝皆以为难其言贼当讨灭者不过四人朕以为此贼断当亟图遂宣昭大义祭告於

天地

宗庙

社稷之灵克成厥勲倘事或未成则受喀尔喀之内附致厄鲁特之兵争糜中国之脂膏事朔荒之边塞穷兵黩武其名恐未能免矣今我师所至

上天佑助无水之地而灵泉涌出不毛之土而庶草蕃芜事悉称意者此皆国家之福将士之劳所致也今西北永远宁谧其不致蒙咎者即幸矣自今以往务益殫励精始终如一治安之日愈求治安其祭告诸典礼俱依议行徽号不必上

六月甲戌

上谕大学士等曰四川总兵官马子云欲率回子袭噶尔丹之後回子生性无义曾三擒其主以献噶尔丹其兵岂可用乎本朝之兵所向无敌若有事时已不可胜用矣安用外国之兵古来用外国兵鲜有善者宋用金兵灭辽复用元兵灭金金既灭元遂灭宋此其明验也初噶尔丹并吞吐鲁番叶尔勤萨马尔汉哈萨克等千余部落本朝并不之问当厄鲁特与喀尔喀战时本朝若助厄鲁特今如何能破噶尔丹乎噶尔丹既克喀尔喀直侵内地朕始领兵剿灭前定海总兵官蓝理曾请率所属藤牌兵进剿沙漠地寒冰冻与南方迥别藤牌兵虽强夏尚可用自八月以至三月岂但交战即藤牌亦不能执此皆人地不相宜所谓纸上谈兵者也马子云粗鄙不识大义可晓示之

七月丁酉

上御太和殿王以下文武各官以平定朔漠并太和殿告

成上表行庆贺礼

诏谕天下曰朕君临天下早夜孳孳勤求治理惟恐一夫不获其所初未尝有岐视中外轻事兵戎远伐异域之事厄鲁特噶尔丹向与七旗喀尔喀同奉职贡嗣因两国交郤构兵喀尔喀汗等为所败衄叩关内附噶尔丹乃借辞追击阑入我边境恣行狂逞朕屡颁敕谕令其悔悟自新而狡寇不知省悟益肆鸱张其逆谋不测实有偏处近塞窥伺内地之渐朕思此寇包藏

祸心倘不即行扑灭则异日必缘边设防重滋民困何如及时声讨立靖根株於是昭告

天地

宗庙

社稷躬统禁旅不憚勤劳三出塞外去年夏贼於克鲁伦地方自度力不能抗仓皇宵遁朕亲追至土喇河适西路大兵遮截其後击败之於昭莫多贼势大挫冬月复驻蹕鄂尔多斯收抚其降衆遏絶其外援而贼益困蹙机会所在刻不可失遂以今年春西巡边境从宁夏出塞遣发大兵两路进剿而青海乌思藏人等皆先後输忱自効哈密国人又俘献噶尔丹之子於行在噶尔丹穷迫已极一闻大军压境计无复之随於阿察阿穆塔台地方饮药自尽揆之料敌成谋适相符合自此寇氛尽涤边圉永安而朕为民除害不得已而用兵之意亦可晓然共喻於天下臣民矣武功告成之会正太和殿鼎建工竣巍焕方新临御伊始协气集於九重观瞻肃於万国是用覃敷庆泽以上荅

郊

庙

社稷之灵下协中外人心之望懋武功而敷文德聿臻熙皞之风建宸极而巩皇图永庆平成之治诞告中外咸使闻知

十月乙卯理藩院题厄鲁特丹津俄木布使彭楚克车陈白克阿儿達尔俄木布来言丹津俄木布与策妄阿喇布坦不合今已无所归矣应遣人招之使来

上遣罗卜臧丹巴齋

敕前往

敕曰朕前闻尔与噶尔丹分析游行故差黑色马尼图捧敕谕以来降必使富贵优加恩养尔如同阿喇布坦往归策妄阿喇布坦朕亦不究着明白覆奏如两无所归欲於额黑阿喇儿洪郭罗等处据险窜伏朕断不容必刻期破之尔使人诺顏格隆臧布额尔克俄木布阿旺达什等来奏云倘噶尔丹至我近地必擒而杀之归降圣朝又以敕书使诺顏格隆臧布齋去谕尔虽不能擒杀噶尔丹而身率属下来降亦必使之富贵而优养之母疑母阻今尔竟不往归策妄阿喇布坦仍另自游行岂因尔向与策妄阿喇布坦不睦有归噶尔丹之事故不便复归策妄阿喇布坦乎今噶尔丹身死国亡生擒其子塞卜腾巴儿珠尔又擒伊拉古克三胡土克图今尔不速来渐至日久则尔生计亦渐迫若尔率属下星速来降朕必加以厚恩优待爱养目下丹济拉车陵等来降俱使得所而爱养之尔亦当闻之详矣今軫念尔无所归生计窘迫欲使得所之意尔当筹之速来归降毋貽後悔为此特遣尔幼时服役识认之人罗卜臧丹巴齋

敕往諭

十二月甲寅

上諭大學士等曰朕屢次出兵看來為將誠難一應軍務惟在相機而行固不可急亦不可緩如阿喇尼紀爾他布過於急而為賊所敗馬思喀等又過於緩而致伊拉古克三胡土克圖逃脫去年中路出兵時雖以衆論俟大將軍費揚古然以此為至論亦屬不可彼時費揚古於五月十三日若不到昭莫多則噶爾丹豈不脫逃乎故為將者必相機調遣方能濟事其餘庸流則多有失策矣

大清聖祖合天弘運文武睿哲?儉寬裕孝敬誠信中和功德大成仁皇帝聖訓卷十八

# 卷十九

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十九

武功七

康熙三十七年戊寅十月乙巳诸王大臣等以荡平噶尔丹奏请立碑太学以垂万世

御制碑文曰惟

天尽所覆海内外日月所出入之区悉以畀予一人自践阼迄今蚤夜殚思休养生息冀臻熙皞以克副维皇大德好生之意庶几疆域无事得以偃兵息民迺厄鲁特噶尔丹阻险北陲因此一方人既荼毒塞外辄狡焉肆其凶逆犯我边鄙虐我臣服人用弗宁夫荡寇所以息民攘外所以安内边寇不除则吾民不安此神人所共愤天讨所必加岂憚一人之劳弗貽天下之逸於是断自朕心躬临朔漠欲使悔而革心故每许以不杀彼怙终不悛我师三出绝塞朕皆亲御以行深入不毛屡涉

寒暑劳苦艰难与偏裨士卒共之迨彼狂授首胁从归诚荒外君长来享阙下西北万里灌燧销烽中外乂谧惟朕不得已用兵以安民既告厥成事乃蠲释眚灾洁事禋望为亿兆祈昇平之福而廷臣请纪功太学垂示来兹朕劳心於邦本尝欲以文德化成天下顾兹武略廷臣僉谓所以建威消萌宜昭斯绩於有永也朕不获辞考之礼王制有曰天子将出征受成于学出征执有罪反释奠于学以讯馘告而泮宫之诗亦曰矫矫虎臣在泮献馘又礼王师大献则奏凯乐大司乐掌其事则是古者文事武事为一折冲之用具在樽俎之间故受成献馘一归於学此文武之盛制也朕向意於三代故斯举也出则告於神祇归而遣祀阙里兹允廷臣之请犹礼先师以告克之遗意而於六经之指为相符合也爰取思乐泮水之义为诗以铭之以见取乱侮亡之师在朕有不得已而用之之实或者不戾於古帝王伐罪安民之意云尔铭曰巍巍先圣万世之师敬信爱人治平所基煌煌圣言文武道一礼乐征伐自天子出朕临域中逾兹三纪尝见羹墙寤寐永矢下念民瘼上承帝谓四海无外尽隶侯尉维彼凶丑渎乱典常既梗声教遂窥我疆譬之於农患在螟螣秉畀不施将害稼穡度彼游魂险远是怙震以德威可往而取朕志先定龟筮其依属车万乘建以龙旗祝融骖鸾风伯戒途宜阳而阳利我樵苏大野水涸川渎効灵泉忽自涌其甘如 设为犄角一出其西一出其东中自将之绝域无人兽羣受掩五日穷追彼狂走险大歼於路波血其孥剪其党孽俘彼卒徒衆乌昼号单马宵遁恐久驻师重为民困慎固戍守还轅於京自夏徂冬雨雪其零载驰载驱我行至再蠢兹穷寇昏惑不悔我边我氓以休以助爰宁其居爰复其赋藩落老稚斯恬斯嬉岁晏来归春与之期春风飘飏扬我旌旆我今于迈如涉我郊言秣我马狼居胥山登高以眺阒彼弹丸天降凶罚孤雏就羈三驾三捷封狼輿尸既腊梟獍既猕豺獍大漠西北解甲弃殳振旅凯入泽霈郊卜明

禮肆赦用迓景福昔我往矣在泮饮酒陈师鞠旅誓屈羣丑今我来思在泮献功有赫颂声文轨来同采芹采藻颂兴东鲁车攻马同亦镌石鼓师在安民非出得已古人有作昭示此旨緬维虞廷诞敷文德圣如先师战慎必克惟兵宜戢惟德乃绥亿万斯年视此铭词

康熙三十九年庚辰七月庚子大学士等遵

旨以商南多尔济等所奏青海事宜问侍郎常绶等回奏上曰此事稍觉迟延方奏到日即为行文甚好青海台吉亦属失算何以先将己意泄漏但将来使照常款待礼遣断不敢构衅今以朕计之亦尚无妨朕巡幸蒙古之地颇多凡事朕皆熟悉策妄阿喇布坦人虽狡猾但由博罗塔拉至土伯特必经哈喇乌苏等艰险之处路径甚恶断不能往伐何也策妄阿喇布坦素行奸恶故其附近哈萨克布鲁特诸部皆相仇讐欲悉军大举则路既难行且无留护其妻孥者若兵单力弱断难成事惟有奋激而行妻孥与俱幸而有济则己无济则有归附土伯特之谋而已然策妄阿喇布坦奏书之意特张虚声欲观青海之动静耳亦未必果有争战也观古赵充国所议五事良是应宜留意

康熙四十二年癸未九月丁卯湖广提督俞益谟偏沅巡抚赵申乔题报红苗抢掠地方

上谕大学士等曰红苗事当筹一劳永逸之计苗人固惯行抢掠而因内地人勾通煽诱者亦有之今照招抚广东八排瑶人事遣大臣一员前往领荆州兵再酌派广西湖南贵州三省兵齐至苗地并力围困令其畏惧就抚则百姓可永免侵掠之患矣尔等与九卿会议具奏

己巳大学士九卿等遵

旨议覆湖广提督俞益谟等所奏红苗一事仍照前招抚广东八排瑶人之例派遣在京大臣率前锋四十人前往调遣荆州及广西贵州湖南三省兵酌量招抚剿灭

上曰满洲兵所向无敌顷广东仅发前锋四十名八排瑶人望风投降今苗人一闻特遣禁旅必自畏而就抚若辈不如此示以利害则地方百姓何能安居尚书席尔达原任川陕总督曾管兵丁红苗之事着席尔达同副都统图斯海徐九如前往

康熙四十五年丙戌十月庚寅

上谕武殿试读卷官等曰今天下太平日久曾经战阵大臣已少知海上用兵之法者益稀朕甲子年南巡由江宁登舟而下至黄天荡江风大作衆皆危惧朕独令冲风而行朕竚立船头射江豚略不经意後又南巡乘船渡江微觉心动去岁之行见人渡江者即为心悸由此观之皆年为之也大约年少则血气强年老则血气衰尝问之宿将皆云年少力壮故能登城陷险今则怯矣凡将军提督总兵官当年少时冒锋鏑越险阻所在効力及位至大僚家亦富饶而年齿渐高设一旦有事使之率兵而行欲其奋勇効命如前何可得耶

乙巳

上諭大學士等曰前遣護軍統領席柱等往取假達賴喇嘛及第巴妻子時諸皇子及諸大臣俱言一假達賴喇嘛取之何為朕意以衆蒙古俱傾心皈向達賴喇嘛此雖系假達賴喇嘛而有達賴喇嘛之名衆蒙古皆服之倘不以朝命遣人往取若為策妄阿喇布坦迎去則西域蒙古皆向之矣故特遣席柱等前去席柱等方到其地策妄阿喇布坦果令人來迎以此觀之若非遣人前往則假達賴喇嘛必已歸策妄阿喇布坦矣至西域回子及蒙古今衰弱已極欲取之亦甚易但并其地不足以耕種得其人不足以驅使且見今伊等已俱恪守法度是以不取此等情事漢大學士及九卿等想俱未深悉爾等可將朕諭示之

康熙四十七年戊子三月己巳

上諭議政大臣等曰朕自幼時讀書之余常習騎射因見滿洲挽硬弓者甚少常以騎射鼓舞衆人今見官員兵

丁中挽十五力及十餘力弓者甚多矣且朕自幼常習畋獵身體強健中路出征時往來行走四月有餘日進一餐五更起行至晚始歇遇沙地則下馬步行殊覺耐勞至寧夏出征時往來兩月有餘竝不會在路途中歇養馬駝自往迄還馬駝俱無倒斃舊時將軍出兵於未到西安寧夏荊州等處之先必喂養馬匹二三十日然後起行尚不能無倒斃之累由是觀之凡領兵行走欲士卒精強馬匹壯健俱視帶領之人措置何如耳且寧夏出兵之時朕帶領兵丁於六鄂爾多斯花馬池定邊等處行圍每日殺兔數千一日所獲可作兵丁幾日乾糧朕於花馬池地方一日殺兔三百一十八只自寧夏回時至黃河渡口因無大船朕量帶侍衛人等乘小舟順流而下以所帶乾糧甚少每日往山間畋獵河中網魚而食二十餘日竝未用及乾糧至湖灘河朔渡口朕日御小舟令新滿洲四人棹舟追射鴈鴨等物一日可得數百只彼時朕方年壯兼之熟習水性故毫不介意迄今思之轉覺自懼也然領大兵行走事必率先心能預料始可服衆令其遵指授而行也朕於諸事閱歷已周行走已熟深悉其可成而後行似朕帥領有方身先士卒嗣後將軍大臣等亦難仿效蓋天下事無有過於領兵之難者也

康熙四十九年庚寅八月庚辰

上諭大學士等曰朕自即位以來辦理軍務甚多向年平定三逆取台灣降鄂羅斯討滅噶爾丹用兵之道朕知之甚明部院諸事朕尚與諸臣商酌惟軍旅之事皆出自一心籌畫前於烏蘭布通擊敗噶爾丹人言彼時天晚未獲全剿嗣後費揚古於昭莫多地方至傍晚時大敗噶爾丹殺賊竟夜以此觀之隨時遇見賊寇即當击杀豈可以日夕推諉而不奮击乎朕巡行塞北至烏蘭布通觀我軍排列陣勢俱甚合節但噶爾丹乃行陣積年之賊於沙岡之下排列所以我軍火器俱高未獲盡剿後費揚古遵朕指示奮力击杀始能剿賊今海內承

平邊疆無事選擇武弁但視其步射騎射才堪管轄者用之而已其於行陣如何則無由知之也或有軀干短小步射平常而善於行陣者必遇敵時方能知之耳凡人誠知顧惜顏面能効



命者即为勇士原任正白旗副都统塞黑尹善射且相貌魁伟善於管辖兵马乌阑布通之战彼则大惧故为受暑下马其家人俱愤曰身为二品大臣如此临阵退怯归去何颜见人耶扶之上马塞黑尹复下马卧於草内及回营犹战栗不已身披甲胄蒙被达旦因此伊所管兵丁无不耻笑内府员外郎喀青阿之父海西尼身小力微曾往福建随征得本旗头等功牌八次虽身体数处被伤而攻城之时犹令人用木板舁之前往以观攻城及城既拔谓衆曰我因残疾未获与汝等一同効力愤恨大哭又原任巡抚杨熙亦甚瘦小丑陋当尚之信反叛时彼与海澄公之弟黄世名拜音达礼俱在广东城内被贼围困三人各率家人杀出重围往赴大兵营内以此观之人之勇怯断不可以相貌定也且三逆叛时李之芳曾任浙闽总督伊虽不谙骑射执刀立於船首率衆突前大破敌人以立功绩彼时同出征者回京俱称李之芳之勇近征红苗提督李芳述亲冒礮铙鼓衆力战连破数寨闻赵申乔亦甚强毅又将军穆占孙思克等在平凉时与贼大战孙思克之手被贼砍中马进良曾为孙思克标下武弁闻之曰砍我总兵之手者吾必杀之遂突入万军中追杀砍孙思克手之贼马进良数处中伤至今尚有伤痕可谓奇勇矣今承平日久善於马步射能管辖兵丁者尚不乏人若经历行阵之人甚难得也野战尚易水战尤难盖水战必待迎风方出此特为易退之计也或我兵欲出之日贼兵不出或贼兵欲出之日我兵不出彼此相遇甚难必能识水性谙水阵之人始可随机应变调度成功也

康熙五十二年癸巳闰五月乙卯兵部题浙江巡抚王度昭招抚海贼陈尚义等见解到京九十二人作何安插

上曰先经拏获海贼俱已发遣宁古塔等处见今陈尚义等一百余人又来归诚伊等俱熟识水性海道之人将伊等归并盛京锦州地方着设立水师营近据山东总兵官李雄奏请裁伊标下水师营战船十只即将此所裁数内截留数船分往锦州看守地方巡防海洋似有裨益着满汉九卿詹事科道会同确议具奏

康熙五十四年乙未四月己丑

上谕议政大臣等曰朕经历军务年久且曾亲统大兵出塞征讨凡行兵机务靡不周知今欲用兵兵非不敷但虑路远运饷殊难诚能挽输无悞令全军得至策妄阿喇布坦之地朕心始慰此兵多系从前在昭莫多乌阑布通屡经对敌之兵且人人怀报効之志若策妄阿喇布坦来战不论何地制胜有余再若由噶斯路进兵一万赴伊里河源抵彼巢穴由哈密吐鲁番进兵一万由喀尔喀进兵一万前至博克达额伦哈必尔汉地方如此三路进剿料必成功但其间进止又在临时相机而行未可预定尔等虽未身历军旅既为国家大臣於议此等要事时当详审筹度务合机宜非可视同泛常也

乙未

上谕议政大臣等曰军中机务甚属紧要前剿噶尔丹时曾由两路运米至翁金河乃已经熟识之地而推河与翁金甚近又从前两路所运之米至回军时尚未用完度今所用钱粮最多

不过三四百万可以足用着户部动支正帑运送军务乃系大事着遣司官二员分往富宁安祁里德处令公同商议策妄阿喇布坦兵已大败而去今若三路进兵或即行进剿或前逼近彼处遣使招降着富宁安与将军提督总兵官祁里德与喀尔喀汗王台吉等各详议具奏喀尔喀汗王台吉等若自度兵力可以进剿固善或再助以我兵及黑龙江索伦打虎儿兵更为妥当再西安甘肃巡抚处着将河东盐课银四五十万两解往

七月甲午朔

上谕议政大臣等曰近和托辉特公博贝奏请招抚吴梁海及策妄阿喇布坦所属厄鲁特杜尔伯特丹津一千户人若伊等抗拒不服即行攻取臣有兵一千五百度已足用若圣上谓应添兵则有根敦扎萨克罗卜藏所属翁科特兵扎萨克济纳米达兵扎萨克台吉阿礼雅兵俱善於攻战可以破敌将此三扎萨克兵添给足矣着照博贝所请将三扎萨克兵添给博贝带领前去遣人往吴梁海处以好言招抚若不归顺逃入树林深密处亦无关紧要相机行事可也至於杜尔伯特丹津处应再探其情实或抚或剿博贝领兵前往时若有策妄阿喇布坦兵向我喀尔喀直冲前来即着尾其後以牵制之杜尔伯特丹津与厄鲁特散秩大臣车领为弟兄可令车领遣一亲信人写给书信尔等将此事派一章京或笔帖式飞驰发往博贝处并带车领人同去即随博贝兵一齐进发

康熙五十五年丙申三月辛丑

上谕议政大臣等曰差往策妄阿喇布坦处之克什图保柱并泽卜尊丹巴胡土克图之使人楚阳托音及策妄阿喇布坦差至泽卜尊丹巴胡土克图处之使人潘提忠内等来京朕询问策妄阿喇布坦情形皆已悉知策妄阿喇布坦乃巨猾奸诡之人甚属无耻以朕之使臣非系使臣旨意非系谕旨是部文等语今尔诸大臣等向克什图保柱等详询策妄阿喇布坦情形将克什图保柱及楚阳托音潘提忠内等一同遣往作何遣往之处尔等会同副都统以上并九卿大臣各陈所见详议再传谕汉大臣等从前但以兵粮牲口路远难到为念今祁里德处粮米见剩有二千余石而西路之米亦皆陆续运到两处之米悉属充裕无容计虑朕从前中路出兵时曾於沿途按站留米令煮粥以赡养营中困乏之步行跟役并贸易人等大有裨益今两路进兵之站亦应照此行将军席柱胸中毫无主见一应军务粮饷

俱将军之责伊云我但统领兵丁运米之事与我无涉粮到我即行等语可见席柱无将军之才此处亦着确议再总兵官路振声一闻侵犯哈密即领兵往救且闻伊爱养标下兵丁甚属出力路振声着授为参赞据策妄阿喇布坦奏恳遣使一贤能大员等语克什图保柱出使策妄阿喇布坦处所已经数次今加伊等大衔即系大员矣再凡为使臣者果能一体同心於事方克有济若内有不睦互相掣肘彼此言语矛盾一有差失则无益於事伊等有不合处即当明言为是再派出在京一人偕克什图保柱前去此处亦着会议朕书谕旨时令克什图保柱等面看缮写伊等俱以为宜其再明示诸大臣我两路兵马牲口粮米一应俱已齐备两处军中业已种地秋季收获可期此番使臣知策妄阿喇布坦处确实情形即将大兵逐渐进至伊地且告以会讲遣往并非进剿之兵亦无可也

十月丁未

上谕议政大臣等曰策妄阿喇布坦赋性狡诈知我兵在巴尔库尔阿尔泰等处防守严密若探听噶斯路兵势单弱由噶斯路来犯侵扰青海亦未可定不可不预为防备朕意派西安满洲兵及督标兵二千名着护理西安将军印务总督额伦特带往西宁预备如策妄阿喇布坦由噶斯路来犯着西宁预备之兵与青海左翼台吉等会合提督康泰带领四川之兵与右翼台吉等会合两路协守策妄阿喇布坦断不敢来犯倘由嘉峪关外及布隆吉尔等处以彼微弱之卒惊我大兵之後亦未可定着行文富宁安令选兵一千名预为防备朕意以为策妄阿喇布坦知祁里德之兵今值冬季雨雪之时决不前进或由公博贝之後以微弱之卒潜来惊扰亦未可定着行文晓谕尔等速议具奏

十一月辛酉

上谕议政大臣等曰朕综理军务年久经历甚多且曾亲统大兵安定边塞衆议欲於明岁进兵又虑路远粮米难运其见不可为非但大兵进剿策妄阿喇布坦势不能当必致逃避明年着暂停进兵加意耕种将粮饷马匹预备整齐後年再行进兵其盛京宁古塔兵丁照旧?往京城之兵着暂停止策妄阿喇布坦词虽卑逊竟遣人盗我噶斯路兵丁之马我兵岂可坐守着将孔格札布罕兵内拣选精骑由阿尔泰作三四路袭击巴尔库尔兵内拣选作两路袭击此袭击之兵遇可击之处即行袭击可取则取应退则退相机而行袭击後仍回驻兵之处策妄阿喇布坦地方必然震动其余党或有变端以致逃亡亦未可定我兵如此一举其道路地势皆可悉知将此询满汉大臣若仍欲明岁进剿尔等将原议具奏

十二月丙午

上谕侍卫郎泰等曰尔等往谕尚书富宁安明岁暂停进兵之故朕亲加筹度复命议政大臣等详议已降旨於两路出征大臣矣遣兵袭击之处尔等与富宁安彼处大臣及公傅尔丹并厄鲁特喀尔喀王贝勒贝子公等会同详议具奏至厄鲁特等甚属狡诈指称投诚或潜来侵犯亦未可定此处应加意防范如果实心率衆来投将彼为首之人解送来京其余令在克鲁伦河地方游牧交与左翼喀尔喀扎萨克等酌量安插所遣袭击兵丁将擒获贼犯释放一二人告彼云汝辈盗窃中国马匹所以边上驻扎之兵竝未候旨即行追剿前进今朝廷深悯汝辈降旨不许肆行杀戮因此各回汛界再传谕公博贝此处正伊効力之所着益加勤慎厄鲁特喀尔喀公内亦有身材壮健者着将和托辉特等处兵派出一同前往袭击如此则策妄阿喇布坦情形自然显露矣然军机事务临期酌量难以预揣惟在领兵大臣善为筹度耳尔等会同定议後即速行奏闻

康熙五十六年丁酉三月丁丑

上谕议政大臣等曰大兵前进宜攻取吐鲁番或招抚之即与哈密相类尽入国家版图既入版图不得不善为保护若袭击之兵势觉单弱或策妄阿喇布坦拥衆而来救援吐鲁番或吐

鲁番等更变彼时不能看守则得而复失关系甚大着军中大臣详加筹画如有难处之势仍照前议袭击回来为是又军务应相机而行若此兵袭击能使策妄阿喇布坦军中内乱分散来归则竟行袭击不必请旨将此训旨晓谕军中大臣

五月癸酉

上谕将军傅尔丹等曰吴梁海之有无总无关系见今扫灭策妄阿喇布坦之事乃属紧要若大处不理止将吴梁海收取迁移以为紧要一经举动之日向何处驱逐耶策妄阿喇布坦若一摇动吴梁海自俱为我有凡谋大事之人应将小处暂置见今罗卜藏达席之信亦尚未来也

八月壬午朔

上谕议政大臣等曰闻策妄阿喇布坦在阿里克地方帮助拉藏发兵六千名一事虽虚实未知朕意料之甚属可恶策妄阿喇布坦先曾向泽卜尊丹巴胡土克图之使者云拉藏汗系嗜酒无用之人不足介意羁留其子并留达赖喇嘛班禅之使不令前去今此兵或征取拉藏收取西边地方或帮助拉藏侵犯青海俱未可定若系征取拉藏其兵於去年十一月前往今已成讐我兵欲救援拉藏恐地方遥远策妄阿喇布坦之兵若帮助拉藏同来侵犯青海则不可不备兵协助迎剿矣见今巴尔库尔有富宁安阿尔纳等一应军务俱已谙练行兵甚易应将额伦特撤回仍驻扎西宁协助兵丁与青海之人一同预备尔等议奏

十月丙午

上谕九卿等曰口外有一定当行之路水草足用若不谙路径则难於前进所以行路先须酌量形势策妄阿喇布坦所住之处即古阳关哈密以西即古瓜州沙州所通之地甚广前有以守边之说进者势必将边墙之外弃去断断不可即如台湾南澳人以孤悬海外无关紧要自得其地福建广东之贼便无容身之地所系非轻然海中之路亦有一定福建至盛京沿海一路曾令详细绘图岛屿停泊皆有定所口外亦是如此彼处行路宜於冬不宜於春夏昔人用兵以为春间口外马瘦内地马肥殊不知春间马一出口肥者先坏受累不小凡人平时易出大言临事多畏缩逡巡口外行走遇大雨大雪即惊惶无措用兵须主意坚定若主将仓皇人心皆为摇惑矣赵申乔前在偏沅征红苗挺身前进新满洲令其在後以避鸟枪伊云即有不测我後人尚可得廕袭与我身在何异赵申乔竝不嫺军旅但立定主意便无畏怯从前耿逆变乱李之芳守衢州亦是身先士卒也当初西路用兵满兵已先进绿旗兵畏死欲退将军孙思克谕云满兵前发竝未伤损一人尔等且看满兵若有死伤再退未迟衆始前进因成大功

十一月甲戌

上以甘肃提督师懿德议不可进兵一摺示满汉大学士

学士九卿詹事科道等

谕曰此事彼处督抚不奏师懿德独奏亦是仿刘?枢之意且将师懿德留京用兵之事原要机谋非拘执不通者所能办理当中路出兵时人云地寒马瘦到彼处马匹必致冻死又包衣大力言粮饷未到难以前进朕即止之云此中机谋非尔等所知如再妄言即律以军法朕来时祭告

天地

宗庙必见噶尔丹方回又与费扬古约两路合兵今不前进如何先回朕亲率大兵深入敌境算在必胜也噶尔丹使人来朕留营中七日谕来使云不见噶尔丹必不轻回鼓兵前进差人往视噶尔丹已遯去二日再差人往视已尽弃庐帐器械远遯矣朕乃回兵今策妄阿喇布坦本属小丑不足为虑但怙恶不悛侵陵哈密前曾以二百人败其二千余人矣今因其移兵到藏道路甚远又无接应自去年十月起行今年七月方到过三层冰山噶斯等处实为难行然彼既可以到藏我兵即可到彼处兵亦不用多二百余人便可破之矣人奏彼处雪深八尺兵不可住今李先复系汉人自彼处运米回来气色甚好竝不见途中有病人是西边水土可住故复议明岁三四月出兵用兵惟以安宁百姓保护地方为先故各省督抚奏摺来俱批先固内地紧要不可听小抄以惑人心我朝驿递之设最善西边五千余里九日可到荆州西安五日可到浙江四日可到三藩叛逆吴三桂轻朕年少及闻驿报神速机谋深远乃仰天叹服曰休矣未可与争也

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷十九

## 卷二十

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十

武功八

康熙五十七年戊戌九月己卯

上谕议政大臣等曰在噶斯一路驻扎之阿齐图带领兵丁一千业已进藏所剩兵一千有西安之佐领禅播等带领驻扎柴旦木地方今届秋时探知策零敦多布等设兵处便可发大兵进剿若谓彼兵趁冬雪之际轻兵来至噶斯一路惊扰青海因此遽将进取西招之兵撤回噶斯则彼且谓得计亦未可定朕意驻扎肃州之总兵官李耀身材壮健今闲住肃州若令李耀带领兵丁前赴噶斯今冬在彼防守似有裨益尔等会同确议具奏

十二月庚午

上谕议政大臣等曰派黑龙江索伦打虎儿及宁古塔船厂盛京六处兵共三千名令於来年三四月间青草发生时各带马匹由索岳尔济地方至喀尔喀河下流上克鲁伦河而去其一路行粮着先派人前往车臣汗一带令不曾派兵之二十二处扎萨克帮助马羊再於达里刚爱羣内取羊拨给其盔甲器械着於京师制造给予此所派之兵俱发往将军傅尔丹处再将傅尔丹向时所领之安逸好兵三千名拨过富宁安处至於胡什图英柱领去之兵竝未到所指之处亦无劳绩将伊等带去之每佐领下护军一名披甲一名亦发往富宁安处令其効力再有不取吐鲁番之兵若进吐鲁番界口竝乌阑乌苏等形势之处着设兵一枝修筑城垣四远哨探加意防守则可得一切总要信息亦可常得逃人自此直至巴尔库尔地方沿途修筑墩堡每堡设兵四五百名令其坚守而大兵仍照常驻扎巴尔库尔如敌兵来少则即行殲灭若多则相机进剿如此则我兵永占要地可以待敌兵之自毙矣此各处边境驻守之兵每年不过用银一二百万两将此等事尔等公同详议具奏

康熙五十八年己亥正月癸卯

上谕额驸吴尔袞等曰今年大兵既不能前进若发兵袭击策妄阿喇布坦则伊情形自露着派盛京乌喇察哈尔索伦喀喇沁以及内地喀尔喀之兵一万自前年进兵之处往彼袭击出兵时厄鲁特王策零旺布公多尔济色卜腾之人不必派往又从前曾欲令盛京三千兵过巴尔库尔地方今暂行停止此次袭击之兵令於六月间?往及秋而回设或今年不便袭击来年

另为筹度尔等到傅尔丹处详议後即差人到巴尔库尔将军处一同定议具奏

九月乙未

上谕议政大臣等曰差往西边胡毕图奏称策零敦多布等及土伯特衆喇嘛民人俱言在西宁见有新胡必尔汗实系达赖喇嘛之胡必尔汗天朝圣主将新胡必尔

汗安置在达赖喇嘛禅榻上座广施法教实与衆人仰望之意允协且土伯特处时有瘴气厄鲁特之子孙不能滋生多生疾病有何贪恋之处惟恳天朝圣主将法教速为广施观此情形似乎易结今将新胡必尔汗封为达赖喇嘛给与册印於明年青草发时送往藏地令登达赖喇嘛之座送往时着大臣带满洲兵一千名蒙古兵一千名土番兵二千名绿旗马兵一千名步兵一千名前去其行粮牲口接续之处令大将军办理再由巴尔喀木带四川满洲兵一千名绿旗兵一千名土番兵酌量派往其行粮牲口接续之处令年羹尧办理青海王贝勒贝子公等亦带领属下兵或一万或五六千送往前去策零敦多布等若实为法教自必俟达赖喇嘛登禅榻後然後前去若不行等候遁走即为无耻之贼此行大将军带领兵马在索落木周围水草佳处驻扎兼照管青海家属驻牧处四川兵二千名出口驻扎兼照管王察罕丹津驻牧处事关甚大将此旨传谕大将军处令伊等公同确议具奏又青海王台吉等令大将军传集一处晓谕唐古特国内达赖喇嘛班禅法教原系尔祖上设立今策妄阿喇布坦无故将拉藏杀害令寺庙喇嘛各自散去将衆鄂里格一路截断今达赖喇嘛之牀空虚从前尔将此新胡必尔汗称为达赖喇嘛之胡必尔汗若安置在达赖喇嘛禅榻为法教广施之事我等愿舍命効力业经保奏土伯特之喇嘛民人及阿木岛地方喇嘛等俱亦称为达赖喇嘛之胡必尔汗皇上将此胡必尔汗特封为达赖喇嘛於明年大势一同送往藏地令登禅榻将法教广施放开衆鄂里格一路令其贩卖茶布此正宜効力之时尔等应各带兵丁与送去之大臣会同一处前去尔等之意如何令伊等各陈已意会盟画一具奏俟会议完时令都统延信楚宗公策旺诺尔布侍读学士长壽等由固关前来京师具奏

十二月丙辰议政大臣并军前召至大臣九卿等公同议奏进藏一事

上曰此议尚未周详只议西地进兵竝未议及阿尔泰巴尔库尔两路之兵两路之兵会合取吐鲁番若乌鲁木齐难以堵塞看守应将两路兵会合袭击或各减骑进入震慑从呼尔达拉之处袭击则彼必畏惧自然弃此牧放牲口之处而去再闻知西地大兵进剿并两路兵袭击不但惊惶无措亦且首尾不能相顾矣额驸阿宝所属厄鲁特兵五百名察哈尔兵四百名令带往取藏柴旦木所有之兵亦令前往取藏大将军留驻穆鲁斯乌苏三千兵内令派兵一千前进大将军之兵若少将京师每佐领下派出护军二名甲兵一名於二月内起程前往西宁今新胡必尔汗奏称各处俱有禅牀皆可安设若为我兴兵实关系衆生此或是新胡必尔汗之意或是青海台吉等畏惧策妄阿喇布坦密嘱新胡必尔汗具奏亦难预知倘新胡必尔汗与青海台吉等意同此新胡必尔汗不可送往青海台吉等若无此意必将新胡必尔汗送往安设禅牀广施法教令土伯特之衆诚心归向则策零敦多布自畏势逃遁我师进藏定立法教之後或留兵一二千暂行看守或久住则土伯特之衆即如我兵纵策妄阿喇布坦策零敦

多布发兵前来伊系劳苦之兵我则安逸之兵即可剿灭朕意如此事关重大不可急迫从容周详定义为是今若照衆大臣议惟行看守自西宁至四川云南内外土番杂居一处西藏之人皆系土番伊等俱是一类倘藏地被策零敦多布占据则藏兵即是彼之兵丁而边疆土番岂能保全尔等暂行看守之议不合着另行周详定义具奏

康熙五十九年庚子正月壬申

上谕议政大臣等曰

太祖

太宗时满洲兵於凡征战之所马匹口粮自备行走所向立功竝无迟悞今官兵凡有行走之处马匹粮饷及一

切物件俱给自官帑且以为不足而怨咨生焉此皆满洲风习较异曩昔亦由该管官竝不严饬之故也朕办理军务阅历甚多向时攻取岳州但从陆路抵御以致许久不克朕谕令洞庭湖备船只以水路遏贼贝勒察尼奏湖中风浪甚大船不能行恐有碍於兵丁请撤战船朕谕以岳州城已被困不久即下若将战船兵撤回贼得由水路往来何能有得岳州之期哉於是不撤船兵严饬看守未几而岳州下矣再征讨云南时满汉官兵合计四十余万贝子章泰等离云南城七十里安营一面临湖一面抵山未令设兵湖中断其水路贼寇米粮仍旧运行城内竝无危急後赵良栋率宁夏兵至云我等连营四布不就近速战迨至日久米粮不继虽满兵无妨营兵何以存立耶章泰云云南城久被围困朝夕可下尔兵丁俱从远来宜休养之何可令其伤损设或营兵不能御敌我等势必捐躯赵良栋不从章泰之言自率标兵前往力战夺取得胜桥而赵良栋之兵亦瘁甚矣章泰又向赵良栋云尔兵已瘁应暂撤回令总督蔡毓荣率兵看守赵良栋云我死战所得之地肯交与他人看守乎城内贼寇闻之始觉恐惧失措不数日而云南下矣此亦由决於进战乃得成功也再出征乌阑布通时阿密达因天晚撤兵云皇上必不以撤兵故遂杀我等将兵撤退索额图明珠选勇士数百人埋伏勇士云挑选我辈原拟或战或追詎意止令看守衆俱忿怨後中路出兵时令大臣官员等会议进兵之处衆皆谓不可独朕与费扬古以兵为可进决意进兵及至科拖地方衆皆不欲前发大臣等劝朕撤兵朕谕以祭告

天地

太庙

社稷亲统兵前来不见贼踪如何骤行撤去不允所请将兵前进噶尔丹闻我兵威甚是惊惧鼠窜而去朕选兵令马思喀为将军尾追噶尔丹又遇西路兵攻击大败

之朕将中路初次运到之米遣明珠速送至费扬古军前二次米亦即令续送三次米内朕但



留十八日口粮余俱送西路军前是以西路兵丁未至饥馑得保全而回彼时若轻信大臣等言中道撤兵则两路兵丁安得立功奏凯耶今观领兵大臣官员等只为保身之计不以国事为重内存私意争论不和又向兵丁等沽名市恩多取口粮及不能驮载至於抛弃全无珍惜之意如此居心行事可乎朕之满洲兵俱极精练全在领兵者将国家之事专心办理不图安逸赏罚严明则断无错悞进兵西藏时色楞不候衆人独自前往额伦特为国家奋不顾身虽至失机岂可论伊等进兵太速乎今策旺诺尔布系差往策应之兵而迟延不前虽伊所统兵丁善全而归伊属下之兵固然感念於国事有何裨益惟进征西路身亡兵丁朕甚为怜悯当分别加恩至大臣官员等在部院衙门亦能清廉自守若行军大事又非仅清廉自守者能胜任也朕年少时每於讲武练兵等事违命者必置之法内外大小悉知儆惕由此观之训练之事不可疎忽也兹衆喀尔喀及青海等俱服朕之风化其策妄阿喇布坦之人霸占藏地毀其寺庙散其番僧青海台吉理应弃命忘身奋勇致讨乃伊等口称维持黄教却无实心効力之人策零敦多布领兵在藏以我兵隔远不能往救策零敦多布步行一年有余忍饥带馁尚能到藏我兵顾不能至乎今满汉大臣咸谓不必进兵朕意此时不进兵安藏贼寇无所忌憚或煽惑沿途番部等将作何处置耶故特谕尔等安藏大兵决宜前进

十月乙卯抚远大将军允禩疏报平逆将军延信等率领大兵於八月十五日驻扎卜克河地方是夜策零敦多布等率衆来犯击败之夺其马匹器械十九日自卜克河起程二十日驻扎齐嫩郭儿地方三更时有贼兵二千余人来袭我师我师严整备御贼衆久持不能抵敌遂奔北二十一日自齐嫩郭儿起程二十二日驻扎绰马喇地方是夜五更又有贼兵千余劫营因营中四面哨兵枪礮矢石齐发贼兵被伤身死者甚多其余贼皆望风而遁延信等随率领满汉官兵於九月初八日自达穆地方起程送新封达赖喇嘛进藏其从前达赖喇嘛博克达不便留住藏地应?回京师

上谕曰前遣大兵进藏议政大臣及九卿等俱称藏地遥远路途险恶且有瘴气不能遽至宜固守边疆朕以准噶尔人等见今占取藏地骚扰土伯特唐古特人民再吐鲁番之人皆近云南四川一带边境居住若将吐鲁番侵取又鼓动土伯特唐古特人衆侵犯青海彼时既难於应援亦且不能取藏朕决意独断着靖逆将军富宁安振武将军傅尔丹征西将军祁里德管领两路官兵前往策妄阿喇布坦边境惊扰袭击又遣定西将军噶尔弼领云南四川满汉官兵由拉里前进平逆将军延信领西路官兵由青海前进又遣大将军总领大兵驻扎穆鲁斯乌苏调遣官兵办理粮饷伊等俱各加奋励两路袭击之兵至策妄阿喇布坦边境屡次大胜剿杀贼兵擒获人畜招抚数千准噶尔人衆兹覽大将军奏延信等三次将策零敦多布杀败贼兵逃窜殊属可嘉在事将军以下兵丁以上俱着从优议叙

康熙六十年辛丑六月癸巳

上发朱笔谕旨命福建总督满保传

谕台湾百姓曰据督臣满保等所奏并伊等进摺家人所言台湾百姓似有变动又奏称满保於五月初十日领兵起程等语朕思尔等俱系内地之民非同贼寇或为饥寒所迫或因不肖

官员刻剥遂致一二匪类倡诱衆人杀害官兵情知罪不能免乃妄行强抗其实与衆何涉今若遽行征剿朕心大有不忍故谕总督满保令其暂停进兵尔等若即就抚自原谅尔等之罪倘执迷不悟则遣大兵围剿俱成灰烬矣台湾只一海岛四面货物俱不能到本地所产不敷所用只赖闽省钱粮养贍耳前海贼占据六十余年犹且剿服不遗余孽今匪类数人亦何能为耶谕旨到时即将困迫情由诉明改恶归正仍皆朕之赤子朕知此事非尔等本愿必有不得已苦情意谓与其坐以待毙不如苟且偷生因而肆行掳掠原其致此之罪俱在不肖官员尔等俱系朕历年豢养良民朕不忍剿除故暂停进兵若总督提督总兵官统领大兵前往围剿尔等安能支持此旨一到谅必就抚毋得执迷不悟妄自取死特谕

乙卯议政大臣等以将军富宁安报称吐鲁番回人托克托麻穆忒等归顺一摺请

旨

上谕曰据富宁安奏称策妄阿喇布坦将吐鲁番回人托克托麻穆忒等迁往哈喇沙尔地方中途逃回在鲁克齐木地方驻扎等语见今归顺之回人与准噶尔之人争鬪将准噶尔之人杀害取甲来献观此情形策妄阿喇布坦似略无报复之意或伊同党内有不睦亦未可定此机不可遗失朕意策妄阿喇布坦将伊等不能迁往哈喇沙尔又不能护卫准噶尔之人足见万不能敌我兵今收复吐鲁番若不看守则策妄阿喇布坦处归顺之人以及来使逃人有回人居中倘行杀掠此路必致阻隔尔等速议行文富宁安派绿旗兵一千名察哈尔厄鲁特蒙古回兵一千名前赴吐鲁番收纳归降回人照看驻扎将归顺之人及来使逃人往内解送之处牢设哨汛今回人归降於我与厄鲁特世成讐敌即系我民其巴尔库尔相距吐鲁番止六百里为途不远如果策妄阿喇布坦率衆侵扰我兵前去援救不迟着富宁安预行转飭回人等於我军尚未抵境之时若有策妄阿喇布坦之处来使逃人万勿隐匿侵犯即行解送着议奏

九月戊戌

上谕议政大臣等曰上年策妄阿喇布坦将伊边界之人收去又将吐鲁番回人移往哈喇沙尔其阿尔泰乌鲁木齐等处无一哨汛因其寂然以处遂有策妄阿喇布坦身死之信然不可据以为实也将军祁里德奏策妄阿喇布坦若果身死则机不可失请预备进兵尔等行文大将军及靖逆将军富宁安等宜照原议今岁将吐鲁番坚守为要又阿尔泰吐鲁番一带汛地均宜加意防守冬令雪降草枯之际不可贪功轻进且将兵丁马匹一应什物整齐备办以俟来年大举征剿此旨着即行抄録传谕军前大臣等知之

丁巳蒙古王贝勒贝子公台吉及土伯特酋长等奏西藏平定请於招地建立丰碑以纪盛烈昭垂万世

御制碑文曰昔者

太宗文皇帝之崇德七年班禅额尔德尼达赖喇嘛顾实汗谓东土有

圣人出特遣使自人迹不至之区经讐敌之国閱数年始达盛京至今八十载同行善事俱为施主颇极安宁後

达赖喇嘛之歿第巴隐匿不奏者十有六年任意妄行拉藏灭之复兴其法因而允从拉藏青海羣衆公同之请中间策妄阿喇布坦妄生事端动准噶尔之衆肆行奸诈灭坏达赖喇嘛竝废第五辈达赖之塔辱蔑班禅毁坏寺庙杀戮喇嘛名为兴法而实灭之且欲窃据土伯特国朕以其所为非法爰命皇子为大将军又遣朕子孙等调发满洲蒙古绿旗兵各数万历烟瘴之地土马安然而至贼衆三次乘夜盗营我兵奋勇击杀贼皆丧胆远遁一矢不发平定西藏振兴法教赐今胡必尔汗册印封为第六辈达赖喇嘛安置禅榻抚绥土伯特僧俗人衆各复生业於是文武臣工咸谓王师西讨历瘴疠险远之区曾未半载辄建殊勲实从古所未有而诸蒙古部落及土伯特酋长亦合词奏曰皇帝勇略神武超越往代天兵所临邪魔扫荡复兴蒙古向所尊奉法教坎木藏卫等部人衆咸得拔离汤火乐土安居如此盛德大业非臣下颂扬所能宣罄请赐御制碑文?勒招地以垂永久朕以何功焉而羣衆勤请不已爰纪斯文立石西藏俾中外知达赖喇嘛等三朝恭顺之诚诸部落累世崇奉法教之意朕之此举所以除逆抚顺绥衆兴教云尔

康熙六十一年壬寅正月庚子

上谕议政大臣等曰策妄阿喇布坦之兵屢被我师击败死伤颇多策零敦多布等贼衆亦大半死亡弃藏窜走仍回伊里地方固守三岭若我满洲兵至则舍命交战势有不敌又思逃避他所希图存活此等情形了然可睹朕数日来细加寻绎伊里山蹊险隘我朝大兵虽欲今年进剿倘为三岭阻隔迟延时日或策妄阿喇布坦战败带领妻孥逃往则我师应否追剿不可不详加定议今策妄阿喇布坦之伎俩悉已深知策妄阿喇布坦亦稔知天朝兵威所加势必不能自存但此时遽遣使向策妄阿喇布坦处招抚彼不知我寬仁之意反以为不能取彼复生他心亦未可定尔等可议写发往策妄阿喇布坦之书着泽卜尊丹巴胡土克图选派好喇嘛为使作速差往其差往之人过阿济岭由吐鲁番一路前往不久可到彼处信息情形亦即得闻知如胡土克图之使者善为晓谕策妄阿喇布坦畏惧天讨将拉藏妻子家属并从前被掳之人送来请罪诚心投顺永不敢侵犯边隅如此可另行商酌倘策妄阿喇布坦已死或伊处内变生乱除向天朝投奔外彼将焉往则我兵进发亦不可缓即一面进兵一面差使亦无耽擱之处今各路兵丁或向伊里前进或於吐鲁番固守渐进乌鲁木齐等处驻扎营寨相机而行或几路前往袭击以及大兵粮饷作何运到之处着议政大臣军前调回将军大臣会同核议妥确具奏

二月己卯

上谕议政大臣等曰今年大兵前进驻扎乌鲁木齐地方尔等念虑米粮不能接济或致迟悞彼时撤兵不可驻兵不可似有烦难之处朕亦虑及但我兵预备数载去年曾议进兵而竟不

果今年若再驻扎不进则策妄阿喇布坦得以休息一年从此或生他志不如乘此预备之兵仍照从前令阿尔泰巴尔库尔两路兵丁照常袭击前进至乌鲁木齐地方两兵会合如策妄阿喇布坦果有兵来正可剿灭若畏惧不敢前来即将我兵收回各往本处驻扎如此每年袭击惊扰贼衆彼或生内变亦未可定尔等会同酌议具奏

九月乙酉

上谕议政大臣等曰从前曾有以朕每年出口行围劳苦军士条奏者不知国家承平虽久岂可遽忘武备前噶尔丹攻破喀尔喀并侵扰我内地扎萨克至乌阑布通朕亲统大兵征剿噶尔丹败走後又侵犯克鲁伦朕统兵三路竝进至昭莫多剿灭之今策妄阿喇布坦无端侵犯哈密地方朕徵发阿尔泰及巴尔库尔两路兵进剿策妄阿喇布坦闻之心胆俱碎乃遣策零敦多布等潜往西藏劫掠毁坏寺庙土伯特地方已被残蠹朕又遣大兵前往击败策零敦多布等复取西藏救土伯特於水火之中我兵直抵西藏立功絶域此皆因朕平时不忘武备勤於训练之所致也若听信从前条奏之言憚於劳苦不加训练又何能远至万里之外而灭贼立功乎尔等诸臣咸宜知之

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十

## 卷二十一

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十一

恤民一

康熙六年丁未五月丙午

上谕吏部等衙门民为邦本必使家给人足安生乐业方可称太平之治近闻直隶各省民多失所疾苦颠连深可悯念或系官吏贪酷朘削穷黎抑或法制未便致民失业果何道以遂其生耶一切民生利病应行应革尔内外各衙门大小文武等官念切民依其抒所见毋隐康熙七年戊申六月辛巳户部覆报灾定例夏灾不出六月秋灾不出九月但踏勘於收获未毕之先始可分别轻重请嗣後报灾限期夏灾不过五月初一秋灾不过八月初一踰期仍如例治罪

上曰凡被灾州县有司必先勘察申报该抚然後具题地方远近不一若限期太迫被灾之民恐致苦累其仍如旧例行

七月乙卯直隶巡抚甘文焜请复巡历旧规部议不准

上曰前谕各省遇有水旱等灾督抚务减仪从将被灾地方作速亲勘欲令体访贪虐官吏重加惩治且使兵民疾苦地方应行之事得以验实更改督抚若不巡历属员反借灾荒颠倒重轻私行科派俱未可定甘文焜所请着准行

康熙八年己酉三月辛丑

上谕户部前以尔部题请直隶等省废藩田产差部员会同各该督抚将荒熟田地酌量变价今思既以地易价复徵额赋重为民累着免其变价撤回所差部员将见在未变价田地交与该督抚给与原种之人令其耕种照常徵粮以副朕爱养民生之意

康熙九年庚戌正月己酉初直隶各省废藩田产奉

旨免其易价改入民户名为更名地内有废藩自置之地给民佃种者输粮之外又纳租银重徵为累而户部议以久载全书不当蠲免

上曰更名地内自置田土百姓既纳正赋又徵租银实为重累着与民田一例输粮免其纳租

至易价银两有徵收在库者许抵次年正赋

康熙十二年癸丑三月辛巳

上谕礼部民资粒食以生今当播种之时亢阳不雨农事堪忧皆由朕躬凉德政治有所未协未能仰格

天心用是夙夜靡宁实图修省以感召休和为民请命尔部即?诚祈祷雨泽以副朕勤恤民隐至意

四月癸卯

上谕巡视五城御史曰每遇民间失火朕常遣侍卫往救闻尔巡城官员於失火时即执伊家主查讯恐其家一切财物无人照看必至匪类乘机窃盗深属无辜此後俟火息时再行查议

十一月庚午

上谕户部自古国家久安长治之模莫不以足民为首务必使田野开辟盖藏有余而又取之不尽其力然後民气和乐聿成丰亨豫大之休见行垦荒定例六年起科朕思小民拮据开荒物力艰难恐催科期迫反致失业朕心深为軫念嗣後各省开垦荒地俱再加宽限通计十年方行起科其所司官员原有议叙定例如新任官自图录叙掩袭前功纷更扰民者各督抚严行稽察题参治罪

康熙十三年甲寅正月癸未

上谕兵部近因吴三桂背恩叛逆已遣大兵前往征剿闻楚省百姓有先行惊避者轻离家室恐致失所朕心深为悯念向来大兵纪律严明所过并无骚扰今宁南靖寇大将军啓行朕面加诫谕务令秋毫无犯安辑地方逆寇煽惑不过一隅大兵到日立见荡平该地方军民人等俱系朕之赤子遣发大兵原以卫民不必惊惧着地方官广行宣谕俾各安生理勿致流离以副朕定乱安民之意

戊子

上谕兵部刑部近因逆犯杨起隆诈称朱三煽惑愚民潜谋不轨逆党相继缉获业经申明正法牵连人犯槩行省释除逆首杨起隆等仍行严缉外其余党羽亦从宽免缉俾得改行从善恪遵法纪勿致自干宪典军民人等俱宜各安生业不得听信讹言自生疑惧旁人亦不许妄行首告借端吓诈扰害善良尔部即出示通行晓谕

二月辛酉

上谕户部兵部逆贼吴三桂心若虺蛇行同梟獍负恩谋叛倡乱害民当明季闯寇入京吴三桂势穷来归我

世祖章皇帝念其投顺优待有加宠以王爵托以腹心嗣大兵克复黔滇岩疆初定令其移驻防御畀以事权及朕即位以来推诚尤至两省官职听其选择题授给养

家口兵丁岁费不貲且欲其感恩知报特加亲王人臣之分已极委任之专无比乃去年伊自具疏求归故土朕悯其久在边远劳於戎事年已衰残欲令其父子祖孙得以完聚准与迁移遂其所请复为之区画房地资给行粮眷念体恤委曲周至詎意包藏祸心久蓄不轨阳报起程日期遽乃拥衆倡叛蹂躪百姓窃踞城池散布伪劄妄张声势以致邻近州县无知之徒被其煽惑又复假造讹言潜行传布以冀摇动愚民种种狡谋悖天蔑理即屡次发兵朕皆严谕将帅令体朕轸念斯民至意务期秋毫无犯无非欲救济百姓安辑地方今宁南靖寇大将军王等率领大兵各路进剿不日殲灭以行天诛吴三桂反覆乱常不忠不孝不义不仁为一时之叛首实万世之罪魁行即悬首藁街以泄神人之愤犹恐小民辄相惊疑不察虚实妄行听信立意一差如蹈陷阱邪正之介即祸福之关身家性命所系不小朕心不忍赤子悞罹法网有伤天和尔部即行文直隶各省督抚刊刻告示通行所属各州县徧谕百姓俾各安生业勿听讹传以副朕保全元元之意

四月丙申户部议河南彰德府因大兵经行秣马需用刍豆业令采办运送甫至中途而大兵已过应发还民间

上曰刍豆已经运送复还民间恐致苦累其见在未给草豆准令存贮以备续发军需

十一月辛未

上谕兵部凡陷贼地方皆我赤子今者诘尔戎兵四征不庭原以除暴安民念愚氓被胁截髮特一时贪生畏死之恒情若大兵所至槩行诛戮非朕救民水火之意百姓无由自新狡贼反得藉以煽诱嗣後大兵进剿有乡民持械拒敌及窃踞城池山寨不即迎降者仍行诛戮其余槩从寛免至剿杀贼徒自应俘其子女但贼营妇女多系掳掠胁从破贼之後凡所掳难民子女许民间认领不得一槩妄收尔部其传谕满汉官兵咸体朕意毋忽

十二月壬寅

上谕礼部古帝王抚御天下莫不以礼制为先务然厘定章程必文质适中方可昭垂永久前见风俗近奢恐渐流於僭滥故令更定条例一切服饰力从俭朴冀返淳龐詎意有司奉行过当专事苛细借端纷扰以致商贾壅滞物力匱拙小民深为未便以後着仍照康熙九年定例遵行见今一应禁约俱行停止尔部即遵谕行癸丑陕西总督哈占奏陕西百姓供应刍粮疲於奔命请令山西就近输运

上谕曰山西运粮水路则有黄河汾渭之险陆路输挽则道远费重民不能堪着户部发银十五万两择能员解至西安采办供应闻秦民亦值困苦之际军需刍粮若令价值稍增民争什一之利自乐于输送不悞军需倘有不肖官员苛派侵克使民不得均沾实惠者督抚指名劾奏从重治罪

康熙十五年丙辰二月丁巳

上谕兵部湖南百姓遭乱以来困苦万状贼粮匱势穷恣行劫掠百姓罹其荼毒如在汤火今大兵克期进发正解民倒悬之日其令大将军等遣贤能官同地方官宣布抚民敕谕凡恢复城池後勿妄杀掠以辑人心以绥地方

康熙十六年丁巳二月辛酉

上谕户部闽地经海孽扰乱又遭逆贼暴征横敛民困已极今年钱粮尽予蠲免其遭乱窜避人民俱招徕还籍俾各安本业

康熙十八年己未四月甲戌

上谕礼部民资粒食以生今时值夏令雨泽未降久旱伤麦秋种未下农事堪忧皆由朕躬凉德政治未协大小臣工不能洁已爱民勤修职业致干

天和朕用是夙夜靡宁深切警惕实图修省诸臣亦用循省过愆恪共乃职期於共襄治理感召休和兹当虔诚斋戒躬诣

天坛亲行祈祷为民请命尔部即择期具仪以闻十二月癸未户部议拨盛京成熟地亩分给新满洲

上曰田亩百姓生业所关以熟地拨给新满洲恐生民困苦可更议两便之法

康熙十九年庚申二月丁卯

上谕户部前因各省饥饉已遣官赈济今京师附近地方流民甚多朕心深为悯恻若不亟行安插令其得所难以生全作何设法俾各归原籍着该地方官加意抚绥安集复业以免流离九卿詹事科道详议具奏

十月庚子

上谕大学士等曰各旗差遣家人或往外省索债或令随官赴任或以私情干求外官者甚多小民最为苦累若详加察究则各旗不遣家仆出外者能有几人此等累民之事尔等可令吏



兵刑三部及都察院会同定例严禁

康熙二十年辛酉二月癸巳

上谕户部直隶各省清察隐占田亩州县有司或利其陞叙虚报田粮摊派民间致滋苦累亦未可定尔部可檄行直隶各省督抚着严行察核以除其弊

四月戊子

上驻蹕三屯营西南

命学士禧佛往谕遵化州知州郑乔生曰鮎鱼池周围地亩不许蹂践虽屡经严谕未必无碍田禾着知州亲行细察所伤地亩若干应纳钱粮若干俟回銮日转奏

十一月辛酉

上谕大学士等曰朕顷驻固安任邱闻户部官员将各州县均派草豆甚为扰民工部向民间私借柴炭亦多扰民俱宜严禁又闻部院各官借称预备差遣无故传集穷民跟随苦累俱宜严禁每次巡幸骚扰百姓者多系部院各官可传谕严饬以後毋得再蹈前辙

康熙二十一年壬戌正月辛未

上谕户部漕粮定例官收官兑独浙省民兑另立私截之名困苦百姓着檄巡抚严禁违者即行参劾

八月辛巳先是潼关额税七千余两有司徵收康熙十九年始遣郎中敦多礼督徵得税四万余两至是例请部员更替

上谕曰数年以来秦省兵民苦於挽运潼关收税仍照旧额着停止差遣部员

甲辰

上谕户部朕闻先由水路出征大兵因昼夜趲行以致纤夫死者甚多深軫朕怀今尔部差去催趲粮船官员恐欲粮船速抵水次致纤夫苦累着行文申饬晓谕

九月壬戌

上谕大学士等曰自用兵以来百姓供应烦苦朕前屡言俟天下荡平将钱粮寬免尔等可同户部先将天下钱粮出纳之数通算啓奏至陕西一省供应较他省苦累更甚钱粮尤宜寬免

十二月壬午兵部议准云南贵州总督蔡毓荣请禁土司民人携藏兵器及汉人将铅硝硫黄售与外彝

上曰闻衆土司人等赖弩弓长枪捕猎为业今若槩行禁止则失其生计矣治民惟在所司官抚绥安戢倘不爱民肆其残虐民操白梃亦可为非尔等其详议以闻

康熙二十二年癸亥七月辛卯

上驻蹕陈谷庄

谕八旗护军统领等曰谷者民生之命一岁不登则一岁乏食今正秋之时田谷未获向恐擅放马匹蹂践禾苗屡降明谕传飭今观随从人等尚有不遵法令蹂践民田者尔等各严缉以闻

九月戊子

上奉

太皇太后幸五台途次遇村民负米豆等物询之云备临

幸之用随传

谕大学士等曰

太皇太后驾临五台一切应用之物皆出内帑预备原无丝毫取给小民此所备物件何处应用可察明具奏随询五台知县赵继晋及村民等皆云五台地方偏僻恐物用不敷故给价小民令预备以待用原非出於科派

上曰一切物用内廷既备此後不必再行齎送可传谕直隶山西沿途官民知之

康熙二十三年甲子四月丙辰工部题请

敕谕直隶河南巡抚严飭所属官员闭塞卫河水口勿使旁泄以济漕运俟漕船过完照常听其分流

上曰漕运所关虽系甚重但直隶河南之民多资卫河水利若水口尽行闭塞不使稍溉田禾一遇旱乾濒河之民必致艰苦又部议俟漕船过後方听照常通流耕种自有定时如漕船过完方许溉田则於田禾无济该部但期不悞漕运初未尝虑及民生也此事着另行确议奏闻

五月壬午户部奏丈量旗下圈地凡有溢额者请另行拨给

上谕大学士等曰田地为民恒产已经给与者不便复行取回其旗下大臣官员既有溢额之地理宜注册俟需用时再行拨给民地不可轻动

九月甲子朔

上谕大学士等曰向令开海贸易谓於闽粤边海民生有益且此二省民用充阜财货流通则各省亦俱有益夫出海贸易本非贫民所能富商大贾懋迁有无薄徵其税可充闽粤兵饷以免腹地省分转输协济之劳腹地省分钱粮有余小民又获安养故令开海贸易今奉差郎中伊尔格图奏请给与各关定例款项於桥道渡口等处槩行徵税何以异於原无税课之地反增设一关科斂乎此事恐致扰害民生尔等传谕九卿詹事科道集议以闻

十月辛亥

上驻蹕桃源县重兴集视堤夫工作驻蹕良久亲加慰劳

复

谕河道总督靳辅曰堤工夫役风雨昼夜露宿草栖劳苦倍常所领工食无几恐有不肖官吏从中侵蚀必使人沾实惠尔其加意轸恤

癸丑

上谕江南江西总督王新命曰朕巡视直隶山东江南惟高邮等地方百姓甚为可悯今虽水涸民择高阜栖息但庐舍田畴被淹未复生业朕心殊为不忍尔系地方大臣应作何筹画濬水通流拯此一方民命以副朕轸恤黎元至意

甲寅

御舟过高邮湖见民间田庐多在水中惻然念之因登岸巡行堤畔十余里召耆老详问致灾之故

谕王新命曰朕此行原欲访问民间疾苦凡有地方利弊必设法兴除使之各得其所昔尧忧一夫之不获况目覩此方被水情形岂可不为拯济耶

庚申

上谕江苏巡抚汤斌曰朕欲周知地方风俗小民生计有事巡行凡需用之物皆自内府储备

秋毫不取之民间恐地方有不肖官员借端妄派以致扰害穷民尔其加意严察如有此等即指名题参从重治罪其沿途供役纤夫及闻朕巡行至此远来聚观百姓恐离家已遥不能自归尔逐一详察多方区画令其还家

十一月丁卯

上谕吏部尚书伊桑阿工部尚书萨穆哈曰朕巡幸东南省民疾苦路经高邮宝应等处见民间田畴庐舍被水淹没朕心甚为軫念询问其故具悉梗槩高宝等处湖水下流原有海口以年久淤塞遂至壅塞今将入海故道濬治疏通可免水患自是往还每念及此不忍於怀此一方生灵必图拯济安全咸使得所始称朕意尔等可往被水灾州县逐一详勘於旬日内覆奏务期济民除患纵有经费在所不惜尔等体朕至意速行康熙二十四年乙丑四月戊戌顺天府府尹张吉午请自康熙二十四年始凡民间开垦田亩永免圈取部议不允

上谕大学士等曰民间自开垦田亩若圈与旗人恐致病民自後永不许圈如旗下有当拨给者其以户部见存余田给之

五月丙戌工部议覆湖广浙江采运楠木不能如期特请宽限应不准行

上谕大学士等曰朕闻明时采运楠木从山至河民力告竭地方苦累今运各省所备楠木杉木若程限太迫恐山路崎岖转运艰难地方虽有良吏不能不苦累百姓其令部臣详议缓运勿致累民

戊子

上谕大学士等曰今岁雨阳时若二麦已登他谷亦皆沃茂秋成可望黎民不致阻饥但豪强富室田土既多收获亦丰往往用之酿酒又轻值收采以待重价贫民田少收获有限更不节用效尤酿酒亦甚糜费虽遇丰年仅免饥馑倘遭荒岁何以自贍朕巡省闾阎历历亲覩每一念及惻然疚怀应作何禁止使家给人足尔等可筹良策以待秋期举行

九月甲申户部题张家口诸处仓廩应令地方官设法修造

上曰若令地方官设法势必加派於民可即以本处税银修筑十月癸卯内阁以工部修治京城道涂册进呈

上曰工价支給尚少宜稍加增至修治小路若责之居民则贫人苦累矣其令如大路估算亦以钱粮给之康熙二十五年丙寅二月壬子九卿等议覆四川松威道王隲条奏四川楠木采运艰难请行停减应不准行

上曰蜀中屡遭兵燹百姓穷苦已极朕甚悯之岂宜重困今塞外松木材大可用者甚多若取

充殿材即数百年可支何必楠木着停止川省采运

康熙二十六年丁卯十一月乙未

上谕大学士等曰近见支用修造等项奏销钱粮时该部不准驳回者甚多此等奏销屡行驳回官员未必捐橐补给亦止派取民间耳如此则百姓愈苦向因需用孔亟故奏销者未即准行今公帑并非匮乏之时奏销案件不必驳回即应完结此等事不行驳回在官员虽稍获便利而於百姓乃大有裨益也

康熙二十七年戊辰七月甲午

上谕大学士等曰今武昌地方平定江宁京口荆州诸路兵仍赴武昌则转输供应民力维艰满洲汉军及调集绿旗兵皆令各归本泛又遇难官民之妻子恐以贼党株累可令该抚察明奏闻

康熙二十八年己巳二月乙卯

上巡幸浙江自杭州回銮舟泊石门鎮

谕扈从部院诸大臣曰朕巡省民生风俗行次浙江见省会兵民俱相和辑生齿蕃庶闾里乂安但观民间习尚好为争讼争讼一兴则不肖有司因缘诈索势所必至纵或官员无所朘削而胥吏作奸究不能无私行勒取之弊小民之牵连苦累者多矣夫微忿不捐构成嫌怨小则耗损物力大则倾陨身家其为蠹害不可胜言矜此愚民允宜深戒地方大小衙门官员亦应各简词讼劝导闾阎俾守分息争共安生业又夙闻东南巨商大贾号称辐辏今朕行历吴越州郡察其市肆懋迁多系晋省之人而土着者盖寡良由晋风多俭积累易饶南人习俗奢靡家无储蓄目前经营仅供朝夕一遇水旱不登则民生将至坐困苟不变易陋俗何以致家给人足之风尔等可传谕将军总督等令家喻户晓务使敦本兴让崇俭黜浮兵民日益协和风俗日益淳朴词讼日益减少积储日益丰盈则教洽化行朕心实嘉赖焉

康熙二十九年庚午二月己卯

上谕江南江西总督傅拉塔曰蠲免钱粮原欲使小民物力稍舒渐登殷阜前已颁谕旨民间建立碑亭颂扬德意虽出羣黎爱戴之诚但恐致烦民力嗣後地方官员不得借端修葺碑亭以滋扰累

六月丙戌

上谕户部朕抚育烝黎勤求民瘼务期休养渐至阜安闾阎间有疾苦朕衷时切轸念近见广东高琼等府地丁各项钱粮历年逋欠如系官役侵渔及豪强顽梗抗不输纳自应严追倘因

丁缺地荒不能输纳仍行徵比照例考成则小民既困迫呼有司复罹参罚徒滋扰累终无裨益着该督抚以各州县旧欠钱粮不能办纳情由详悉察明具奏

七月丙午

上驻蹕正红旗鹰庄

谕大学士伊桑阿尚书顾八代等曰朕沿途阅视见所践田禾过於朕初时谕旨部中丈量者惟鞍匠屯以南过此并未丈量何地非朕赤子可令侍郎赛弼汉即自口以北至坡赖村凡所践田禾作速明晰丈量

康熙三十年辛未九月己巳

上谕户部朕顷巡行边外入喜峯口见民间田亩多为蝗蝻所伤又闻榛子鎮及丰润县等处地方被蝗灾者亦所在间有秋成失望则民食维艰朕心深切軫念倘及时不为区画储蓄恐至来岁不免饥馑之虞着行该抚亲历直隶被灾各州县通行察勘悉心筹画应作何积贮该抚详议具奏其被灾各地方明岁钱粮若仍照例催科小民必致苦累着俟该抚察报分数到日将康熙三十一年春夏二季应徵钱粮缓至秋季徵收用称朕体恤民生休息爱养至意

康熙三十二年癸酉六月庚子

上谕大学士等曰朕每见各省往来及请安之人必问地方情形雨水沾足与否前问自江浙来者俱言今岁甚旱五月二十日尚未得雨朕幸江南深知彼处民生家无二日之储所食之粟每日籴买若五月以後仍不得雨则米价腾贵贫民必至困苦此不可不预筹者着遣户部才能司官二员一往江南一往浙江详问督抚观看雨水形势来奏江浙地方雨水虽大若不没禾穗水消禾即复旧故涝不足虑旱则所蓄之水尽涸真无计可施朕又曾见舟中满载猪毛鸡毛问其故曰福建稻田以山泉灌之泉水寒凉用此则禾苗茂盛亦得早熟朕记此言将玉泉山泉水所灌稻田亦照此法果早熟丰收江浙稻田俱池中蓄水灌之池水不寒所以不用此也

八月丁酉户部议覆漕运总督兴永朝疏言江北庐凤淮扬等处漕粮请红白兼收应不准行

上曰米取圆净各随其地所出不论红白令兼收勿劳百姓

十一月庚申

上谕大学士等曰今岁畿辅地方歉收米价腾贵通仓每月发米万石比时价少减糴卖其糴时止许贫民零籴数斗富贾不得多籴转贩始於民生大有裨益又蒸造烧酒多费米谷今当米谷减少之时着户部速移咨该抚将顺永保河四府属蒸造烧酒严行禁止

康熙三十三年甲戌二月癸酉直隶巡抚郭世隆等疏言臣遵

旨会同户部员外郎雍泰查霸州文安等州县及天津卫见在贮仓米谷共十余万石将此米赈济霸州等州县饥民需用三万石所余米谷应减价粜卖其景州等州县将山东漕米截留平粜

上曰霸州等被水灾地方所有积谷除散赈外余着减价发粜其沿河一带景州等各州县卫所着将山东漕米每处截留二千石亦发粜以平米价着户部行文该抚责成州县实心奉行务俾小民均沾实惠朕不时遣人稽察如小民有不沾实惠将该管官一并从重治罪断不宽宥

丁亥

上谕大学士等曰通州仓米平价发粜米价顿减於民大有裨益又沿河一带州县已截留山东漕运米与百姓诚恐不肖地方官员或增价发粜或米与贩卖之人以致百姓不沾实惠着巡抚郭世隆不时巡察

四月庚辰

上谕大学士等曰朕虽处深宫日以民生为事每巡视郊外必详察农桑咨询稼穡是以深悉农家之事应於农事之先早为筹画方有裨益朕以去岁雨水霪潦立春稍旱蝗种必致为灾故谕直隶山东河南等处地方官传谕民间早耕田地将蝗种掩埋则後患可除今已立夏或有余蝗遗种渐渐长成致害田稼亦未可知村庄愚民往往以蝗不可捕待其自去此等愚昧之言尤宜禁止捕蝗弭灾全恃人力今差户部司官一员宣谕直隶山东巡抚令各州县官员凡有蝗出即亲至其地率民掩捕无使为灾再传谕河南山西陕西等处地方咸使知悉一体遵行

五月丁巳

上巡幸畿甸阅视河堤

谕内大臣等曰扈从卫士鱼贯而行无得践踏民田着派侍卫等严查

九月甲申

上谕户部朕惟黎元率育全恃农桑每遇岁时丰穰比屋皆能自贍倘一经旱潦粒食无资即有俯仰不给之虞非相缓急而先事图维则补助之恩难以徧沛顷巡历边外道经密云等处地方见田亩歉收米谷价贵闾阎匮乏衣食不充目前既已艰难後岁何所依赖宜豫为筹画用俾资生着遣部院堂官二员会同直隶巡抚亲诣年岁不登之各州县详察明白应作何区

处赈济确议具奏其八旗披甲当差及孤寡无依年老有疾中伤退闲人等有实系贫窶窘於谋生者着各该都统详察姓名报部酌量恩恤尔部即遵谕行

十一月癸酉吏部右侍郎安布禄工部右侍郎常绶等奏臣等遵

旨查直隶安州等十一州县贫民十万余口应赈米四万

余石

上谕大学士等曰朕思直隶米价腾贵小民艰苦若仅照数给发诚恐无益着将此米一半散给百姓一半照目前米价折银给与贫民所余之米着视时价酌减令民贱买如此则百姓既得银两而余米又易庶小民均沾实惠其安州等十一州县康熙三十四年地丁钱粮尽行蠲免又

谕曰密云顺义附近地方今年米谷未收除常平仓所贮米谷照常糴卖外并将前转运积贮之米每月发千石平价糴之遣户部贤能司官各一员监视糴卖

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十一



## 卷二十二

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十二

恤民二

康熙三十四年乙亥正月戊寅

上谕大学士等曰兴永朝奏请丈量湖南田地有累於民否治国之道莫要於安民或有不肖州县官将田地竟不行丈量而辄称余田加赋者亦未可定安有加增田赋而全不累民之理着湖广总督吴琯详察具奏四月庚子户部题天津开河工程行文附近州县派夫定限挑濬

上曰若行文各州县定限派夫必至苦累民间着停止行文即发与雇价令天津等处雇民挑濬如此则公事既得告成而穷民亦可资以度日矣

五月壬戌朔

上谕户部尚书马齐曰尔传谕巡抚噶尔图平阳等处地震房舍倒坏人民压毙伊应亲身於彼处设厰居住将被灾百姓救护候朕谕旨乃遽回省城殊属不合除噶尔图所奏外有地震重处尔可详察阅视加恩赈给本年应徵钱粮停其徵收尔到彼处即晓谕衆民皇上为尔百姓深切軫念特遣大臣赈救尔衆民毋妄迁徙离散且恐因地震地方不良之人及鎮标兵丁借端抢夺扰害生民传谕总兵官周复兴亲身率领官兵将这一带地方善为防护其平阳府洪洞县被灾百姓尔会同巡抚噶尔图亲身到彼处赈济务令均沾实惠

六月癸卯

上谕大学士等曰时值久雨连绵乍止复雨将不利於田稼朕甚悯焉亟宜祈晴其传礼部速议以闻

康熙三十五年丙子七月庚申

上谕户部朕亲征时闻宣化府牧养三旗驼马所需草豆甚急皆先派龙门赤城蔚州百姓供用後给价值恐小民不能如数支领着该抚委地方贤能官查明照价估给务令小民得沾实惠以副朕抚恤至意此地百姓供应军需修治道途劳苦可悯俟冬间当免其来年之赋

九月丁丑

上谕大学士阿兰泰等曰右卫兵丁马匹若在大同一处喂养恐累小民着侍郎阿尔拜前去与监喂内大臣酌量於附近州县分养务给实价毋苦百姓

十二月辛亥

上谕大学士等曰去岁霸州等处州县曾运通州之米与被灾百姓减价平糶闾阎甚为得济今年水灾更甚应如去岁运米於各州县平糶可敕直隶巡抚沈朝聘何州何县当运米若干与民懋迁之其作速具摺奏闻勿缓俟开印时也

康熙三十六年丁丑二月乙未

上谕大学士伊桑阿曰修理道路专责之地方官恐至太过可遣乡导官法保布達修一车可行之道足矣山西道路着按察使巴什道员王辅鹄工督修令侍郎常绶前去按站备办草料柴薪渡黄河後陕西路濶无庸大修或有宜略修处着常绶等验视令地方官修之若修路太过劳及百姓责在法保布达与地方官无涉也

戊戌

上谕右卫将军宗室费扬固曰山西巡抚倭伦等顷给发右卫官员兵丁米豆草价值较时价减少以致穷兵苦累亦未可定又询察大同府所属州县卫所之民运送右卫官兵马匹所用草束殊为苦累可将官兵之马各留一匹於右卫余马发附近州县卫所酌派官员兵丁看守饲养小民可免运送之苦此後每草一束作何给价着议政大臣大学士在事官员会同尔等议奏

辛丑

上谕山西巡抚倭伦陕西巡抚党爱甘肃巡抚郭洪等曰朕比年出师剿寇总期乂安边徼永辑民生兹厄鲁特噶尔丹势蹙力穷畏死悔罪遣使具奏乞降朕特亲统六师再临边塞相机剿抚因乘便巡览边境形势察视军民生业遂发禁旅取道边外朕自大同从内地前赴宁夏一路地方见缘边州县地土瘠薄军民生计艰难朕心深切軫念一切御用所需皆自内廷措办不以烦民扈从简少市易之物悉依时值诚恐有强取抑价等事已令都察院及科道官逐日稽察纠劾其经过城堡衢市辄多结彩殊觉扰累嗣後着通行禁止乘舆巡幸本为安民岂可反劳民力尔等务严饬有司不得借端科派仍张示晓谕俾穷檐编户咸悉朕曲体民依至意

闰三月甲午宁夏绅衿兵民人等闻

驾起行齐集

行宫前叩恳

皇上驻留数日以慰羣情

上曰朕欲扫荡寇氛以安黎庶特幸宁夏经理军务驻蹕十有余日曩者南巡凡所巡幸之处未有驻蹕至三日者且边地硗瘠民生艰苦朕甚悯之朕扈从人衆恐多留一日即滋百姓一日之扰朕已定於十五日起行尔等诚恳之意朕已知悉又向者曾欲使禁军驻防此地恐民间居处狭隘已命将房舍查明给还本主尔等即回故居可也

五月丙申

上谕大学士九卿等曰朕前巡幸直隶山东江南浙江见地方人民皆各安生业大小官员恐朕不时临幸咸兢兢守法奉职以为他省类皆如此顷由大同历山西陕西边境以至宁夏观山陕民生甚是艰难交纳钱粮其火耗有每两加至二三钱不等者前曾面问总督吴赫据言西安等府距省甚近收耗尚轻若沿边所在地方火耗不免加重矣至於山西特一小省闻科派竟至百万民何以堪科道官因朕已经访问始行参劾竝未有言於未发觉之前者亦属何益

戊戌

上谕吏部等衙门朕顷以狡寇噶尔丹未灭调度军务亲莅塞外因念切民依巡历边境所至咨访目击山西陕西缘边一路地皆沙磧难事耕耘人多穴居类鲜恒业其土壤硗瘠固已生计维艰而地方辽远疾苦无由上闻大小官吏不能子爱小民更恣横索遂使里井日渐虚耗比年用兵以来一应军需刍糗俱动支正项钱粮储侍供应从不取办闾阎乃各府州县官员借端私徵重收火耗督抚布政使等官又不仰体朝廷恤民至意纠察贪污禁革加派反多瞻徇曲庇又或督抚庸懦懈弛因而笔帖式及衙门人役无所忌惮擅作奸弊以致民生滋蹙朕心深切軫恻今外寇已经荡平惟以绥乂地方拊循百姓为急务山陕两省关系紧要应作何抚恤休养着九卿詹事科道详议以闻

六月戊寅山西巡抚倭伦疏请建

万寿龙亭恭勒

圣谕

上谕大学士等曰何事建立龙亭若果善民自感颂大同田薄民穷其建龙亭着停止倭伦奏称大同地方饲马万匹全不费民力自朕观之前大同养马不过六千未始不用民力朕因民

劳苦故将康熙三十六年钱粮尽免朕凡事俱务实行不尚过誉尔等可晓示之

康熙三十七年戊寅二月庚午

上谕大学士等曰山东巡抚李炜居官不善地方饥馑百姓乏食竟不奏闻及至言官参奏始行具疏朕为人君於国计民生日切存心详加审虑李炜身任巡抚不知抚恤百姓朕又何赖焉着革职

五月甲申户部议覆总督仓场侍郎德珠等疏言直隶朝鲜等处米贵将各省漕粮截留一十五万石赈济请令有漕各省督抚於本年秋收时买补带运还仓应如所请

上曰此截留赈济等项所费米石若令有漕省分采买带运则小民运丁必致苦累京仓米石充裕所用之米无多采买补额着停止

康熙三十八年己卯九月戊申

上谕大学士等曰各省采买物件科派累民不若折色解京官买总之累民之事虽纖毫亦不可行向日口外蒙古困穷人不聊生朕近年来任人经理多方抚育培植之今已家给人足乐业安生可见治民之道全在休养也

康熙三十九年庚辰二月乙酉湖广总督郭琇奏称

皇上命臣选奏丈量地亩官员但湖南民稀地广恐清丈

後钱粮较前减十分之二

上曰果於民有益所减虽倍於此亦有何害若不清丈以荒田着落他人徵收钱粮有累羣黎断不可也此事綦重保题丈量官员尔具疏来照所请行

三月甲午朔

上谕大学士等曰修筑永定河夫役云集人多则需米谷价必致腾贵遣户部贤能司官二员截山东河南漕米二万石留於信安柳岔二处会同地方官照前稍减时价平糴至附近信安修河诸处屯庄米石亦令糴卖有益於民令内务府总管查明具奏

康熙四十一年壬午闰六月癸未户部议覆山西巡抚噶礼疏言右卫驻防官兵浮给康熙三十六年分草束折色银两请交各旗追还

上曰此浮给官兵草束折色银两复行追赔殊为可悯若向误给官吏追补必致派累小民其

免之

康熙四十二年癸未正月壬申

上巡阅南河驻蹕长清县界首舖

谕大学士等曰昨夜大风南村失火朕遣大臣侍卫扑灭之小民遭此深为可悯着传谕巡抚布政使察明被灾房数并议作何行赏之处大学士等遵

旨令巡抚王国昌等察明并议每房一间赏银三两上曰专委地方官行赏小民未必尽沾实惠着交近御侍卫海青等监视散给

二月丙子朔

上谕山东巡抚王国昌曰朕自泰安州见新泰蒙阴沂州郯城等处城郭乡村黎民被灾甚苦虽蠲免正赋兼行赈济犹恐未能大有裨益如以养蒙古之例施於山左庶青黄不接之际小民得以度日命在京满汉大学士九卿会议无论官民有情愿効力者作速遣往山东不拘银米同地方官分界赈济以及降级革职人等有情愿赎罪者亦准其赎罪俟秋成之後视其果有裨益酌量议叙至该抚尤宜董率属员善为抚绥勿致流离务期副朕视民如子之至意即将告示刊刻遍行晓谕八月甲申刑部尚书王士正等因山左被灾奉

旨截留漕米并派八旗官员领帑往赈具疏奏谢上曰朕四次经历山东於民间生计无不深知东省与他省不同田野小民俱系与有身家之人耕种丰年则有身家之人所得者多而穷民所得之分甚少一遇凶年自身并无田地产业少壮者流离於四方老弱者即死於沟壑此等情由尔省大臣庶僚及有身家者亦当深加体念似此荒年虽不能大为拯济若轻其田租等项各贍养其佃户不但深有益於穷民尔等田地日後亦不致荒芜如果民受实惠岂不胜谢恩千百倍耶十月庚寅理藩院议覆扎萨克大喇嘛绰朱儿喇穆扎木巴奏将伊所原居洮州卫卓柰克依特之庙伏恳开广修造应如所请

上曰取边氓之地以广修庙宇关系民生嗣後凡有广庙宇与民间田庐有关者永行禁止

康熙四十三年甲申三月辛酉

上谕大学士等曰朕因山东及直隶河间府等处饥民流至京城者甚多特命八旗诸王贝勒大臣总管内务府各官及汉大臣官员於数十处立粥廠日煮粥赈济务使流移之人得所酌量赈给数月但此等饥民弃其家业聚集京城以餬其口实非长策应作何料理始复旧籍得安生计尔等会同九卿詹事科道等确议具奏

康熙四十四年乙酉三月己亥

上谕山东巡抚赵世显曰朕为两河告成特来巡阅道经山左见民生自去岁休养之後渐有起色朕心甚慰夹岸黄童白叟懽呼载道感恩叩谢者日有数十万今仲春之时麦苗未长未致妨农至回銮之际正值农忙麦秀恐妨稼穡尔即晓谕百姓概免叩谢各务农事可也

癸丑

上谕兵部侍郎贝和诺江宁将军鄂罗舜等曰自江宁至苏州坐台兵丁可令撤去各回本汛今当麦秀之时倘铁路而行恐致践伤陇麦且御舟所泊亦时与坐台处相左随驾人员自足环卫尔等辖下兵丁固当在此効力朕非谓其劳苦而遣归也但系农时不比冬令耳其两岸护送绿旗兵镇江坐台兵丁一并撤去

壬戌

上谕江南江西总督阿山江苏巡抚宋荤曰朕为两河告成杨家庄新河建闸特来阅视尔等复偕地方官民再四恳请故渡江而南见百姓虽不能比户丰饶幸安居乐业无憔悴之色朕心少慰编氓皆朕赤子休养生息已数十年民虽至愚亦所深悉故扶老携幼日计数万随船拥道欢声腾沸此皆由中而发非假饰也但人多路隘菜蔬苗麦弥漫田野不无践伤朕甚惜焉尔等即出示晓谕万勿踏坏田禾有负朕恤民之意

康 四十六年丁亥七月戊寅

上谕大学士等曰浙江巡抚王然江南江西总督邵穆布奏报旱灾以此揆之被旱之处甚广朕屡幸南省其地方山川形势及小民生业鲜有不知者南方沟洫最多水之出入固易然亦只可备平常小旱而已若至大旱河荡尽涸惟近大河之处犹可薄收若田高河远之处水不能到必至全荒且小民有田者少佃户居多丰年则纳粮之外与佃户量其所入分之一遇岁歉则佃户竟无策可施矣南方卑湿民间难以盖藏故比户而居有米者少凡饮食诸物每日见买此数年幸遇丰稔可以无虞今遇大旱所关匪细奏闻之後若能得雨不必言矣如未有雨不早加详议殊非朕保民如赤子之心矣着九卿詹事科道会同速议具奏

十一月己未

上谕大学士等曰福建内地之民居住台湾者甚多比来洊罹灾祲米谷不登若土着之人犹可采捕为生内地之民在彼者粮食缺少难以自存欲归故土则又隔大洋诚为可悯着行文该地方官察明情愿复归本地者或遇兵丁换班之船或遇公务奉差之船令其附载带回原籍

康 四十八年己丑七月乙亥

上谕大学士等曰湖广江西稻谷丰收沿江之米甚多而近日江浙米价愈贵朕为民生计时

切忧劳辗转思之上江之米不禁其沿江而下者特欲使江浙米价平耳今富豪之家广收湖广江西之米囤积待价於中取利虽米船沿江而下而粃卖之米愈少此事关系贫民甚大尔大学士及九卿诸臣皆国家倚赖之人所以为民生忧虑者必与朕同当何如有济於民着公同详议速奏

己卯大学士九卿等遵

旨议覆湖广江西产米甚多但恐富商囤积图利应严查

禁止

上谕大学士等曰朕因湖广江西之米商贩由江而下者多而江浙米价不减故命尔等会议若将囤积米石定例禁止则借此横查不过利於胥役而已百姓不但无益反致受害矣尔等但言其枝叶未究其本源朕意以为必於本源之地清查自无收买囤积之弊湖广江西之米或江浙客商或土着人民某人於某处买米若干清查甚易应行文湖广江西督抚委贤能官将有名马头大镇店买卖人名姓及米数一并查明每月终一次奏闻并将奏闻之数即移知江浙督抚湖广江西之米不往售於江浙更将何往此米衆所共知则买与卖不待申令而米之至者多即大有利於民也

康熙五十二年癸巳二月丁丑

上谕吏部尚书兼管仓场事务富宁安等曰朕闻京城近日米价较往年稍贵想因直隶各省人民今岁来京甚衆之故应发仓米一万石照时价减粃则米价可平於民生大有裨益若一万石不敷即再发一万石平粃

四月辛亥

上命都察院左都御史赵申乔往广东平粃仓谷谕之曰朕览广东奏销册内见存米二万余石以之减价平粃似属有益尔至广东详查如所粃谷石尚不足用即速奏闻朕令动正项钱粮买米平粃江西湖广二省不禁商人贩米良有益处前江浙米贵朕谕将湖广江西米船放下江浙米价遂平广东督抚若於正月间早行奏闻则海运可及今风信不顺海运尚难行也

五月庚辰

上谕大学士等曰提督康泰奏称蜀省一碗水地方聚集万余人开矿随逐随聚见在差官力行驱逐朕念此等偷开矿厰者皆系无室可居无田可耕之贫民每日得锱铢为养生之计若尽行禁止则伊等何以为生果如滇省矿厰所出颇多亦可资助兵饷此处所出无多应令该地方文武官员尽心设法使穷民获有微利养贍生命但不得聚衆生事妄行不法耳

六月己丑

上驻蹕热河行宫

谕大学士等曰从来壬辰癸巳年分雨水应多去岁幸而未涝观此两日雨势连绵此处山水或发亦未可定东边之堤因城墙所逼水必汹涌东边巡守之人在河滩中者若不小心则无走避处矣应预为之备至於贸易人民所居之屋凡当涧口之处亦各应防备若山水夜发当水处恐致被冲将此晓谕

辛卯

上谕大学士等曰连日之雨朕甚恐致涝今晴甚佳人居高处尚无妨但田禾可惜耳昔人谓壬辰癸巳年涝去岁获免倘今岁五月初十间雨至此时可奈何朕记

太祖皇帝时壬辰年涝大饥另户人家以致卖身世祖皇帝癸巳年霪雨大涝京城内房屋墙垣倾颓不堪明成化时癸巳年涝城内水满民皆避居於长安门等处後水至长安门复移居端门前至棋盘街今岁朕未来时雨水甚大老人有言後涝不及前涝但霪雨不止则田禾倒青矣朕甚虑之

九月辛未户部等衙门题广东广西总督赵弘灿浙江福建总督范时崇等言将江南浙江米石运至广闽备用於地方民生大有裨益应将江南省捐纳米十万石令总兵官穆廷棻总管船只运至闽省广东督抚拨船至闽省接运往广东浙江亦报被灾将五万石仍留浙省将五万石令总兵官吴陞运至闽省

上曰浙省今岁歉收十万米石仍留备用江南十万石内将五万石运至福建五万石运至广东米到日即行平糶勿致浥烂

十月庚寅

上问户部尚书张鹏翮曰钱粮之数若何张鹏翮奏曰此

数年因

皇上所免钱粮甚多今见动用至四十九年钱粮上曰即动至五十年钱粮亦无妨尔等为户部故如此奏耳朕心惟百姓为重今广东福建沿海之府州县等处正青黄不接之时尚宜酌量免其钱粮张鹏翮奏曰顷

皇上特加殊恩已令运米赈济矣



上曰米虽运去但足餬口耳不能办钱粮也张鹏翮奏曰

至彼时再行请

旨

上曰不可迟延今即其时矣

康 五十三年甲午三月乙巳

上谕户部甘肃一带地方去年春麦失收秋田亦歉经该督抚奏报甚明其地俱系山田稍遇天旱易致荒歉是以旧岁特沛恩泽蠲免租赋见在虽据该督抚设法赈济给与牛种此外更应作何筹画使小民得所永有裨益着遣工部右侍郎常泰大理寺少卿陈汝咸到彼会同该督抚详查地方百姓情形确议具奏

癸丑

上以甘肃被灾

命工部右侍郎常泰大理寺少卿陈汝咸前往察勘谕之曰朕曾至宁夏其地方有似蒙古所种惟青稞遇岁不收民即流散尔等到彼应与总督鄂海巡抚岳拜计议教百姓牧养牛羊盖甘肃地方不比直隶山东与蒙古同宜畜牛羊虽遇荒岁食乳亦可度日矣又其地产肉苁蓉天门冬煮食之味似山药又一种沙米亦可食被灾诸处尔等悉亲身往勘会同督抚酌议以闻

六月丙戌

上谕领侍卫内大臣等曰天气甚热贸易人等多夜行者伊等但知为利不顾其身朕甚念之嗣後有紧要事方许夜行朕视商民皆如赤子无论事之钜细俱当代为熟筹也至於一应随行官员兵丁执事人等如有公事不必过亟缓缓前行将此交与兵部自喀喇和屯以至口上俱遍张告示并於各该管处通行晓谕

十月壬辰甘肃巡抚绰奇疏言甘肃宁夏等处今岁被灾穷民请计口散赈至来年夏收时停止

上谕曰甘肃地方被灾流移各处就食之民见令招回本处但时尚沍寒本处竝无粮米招回无益俟来年春耕时送回方有益也

康 五十五年丙申闰三月壬午

上谕大学士等曰直隶巡抚赵弘燮因顺天永平两府所属地方米价腾贵民多乏食奏请借帑银差官贵买贱卖再借庄头积贮之米减价糶卖朕思治天下之道以养民为本当此太平之际而使民乏食可乎从前如福建广东远处偶遇灾荒犹海运赈济况京师畿辅之地乎去年顺天永平保定河间宣化五府因雨水过多米谷歉收已将钱粮尽行蠲免积贮之米减价糶卖见今闻阁积贮无多若又以银买谷则米价益加腾贵今京仓通仓之米甚多将仓内所贮之陈米发二十万石遣堂司官运至各处地方不论旗民确查赈济穷民始得均沾实惠且直隶北四府地方有水路可通即由旱路运去亦不甚远不过在人区画而已至於运米脚价以米给之亦可煮粥之柴以米易之亦可近京之地减价糶卖今又发陈赈济则小民断无乏食之虞矣又

谕曰朕闻今年直隶南四府地方麦苗甚好但麦收时亦止有地之人得食而已未种麦之人何由而得朕意此番赈济须至九月民方不致乏食每岁五城煮粥施济至三月即止今尚未停止於民大有裨益古之人君居深宫之中不知民间疾苦者甚多朕巡行各处曾目击之故知之甚确又於直隶各省年谷丰歉时加访问地方大吏所以不敢隐瞒朕凡事但求实济不务虚名即如积贮之事闻之似善行之甚难从前连岁丰收朕曾谕地方官令民间节省积贮但穷民一年所得糊口之外别有费用何得余剩至於社仓一事李光地任直隶巡抚时曾以此为有益卒不能行今太平已久生齿日繁而田土未增且士商僧道等不耕而食者甚多或有言开垦者不知内地实无闲地今在口外种地度日者甚多朕意养民之道亦在相地区处而已陕西临洮巩昌等地方虽不可耕种若於有水草之地效蒙古牧养则民尽可度日而百姓但狃於种地不能行此昔年去山东赈济人员曾云或有人在牛旁不知取乳而食坐以待毙此皆不习之故耳尔等将赵弘燮所奏之事会同九卿确议具奏

五月壬戌

上谕大学士等曰京畿地方至今雨未沾足朕心不胜焦劳自密云至口外田禾甚佳及问各处来人俱云雨水尚有不足之处念京城人民辐辏就食者多且太平日久人口滋生多至数倍以此平素间谆谆以此事面谕诸大臣今值暵旱之际若再不亟为筹画朝廷之上所理者何事乎閱此次报内米价又长八旗官兵粮米定例於八月内支放今若候至八月米价必愈加腾贵着於五月初十日起即行支放至京城米石若仍行减糶甚为有益着再发米三万石交与原派卖米官员减价糶卖尔等转谕户部

康熙五十六年丁酉六月丙戌

上谕大学士等曰今年虽旱然得雨之後或连绵阴雨亦未可定应传八旗军民人等将危圯房屋墙垣修理渗漏之处早行苫盖并潮湿朽坏物件移置高处凡事豫则易备朕凡经历之处心思所到即行传谕即不连绵阴雨平常豫备亦可也

十月癸卯

上谕大学士等曰朕理事五十余年无时不以民生为念凡巡行所至之地即加访问故於民之疾苦无有不知各省奏事之人伊所过地方年景丰歉米价贵贱无不详悉问之故总督巡抚提督总兵官等一切事皆无敢隐匿者今年各处皆丰收河南连年大熟朕念切民生尔诸臣当体朕恤民之意凡有闻见之处即当奏闻不可佯为不知也

康熙五十七年戊戌八月庚子

上谕大学士等曰闻今年安徽所属地方出蛟发水甚是伤民前日曹頌家人来奏晴雨录询问是实总督巡抚虽未启奏朕既闻知心切轸恤京中有安徽地方官员着九卿速行问明

康熙六十年辛丑四月己酉

上谕大学士等曰去冬雪大所以今春雨泽甚少大约冬雪多则春雨必少春雨少则秋霖必多此非有占验而得知者也朕六十年来留心农事较量雨阳往往不爽且南方得雪有益於田土北方虽有大雪被风飘散於田土无益今岁山东得雨河南山西陕西未甚得雨备荒最为紧要不可不预为筹画若直隶山东河南已难料理至山西陕西其补救尤难古人云三年耕则有一年之积九年耕则有三年之积言虽可听行之不易如设立社仓原属良法但从前李光地张伯行曾经举行终无成效至於各省积贮谷石虽?报称数千百万实在存仓者无几即出陈易新之法亦不为不善第春间仅有所出秋间竝无所入州县官侵蚀入已急则即以折银掩饰此等积弊朕知之甚详其报荒之真伪虚实朕亦无不洞悉如热河所积谷石每年减价平糴秋收余补还仓数目无多稽查颇易所以每有余粮语云大兵之後必有凶年昔征剿三逆时丰收足以供给竝无一州一县贻悞及平定以後间有歉收之年不可不绸缪於未雨也迩来稍觉暵旱或者政事有缺失应行改正之处亦未可定尔等会同详议具奏

五月甲申

上谕户部朕御极六十年自冲龄时惟以黎庶为重宵旰图维勤劳至今今春朕之子孙暨六世孙辈与举国官兵人民请行大庆典礼在朕固所应受衆亦咸以为宜朕意昔年辛丑系

皇考宾天之岁今岁又值辛丑况西陲用兵事尚未竣是以坚辞不受今年朕躬自四月违和五月初旬又复感寒遂觉甚病以致面色稍减或稍行动或多言语便不胜倦乏目今直隶山东河南山西陕西麦已无收民多饥馑屡令大学士九卿议奏茫无头绪似此尚忍而不言将来不知作何底止也诸大臣皆受高爵厚禄应视万民如一身一家各抒拯救之法若必俟朕降谕旨推诿於朕则大臣所任何事耶今朕躬甚弱心思亦短易倦善忘惟诸大臣是赖救民之策不可不急为筹画着大学士九卿等速行详议甚勿轻视倘再迟时日被灾之民不能待矣

九月辛亥

上諭近御侍衛等曰爾等日侍朕側於朕心忧勞之處差知大槩若百官萬民何從而知朕日理萬几其他姑置勿論即每年春時為雨水田禾時刻不忘留心究問直至秋成始稍釋念至於冬日内地常恐雪少口外地方又恐雪大此等苦心惟身歷方能知之即爾等日侍左右者亦未必悉知也

康熙六十一年壬寅二月乙酉

上諭吏部侍郎張廷玉內閣學士勵廷儀曰去歲秋冬雨雪頗少今春已屆清明尚覺亢旱民以食為天朕以萬姓為念雨陽不時朕心豈能安乎見今各處為朕祈福不如祈雨倘得大沛甘霖朕即以為福矣

六月壬戌

上諭大學士等曰盛京地方屢歲丰收米谷價值甚賤民間或致濫費着令盛京米糧不必禁糴聽其由海運販賣可傳諭盛京將軍府尹知之

大清聖祖合天弘運文武睿哲恭儉寬裕孝敬誠信中和功德大成仁皇帝聖訓卷二十二

## 卷二十三

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十三

任官

康熙三年甲辰四月己未

上谕吏部向来所定部院衙门满洲蒙古汉军官员品级陞转与汉官不同满洲蒙古官员无向外陞转之例故其品级稍优今汉军官员既与汉官一体向外陞转其品级陞转应与汉官画一尔部酌议妥确以闻

五月壬午

上谕吏部都察院近日内外文武各官考满一等二等甚多岂无一才力不及不称职者此後各部直隶各省文武官员考满将三年之内某官所办某事奉旨改正者某事駁行者某事处分者某事察明保奏若考过一等二等官员不能称职者事发之日将考核时具保之官一并治罪

十月辛未

上谕吏部兵部都察院近见考满内外各衙门具奏吏部等衙门又行覆题以致事多繁冗贤否甚难甄别内外大小文武各官除今年考满外以後每三年彙考一次其到任未经三月者不必考向来自陈等官仍照旧例自行陈奏候旨定夺至於司属汉官定例陞授时如无考满之人论俸深者陞授又於一年一次考核无益着停止应行事宜尔部院酌议具奏

康熙七年戊申三月丁未

上谕吏部国家政務必委任贤能乃可赞成上理今在京各部院满汉官员俱论资俸陞转虽系见行之例但才能出衆者常以较量资俸超擢无期此後遇有紧要员缺着不论资俸将才能之员选择补用

辛酉

上谕吏部旧例科道乏员行取在外有司考选补授原因有司乃亲民之官谙悉民间利弊得以据实指陈有裨政治且外官内擢足以鼓励人才振兴吏治今後科道缺出可移文督抚就

有司内举才能夙着者咨部尔部详核具题行取来京朕亲选用每岁宜行取几人尔部酌议以闻

康熙八年己酉十月癸亥

上谕吏部朕思部院事务殷繁诸司官职掌必得贤能方克胜任今尔部但就部院见任官员调补其随旗上朝者岂无贤能可备擢用之员可谕满洲汉军都统副都统等於阿达哈哈番以下拖沙喇哈番以上有明习满文或通晓汉文夙具才干堪任部院事务者从公详择一旗数员咨送尔部俟各旗缺出与应陞者并题补用

康熙十二年癸丑九月辛未

上谕吏部向来定例外官告病不准起用原以防其规避但其中有才品优长政绩素着者迫於一时至情引例告归终身弃置深为可惜宜令地方督抚确行谘访果有才品堪用者着据实保奏以凭擢用

康熙十三年甲寅三月丁丑

上谕吏部大兵进剿逆贼指日荡平地方恢复之後即应设官抚绥民生料理事务顷以需人甚急已将汉军内可用人员照该督抚所请发往军前候用其汉人中素有清操及才能堪任烦剧者不拘资格着汉大学士以下三品堂官以上据实保举发往军前与汉军官员一体委用务期虚公推荐有裨地方以副朕广揽人才之意

康熙十四年乙卯闰五月戊子朔

上谕兵部秦省岩疆重地军务方殷靖逆将军侯张勇忠勤懋着谋略优长久鎮西陲奠安疆宇近复躬履行间殚心筹画屡败贼衆恢复城池志期殲逆渠定秦陇朕甚嘉之凡用兵筹饷一切机宜必须专其责任而後可以整饬军机齐一衆心以收荡平之绩所属地方总兵官有故违节制不听调遣者许即指参副将以下有临阵退缩杀良冒功者听以军法从事其文官自道员以下倘有迟悞紧急军需者会同巡抚据实题参务令克展壮猷早奏肤功以副朕委任重意

康熙十六年丁巳十月癸亥

上谕大学士等曰朕不时观书写字近侍内并无博学善书者以致讲论不能应对今欲於翰林内选择二员常侍左右讲究文义但伊等各供厥职且住外城不时宣召难以即至着於城内拨给闲房停其陞转在内侍从数年之後酌量优用再如高士奇等能书者亦着选择一二人同伊等入直尔衙门满汉大臣会议具奏

康熙十九年庚申六月丁丑

上谕大学士等曰据都察院题御史洪之杰试俸已满应行实授朕思试俸各官一年俸满称职者实授不称职者或仍试俸或作何改用宜更定一例不然试俸竟属虚文矣洪之杰仍如旧例实授可传谕吏部定例以闻

七月甲午

上谕九卿等曰各部主事日後皆陞道府与其俟为道府後令督抚保举何如为主事时即令堂官保举之为愈今後凡不系正途出身之主事历俸三年果能胜任该衙门堂官保举方许陞转

十一月戊午

上谕大学士等曰御史张志栋疏参大理寺少卿张永祺国子监祭酒冯源济二人品行不端甚当又参刑部尚书黄机衰老宜罢此言太过当矣国家用人正须老成练达之辈从来才德难以兼全闻黄机居乡谨饬安静是一老成人也

康熙二十年辛酉正月辛巳

上谕翰林院日讲官敷陈经史日侍顾问赞襄典学职务繁多宜广其员以彰右文之治见在满官足用汉官尚宜增添着即开列应用各员职名具奏

六月辛亥

上谕大学士等曰行取官员吏部已经引见其各部主事等汉官朕尚未知其人科道为耳目之司选择不可不慎尔等即传谕九卿詹事科道令各举所知将居官洁清办事才能者从公保举不可以同年同乡亲党徇情私保即总督巡抚所举有不当亦着指陈勿隐

七月丙寅

上谕大学士等曰近来投诚守备千总等官或带伪总兵副将割付即照伊伪割反加优叙先用其绿旗官员於军前効力显着者并不得表见淹滞者颇多所在统兵将帅知悉此情者已经回京无人在彼代奏此等官员甚为屈抑其特行宣谕以示奖励

戊辰

上谕兵部在外武职官员有未经从逆効力行间勤劳日久者枕戈卧甲躬冒矢石建立功绩虽经叙录加衔加级亦不能即补实缺仍留该标投闲置散虚糜岁月或赴部候补又因无缺

守候迟延资斧匱乏深为可悯此等军前効力之人应令本身赴部验明原劄即行录用推补

壬申

上谕吏部兵部大同地方连年荒旱百姓困苦以致流离失所就食他方因而田地荒芜生计不遂今已屡行賑济蠲免各项钱粮又闻雨泽沾足秋成有望但饥饉之後安养生全必得清廉爱民官吏方能加意招徠留心抚字着该抚将见任知府以下等官贪劣不职者照常参处外其才具平常者酌量更调本省简僻之缺仍於通省见任官员内选择清廉爱民者调补若果能抚循使户口充实田地开垦着有成效该抚特行举荐该部从优叙录以副朕獎勵循良爱养百姓至意

康熙二十二年癸亥五月乙卯

上谕大学士等曰部院堂官惟敬慎廉洁方可无玷厥职今观各部侍郎内虽办事有才而操守不足者有之应将伊等改授武职向来副都统员缺有将侍郎改授之例自後副都统缺出可将侍郎职名一并开列朕将酌用之

康熙二十三年甲子三月壬辰

上谕兵部国家赏罚所以劝贤惩奸也又语云使功不如使过近见缘事宗室及有罪大臣行间得罪官员闲散者甚衆此辈之人与其置之闲散何如委以一职则贤能者可得其用况伊等或任统兵或历部院较之旗下人等必优已为大臣者姑勿论其以下者应行选用护军令其効力如此可渐得陞迁之路尔部即遵谕行四月戊申吏部等衙门奏各处关差奉

旨令臣等於司官内保举才守俱优存心谨厚之人派往但司员办事有才及谨慎者尚有其人至於操守知之实难不能保举

上曰节操清廉最为紧要即如部院堂官朕皆信其清操而委任之堂官於司员亦应信其清操而委任之各衙门官员或谨慎有守或生事奔竞堂官岂有不知者尔等务将有守之人举出则被举者自能効力也

六月丁巳

上谕大学士等曰凡所贵道学者必在身体力行见诸实事非徒托之空言今汉官内有道学之名者甚多考其究竟言行皆背如崔蔚林之好事居乡不善此可云道学乎精通道学自古为难朕闻学士汤斌曾与中州孙鍾元讲明道学颇有实行前典试浙江操守甚善可补授江苏巡抚

康熙二十四年乙丑三月癸亥



上谕大学士等曰内阁翰林院须用通晓汉文善翻译者其自卿员以下部院无品级笔帖式以上及满洲蒙古汉军废官与随旗行走暨闲散人晓习汉文能译满文者统皆考试计其文理优长者用之其下所司速察以闻

九月辛酉

上谕大学士等曰汉军既有旗分缺又补授汉缺不但人不敷用汉举人进士亦且壅滞不得铨选汉军既有外任该旗有缺即以外任汉军补授亦无不可着九卿等议奏

康熙二十五年丙寅四月戊申吏部以翰林院掌院学士员缺开列尹泰等请

旨

上曰翰林院学士职任关击甚重必学行兼优方为允当满汉学士得人则词林观摩兴起咸勤学砥行人材成就有裨治道匪浅曩者喇沙里居是官其学问品行词林至今追述之后来者俱不能及朕观尹泰品有余而才不足任以詹事则相宜若用为学士恐办事不甚敏捷库勒纳任此职时较他人为优通政使葛思忒似亦可用可将此二人酌议来奏

癸丑

上谕吏部国家选用臣工必得才学通敏之人畀任斯席官无旷实得用人之益朕见汉军官员从事学问者少年未成材便涉仕版并无素抱何以莅事临民去年特行考试分别去留曾将交白卷人员从宽姑免处分令其学习俟通晓文义该部题明考试录用朕因从前考校情弊多端今特行亲试荒陋不堪者甚众朕不加搜察私藏怀挟自行发露者已交刑部鞫问外其考列一等高璜等及二三四等人员见任者仍照旧供职候补者照常补用王抚民等文理不通及书写履历投交白卷者俱着以原品随旗行走其去年着令学习之人今仍交白卷及考置五等者显图侥幸着察议具奏王梁居官有声仍准候补难廕生马世永王琨王镐胡枚念伊父殉节可悯着令学习俟通晓文义之日该部题明录用程万坦曾効力行间着以旗内武职补用尔部即遵谕行

七月乙酉户部议覆御史戴通条奏坐粮厅监督员缺应将清廉贤能官员保举差往

上曰各部院官员不称职者许堂官不时参奏传谕已久未见举行至於保举拣选不过特旨偶一行之若以此为定例则资俸深者既有壅滞之患而奔竞之端亦即由此而生保举着不准行

康熙二十六年丁卯四月辛亥

上谕吏部国家用人凡才优者固足任事然秉资诚厚者亦於佐理有裨比部院中亦有一二

才优之人所以未即陞擢者因其有才又能循分故久任之朕听政有年见人或自恃有才辄专恣行事者思之可畏朕意必才德兼优为佳若止才优於德终无补於治理耳

康熙二十七年戊辰十一月辛未

上谕大学士等曰兵部考武官射箭合例者方记册录用或有前在行间显着劳绩若槩以考校不合例之故不得见用事属可矜朕已屡有谕旨且射而中者人材皆优射而不中者人材皆劣不可以此一槩论也若执此用人则人材优而有劳者终身不得见用矣又闻兵部阅射情弊有以中者为不中以不中者为中其飭兵部堂官自此以後其严之慎之

康熙二十八年己巳闰三月壬寅

上谕兵部朕幸江南浙江见骠骑校小拨什库披甲内曾効力行间材力壮健者甚多此辈出兵时有虽得功牌未应得官者亦有因罪抵销功牌者因是皆不得擢用淹滞可惜其行文江宁杭州荆州西安满洲将军副都统等如果有才堪管辖及曾经効力者选择十人或十五人不拘旗分遇彼处佐领防御骠骑校缺出即将选择之人一并咨送来京尔部引见以备任用

六月庚寅

上谕大学士伊桑阿等曰八旗参领佐领有职任之官多有以疾告休者此中亦有以不能骑射畏惮而求罢者夫管辖职任须得旧人为佳其传谕八旗都统副都统等自是以後若有告休者详察之果疾病不可支者允其休致若虽不能嫺於骑射而能管辖者仍留用之康熙三十一年壬申七月癸酉理藩院以効力年久之拨什库等引

见

上曰伊等於事务何如侍郎文达奏曰伊等未为司官不

曾办事

上曰办事在人何论曾为司官朕临御多年何事未历部院诸臣欲寬人罪却不务求允当而故拟过重直待駁回旋即改为无罪或注意在此而饰词在彼实欲为此而佯托为彼此等处最多大凡经理事务须以持平为当此引见诸人曾为拨什库差遣年久熟知蒙古性情与地方形势俟理藩院主事缺出将伊等一并选择具奏

康熙三十二年癸酉十一月庚子朔

上谕大学士等曰朕每日听政必於辰刻中御门闻部院奏事大臣每日黎明即齐集午门外久候方始入奏迨奏毕复各归署理事无乃过劳朕观大臣内有年及六旬者亦有六旬以上

者此後於家中各进糜粥按时来奏亦不至迟悞大臣节劳养体亦可多为朕効力数年尔等可将朕旨传与部院大臣知之

十二月壬申

上谕大学士等曰朕观近日政务简少每日啓奏部院大臣中有年迈者甚属劳苦自後年六旬以外大臣令其量力间二三日一来啓奏至折本内遇紧要事朕有旨传进尔等方来请旨若无朕旨尔等将折本彙齐亦间三日一来啓奏

康熙三十三年甲戌五月癸卯

上谕大学士等曰国家以用人为要或有知其人可用而避嫌不举者或有知其人不善而引为党援者自今九卿当各将所知居官贤能者敬慎公举科道官职司耳目诚能於所知贤者从公推荐不肖者立行参劾则贤者劝而不肖者惩治道岂不美乎可将此旨传谕九卿科道

甲辰

上谕礼部尚书兼翰林院掌院事张英曰翰林系文学亲近之臣向因日讲时时进见可以察其言语举止近日进见稀少讲官侍班不过顷刻岂能深悉着将翰林院詹事府国子监官员每日轮四员入直南书房朕不时谘询可以知其人之能否以备擢用

康熙三十四年乙亥三月癸亥

上谕大学士等曰翰林官撰拟文章是其专任善与不善皆应有鼓励惩戒之处自是以後凡碑文祭文其撰拟人姓名及所撰之文或经俞允或被申飭一一记明有三次善三次不善者俱行奏闻

康熙三十六年丁丑七月丙午

上谕兵部都统副都统典兵重任若但於本旗内选授则下五旗即有本旗之王掣肘办事不得其正者甚多嗣後都统副都统员缺应於左右翼内不论旗分补授

八月辛酉

上谕大学士阿兰泰曰山陕两省最为要地以後文职缺人俱令奏闻朕酌量选用

康熙三十七年戊寅十一月甲午大学士伊桑阿阿兰泰以年迈健忘疏请引退

上曰大学士最为重任必平坦雍和办事敬慎者方为称职至於记事学士可分任之尔二人

着照旧供职十二月丙辰湖广道御史朱廷鋮条奏服满候补人员内有系特简者有卓异者应不论班次即行录用

上谕大学士等曰览朱廷鋮所奏未必无故但所言之事有当於理夫治国家者以人才为要朕亲简之官如丁忧服满起补与降级及一槩丁忧者校年补授何时得录用乎凡条奏合宜即为准行其间有私与否朕不问也

康熙三十八年己卯五月癸巳大学士伊桑阿以老疾乞休

上谕大学士阿兰泰曰伊桑阿为人厚重老成办事年久尔二人自任大学士以来不生事端凡事推诚从公料理不独朕知之天下无不知者非尸位素餐者可比伊桑阿虽以老疾求罢朕不忍令去也

六月戊戌朔

上谕大学士等曰当今凡事皆可缓图惟吏治民生最难刻缓谚云湖广熟天下足江浙百姓全赖湖广米粟朕南巡江浙询问地方米贵之由百姓皆谓数年来湖广米不至以致价值腾贵然楚省官吏并未奏报水旱又闻湖南百姓甚苦皆由兴永朝王梁杨凤起三人相继扰害所致见任总督李辉祖为人诚实办事颇优但俱系于成龙荐举欲其不徇情面将从前废弛整理断不能李辉祖可召进京以侍郎用原任左都御史郭琇前为吴江县知县居官甚善百姓至今感颂其人亦有胆量无朋比郭琇着补授湖广总督令驰驿赴任

十月己巳

上谕大学士等曰凡上司居官有声者其所举之人必佳上司不善则所举者亦属庸劣然亦有居官先优後劣者亦有居小吏善而陞迁後改变者若始终如一行止不改者不多得也

康熙三十九年庚辰七月乙未

上谕大学士等曰观翰林官及庶吉士内有极贫者衣服乘骑皆不能备将此等查出作何施恩有益供职其丁忧告假回籍之翰林官庶吉士有生计艰难无力至京者着该督抚酌量资助令其来京又翰林官员专司文翰更无他事各省学道员缺应与郎中并差满任之日仍各回衙门或掣籤或作何差遣尔等会同翰林院议奏

九月丙午

上谕大学士等曰旗下大臣子弟当令为侍卫执事勤劳効力今皆令入部院衙门大臣交相顾庇一应陞迁出差全不论俸之浅深人之优劣擅徇情面选择保奏其间揽事恣行者亦有之此辈在部院衙门大臣等彼此相托不无掣肘见今写本办事坐台驰驿等劳苦之处大臣

子侄誰曾派遣況漢官見任三品以上堂官子侄不授科道之職若大臣子侄人材果優何處不可効力必在部院衙門方為美耶今八旗滿洲漢軍大臣除同族不論外其子孫兄弟伯叔兄弟之子在部院衙門為司官筆帖式者著查明開列呈覽朕閱其可留者留之可去者去之上三旗以侍衛執事選用余著隨旗行走俟伊等父兄不在任時再行補用部院衙門爾等可與九卿會同議奏

十月己卯

上諭大學士等曰今年內陞科道官仍管原任事外轉又停科道暫时无缺候補之人不得即補今歲行取以科道用者著補額外御史俾隨九卿議事則伊等苟有一得可以陳奏爾等將此旨傳諭吏部

康熙四十年辛巳二月庚辰九卿等議覆河道總督張鵬翮題請河工官員保守三年不決照台灣官員例以應陞之缺陞用應准行

上諭大學士等曰河工豈可與台灣並論台灣系海外之地彼處官員俱屬揀用赴任時不帶家屬獨身前往三年後調陞別地此內有意存焉今張鵬翮奏稱河工官員保任三年不決即陞果依此行三年後惟河工官員陞遷其他盡壅滯矣且部中定例亦從此而壞此本發還著再議

三月壬辰九卿等覆奏河道總督張鵬翮題河工官員請照台灣例叙用應不准行

上曰凡事得中為善不可太過亦不可不及河工官員俱照台灣例叙用雖屬不可然竟不准行亦未盡當須按其工程之極險次險與平易者分別作何加級則諸員方肯効力其或才本庸劣而督險要之工或才本優長而督平易之工皆不妨调用爾等可擇善馳驛中書遣至張鵬翮處令分別其工程之極險次險與平易者開明具覆到日再行定議

壬子

上諭大學士等曰據張鵬翮疏稱上險次險等工程但水性靡常倏爾變遷歲修工程或變為險要險要淤塞即變為歲修各官有實心効力者亦有隨眾塞責者豈可俱照台灣之例一体叙用又言河員冒涉風濤與台灣官員无异不知台灣官員三年即陞之例并非僅為風濤起見且河員見今俱系保題從優補授之人若照台灣例叙用必致吏兵工三部條例俱要更改況河工練員同時陞去獨存新任之員於河工有无裨益之處未經議及今河員已歷二載其三年之限自前到任之日扣算抑自今歲明歲扣算且再過三年張鵬翮能保尚在河工否接任河臣焉知從前官員賢否乃欲將河員遽為陞用可乎其不可行之故諭令張鵬翮知之

五月戊子

上谕大学士等曰自古帝王用人行政皆赖大臣荐举贤良尽事君之大义天下至大为人君者焉能人人而识别之且官方贤否或操守清正或贪污不肖必难掩於百姓必难逃於衆论其居官即此可见矣倘所举之人居官皆善此乃实心为国无私之贤臣也所举有善有不善此其心虽为国特识鉴未到之故耳若所举皆贪污行私此则大玷为臣之义矣辨别臧否以鼓励实行权在人主或居小吏时亦有善名及得志之後改行者甚多焉能豫料自兹以後朕惟视其居官操守清廉以为实据无庸豫为疑度也

十月己巳大学士等以湖南按察使员缺将九卿保举道员施世纶等开列具奏

上谕大学士等曰施世纶朕深知之其操守果廉但遇事偏执百姓与生员讼彼必庇护百姓生员与缙绅讼彼必庇护生员夫处事惟求得中岂可偏私如施世纶者委以钱谷之事则相宜耳

康熙四十二年癸未正月丁卯

上谕大学士等曰湖广总督郭琇摺奏提督林本植标兵於城内公行焚劫朕思湖广兵丁骄纵若不用一才能者统辖安能除其恶习林本植年迈着解任将大同总兵官俞益谟补授湖广提督令即驰驿赴任兵弁中有深信者并令酌量带去其带去兵弁悉以职名奏闻

四月戊戌

上谕大学士等曰今吏部尚书缺尚未补人巡抚李光地徐潮原在内任历年亦久早应擢用朕因地方起见所以暂留外任伊等居官诚优且得大臣体彭鹏赵申乔行事偏执惟务沽名所以事皆背谬李光地自任直隶巡抚以来每年雨水调顺五谷丰登官吏兵民无不心服吏部尚书员缺以李光地徐潮问九卿寻大学士等

问九卿言二人俱优覆奏

上命李光地为吏部尚书仍管理直隶巡抚事

十二月辛卯

上谕大学士等曰朕今次西巡见直隶河南陕西山西四省接壤如山西泽州人授以河南怀庆府地方官虽云隔省相去实不过百里得无徇庇伊弟兄亲戚乎又直隶人在河南接壤处河南人在直隶接壤处居官者甚多嗣後补授外官时掣籤所得地方如隔伊原籍五百里外听伊赴任如五百里内虽隔省着回避

康熙四十五年丙戌三月丙寅九卿议云南贵州广西四川四省员缺若本省无应委署之员则委隣省附近官暂令署事俟部选官到日仍回原任

上曰如此议则官员到任仍至迟延令隣省官署事则隣省官少又至悬缺当照年满千总分发各省候缺着将此四省见出知府以下员缺俱行察明单月掣籤补用至候缺官员论省之大小缺之多少一省或十五人或二三十人均匀配算亦归单月一年一次掣籤分遣俟有缺出着该督抚指名挨次补授一面报部如未有缺出暂给俸候缺如此则员缺不致久悬而於事有济矣康熙五十一年壬辰二月丁巳吏部以各省学政任满开列请

旨

上谕大学士等曰提督学政有教育士子选取人才之贵关系甚要从前学差声名不善者多间或取二三孤寒因而得名亦不可谓之善今大臣官员子弟内虽亦有学问优者但伊乡会试时皆以贿进故一得学差取士亦必受贿科道官员知其情弊徇情不行指参此任甚要开列人员内有尔等所知者可各举出

三月乙巳

上谕大学士等曰县令与民切近有刑名钱谷之责未出仕以前如不能谙练事宜则登仕之後於地方民生无有裨益今岁考中进士除?选庶吉士外其余勿令回籍俱交与礼部选翰林内学优品端者数人派令教习文艺从事典礼如有修书处率同修书又考中武进士皆以参将游击守备等项员缺补用此等俱有约束兵丁整饬营伍之责未补官以前不可不先令其学习嗣後考取武进士亦着勿回原籍见在年满千总皆分拨八旗武进士等亦着分拨八旗随围学习行走

康熙五十二年癸巳二月癸酉

上谕大学士等曰福建巡抚觉罗满保奏闽县等十六州县员缺请於卓异人员内拣选补授部议不准督抚等为地方得人起见恳切陈奏理所宜然其应否准行恩出自朕近见督抚等题请之事言官每从中阻挠前曾有御史条奏称闽属十六州县员缺拣选官员补授可为一时之计未可为经久之例不如择本省之员调补若拣选卓异荐举官员发往补授必至悬缺以待於地方无益等语阅之似乎有理其实皆系卓异荐举官员料伊等即行陞转不愿往海滨苦地希图美缺因於未经部覆之先求言官条奏则部议自然不准所以特嘱言官言之也如此则权尽归都察院科道等官矣此系明末恶习断不可长也着问九卿詹事科道

五月庚辰

上谕大学士等曰武官系朕亲验骑射及人材壮健补授故尔识认文官皆系临民之官关系尤重凡掣籤月官悉行引见应补授者俱行补授其年老不及者令原品休致惟在外陞补等官槩不引见伊等贤否岂得周知嗣後作何验看辨别尔等与九卿会议具奏

九月丁卯

上谕九卿等曰尔等俱为大臣天下督抚之贤否应於平时留心细访以备顾问谁贪谁廉即行公举虽门生故旧不为徇庇庶皆知畏惧而勉励矣乃者朕问时或谓未经同衙门办事或自谓平日不接见人知之不真以此推辞非理也

康熙五十三年甲午四月癸酉

上谕吏部补授州同人内不堪者甚多应取至京师令九卿面试补用有出身不明者着革退

康熙五十四年乙未十一月己酉

上谕大学士九卿等曰部院司员见在官职虽卑日後亦可至大僚伊等朕多不认识必数数问诸大臣而用之亦不胜其烦今观部院司员等劣者甚多考校武进士马步箭时侍郎觉和托举止麤鄙向背不知何以办事又有一司官因劣革退旧例满洲不分文武两途出征时则令於夸兰大章京等处行走此後部院衙门满洲司员着轮班佩刀在侍卫里行如此贤否始见部院汉司官等朕亦未尽认识应照见今翰林分班行走例令伊等分班引见

康熙五十七年戊戌四月丁未

上谕大学士等曰近见八旗补授佐领及袭职官员俱有迟至数年未曾啓奏者此等事甚不宜迟今迟延至此显有情弊交与都察院查明题参其应补应袭之人着各旗大人带往热河引见

康熙六十一年壬寅三月壬子

上谕大学士九卿等曰用人行政朝廷之大权也文官铨选掌之吏部武官迁除掌之兵部吏部论班论俸兵部论俸论衔从来定例也其武官历三年加衔调补之例甚善近来督抚提鎮题补太多始不过州县官千把总之类今则司道副参亦皆题补矣值此用兵之际姑且行之此习若久大有关系且伊等题补官员内朕不知者甚多补用後遂皆称为奉旨补授之员诸臣皆读书之人何可不虑及此在京大小职官皆朕所选用贤否易知若外省保题之官非朕所素知岂能一一定其优劣乎尔等会同详议具奏

七月甲辰

上谕兵部拨派年满千总发往各省分营当差据尔部所议部文一到遇有守备员缺即照所分次序具题引见以渐补授则往返多需日期员缺必致久悬伊等俱系朕拣选之人嗣後缺出报部部内即按次序补用不必引见

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十三



## 卷二十四

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十四

广言路

康熙六年丁未十二月壬申

上谕吏部都察院设立言官原为国家大事兵民疾苦内外官员贪酷等项应许陈奏理宜简约真切直陈以备采择近见言官条奏於事理之外牵引比拟多用浮饰之言或有将已结之事剿袭充数者或有挟私纷更国家之良法者且本章原令不得踰三百字今踰额浮词甚多以後陈奏此等无益之处俱着更改如仍前不改严加治罪至言官如有所见既许不时陈奏其拾遗着永行停止尔部院即传谕严饬遵行

康熙七年戊申九月癸丑

上谕吏部兵部朕顷以秋冬农隙讲武之时欲一往边外阅视不久即还今览诸臣前後各疏称今岁灾变甚多不宜出边以致兵民困苦朕思诸臣抒陈忠悃直言进谏深为可嘉已允所请停止边外之行以後国家紧要重大事情如有未当务将所见直陈朕不憚更改尔二部即传谕遵行

十一月丙辰

上谕吏部各部院衙门事务殷繁必得贤能之人乃克办理都察院科道等官职司建白纠弹内外大小各官有衰庸及贪酷溺职者理应据实指参近见言官章奏或条陈无可采取之琐事或止将微员塞责不过以职任言官曾言某事徒沽虚名而已如内而部院堂司各官果有嘱托行贿者即行纠参外而督抚以下有为害地方苛虐小民大贪大恶者即据实不徇情面参发则恶人知儆地方乂安岂有不臻太平之理尔等身为言官若不摠忠入告即不称职理应处分姑暂宽免嗣後务破情面据实参发以副朕用人图治之意尔部即严饬遵行

康熙八年己酉六月丁卯

上谕吏部朕夙夜图治念切民生艰难加意抚绥俾各安居乐业乃成久安长治之道近年水旱频仍盗贼未靖兼以贪官污吏肆行朘削以致百姓财尽力穷日不聊生朕甚悯焉尔等部院大臣科道各官或任要职或有言责者即将拯救民生疾苦切实裨益之处各摠所见明白陈奏以备采用勿得妄行借端以无益之事塞责指陈负朕加惠黎元图治求言之意

康熙九年庚戌十二月戊申

上谕大学士等曰朕近日披览章疏於科道官条奏有合於事理裨益政治者虚怀听纳不憚见之施行其所言无益不可行者非剿袭陈言则浮泛塞责尔诸臣宁有不知今後有言关政理切实可行者照常票拟朕亲加裁夺其或不可行者若悉下部议徒令章奏繁多反致应行事务稽迟尔等即以不准行拟旨朕仍审择而执其中古之圣帝贤君虽迹言是察亦无稽勿听用言致治之道盖当如此

康熙十二年癸丑八月己酉

上谕吏部国家设立言官专司耳目凡政治得失民生利弊必须详切条陈直言无隐斯为称职若但敷衍虚文浮冗剿袭或以不急之务草率塞责非朕广开言路之意今将科道官亲加考试其留用各员宜益加勉励殫心尽职以副委任石文郁范时起何名扬庸劣无文不称言职令罢之尔部即遵谕行

康熙二十一年壬戌八月丙子朔

上谕大学士等曰学士乃内阁参赞政事之官如有所见应行啓奏近来并无与议者若惟送本接本用一笔帖式足矣何必设立学士此後各有所见俱令敷陈

康熙二十四年乙丑五月戊子

上谕大学士等曰九卿咸有条奏之责科道亦为耳目之官凡有见闻及应行事宜当不时入告以明尽忠补过之义今天下虽已昇平而兵刑礼乐之大国计民生之繁岂皆事事允厘无一可言者耶尔等其以此旨遍谕廷臣焉

十一月己未

上谕吏部往者康熙十八年传谕九卿詹事科道一同奏事期於政治得失互相讨论虽微员亦得於朕前各抒己见前阿兰泰於九卿啓奏时言诸大臣跪列於臣之前故未说出此则非朕令一同奏事之意矣尔等将此再行晓谕九卿等

康熙二十六年丁卯四月癸酉

上谕大学士等曰自设科道侍班纠仪之後啓奏各官往往心怀畏惧即科道官虽欲有所建白或恐以失仪被纠不敢条奏亦未可定朕思啓奏各官果有失仪应处分者朕自当付部议处若系无心小悞亦宜寬宥况啓奏者俱系国家大臣即有差悞伊等自行检举岂待人纠至科道官朕本欲其尽言无讳其中有新从外任擢授者礼仪未经嫺习虽有些小过悞朕亦不计也科道侍班着停止

十一月乙未

上谕大学士等曰凡参劾贪官其受贿作弊之处因未曾亲覩无所凭据畏缩而不行参劾者甚多今间有弹章亦止据风闻参劾耳岂有身与之通同受贿作弊而顾肯参劾之耶向者原有风闻纠弹之例

世祖章皇帝时及辅政大臣停止今再行此例贪官似有傲惧若有挟讐参劾者审明果系挟讐自有反坐之典在可传谕九卿詹事科道等

康熙二十七年戊辰六月辛亥

上谕大学士等曰近来科道絶无章奏条陈乃科道专职惟在中无私意而已尔等可将此旨徧谕科道如有条陈令至畅春园面奏

康熙二十九年庚午四月己卯左都御史陈廷敬奏言官建白不得摭拾小事

上曰设立科道原欲其建言也至条奏之事是否可行自有裁定若必大事始言则言官难分事之大小以致进言者少非所以集衆思广忠益也

康熙三十一年壬申三月戊寅

上谕大学士等曰国家设立言官本欲令其陈奏得失近日不见一人条陈岂皆无事可言耶尔等可传谕科道等官俾各抒所见昌言勿隐

十月丁酉

上谕大学士等曰国家设立言官职司耳目一切吏治民生得失利弊皆宜殚心采访据实直陈近见满汉科道官员建白甚少殊非朕委任言路之意嗣後应各矢公忠研求时务凡有可以裨益国家之事悉摭所见以俟采择但不得怀挟私情浮泛塞责其有真知灼见应纠劾者即行参奏亦不得暗受嘱托代人报复苛责细事希图倾陷着传谕遵行

康熙三十六年丁丑二月乙酉

上谕吏部都察院国家设立都御史及科道官员以建白为专责所以达下情而祛壅蔽职任至重使言官果能奉法秉公实心尽职则闾阎疾苦咸得上闻官吏贪邪皆可厘剔故广开言路为图治第一要务近时言官条奏参劾章疏寥寥虽间有入告而深切时政从实直陈者甚少此岂委任言路之初旨乎自今以後凡事关国计民生及吏治臧否但有确见即应指陈其所言可行与否裁酌自在朝廷虽言有不当言官亦不坐罪自皇子诸王及内外大臣官员有所为贪虐不法并交相比附倾轧党援理应纠举之事务必大破情面据实指参勿得畏怯贵

要瞻徇容隐即朕躬有失亦宜进言朕决不加责其有怀挟偏私借端倾陷者朕因言察情隐微自能洞悉凡属言官尚各精白乃心力矢忠说以无负朕殷切责望至意尔部院传谕行

是日吏部遵

旨将起复原任科臣苏俊等职名开列啓奏

上谕大学士等曰科道职司耳目年来并无一人陈奏故朕将见任言官严饬又将伊等起复言路必大开矣此後条奏内如果可行即批准行否则俱批知道了若一槩交部议覆必多更张成例之弊况朕令其陈言原欲闻军国要务如但以浮词细故塞责陈奏殊非朕求言本意

五月壬寅礼科给事中郑昱条奏平定噶尔丹庆贺大礼颁

诏款项

上曰凡颁赦诏皆人主之事非人臣所宜言自古诏赦频频不以为善政者以其便於恶人而无益於善人也郑昱妄以诏款陈奏念系言官特从宽宥着大学士等严饬之

康熙三十九年庚辰四月辛未

御制台省箴以儆言事诸臣箴曰台省之设言责斯专寄以耳目宁取具员通明无滞公正无偏党援宜化畛域宜捐洞达政体斯曰能贤古昔诤臣风规凜然訏谟说论垂光简编朕每览绎如监在悬居是官者表里方直精白乃心克广其识国计民生臧否黜陟凡所敷陈敬将愠悞风霜之任以惩奸慝搏击之威以儆贪墨毋摭细务苟塞言职毋纷成宪妄逞胸臆书思入告当宁对扬沽名非正营私孔伤或藏嫌怨谬为雌黄受人指囮尤为不臧形诸奏牒有玷皂囊职司献替亟宜申详敬尔在公风纪岩廊词箴用勗诞告聯常

九月乙巳

上谕大学士等曰给事中穆和伦条奏服用奢侈本章尔等拟票申饬朕意言官专任耳目之职若因言而罪之谁复敢言但此本内言顺治以来至康熙十年尚为俭朴自後渐至奢僭等语殊属错谬朕知之甚悉自辅臣摄政十年以前凡器用服食等物甚为奢侈自朕听政以来一应服食俱从节俭诸王大臣亦皆效法不用金银器皿金镫等物此时服用较从前十分之内已减九分矣然笔帖式护军庶人等服用未必不少有奢侈朕岁岁赏赉更给官马而生计尚未充裕谓非奢侈之故乎朕阅载籍历代以来皆由朴而渐至於奢未有由奢而渐至於朴者不可以不禁也当此之时惟以大开言路为要务况设立科道专为求言所言当则行之不当但将原本发还如此则内外臣僚亦俱知所儆戒矣朕听政四十余年言官有为人而言者有受贿陈奏者有报私讎而顛倒是非者此等条奏朕无不知至於丧祭时恐其僭用朕屡经传谕族长着不时查察今日久渐弛容或有之亦当禁止此本着不必申饬

十月丁卯

上谕大学士等曰臣下之贤否朕处深宫何由得知缘朕不时巡行凡经历之地必谘询百姓以是知之朕欲开风闻言事之例科道官以风闻题参即行察该督抚贤者留之不贤者去之如此则贪暴斂迹循良竞劝於民大有裨益嗣後各省督抚将军提鎮以下教官典史千把总以上官员贤否若有关系民生者许科道官以风闻入奏倘怀私怨互相朋比受嘱托者国法自在着谕满汉掌印与不掌印科道官知之

康熙四十年辛巳十二月甲子广东巡抚彭鹏因云南道御史王度昭疏参遵

旨明白回奏

上谕大学士等曰朕於科道官许其风闻入告者专为广开言路使自督抚以下各官有任意妄为及贪劣害民者皆知所顾忌而警戒也科道官员纠参不实例有处分又或言不合理及生事妄奏者外转有之罢职亦有之至於被参之人具疏回奏止应辩晰是非不应支离牵引因彼一身被参而举原参之父子兄弟亲戚皆受指摘以逞报复则自此以後孰敢更纠一人耶彭鹏身为言官时亦曾参人兹为王度昭所劾理应止以切己之事剖晰奏明乃今讐奏王度昭谓其曲庇亲戚而其间所有夙怨又未指出实据彭鹏虽操守清廉居官亦善此回奏反复瀆陈辞气不胜忿激凡在君上之前不应陈奏之言辄形於章疏粗戾已极着严饬行

康熙四十一年壬午三月辛丑

上谕大学士等曰旧岁稔收今虽稍旱似未为害然为人主不随时为计可乎往者朕以旱潦为灾令各陈奏事宜时因人自为奏故辞多粉饰於国家政要莫之言及其令九卿詹事掌印不掌印科道集议有益於时政事宜者具奏以闻

康熙四十五年丙戌十一月壬戌

上谕大学士等曰往代之君不接见诸臣臣下之意无由上达政何以得理耶

康熙五十一年壬辰正月壬子

上谕领侍卫内大臣大学士都统尚书副都统侍郎学士副都御史等曰自古帝王统驭天下君臣一心无有异意故凡事无不就理倘上下睽隔各怀一心则凡事无不滋弊此理所必然也朕今春秋已高听政年久衆亦谓朕事事经历无不周知但不闻不见之事甚多虽有言官若以不可发抄之事入告必关身命不惧者有几

是以托合齐等辈小人常昂然张胆构集党羽今已显露若渐使滋蔓其弊不可胜言矣朕为国为民宵旰勤劳亦分内常事此外所不得闻者令各该将军总督巡抚提督总兵官因请安

摺內附陳密奏故各省之事不能欺隱此於國計民生大有裨益之效也爾等皆朕所信任位至大臣當與諸省大臣一體於請安摺內將應奏之事各罄所見開列陳奏所言是朕則擇而用之非則朕心既明亦可手書訓諭而爾等之善惡真偽亦昭然可見朕於諸事謹慎舉朝無不知之凡有密奏無或漏泄但不肖大胆愍不畏死之徒從中拆視或原奏之人朋友衆多口不密而洩漏者有之況一概奏摺不遲時刻皆不留稿朕親自手批發還凡奏事者皆有朕手書證據在彼處不在朕所也如是則大貪大奸自知畏懼或有宵小誑主竊賣恩威者亦自此顧忌收斂矣為此特諭

康熙五十五年丙申七月壬午

上諭大學士等曰朕前曾諭九卿科道等文武大臣內有聲名不好者科道即行題參科道內有行止不端者九卿亦參奏今部院司官內有辦事雖勤而操守平常者亦着查參可傳諭九卿

十月甲午

上諭大學士等曰朕令大臣皆奏密摺最有關係此即明目達聰之意也凡一切奏摺皆朕親批諸王大臣等知有密摺莫測其所言何事自然各加警懼修省矣爾等可傳諭九卿知之

大清聖祖合天弘運文武睿哲恭儉寬裕孝敬誠信中和功德大成仁皇帝聖訓卷二十四

## 卷二十五

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十五

严法纪

康熙三年甲辰三月庚午

上谕刑部直隶各省民有冤抑许赴原问衙门及部院等控告如不准行方许叩阍前谕甚明近见有不赴原问衙门及部院控告竟叩阍者有已经叩阍不候原问及部院审结辄行再叩者有覓人代告者嗣後通行禁止其奸棍代人控告者论死尔部晓谕直隶各省军民人等一体遵行

四月戊午刑部奏流徙宁古塔犯人项知中途病故伊妻傅氏应否还原籍

上曰凡僉妻流徙人犯夫死其妻免流若有子或无子有仆仍照流徙其止有一子尚未离乳者亦免或妻家冀免伊女致死其壻及恶棍欲得其妻设谋致毙作何禁止尔部详议以闻

康熙四年乙巳正月甲午

上谕兵部督捕衙门向因满洲藉家仆资生若立法不严必致尽行逃走不得已严定窝逃之法非欲以逃人之故貽害於民也今闻各地方奸棍结党诈害报仇或指逃报部提审全虚或指称某家窝逃审虚复扳别家或逃档无名复改易名姓或自称逃人解部无人识认或棍徒在地方犯罪逃京投旗希图免罪或地方官拏获重犯因诬称逃人不敢加刑迁延漏网或解役与逃人结党沿途抢掠肆行无忌或地方官唆令逃人指扳富室巧行吓诈此等株连蔓引冤及无辜饿死道途瘐毙监狱实属可悯何以立法使逃人可获奸棍不得肆恶小民不受诈害着议政王贝勒大臣九卿科道详议具奏

康熙六年丁未四月戊申

上谕兵部督捕衙门严立逃人之法因愚民窝隐旗人逃亡日衆不得已而然非欲苦累小民也近闻有递解逃人所过城邑村庄吓诈抢夺及解役亦将逃人纵放借端枉道村庄同谋挟诈害民殊甚此皆由地方各官起解逃人时不严禁解役不将逃人严加桎梏之故凡城邑则有该管官员村庄则有经管约长如将挟诈抢夺者严拏举首谁敢扰民以後逃人及解役若

於所过地方骚扰者锁拏送京治以重罪毋有所纵若原起解官不严禁解役经过地方官不行察拏事发严治其罪必不寬恕尔衙门即通行晓谕直隶各省遵行

康熙七年戊申三月辛酉

上谕吏部近闻在京诸臣违法遣人往各省官员处借名问候多索财物又干预地方事挟持请托颠倒是非甚为良民之害有等游行闲棍讨取官贝书札或雕刻别人图书投见地方官员恣行欺诳此等情弊深可痛恶地方大小各官果能持己端方制行清直於此等违法干请之辈即不应所求不给财物何惧之有以後地方文武各官遇有此等游棍应即严拏具奏将主使之入究出从重治罪若畏惧徇私不行陈奏被旁人讐告科道纠参将地方官一并从重治罪尔部通行晓谕王以下内外文武大小各官

是日

上谕刑部向来东西长安门外竖立石碑原为民有冤枉令其伸告近见奸狡棍徒并无冤抑谎捏事端诬告者多实情者少将无辜牵连苦累又闻无赖之徒指称叩阍在於地方恣行挟诈扰害良民是负朝廷恤民之心而开奸徒生事之路也通政使司登闻鼓衙门既许封进状词伸理冤枉以後内外官民果有冤抑事情着照例於通政使司登闻鼓衙门告理叩阍之例永行停止

六月丁丑

上谕刑部严禁赌博向有定例近闻官民有以此为事者废弃本业倾败家产深属可恶此皆该管官员稽察不严或徇情护庇不行发觉所致嗣後满汉官员军民人等有赌博者该管官不行察出事发审实作何严处旁人首告者作何赏给至樗蒲等物乃败坏人性导引为非之具将此货卖亦属可恶作何严行禁止之处一并详议具奏

康熙八年己酉五月庚申

上谕吏部兵部鳌拜等以勲旧大臣深受国恩奉皇考遗诏辅佐政务理宜精白乃心尽忠图报不意鳌拜结党专权紊乱国政纷更成宪罔上行私恣意妄为用伊之奸党班布尔善穆里玛等凡事先於私家商定乃行与伊交好者多方引用不合者即行排?种种奸恶难以枚举朕以罪状昭着将其事欸命诸王大臣公同究审俱已得实以其情罪重大皆拟正法奏闻朕复面加鞫问情罪俱实本当依议处分但念鳌拜累朝効力年久且

皇考曾经倚任朕不忍加诛姑从寬免死革职籍没仍行拘禁遏必隆无结党之事免其重罪削去太师及後加公爵其原有一等公爵仍准留与伊子其班布尔善穆里玛等皆已正法余皆系微末之人一时苟图侥幸朕不忍尽加诛戮寬宥免死从轻治罪至於内外文武官员或有畏其权势而倚附者或有身图幸进而倚附者本当察处姑从寬免自後务须洗心涤虑痛



改前非遵守法度恪共职业以副朕整饬纪纲爱养百姓至意尔二部即传谕内外遵行

六月庚寅

上谕刑部设立通政使司及登闻鼓衙门原系通达民隐陈告冤抑果有冤枉事情应赴该部院衙门告理近见奸恶棍徒或以琐细小事捏成重大或以私仇藉端陷害善良或受人雇托代为控告或擅入禁地及行幸之所冲突仪仗趋近喊告及将此等状词交与部院审理并无大事及冤枉之处反因被告干证将良民株连受累者甚多前此虽行禁止今仍多有违禁妄告者以後着再严禁如有恶徒仍前渎告者除所告之事不准外照律治罪

八月壬戌

上谕宗人府吏部兵部凡令议政王贝勒大臣会议之事俱系国家重大机密事务理应极其慎密今闻会议之事尚未具题外人即得闻知此皆会议处不严行约束闲杂随从之人以致听闻传说将国家大事预先泄漏殊属不合至於人衆愈觉繁杂其诸王贝勒长史闲散议政大臣俱着停其议政以後凡会议时诸王贝勒大臣务须慎密勿致泄漏着即通行晓谕严饬

壬申

上谕内大臣吏部兵部侍卫文武大小各官各有职掌理宜精白乃心恪遵法纪循分尽职以副朕任用之意近见有不安厥分交通在内近侍使令人员妄行干求或潜为援引或畏威趋奉揆之臣谊殊为不合朕夙夜图治惩创奸佞察其忠贤才能者始行简用岂容匪类妄行陷人以图侥幸嗣後如有仍前干求趋奉者定行从重治罪不宥尔等即通行内外及包衣佐领严加申饬

康熙九年庚戌三月辛未

上谕兵部都察院督捕衙门京师重地理宜肃清近闻京城内外豪恶肆行无忌或借端胁诈逼取钱财或公然剽夺侵扰市肆或纠党横行毒殴良民又暮夜盗刦时闻而就擒者甚少此皆步军校该巡城御史司坊各官督捕司属捕营将弁稽察不严缉捕无术以致奸盗不息良民罹害今应作何严饬擒捕所司有怠玩者作何定罪其集议以闻

康熙十年辛亥七月甲子

上谕刑部近闻流徙盛京一带人犯押解官兵将犯人妻子恣行凌辱或将人犯潜害致死以後尔部严饬押解官兵如有此等事发从重治罪仍传谕户兵二部

康熙十一年壬子正月庚申

上谕吏部各省藩臬以下丁忧官督抚每奏称才能请在任守制恐贪恋职任者多方营求彼此效尤有乖孝道其申明定例嗣後丁忧官督抚毋得题留悉令离任守制

康熙十二年癸丑十二月癸丑

上谕吏部礼部致治之道首重人才储养之源由於学校必衡鉴得人厘剔有法乃能革除积弊遴拔真才以彰文治之盛近闻各省学差沿袭陋规隳废职业营私作弊考试不公以致真才沦弃文治不光今应作何整饬差遣何官及磨勘考核之法何以尽善务期永革弊端着九卿科道详确议奏

康熙十五年丙辰正月丁酉

上谕兵部督捕衙门逃人事情关系重大前因立法太严恐致百姓株连困苦故将条例屡行更改减定期於兵民两益近见各该地方官奉行疎玩缉获日少殊非安辑兵民之意应遣部院大臣会同尔衙门将新旧条例逐一详定俾永远遵行

八月乙丑

上谕吏部户部兵部迩年以来大兵诸路征剿军需浩繁一切供应皆取给於民凡领兵将军将弁及督抚文武大小各官俱当以国计民生为念洁己奉公加意撙节表率属员恪遵法纪以副朕戡乱救民之意乃有不以剿寇安民平定地方为念惟图营私射利糜费钱粮军前所用米豆草束诸项自将军以下有自行贩卖嘱托地方官多取价值地方官有徇情浮冒开销者亦有地方官贩卖支放多行开销者有已备本色不行收纳折价入己者有民间运到米豆草束地方官故意迟延措勒及至军前又多方刁难解官恣意需索方肯收纳者至於购买马匹不开实价以少为多滥行销算种种情弊难以枚举皆由大小各员互相徇庇止知图便已私殊为不合应严加禁饬以清积弊若仍不悛改事觉照贪官例治罪有能举首者从优议叙

丙寅

上谕户部今正当军需浩繁在外总督巡抚及经管钱粮各官俱宜洁己奉公殚心料理一应收支销算详明造册据实开报听部核议近见部覆各处奏销本内或因欸项不符或因数目舛错或因造报遗漏或因册结不到多致駁察道路往返动经岁月明系地方各官不加意清理故留疑窦希图延挨时日以滋弊端钱粮朦混不清民力苦累益甚以後如何尽除积习使钱粮不致駁察尔部定议具奏

康熙十六年丁巳二月己巳

上谕兵部进蜀官兵并未平定地方大创贼寇且屡奉温纶理宜戮力疆场乃至西安布匿名札惑衆既抵陇州又妄行控告不赴平凉我国家创业以来从未有此行事统兵将领不能约

束兵丁肆行不法及至京师敕令首倡告之人官兵又互相隐匿不举殊干法纪此行军功俱不准叙

康熙十八年己未二月乙酉

上谕刑部民间鬻身为厮养者多藉口投充营伍挟制家长勒索身契及妻子财物又有桀黠之徒乘戎马往来之际?人坟墓或利所有或挟私仇其情罪尤属可恶着严议具奏

康熙十九年庚申五月庚寅

上谕吏部等衙门致治安民之道首在惩戒贪蠹严禁科派而後积弊可清闻阎不扰近见街道衙门蠹役诈索害民又闻提督步兵衙门五城司坊街道巡捕营等衙门各官不能洁已奉公恪遵法纪纵容衙役唆削小民或沿习陋规科敛行户或借端挟诈官役分肥肆意横行无辜受害种种弊端深可痛恨向来虽经严禁定有处分之例但恐小民未能悉知仍被奸徒扰害应再加严饬务令家喻户晓以副朕安全生民至意

六月壬午

上谕刑部等衙门凡大兵经过之地将弁宜严加约束务令秋毫无犯屡经有旨申饬今兵丁陈德任意逗留扰害小民杀死人命该管将弁所司何事尔等不行严察但将陈德议斩监候其余竟置不议殊属未合可一并严加议处

七月甲辰

上谕兵部朕闻往来官兵所用船及人夫皆借端勒索往往额外多派折价入已沿途生事又辄将纤夫肆行鞭撻民甚苦之各该管将军不加禁制任其妄行地方官复行苛敛希图分取互相隐饰种种私弊甚为可恶此後合行严禁且此等事科道虽有风闻因无实据未便题参地方督抚又以官兵劳苦不行劾奏以致如此自後如仍前所为事发之日该将军及地方官俱各从重治罪断不姑宥

康熙二十年辛酉二月甲午

上以逆贼尚之信在广东令其部人私充盐商据津口立总店又逆贼耿精忠在福建横徵盐课擅设报船苛派夫驿勒索银米久为民害

命该部檄各督抚悉革除之又逆贼吴三桂在云南曾以沐氏庄田赐给为藩庄其藩下官兵侵占民田擅为己利

命户部檄该督抚事平之日察出给还小民

七月丙寅

上谕户部京仓通仓粮米历来缺额其监督官员交盘时有贿与银两者亦有杂以灰土者放米时有与旗下官员银两抵完者其贫人所得米粮缺少此等情弊朕悉知之如尽行究察从前经管各官有一得免者乎其饬所司严革诸弊

康熙二十一年壬戌四月己卯兵部议准宁古塔将军巴海题缉获盗采人参之官兵应定例以示劝惩

上曰盗人参官兵踪迹缉获者视所获多寡议叙甚为允当但恐非系采参之人妄有拘执夺其资财致子身采捕他物者无故罹害亦未可知嗣後有犯此者作何处分其再议之

康熙二十二年癸亥五月辛酉刑部题覆直隶巡抚格尔古德疏称旗下所买之人当携归庄屯不当听其仍留本籍违者买王及卖身之人均行治罪并地方官亦当议处因定容留人数多寡处分之例

上谕大学士等曰地方凶徒或素行横暴乡里不容多有卖身旗下倚势纵恣者此等即一二人已足扰害地方至於守分安居原有田舍者虽卖身旗下於地方无害槩令迁移恐致失业应不论容留人数多寡作何分别定例九卿詹事科道可会同确议以闻又

谕曰卖身之人或曾犯罪处分或见有犯法事情卖身旗下希图幸免者从重治罪买主知情亦从重治之

八月丙辰大学士等遵

旨议覆刑部事件

上曰朕於刑部事件所以念念不忘者特以别部事件虽少迟延不过牵累一二人而已不致大害若刑部事件迟延太久则正犯暨无辜牵累者身家性命受害无穷朕念及此每用惻然其借行提两造干证故意稽迟时日应作何立法尽除弊端可再议又

谕曰刑部不独人命大事迟延日期即杖笞鞭责之罪亦复延挨虽都察院及该科衙门每月稽察档案不过虚名而已何益实事嗣後照热审例十日内所结事件造册奏报则事不致稽延而定罪之当否亦可尽知此等小事朕不应苛察但刑部事务渐至颓废恐人犯无辜受害故尔频加稽察可传谕此意一并会议

辛酉议政王大臣等会议永兴过河交战失利官员分别处分

上曰我朝军法从来严明虽承平时不少寛假然尚有未尽处因定例内击败贼寇凡受伤回

营之人俱准论功又我军退却凡受伤退回者亦得免罪於是不肖之徒怯於战鬪故将伊身自作伤痕希图规避者不无其人更有甚者因一人受伤即数十人扶拥送回规避不前如此则军法岂不纵弛今虽殲灭贼寇海内宁一所有军法未尽处不可不详议改定故特谕尔等知之

十月癸亥

上谕刑部明罚敕法民命攸关必殲决精详案无留滞而後听断得情民免株累向因刑部等衙门事务审理迟延屡加申饬今积案已完宿弊渐革惟在外直隶各省督抚衙门因循积习怠忽稽迟一切刑名案件有经年不结者有数年不结者或因承审官员不能恪秉虚公妥招定案每年草率含糊希图苟且完结以致上官屡行批駁沉案积久不清或因上官意有偏徇借端频行駁审因而营求滋弊顛倒是非冤抑无辜莫由申诉此等情弊皆由听断不公完结不速牵连淹滞苦累小民应作何立法俾在外各衙门痛改积习永絕弊源讼简刑清克称平允着九卿詹事科道会同详议以闻

康熙二十三年甲子五月甲申

上谕户部民间田地久已有旨永停圈占其存部注册地亩分拨时或不肖人员借端扰害百姓圈占民人良田以不堪地亩抵换或地方豪强隐占存部良田妄指民人地亩拨给殊为可恶直隶巡抚可严察此等情弊指名纠参从重治罪

康熙二十四年乙丑九月庚辰九卿会议广东云南秋审人犯

上曰凡别项人犯尚可寬恕贪官之罪断不可寬此等人藐视法纪贪污不悛者祇以缓决故耳今若法不加严不肖之徒何以知警此内贪官耿文明等正法外其余正犯俱照尔等所议完结

十月戊戌理藩院等衙门奏称厄鲁特来使伊特木根於北馆中毆死正白旗商人王治民应论死

上将伊特木根正法并传

谕厄鲁特曰尔等进贡来使沿途往返扰害民生抢掠牲畜以致边境内外百姓患苦者甚衆朕虽稔知以尔等远方之人本不谙中国法纪无知妄行屡不加罪槩从寬免嗣後贡使往来如有攘夺为非者尔等率领头目并犯法之人皆依中国律令治罪曾经颁旨晓谕今尔进贡头目并不严束侍从任其扰害将内地人毆死干纪甚矣先以尔等愚昧顽蠢凡细微攘夺之罪知而宥之乃屡邀寬免频加晓谕全不钦遵竟至毆死内地之人今若不按法抵罪日後渐益恣肆大起争衅未可定也用是将毆死人命伊特木根依律处斩令尔等识之观之此後尔等其谨遵成法严戢从人毋得肆恶妄行

十一月戊午

上谕大学士等曰穆尔赛身为大吏贪酷已极秽迹显着非用重典何以示惩且九卿会议穆尔赛事瞻顾徇庇并未详明议罪朕不行立断谁肯执法耶治天下以惩贪獎廉为要廉洁者獎一以劝衆贪婪者惩一以儆百尔等将此意传问九卿回奏

十二月甲辰刑部奏称旗人史书等辱冒顺天府府丞王维珍应将史书等枷一月鞭一百

上谕大学士等曰旗下恶棍辱骂职官如此轻处何以儆戒衆人着查康熙十八年定例具奏於是大学士等奏康熙十八年曾经九卿定议诸王及大臣仆人有干预词讼索取财物者其主知情从重议处仆人枷三月鞭一百其主不知情仆人以光棍治罪

上曰此情最为可恶着从重治罪伊主一并察议此等事甚多举首者少王维珍不顾情面举首可嘉着议叙勒

德洪奏曰其主乃康亲王杰书也

上曰朕止论事之是非不论其为何人也

康熙二十五年丙寅闰四月壬戌江宁巡抚汤斌奏苏州上方山有五通邪鬼祠应焚毁

上谕礼部直隶各省淫祠滥祀诬民惑衆俗尚甚多有关风化应行文直隶各省巡抚严察禁革违者按律治罪该管官不行察出隐匿者照例议处

康熙二十六年丁卯二月癸亥九卿议覆给事中刘楷条奏请禁止淫词小说应如所请

上曰淫词小说实能败坏风俗蛊惑人心至於僧道邪教素悖礼法其惑世诬民尤甚俱宜严行禁止

四月庚午

上谕刑部等衙门凡各省解送京城及京师解发各省人犯有解役中途凌虐及教唆犯人於沿途抢夺者甚至有将人犯拷打致死者其所犯之罪不至於死而凌虐拷打以致毙命殊为可恶尔部会同督捕衙门定议条例以闻

五月壬辰

上谕大学士等曰朕观今时之人不敦本务实轻浮奢侈者甚多汉人为甚今满官田舍俱在畿辅之地人皆知之汉官内或有自称道学粉饰名节而本乡房舍几至半城者有之或多置

田园者有之且羣会宴集流於邪僻嬉戏若不禁止则渐至於放纵或身为大臣沉湎之色形於顔面者实非人类矣着严行禁止

十月辛未

上谕大学士等曰百行莫大於孝近者汉军居父母之丧亲朋聚会呼卢饮酒毫无居丧之礼至孝服鞍辔等类所用素白皆异常华美丧礼当自尽其诚服用粗恶岂宜华美孝道如此其他又何足观又汉军外官赴任每借京债饰置行装且多带家人为伊等谋给衣食势必苛取於民以资用度亲朋债主往往在任所请托需索是官虽一人实数人为之以致唆削小民民何以堪嗣後汉军居丧违理着都统副都统严行饬禁其在外汉军官员任所有亲朋债主前往请托需索贻累小民者亦令查访指名题参

康熙二十七年戊辰十月庚戌

上谕盛京刑部侍郎吴世巴曰朕闻盛京地方光棍匪人聚集颇衆互相告讐者甚多尔往审理诸事慎毋偏向须从至公又闻盛京刑部遇讯鞫时或别部及旗下各官皆得杂至并坐干预所审之事向日京师刑部亦往往有此朕再三申饬今已肃清矣尔往其力除此弊持正以行

丁卯

上谕兵部尚书纪尔他布等曰朕闻绿旗兵饷兵丁照数得者甚少皆由不肖武弁扣剋夤缘馈送兵部夫兵所恃者饷耳若果全得自然精强今在外各弁或将饷银私侵入己又馈遗兵部是以兵不聊生以致鼓噪而总兵副将等官亦不能弹压仓皇失措此等兵将来如何可用凡事当穷根本此事根本全在兵部尔等应通行严饬

康熙二十八年己巳十一月庚申理藩院题乌斯尼哈白塔住持喇嘛罗卜臧宜宁等称伊师喇木占巴喇嘛复转生於世祈请往聚议不准行

上曰蒙古之性深信诡言但闻喇嘛胡土克图胡必尔汗不详其真伪便极诚叩头送牲畜等物以为可以获福长生至破荡家产不以为意而奸宄营利之徒诈谓能知前生事惑衆欺人网取财帛牲畜败坏佛教诸蒙古笃信喇嘛久已溺惑家家供养听其言而行者甚衆应将这些诈称胡土克图者严行禁止

康熙二十九年庚午五月辛丑

上谕刑部朕早夜孜孜勤思治理日与在廷诸臣讲求无非爱养民生恐其颠连无告以致失所若绅衿土豪倚势横行凌虐小民藐法纵恣毫无顾忌穷黎受害何所底止太常寺少卿胡简敬等一闻济恶霸占民人妻女田产诬告盜情致毙人命阖县之人遭其毒害种种恶蹟昭

然有据督抚不行举发科道漫无纠参无非畏其势力瞻徇情面今已告?审实若不严加处分立置重典何以为直隶各省不法绅衿积恶豪强之戒胡简敬等应於彼处正法治罪江苏巡抚洪之杰为地方大吏平日既不能体察纠参及经告发又不速行审治迁延徇庇殊负委任应革职着九卿詹事科道会同议奏

六月乙亥

上谕大学士等曰绅衿优免丁银原有定例其乡绅豪强诡寄滥免以致徭役不均偏累小民积弊已久今山东巡抚佛伦奏请改正厘剔具见实心任事并不瞻徇直隶各省应一体遵行九卿詹事科道会同确议具奏康熙三十三年甲戌闰五月庚辰刑部等衙门议奏太监钱文才打死民人徐二应绞监候

上曰凡太监杀人断不可宥尤宜加等治罪朕观古来太监良善者少要在人主防微杜渐慎之於始苟其始纵容姑息侵假事权迨其势既张虽欲制之亦无如何如汉之十常侍唐之北司窃弄威权甚至人主起居服食皆为所制此非一朝一夕之故由积渐使然也太监原属陰类其心性与常人不同有年已衰老而言动尚若婴儿外似谨厚中实叵测必人主英明此辈始无由弄权朕闻明代诸君将本章批答委之司礼监司礼监委之名下内监此辈素无学问不知义理委之以事其能免於舛谬耶钱文才此案尔等记之至秋审时勿令幸免

十月庚子

上谕大学士等曰朕闻奉旨遣往各省大臣官员沿途文官朝服武官介冑以迎之此皆未当於理着行禁止

康熙三十四年乙亥二月丙辰

上谕大学士等曰朕昨幸五龙亭因往视光明殿东柴厰内失火延烧处守巡官员兵丁尽皆旷悞凡诸守视之地以有关系始设官员兵丁若此怠忽将来流弊何所底止可敕八旗满洲蒙古汉军都统副都统等嗣後各於本旗官员兵丁守视处不时巡察有旷悞者当参奏则参奏当答责则答责之步军统领等巡察该管官员步兵之便其马兵守视处并令巡察至於米仓所系重要尤宜敬慎倘有疎虞守视官员兵丁必戮无赦其下八旗都统副都统等遵行毋怠

六月庚申

上谕大学士等曰兹後世职若以罪革斥其子勿准承袭令同父昆弟袭之无同父昆弟者则宜削其职其下吏部定例以闻

大清圣祖合天弘运文武睿哲恭俭寬裕孝敬诚信中和功德大成仁皇帝圣训卷二十五



# 卷二十六

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十六

严法纪二

康熙三十五年丙子二月丁未

上谕议政大臣等曰军士所齎米粮务如数携带自启行以至在途该管官员不时严查倘有减数带往者将本身及该管官员一并从重治罪有盗米粮马匹逃回及军士纵酒杀人或鬪殴伤人扎萨克蒙古等盗我军马匹军士及厮役等盗贸易蒙古马匹者俱立行正法昔时行军以厮役牧放马匹此番既派出军士守视其庸劣不堪之厮役可停其带往至於随军贸易之人固不可少若纵其贸易又至紊乱应於某营相近即令某营之夸兰大派出章京於一里外驻扎准其贸易严禁誼譁火烛并戒沽酒倘贸易人不遵法禁偷盗米粮马匹者亦即正法带往之人一并治罪军士或将米私售贸易之人或强买抢夺者定加重罪可徧行晓谕使咸知凜遵

丙辰

上谕领侍卫内大臣公福善曰古北口一路兵衆惟尔督率而行凡所过城池邨舍恐军卒抢掳当行严禁兵丁马匹最要须加意牧养朕前所示法令极明毋使有违出古北口後或有无知之徒以捕兽驰骋劳苦马匹者当严行禁止

五月丁巳

上谕行在兵部征讨莫要於法令奋勇先登者锡赏怯懦退後者议罪俱系定例岳昇龙马进良白斌等系简选任用之人今已逼近噶尔丹若遇敌交战时副将以下至兵衆人等有退怯违令者着该总兵官正法奏闻

九月己巳

上谕理藩院是役经蒙古地方官兵马驼摆站马匹关系重大尔衙门可檄外藩衆扎萨克喀尔喀扎萨克各自严禁本旗盗贼如窃取官兵马驼摆站马匹什物借交易为名而来偷盗立正军法梟首示衆该扎萨克管辖人员从重治罪着严行传谕

十月乙未

上諭內大臣等曰明日到歸化城停止圍獵歸化城商賈叢集恐仆從或行騷擾及土默特蒙古盜竊兵丁馬匹着交副都統阿迪嚴行禁止

康熙三十六年丁丑二月癸巳

上諭副都御史努赫曰爾每日親率科道官一員在輜重之後如沿途兵廝匪類有爭鬪搶奪民間財物者即行查拏指名題參

三月己未

上諭大學士等曰隨駕人員搶奪強買民物朕皆差官查拏從重治罪但恐京城後來者及離大營在一二日後至者搶奪強買民物亦未可知着曉諭經過沿途地方官員如有此等事查拏指參從重治罪其衆人車輛不得攔阻着通行傳諭

五月辛卯

上諭議政大臣等曰山西巡撫溫保居官極惡刻剝百姓不可言述前者彼自謂居官好民甚頌之欲爲之立碑今觀沿途之民无不切齒思食其肉況溫保不比他人嘗爲學士朕愛惜斯民之意不可謂不知之布政使甘度居官亦極惡今蒲州之民皆逃入山中伊等若善民豈肯逃乎倭倫往撫如不肯降即押溫保甘度至彼處立斬如此貪官若不誅戮何以懲衆着議政諸臣會奏九月己卯刑部以太監劉進朝逃出訛詐議罪奏聞

上曰劉進朝乃禁中役使之入逃出已屬可惡況又於所逃處吓詐有司宜照光棍例議罪嗣後太監有與同罪者以此爲例

康熙三十八年己卯六月辛酉

上諭大學士等曰選授雲南貴州廣西四川官員故違限期處分解任希圖另補善地其續選之員不能一時即到每致員缺久懸嗣後將此輩計月多寡革職留原任効力則不肖之徒知有處分赴任自速矣

七月戊辰朔

上諭兵部近聞直隸各省經制額兵虛冒錢糧者甚多殊干法紀嗣後須痛加省改嚴行禁止如有仍前濫行冒支扣剋者事發定行從重治罪又直隸各省自副將以下把總以上官員督撫提鎮當不時嚴察如有衰老庸劣不諳騎射之員即行題參若互相徇隱或差官察出或經引見罷斥或經該部糾參該管各官一併嚴加處分不貸

十一月丁酉

上谕大学士等曰顺天乡试所中式者童穉甚多物论腾沸大殊往昔考试系国家大典所当严飭以示儆戒御史鹿佑题参可嘉着九卿詹事科道会同将李蟠等严加议处

丁未九卿遵

旨磨勘顺天乡试中式举人试卷并议覆江南道御史鹿佑疏参考试不公一案拟将顺天正副考官李蟠姜宸英等革职

上谕大学士等曰此科考试不公已极且闻倩代之人亦复混入闱中京师何地可如此乎此案若照议完结仍不知警着将所取举人通行齐集内廷覆试如有托故不到者即行黜革其考官等处分俟覆试後具奏十二月戊辰刑部题湖广总督郭琇遵

旨查参审理茶陵州叛案郎中刚五达等恣肆横行扰害

地方俱实请

旨定罪

上谕大学士等曰刚五达陛辞朕曾谕云尔系部院保举贤能他日乃上进之人此行须从公审理断不可颠倒是非倘行止妄乱决不轻恕今肆行无忌不加重治何以惩警着将刚五达等交刑部等衙门严加议处寻刑

部等衙门遵

旨察审刚五达应拟绞监候秋後处决

上曰若辈即当正法以示警戒何待秋後也着再议

癸酉

上谕吏部凡奉差官员理宜恪慎洁已办理公务事竣即行复命庶不?委任之意嗣後如巡盐榷税审事一应差遣各官倘有沿途骚扰绕道妄行或公务已毕仍逗遛地方借端生事或将所带笔帖式拨什库等私自遣往他处督抚即指名题参以凭究治如督抚瞻徇容隐不行纠参事发一并议处尔部即遵谕行

康熙三十九年庚辰正月壬戌

上遣学士满都等往盛京审理偷创人参一案

諭之曰凡事皆有为首之人闻偷采人参者若辈皆衣食不赡之徒一切马匹粮米帐房何能自办尔等但详察源流能获其养赡此辈给发盘费马匹收揽人参之为首者则案即结矣

七月乙卯山东道御史吕琨条奏秋审罪案宜分两议具奏

上曰此事断不可行若分两议谁肯附於议斩者恶人不除则法既不行而善类何以得安朕凡遇难决之事必与诸大臣商酌行之即如昨日刑部题毆死伯父叔父之人拟即正法朕着问九卿者非谓此等人不当处斩也但其中或有他人毆死而罪归於彼亦未可知故令详议耳彼等果系情实岂可寬宥此本着发还吕琨给事中御史专任言职各以闻见入奏甚是朕此发还非阻言路之意因於事不合故发还耳可将朕旨明諭

康熙四十一年壬午二月戊辰

上行幸五台驻蹕行唐县

諭内大臣侍卫等曰前所过地方原系旗民杂处人俱熟习贸易自此以往皆系民地随从人等凡一切诸物俱宜从公市易毋得骚扰民间其令各管辖官遍行晓諭严加禁飭更令学士赖都率一二章京乘其後察之如有犯者即行参奏倘隐匿不举从重治罪

壬申吏部彙题以疾解任各官

上曰汉官告疾者既痊仍以原任部院衙门补用若满洲解任官员或因所遇之缺不佳冀得改补美缺或揣其堂官将以庸劣参处故先自引退如此任意行私可乎凡前後具呈解退者俱照汉官例补以原部院之缺着为令

四月壬戌刑部议奏毆死陈大胜之陈潮应照例留养

上曰有罪之人存留养亲必其亲原无罪犯情有可矜方为奏请陈蒂生与其子陈潮同毆陈大胜致死亦属有罪陈潮照留养例殊未允协其另议以闻

康熙四十二年癸未五月壬戌

上命领侍卫内大臣和硕额駙尚之隆等传

諭曰朕观索额图并无退悔之意背後怨尤议论国事伊之党类朕皆访知阿密达马尔图额库礼温代硕甘佟

保伊等结党议论国事威吓衆人且索额图施威恐吓举国之人尽惧索额图乎亦有不惧者即今索额图家人已将伊告发索额图能杀害乎至温代额库礼俱犯重罪流徙之人因其年

老令回京师伊等应安静以养余年乃与索额图结党议论国事妄自怨尤伊等之党俱属利口愚昧无知之徒被伊等恐吓遂极畏惧果至可杀之时索额图能杀人或被人杀俱未可料虽口称杀人被杀者谁乎至索额图之党汉官亦多朕若尽指出俱至灭族朕不嗜杀人嗣後尔等若与索额图絶交将所行之事举出尚可不然被索额图株连必如噶楚哈阿思哈被灭族之祸索额图之党阿密达额库礼温代马尔图佟保硕甘之同祖子孙在部院者俱查明革退副都统佟保不在家俟到时再传谕此旨着晓谕门上大人与衆侍卫等尔等若在索额图处行走必被索额图连累致死

癸亥

上谕刑部额库礼温代马尔图硕甘等俱系问罪充发之犯念其年老取回京师伊等至京并不善养余年与索额图结党议论国事俱交刑部锁禁不可疎放

彳侍卫海青武格马武传

谕索额图曰尔家人告尔之事留内三年朕有寛尔之意尔并无退悔之意背後仍怨尤议论国事结党妄行尔背後怨尤之言不可宣说尔心内甚明举国俱系受朕深恩之人若受恩者半不受恩者半即俱从尔矣去年皇太子在德州住时尔乘马至皇太子中门方下即此是尔应死处尔自视为何等人此处问公福善即知尔任大学士时因贪恶革退後朕复起用尔并不思念朕恩即如养犬尚知主恩若尔者极力加恩亦属无益朕差人搜查与尔行走之江潢家得书字甚多朕亦欲差人到尔家搜看但被尔连累之人甚多举国俱不得安所以中止朕若不先下手尔必先之朕亦熟思之矣朕将尔行事指出一端就可在此正法尚念尔原系大臣朕心不忍但着尔闲住又恐结党生事背後怨尤议论着交宗人府与根度一处拘禁

八月甲戌朔

上谕吏部山东一省官员平日不知重积蓄备荒灾所以一遇凶年束手无策致劳京师遣官赈济今应将山东合省官员停其陞转俟民生复苏之日再行开复此内除丁忧离任外有以老病乞休者俱令来京引见再行定夺

十月癸未

上以西巡驻蹕良乡县十三里村

谕大学士等曰见在扈从给事中满普御史顾素令其後行查有肆行抢掠者即时锁拏并将其主亦行参究至地方官员若私行禁阻民间市卖亦指名题参

康熙四十三年甲申正月戊辰

上諭大學士等曰近八旗漢軍俱圖任外吏不思在京効力或一家兄弟子孫數人俱外任者有之可着各都統察出酌調回京任用若不察出調回罪即在伊等可傳諭知之

三月己酉

上諭刑部熱審謂之慎刑夫刑在平時亦宜加慎何必因熱而始慎也如謂熱審減等於犯人有益則於原審時即以減等議之豈不更有益乎且犯人苦熱猶可而苦寒更甚熱既宜審則寒亦宜審既多此一事不肖官員遂欲延至熱審故意遲玩其停之

十一月癸卯刑部題覆朝審案件

上諭大學士等曰觀今年秋審外省罪犯議出者少京城罪犯議出者多用法豈可如是原任工部郎中費揚嘏於內外河分司之事不但侵蝕帑金凡諸弊端皆專擅而行諸大臣既不肯以此人應正法之處公同奏請反謂之情罪可矜朕今斷不寬宥凡人出身為筆帖式即思盡忠効力日後始可用為大臣費揚嘏各處差遣竟不為國家効力如留此等人將於何處用之費揚嘏着改情實

戊午

上諭大學士等曰凡人皆當立品筮仕之初即思干請於人其立意如是則他日將何所望哉倘自為筆帖式之日即有急公盡力之心何憂不至顯位或有未仕之先早已債負盈積至入官後若不賸民何以償之國家名器豈為此輩償債設乎朕於滿洲蒙古漢軍漢人視同一體善者即稱之為善若有罪一概不恕也

康熙四十四年乙酉閏四月丙午

上諭河道總督張鵬翮曰河工積弊汎官利於堤岸有事修建大工得以侵冒河帑又希圖修橋建閘興無益工程於中取利着嚴飭各官痛改前非加謹修防倘有故違定行正法以示懲戒其地方有司官員漠視河工致有貽誤者爾題參到日將地方官亦行正法河官平時須豫備物料以為不時修防之需若料物不備遇工程險要倉皇無措雖將該管官重處亦無濟矣

七月乙酉

上諭刑部凡管理兵丁將弁必平素約束軍伍禁令嚴明兵丁始克遵法紀地方無事湖廣兵丁王漢杰等糾集三百余人在城中搶掠當舖又於城外執旗蠶勒索府縣官印結該管將弁何得稱為不知伊等所司何事況因此案已將總督提督等俱行治罪今總督喻成龍不將各營武弁讞審明白輒以并不知情徇庇具題殊屬不合喻成龍着該部嚴加議處此案遣郎中吳進泰前往究審具奏

八月甲午

上谕大学士等曰向来满洲无犯法杀人之事康熙初年一年之内最多不过一二件而已自平吴三桂以来满洲杀人之事渐多五年前至每月七八件朕谓若不力禁断不知改自定为新例又将都统副都统佐领官一并治罪是以去年仅有三件今年仅有一件由是观之则知法严而人命之事自少矣

康熙四十五年丙戌二月壬辰刑部议覆差往湖广郎中吴进泰等察审提标兵丁抢掠当舖一案

上曰此风不可长也湖广兵丁原皆良善後因武臣不能约束流弊至此岂可不严加惩治且地方官亦不将此案审明延捱推诿朦朧具奏殊为不合着将兵丁首犯王贵等依拟立斩从犯王汉杰等俱依拟应斩监候秋後处决施世纶董昭祚董廷恩郎廷栋等俱着革职提督俞益谟居官好且在事发之後到任着降二级从宽留任

十月丁酉

上谕大学士等曰九卿议土司事但欲使两造平息湖广总督石文晟原参田舜年建造宫殿行凶作恶是以羈留於武昌府今田舜年已故石文晟又具奏欲息其事如土司等果抗拒不法则当发兵征剿土司若无罪则当反坐原参之人朕意以二格所奏为是此事不便令督抚提督会同审理当再特遣大臣前往察看着以此谕九卿

丁未

上命大学士席哈纳吏部侍郎张廷枢兵部侍郎萧永藻

等往审土司田舜年事

谕之曰田舜年一事关系土司竝於地方总督提督亦有关系若不究其本末辨其是非则衆心不服尔等到彼可与前次遣往都御史梅鋐学士二格详加研审如总督理亏则罪坐总督土司理亏则罪坐土司惟公平则人心自服尔等须出示晓谕衆土司若彼果有冤枉许其陈诉尔等收呈详审穷诘根柢如无冤枉而钦差大臣至彼地提人不解反固守关隘不纳公差则特欲反耳果其如此竟发荆州大兵立剿之不可持两端苟且结案也总督参田舜年事极其狠毒今又欲草草完结何以服人九卿并不据大体立议首鼠两端愈非理矣尔等前往若不能辨明此事则於尔等声名亦大有关系也

康熙四十七年戊子正月庚午

上谕大学士等曰闻内地之米贩往外洋者甚多洋船行走俱有一定之路当严守上海乍浦

及南通州等处海口如查获私贩之米姑免治罪将米入官则贩米出洋者自少矣

闰三月甲午

上谕兵部鸟枪等火器祇当用於蒐猎行阵之间此外一应旗下民间不得擅用着严行禁止

七月丁丑

上谕刑部凡减等流徙者俱系死罪豁免之人理当在流所安静守分若仍不改过逃回作恶者情罪殊为可恶嗣後流所逃回不犯罪者仍照原定例完结外逃回後又复犯罪不论罪之轻重并将旧案查出立时正法庶匪类知所警戒着为令

康熙五十年辛卯八月辛酉

上谕大学士等曰太平之时不宜屡赦罪犯执法之人若将不应宥者宥之则奸徒逞欲怙恶不悛矣

康熙五十一年壬辰五月戊申刑部覆四川陕西总督殷泰疏参纵容游民连直等地方文武官员应分别议处

上谕大学士等曰连直等俱系行医小业为生各处餬口地方官员着从寬免其查参朕前谕各省督抚查拏越省游行者盖谓奸恶之徒有为僧道而行者亦有市药卖卦而行者若不防微杜渐严行禁止令其任意行走结成党类渐至人多势盛即行刼掠有害地方或致难图凡多费钱粮豢养兵丁者特欲剪除恶乱之辈耳明代李自成即其验也不豫为之计可乎

康熙五十二年癸巳正月癸卯

上谕大学士等曰乡会试皆抡才大典关系紧要今见考试官不遴取人才贪图贿赂夤缘作弊者渐多此等人若不立置重典断乎不可正考官系考场统领之员副考官同考官等通同作弊严加觉察是其专责而诿为不知情可乎刑部议江南科场处分未当应另行严议

七月丁巳

上谕大学士等曰总督赫寿因为广东省运米所奏疏内以战船今系大修之年俱各修理不堪应用请雇民船运米等语沿海各省设立战船者特为防护地方裨益民生以备急需也今据称战船俱不堪用请雇民船可知战船少而民间贸易之鸟船多虽有修船之名徒致耗费钱粮况修一战船需用之钱粮甚多观此将所修战船或卖与民人或雇与民人贸易并将民人破坏船只顶补充数捏称修理亦未可定倘有用处将如之何此习相沿成风应用之时恐必致迟悞着问九卿令会议以闻



十月庚辰

上谕大学士等曰御史周祚显条奏百姓保留地方官及督抚保留官员请行禁止甚是顷口外博洛和屯地方有二百余民叩阍保留莱州知府朕未曾准後又至热河叩阍只剩五六十人朕疑之因令拏审皆系雇覓见居口外之山东民知府家人及代写呈之人相随指使且百姓纠党保留地方官若准留任则官必为民挟制实非美事令民不畏官官不畏其上司此处关系匪轻理宜留心或以己居官清洁不畏上司者有之清官如此而贪官被参之後亦谓我不能迎合上司所以被参学清官之语以自饰朱子畏大人注云大人理所当畏国家有上下贵贱之体虽清官可不畏上司乎

是日九卿等遵

旨议覆八旗出征旧人有将掳获之人为养子分产开户者传至子孙辈或行勒索称系祖父家奴混行控告殊违祖父初心嗣後有子孙控告祖父时为养子分产年久者永行禁止有恶劣不肖之徒不遵法度捏造他故控告者该部指名题参有职者革职无职者枷号两个月鞭一百如有勒索款项审实照讹诈律处分着为定例

上曰此议尚有未尽处如以家人为养子分居开户若日後原主子孙或极庸懦或至絶嗣伊等称系近族弟兄反肆欺凌争告家产者亦当入议禁止

康熙五十三年甲午八月甲午

上谕兵部贩马人等往往暗结将军总督巡抚提督总兵官子弟将疲惫不堪之马发与不肖道府营弁索取高价代为压派甚至无驿站之州县及管步兵之头目一概滥派以致所属官员勉强收受负累甚多着行令直隶各省将军等严查禁止

康熙五十五年丙申七月戊寅

上谕领侍卫内大臣等曰本朝旧制王大臣及衆执事人等凡系御用之物各极谨慎不致迟悞今渐染汉人习气惟尚虚浮銮仪卫迟悞御轿之事无大关系但该管官於御用之物怠忽从事情殊可恶朕今将纳音图等拏问观鄂伦岱之意大以为不然朕洞察其情必欲惩治以彰国法特谕尔等知之

九月癸酉江南苏松水师总兵官胡骏奏臣不谙水性请调极边効力部议行文该总督将胡骏果否谙练水性之处查明之日再议

上谕大学士等曰朕闻苏松兵丁习俗甚恶自胡骏到任因其约束严峻兵丁几起衅端总督巡抚提督等欲潜行消弭故未奏闻至於给饷俱系知县等微员不能弹压兵丁胡骏征剿海岛勤劳素着今为兵丁恶习所迫故尔奏请改调部臣未悉此情议将胡骏果否谙练水性之

处行查该督误矣倘因胡骏不谙水性另行改调则兵丁恶习愈长此断不可况崇明远在海岛民稠地广应将江南事简地方道员移驻於彼以资弹压着九卿议奏

康熙五十六年丁酉正月乙丑

上谕内阁学士星戡特等曰尔等俱曾出江南海差海船一年造若干应令报明监督於出洋时将从前报过造船人名与船只字号逐一查对方不致隐匿凡大船指称贸易领票出洋每另泊一处用小船於各处偷买米石载入大船不知运往何所乍浦地方有堤一应货物必於此递运他处大船不能出入惟上海崇明等口甚属紧要尔等将此传谕九卿着议奏

康熙五十七年戊戌七月甲戌

上谕大学士等曰河南南阳总兵官高成标下兵丁因查拏赌博人等至知府署内争鬪将知府沈渊带至教场看守三日巡抚业已奏闻御史杨汝谷一闻即行题参甚是闻此等人俱系诡冒营兵夥同二三百人诈扰百姓不独河南一省他省俱有之其行文各省督抚提镇伊等地方有此等并不食粮诡冒营兵合夥妄行不法之人严查据实奏闻其作何禁约治罪之处着九卿议奏

康熙五十九年庚子十一月丙子

上谕大学士等曰朕见九卿荐举之人有初次列名至第二次又不列名者是必因缺有美恶任意趋避也嗣後一次荐举之人即当每次荐举凡某官荐举某人着吏部注册以备查核

康熙六十年辛丑六月甲辰

上谕大学士等曰闻得米从海口出海者甚多江南海口所出之米尚少湖广江西等处米尽到浙江乍浦地方出海虽经禁约不能尽止福建地方正在需米之时又派浙江兵二千往闽驻防恐米价益贵米到乍浦价值必贱交与浙江巡抚提督严禁私卖不许出海动帑买米三万石豫备海船装载提督派官兵护送押运从海运至厦门收贮自福宁州直至福州府不过十数日之内即可达厦门斯事甚属紧要嗣後出海米石交与江南浙江总督巡抚提督总兵官严行禁止其福建贩卖米石不必禁止尔等将此旨交九卿閱过速行

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十六

## 卷二十七

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十七

理财

康熙七年戊申三月辛酉

上谕吏部户部都察院盐课关系紧要必得廉干之员差遣乃能严缉私贩惠恤商民疏通引法以裕国课近见课额未增商民又鲜裨益之处以後不必专差监察御史应将廉干之员选择兼差尔等酌量定议以闻

康熙十八年己未九月乙巳

上谕大学士等曰今闻钱法渐弛鼓铸收铜等项滋生弊端以致制钱日少价值腾贵着户部工部都察院堂官同诣钱局每铸钱一文必重一钱应作何厘剔弊端俾制钱充裕永可遵行着彻底确察逐一定议具奏至於部院衙门各处所有废铜器皿毁坏铜钟及废红衣大小铜礮并直隶各省所存废红衣大小铜礮着尽行确察解部鼓铸

康熙二十三年甲子三月癸酉

上谕大学士等曰户部管理各省钱粮一时难以清楚地方督抚将在库银两那移私用虽云补垫及至题奏时每多朦混销算部内无凭稽察百姓深受其害即今原任广西巡抚郝浴侵欺银至十九万两由此观之天下类此者不少朕日夜思维欲清查各省钱粮访之外任官员及督抚等皆云清出存留钱粮则别项钱粮自必清楚朕思此事一行虽在外督抚司道不无被罪实於国家有益果钱粮充足更可为加恩百姓之用今九卿曾为外官者多知之必详尔等会同详议具奏

康熙二十四年乙丑二月辛亥

上谕大学士等曰财赋出於闾阎凡查核钱粮必彻底澄清不致以完作欠额外科派方於小民实有利益朕於正供所入毫无濫用正以爱养物力使国有三年九年之积纵遇水旱民生亦不致苦累朕所以留意清核正欲加惠元元也

三月辛酉朔

上谕大学士等曰光禄寺估计价值等项头绪繁多各物俱照时价须详察估计使公私俱便厘剔诸弊逐一一定为条款以便永久遵行则国课不致妄费户部储有余财凡遇有旱涝可以酌量赈济蠲免无所顾虑民间不致困苦大有裨益

庚午

上谕户部赋役全书将永为定例纂修官员必尽心详慎务求切当编纂成书朕思土田一亩之外亦有奇零不足亩者若以毫忽俱改为厘虽目下易於办理诚恐有累小民尔等其详议之

六月丁巳

上谕兵部侍郎佛伦等曰钱粮所关甚重宜详加厘剔以除虚冒滥支之弊近见上驷院以假印诳领太常寺亦以假印取丝见今发觉者虽止此其未发觉者谓之无有可乎此皆支給时不行详察怠玩疎虞之所致也嗣後凡关系支用钱粮事务必告之该部院堂官稽核得实用印文支取其四五十两以下者遣笔帖式往领若踰此数则遣司官往领其给与时亦详加稽核告之该部院堂官然後与之可也如此於职事亦无所旷废告於该堂官及司员亲往领取亦岂难行之事尔等可传谕户部

十一月丁巳朔吏科给事中杨周宪奏称纂修简明赋役全书不便於民请停止

上谕大学士等曰杨周宪奏称纂修简明赋役全书将银之尾数收入厘内粮之尾数收入勺内所增银米豆麦为数无多在部议所收者乃州县之尾数州县所收者则各图各里各甲之尾数殊为繁多不无滋弊且岁造册籍书吏需索恐致扰民伊言似是不知户部初题时是何意见果能永久无弊否此事关系国计民生须求确当方可永久遵行勿以一人以为可而辄行勿以一人以为不可而辄止宜虚心公议从容确定务期可垂久远倘急遽议行不过数年又议更改岂可为法尔等再公同确议具奏

康熙二十五年丙寅二月丙申大学士等奏称部定铜筋价值采买不敷其各差造册四季报部不如改令差满之日一并彙送

上曰国家设关榷税原以阜财利用恤商裕民必徵输无弊出入有经庶百物通流民生饶裕近来各监督不恪遵定例任意徵收官役通同恣行苛虐托言办铜价值浮多四季解册需费将商人亲填部册隐匿更改既以充肥私橐更图溢额议叙重困商民无裨国计种种情弊不可枚举朕思商民皆我赤子何忍使之苦累今欲除害去弊必须易辙改弦所有见行例内收税溢额者即陞加级纪录应行停止其采办铜筋定价不敷作何酌议增加至四季达部册籍应俟差满一次彙报嗣後务令各差洁已奉公实心厘剔以副朕体下恤商至意

六月丁巳

上命户部郎中吴什巴督理闽海税务

谕之曰凡收海税官员因系创行设课希图盈溢将出入商民船只任意加徵以致病商累民亦未可定着严加申饬务令恪遵定例从公徵收无滥无苛以副朕轸恤商民至意

康熙二十六年丁卯二月壬申户部奏浒墅关监督桑格任内溢额银两

上曰设立榷关原欲稽查奸宄照额徵收以通商贾桑格徵收额课乃私封便民桥以致扰害商民着该衙门严加议处关差官员理应洁已奉公照例徵收嗣後有不肖官员希图肥己种种强勒额外横徵致害商民亦未可定尔部通行严饬

五月己卯

上谕大学士等曰各项采买估计价值浮冒欺饰者甚多是以令其核减今所减者太过又凡修造工程其估计在前若照新例销算则物料匠役工价核减太过必至苦累其前此修造已完者着仍照原估计销算至於各项物料所值之价俱访时价采买估计销算

康熙二十八年己巳闰三月丁未

上谕户部国家设关榷税原以通商裕课利益民生非务取盈致滋纷扰朕巡行地方轸恤民隐谕谏利弊有应兴革者即见诸施行近闻江浙闽广四省海关於大洋兴贩商船遵照则例徵取额课原未累民但将沿海地方采捕鱼鰕及贸易小船槩行徵税小民不便今应作何徵收俾商民均益着九卿詹事科道会同确议以闻

康熙三十六年丁丑十一月丙戌

上谕户部朕顷谒

陵时见用小钱者甚衆所换之数亦多旧钱及两局之钱使用者少此实非益民之事今岁田禾大有而米价仍贵询之土人皆云钱贱所以米贵又问小钱从何而来皆云由山东来者多由此观之自古以钱法为难诚然先年科尔坤佛伦管钱法时题请将钱式改小朕每谓钱改小易改大难钱价若贱则诸物腾贵後因题请再三方始准行今果如朕言尔等即同九卿将钱法如何方能尽善确议具奏

康熙三十七年戊寅四月壬戌

上谕大学士等曰广东海关收税人员搜检商船货物槩行徵税以致商船稀少关税缺额且海船亦有自外国来者如此琐屑甚觉失体着减广东海关额税银三万二百八十五两着为令

康熙三十九年庚辰九月丙午工部奏销杂项修理钱粮

上曰一月内杂项修理即用银至三四万两殊觉浮多明代宫中一日用万金有余今朕交内务府总管凡一应所用之银一月止六七百两并合一应赏赐诸物亦不过千金从前光禄寺一年所用银两亦甚浮多朕节减大半工部情弊甚多自後凡有修理之处将司官笔帖式俱奏请派出每月支用钱粮分晰细数造册具奏若三年内有塌坏者着赔修如此则工程坚固而钱粮亦不至妄费矣

康熙四十五年丙戌四月己亥大学士等会同户部议今钱价甚贱不便於民奉有

谕旨应暂动支户部库银十万两由户部差官会同五城

御史收买旧制钱俟钱价既长奏闻

上曰钱价贱者皆私钱多之故也果欲力禁私钱何难之有明代尚能行纸钞岂有不能禁私钱之理但与其严行禁止毋宁和平处置在京收买准如尔等所议至天津临清地方亦当遣贤能官各一员即支该地方饷银各一万两收买专差侍郎穆旦督买视钱价贵後不时奏闻又闻山陕两省贩去制钱甚多着行文山陕直隶督抚查察紧要关口严令擒拏如擒获时将贩运之人从重治罪其钱入官

七月辛酉户部侍郎穆旦遵

旨回奏差官齎银收买制钱天津临清地方钱价已长但五城民人行用之钱搀和小钱者尚多

上谕大学士等曰查拏小钱乃五城提督府尹专司之事查拏疎忽是以仍用小钱若不将伊等治罪则弊将不止着将五城官员提督府尹交都察院严加议处

十月辛亥

上谕大学士等曰山东长山县周村一带俱开炉私铸巡抚赵世显不禁不捕乃奏请鼓铸大钱若不禁私钱而铸大钱则大钱重小钱轻小民必思射利毁大钱而铸小钱是大不利於地方矣顷差侍郎恩丕等带德州兵四十名驰驿往长山县周村等处捕铸私钱之人已谕伊等於拏获之後竝私铸之炉带往赵世显处示之问伊地方见铸私钱不禁不捕又欲请铸大钱何故观赵世显更将何辞以对外省督抚孰贤孰否朕俱知之清浊断不能掩也

十一月己巳

上谕大学士等曰因山东私铸小钱故特差侍郎恩丕等缉拏今既禁私钱又不收取则用私

钱者无日可止矣朕意欲令来年徵收山东钱粮其银一两折钱二千俟钱尽时照二千钱之数折收诸样铜器则不出一年私钱自尽矣彼地官员不能缉拏私铸俱系有罪之人即将所收钱及铜交付伊等运至京城以赎前罪运到之时即着增炉作速鼓铸制钱尔等可与九卿詹事科道会同详核议奏

康熙四十七年戊子闰三月己丑

上谕大学士等曰朕闻湖广襄阳地方鼓铸私钱粮船装载至京各处售卖此事须清其本源着大理寺卿塔进泰速往会同该督抚严察具奏并檄总漕将楚省粮船装载私钱偷卖者严行查拏

康熙四十八年己丑十一月丙子

上谕大学士等曰适科臣郝林条奏各省钱粮亏空郝林但知州县钱粮有亏空之弊而所以亏空之根原未之

知也凡言亏空者或为官吏侵蚀或为馈送上官此固事所时有然地方有清正之督抚而所属官员亏空更多则又何说朕听政日久历事甚多於各州县亏空根原知之最悉从前各省钱粮除地丁正项外杂项钱粮不解京者尚多自三逆变乱以後军兴浩繁遂将一切存留项款尽数解部其留地方者惟俸工等项必不可省之经费又经节次裁减为数甚少此外则一丝一粒无不陆续解送京师虽有尾欠部中亦必令起解州县有司无纖毫余剩可以动支因而有那移正项之事此乃亏空之大根原也再如正项钱粮二千两徵收未完五百两者按分数议处其例甚轻若因公那用五百两则处分甚重今但责令赔偿足额则那移出纳还充官用其罪似乎可寬不必深究凡事不可深究者甚多即如州县一分火耗亦法所不应取寻常交际一二十金亦法所不应受若尽以此法一槩绳人则人皆获罪无所措手足矣且如户部库中钱粮历年存积数极难清前此库贮一二千万时会令部中逐案盘查转多二十余万即各仓粮米亦历年堆积陈陈相因赢余不少不肖官役侵盗银米未尝无人若行盘查细微不必深究诸事大抵如此见在户部库银存贮五千余万两时当承平无军旅之费又无土木工程朕每年经费极其节省此存库银两竝无别用去年蠲免钱粮至八百余万两而所存尚多因思从前恐内帑不足故将外省钱粮尽收入户部以今观之未为尽善天下财赋止有此数在内既赢则在外必绌凡事须豫为之备若各省库中酌留帑银似於地方有济倘在外各省一旦仓卒需用反从京师解出得无有缓不及事之虑此亦当於无事之时从长商?者也

康熙五十三年甲午正月癸亥户部题为禁用小钱请再展限三年

上曰尔等所见甚善自古钱法未有如本朝流行之广者如宋时钱至元末尚有元时钱至明末亦尚有惟本朝不但顺治钱於今已少即康熙初年之钱亦少前者湖广总督额伦特奏湖广一省小钱甚多若将大钱二百万贯运去收买小钱则小钱可尽矣朕谕尔但知一省之事未知天下之事以二百万贯钱运至湖广能保途闲无不测之事乎伊愕然奏称上谕甚是臣

实意料不及总之钱法必期便民若不计便民而但期法之必行严加禁止亦有何益凡事必酌量权变不失其宜方有济耳

七月己未

上谕大学士等曰朕理事年久洞悉钱法钱价随时不同铜价贵即毁小钱作铜卖铜价贱即盗铸小钱用小钱则私铸之人有益用大钱则私铸之人无利然小钱又不可禁今大小钱兼用於民甚便钱法流行无如我朝南至云南贵州北至蒙古皆用制钱从古所未有禁小钱甚易但於民无益耳治天下当宽裕仁慈以因人性不可拂逆即如满洲蒙古各方之人饮食日用其性各殊必欲一之亦断不可行也

九月乙丑

上谕户部临清关钱粮每至缺额皆由地方积棍串通作弊所致不心派遣监督着交该巡抚收税

康熙五十四年乙未七月壬寅户部题鼓铸铜筋请仍交商人采买

上谕大学士等曰商人采买铜筋前已令停止今复交商人采买必致积累拖欠无了期矣已经料理完结之事岂得再有纷更今各关差官员更换将毕应将铜筋交与各关差官员速行采买不可有悞鼓铸着再议具奏康熙五十五年丙申七月壬午户部题请更换凤阳关监督

上谕大学士等曰各关监督所欠钱粮甚多未派之先俱愿前往及到任之後额税必缺此皆多带人役徵收过刻之故昔南新关有一监督问巡抚王度昭钱粮如何不致缺额王度昭告以从宽徵收断不欠缺後果如其所言凤阳关着交与该巡抚徵收余缺俟朕另派康熙五十六年丁酉三月甲子户部议覆长芦巡盐御史田文镜疏请山东所裁盐引补足办课应准行

上谕大学士等曰盐务朕所深悉加引虽可增课然於商人无益如两广盐课累年亏空至一百八十余万两该部反置之不问殊觉失宜办理盐务必得廉能素着实心办事之人庶正课不至有亏商人亦不受累着问九卿具奏

六月己亥大学士九卿等议覆民间私毁小制钱作铜变卖当严行禁止

上曰毁壞制钱原有明禁特因铜少价昂部内铸钱不敷采买废铜以致小民射利毁小制钱作废铜变卖朕办事五十余年屡次更定钱法皆视民之形势从未严行禁止销毁小制钱亦屡为宽限前李光地请将小制钱严禁朕曾下旨断不能行伊後知其不可始以朕所见为是总督额伦特请於湖广省发大制钱二百万串通用将小制钱销毁朕以不可之故分晰下旨伊始晓然小制钱私毁如何禁止之处九卿詹事科道会同确议具奏



康熙五十八年己亥三月壬辰

上谕大学士等曰户部见今采买器皿旧铜兹工部又行采买京城焉有如许器皿旧铜乎采买至不得之时不肖之徒乘机射利必致将制钱转买销毁钱则钱价必长甚於民生无益且伊等局内每月铸钱即将伊匠役工钱作为采买铜筋所铸之钱交部亦未可定此事不无情弊尔等详问九卿具奏

康熙六十一年壬寅九月戊子

上谕大学士等曰朕抚御寰区时以生民为念凡各省将军督抚提镇差遣进摺之人及从外省来者必询问雨阳收获与米粮物价今年五月间因京师钱价甚贵故将应给兵丁月饷银钱兼发至今钱价尚未得平昔年

因钱价贵管理钱法侍郎陈廷敬阿兰泰佛伦马世济等条奏奸宄图利毁钱作铜以致钱价腾贵如将制钱铸重一钱则钱价即平於民甚便九卿照陈廷敬等所奏议覆准铸小钱朕遲至数月未肯准行是时科尔坤佛伦屡奏将制钱铸小甚有裨益始从其请迨後私铸甚多朕以制钱仍应照旧铸大者为善故特降谕旨而九卿请鼓铸大钱将小钱锁毁朕念小钱行之已久今又专行大钱未知於民有无利益暂令大小兼用试行三年一次奏闻於是大小兼行自後钱价竝未见增於民亦甚便利此皆朕所理之事也再从前商人办买铜筋价值尚平自赵申乔奏请交八省督抚采买遂致遲悞部臣将遲悞官题参朕以采办铜筋改交八省初行之始若将违限官治罪似属冤抑故暂行寬恕其後铜筋虽陆续解送而不能全到有悞鼓铸矣铜筋少则鼓铸悞鼓铸悞则钱价自贵凡事不可执一须随时制宜鼓铸一事从前屡经更改今钱价何故骤贵如何使之得平交九卿詹事科道会同确议具奏可否鼓铸小制钱与大制钱兼用其一并议之

大清圣祖合天弘运文武睿哲?俭寬裕孝敬诚信中和功德大成仁皇帝圣训卷二十七

## 卷二十八

钦定四库全书

大清圣祖合天弘运文武睿哲?俭宽裕孝敬诚信中和功德大成仁皇帝圣训卷二十八

慎刑一

康熙二年癸卯正月壬午

上谕兵部凡查解逃人有主认识始应照例拟罪今见灵寿县所解逃人李大增督捕传拨什库七人到部俱不认识即李大增自供竝地方十家长俱云竝未投充满洲李大增明系民人督捕不行审明即议李大增等入官李九山等流徙恐属冤枉且陈氏等七人何以尽毙於狱尔部即将该县典史杨煦快役高应正温起家并出首李大增之高万臣作速差人提取到部请旨定夺十一月乙丑朔刑部题覆山东总督祖泽溥审鞫原任按察使宋琬等通同于七谋反一案两议上请一拟极典一拟流徙将原审总督祖泽溥议处

上曰据审宋琬等原无通贼情节干证唐进夏吴八等亦坚称乌有叛逆重罪理应详审情实即应正法如虚即应免罪尔部将无确据之事悬揣定拟两议俱属不合宋琬等着免罪总督祖泽溥亦免议处

十二月辛酉刑部以岁终彙报病故监犯

上曰据奏监犯物故者甚多人命关系重大罪不至死者久淹狱中管狱官役不与犯人饮食饿毙亦不可知狱官狱卒如此疎忽殊为不合着严加申饬

康熙三年甲辰十二月壬午兵部督捕左侍郎马希纳等奏请嗣後首告逃人之人带有逃人之主同赴具告者准咨该督抚严查解部若竝无逃人取地方官保结咨报免提案内牵连之人质审

上曰不将被告干证提来质审则逃人获者稀少若提来质审不但牵连人多且往来提解甚苦以後有首告逃人在某处某家者将首告之人拏送地方官照发去口供止将窝隐之人令出质问若无逃人而挟讐控告或牵引妄扳将谎告之人加等治罪

康熙四年乙巳二月癸酉

上谕刑部向来流徙人犯定例有止应将本身流徙者有应并将妻子流徙者後因夫妻不应拆离故凡应流徙人犯将伊妻子一并发遣原欲令其夫妻不致拆离一同完聚其妻子本系

无罪如本犯已死仍将妻子?遣未合以後除反叛重案内应连坐者仍照前旨定例遵行外其余凡犯贓等罪应流徙人犯如本犯已死妻子俱免流徙尔部即遵谕行

康熙八年己酉五月癸巳朔

上谕刑部凡行幸之处有叩阍者若不申明事之虚实遽照冲突仪仗律则此内或有冤枉亦未可定以後着申明所告之事虚者责四十板免其充军

六月癸酉

上谕刑部直隶各省罪囚旧遣恤刑官审录今恤刑罢遣遇热审时有非实犯死罪者宜具题减等如在京法司例尔部通行直隶各省永着为令

康熙九年庚戌二月壬申

上谕刑部盗案内论死者甚多其为诬引株连亦或有之宜加详勘至於夹棍乃惨痛之刑必不得已而後用其慎之毋忽

六月丙申

上谕刑部近览章奏罪犯监禁逾限不行速审以致毙狱者甚多夫各犯自有应得之罪未死於法先死於狱殊非慎刑之意朕心深为不忍嗣後逾期不结监毙几人以上者着严议处分定例

己酉

上谕刑部今年虽经颁诏将重犯赦免但时值暑热天气亢旱牢狱重犯内有可矜疑者亦未可知着图海杜立德等前赴刑部会同将监内重犯确审酌议具奏

康熙十年辛亥四月丙戌

上谕刑部等衙门迩来天气亢旱不雨或因刑狱淹禁中有冤抑亦未可知尔等将见禁人犯详加清理如有可矜疑者照例减等发落其见审人犯亦速为审理应减等者即与减等应释放者即行释放务祈狱无冤滞以迓

天和

康熙十一年壬子六月己亥

上谕刑部刑狱重地人命攸关天时炎暑急宜清理虽热审见有定例但已结大案中监禁诸犯或有无知而罹法网小过而?重辟者株连无辜久淹羁禁朕心深为恻然兹特遣大学士图海等同三法司详加审鞫凡有罪可矜疑者即为察明列奏务使情法允协有枉必伸以副朕钦恤刑狱至意

闰七月丁亥

上谕刑部设立刑法原以戢奸禁暴必事情重大方可用刑严讯近见内外问刑衙门尝有滥用夹棍致毙人命者朕心殊为不忍嗣後审问事情尔等务加详慎勿得轻听问官不分轻重动辄夹讯希图草率结案仍将审事官员严加申饬不时稽察其有任意滥刑者即指实题参务使重刑不得滥及无辜以副朕钦恤民命至意如有不应夹讯之人擅用夹讯及罪不至死而夹讯至死者作何治罪尔部会同吏部定议以闻

十月辛亥刑部议覆江苏巡抚马祐疏言吴淞子等行劫杀人情实拟斩在狱相继病故应无庸议

上曰人命关系重大此案因监禁日久以致瘐毙多人殊非钦恤之意嗣後限内虽取口供不早题结致监毙几人以上者作何处分其一并再议

康熙十二年癸丑十一月丙寅朔

上谕刑部自古帝王钦恤民命务期狱无枉纵讞决明允以成刑措之治朕每於秋决重犯特为详慎惟恐一夫有冤以伤和气向来期审之例先期进呈招册然後九卿科道会审覆奏完结乃各省秋审奏本内止有节略观览未能明晰又有秋审後续到者不及入覆奏案内以致留俟来年殊为不合以後各省秋审应令照在京朝审例豫期造册进呈亦着九卿科道会同覆核奏请定夺其造进呈招册及奉旨结案行咨俱应限定日期尔部一并详议定例具奏

康熙十四年乙卯五月乙亥

上谕刑部迺者天气炎亢农事堪忧虽?诚祈祷尚稽雨泽朕念切民瘼夙夜焦劳或因刑狱淹滞中有冤枉致干

天和亦未可知特遣索额图等会同三法司将已结重案详加审鞫如有罪可矜疑者即与察明事由开列奏闻务期情法允协有枉必伸以副朕钦恤刑狱至意

十一月辛丑

上谕刑部尚书艾元徵等曰罪人久系朕心不忍今时严冬应速行审结

康熙十六年丁巳七月壬辰

上谕刑部秋审事关人命直隶各省重案着仍令定限送京师覆核如旧制

康熙十八年己未三月己未刑部等衙门议覆御史黄斐疏言杀人羣盗中有同行为盗而非手刃人者宜许其自首减罪因具两议上请一照律勿听自首一如斐请

上曰同行为盗虽未手刃人若听其自首减罪恐有凶徒怀仇报怨投入羣盗令其党杀人而後自首或亲自手刃卸罪逸贼俱未可知应从依律论罪之议

四月戊辰

上谕刑部今已入夏亢阳不雨耕种愆期民生何赖或内外问刑衙门有无知而罹法网小过而重辟株连无辜淹禁日久刑狱重地人命攸关审拟未当有干

天和朕每思及此深用警惕兹特遣索额图明珠杜立德等会同三法司将已结大案见在监禁者逐一详加审理务期明允无使冤滞其在外直隶各省监候重犯应遣三法司满汉贤能司官前往察审凡罪可矜疑者会同该抚臬司详开情由具奏俾无枉无纵以副朕慎刑爱民至意

壬午

上遣刑部郎中索尔孙等往直隶各省察审刑狱谕之曰朕因天时久旱恐外省罪犯中或有冤抑特选尔等前往察审务须体朕矜恤庶狱之意勿徇一己私见颠倒是非仍宜兼程遄往作速清结倘或迟延时日恐无赖之徒借端生事造作虚词妄行评讼反为良民之累且尔等审理当否朕无不洞悉各宜慎之

康熙十九年庚申四月戊辰

上谕讲官等曰律与例不容偏废律有正条自应从律若无正条非比例何以定罪总之用律用例俱在得人也

癸酉

上谕刑部国家设立法制原以禁暴止奸安全良善故律例繁简因时制宜总期合於古帝王钦恤民命之意向因人心滋伪轻视法网及强暴之徒凌虐小民故於定律之外复严设条例俾其畏而知警免罹刑辟乃近来犯法者多而奸宄未见衰止人命关系重大朕心深用惻然其定律之外所有条例如罪不至死而新例议死或情罪原轻而新例过严者应去应存着九卿詹事科道会同详加酌定确议具奏

康熙二十年辛酉正月辛巳

上谕刑部等衙门帝王以德化民以刑弼教莫不敬慎庶狱刑期无刑故讞决之司所关最重必听断明允拟议持平庶几民无冤抑可几刑措之风近览法司章奏议决重犯甚多愚民无知自?法网或为教化未敷或为饥寒所迫以致习俗日偷愍不畏死每念及此深为悯恻在外督抚以下问刑各官审理重案有律例未谙定拟失当草率完结者有胶执成见改窜供招深文罗织者有偏私索诈受嘱徇情顛倒是非者有一於此民枉何由得伸以後着严加申飭内外大小问刑衙门洗心涤虑持廉秉公务期原情準法协於至当不得故纵市恩亦不得苛刻失入痛改积习加意祥刑以副朕尚德好生钦恤民命至意

五月甲戌

上谕刑部六月节若在五月内即以交节日停刑若六月後方交六月节即以六月初一日停刑至立秋虽在六月内必俟交过七月初一日方令行刑

八月丁酉

上谕刑部凡重案悉归尔部拟罪关系最要早完一日牵连者得早安一日如遇斋戒不能审结犯人拘系日久甚苦亦应於斋戒前速行完结再犯人各有应得之罪今闻尔部枷孔大小不一板有厚薄贿嘱者板薄而孔大否则板厚而孔小所带项鎖亦有轻重又闻尔部发在各衙门罪妇辄为门军污秽恐吓索诈分外苛扰此等情弊尔等宜亲行严察禁止

十月丙午理藩院题盗马罪犯阿毕大等五人应立决家产妻子请给事主

上曰朕念人命关系重大每於无可寬貸之中示以法外得生之路书所谓罪疑惟轻也阿毕大等家产妻子既给失马之人若本犯免死给与为奴则失马者得人役使於法未为不当嗣後着为定例

康熙二十一年壬戌五月壬子

上谕大学士等曰流徙宁古塔乌喇人犯朕向来未悉其苦今谒

陵至彼目击方知此辈既无房屋栖身又无资力耕种复重困於差徭况南人脆弱来此苦寒之地风气凜冽必至颠踣沟壑远离乡土音信不通殊可悯恻虽若辈罪由自作然发辽阳诸处安置亦足以蔽其辜矣彼地尚有田土可以资生室庐可以安处且此等罪人虽在乌喇等处亦无用也

丙辰

上谕刑部顷以逆寇歼灭海宇荡平朕躬诣盛京展谒永陵

福陵

昭陵以告成功因而巡行边塞咨询民间疾苦东至乌喇地方见其风气严寒由内地发遣安插人犯水土不习难以资生念此辈虽干宪典但既经免死原欲令其生全若仍投畀穷荒终归蹈毙殊非法外宽宥之初念朕心深为不忍以後免死减等人犯俱着发往尚阳堡安插其应发尚阳人犯改发辽阳安插至於反叛案内应流人犯仍发乌喇地方令其当差不必与新披甲之人为奴以昭朕轸恤民隐哀矜保全之意尔部即遵谕行

六月丁亥

上谕刑部尚书魏象枢等曰天气炎热可将尔部事件次第速行审结勿得迟延使犯人於得罪外更受余辜康熙二十二年癸亥十二月丙辰刑部以岁终彙报病故监犯四十余人

上曰人命关系重大无辜枉死上干

天和朕念狱中犯人自作罪孽理固应死但恐死於非命曾命御医给与药物疗治有疾之人闻今岁狱囚患病者甚多何故不将见给医药疗治秋决之犯尚不及四十余人今乃病死若干人犯岂皆命耶此由该部怠忽之故着传谕刑部堂官严加申飭令伊等不时亲自巡视仍令该管官员加意存恤无致滥毙以副朕慎重人命至意

康熙二十三年甲子正月丙戌刑部议覆御史钱瑀奏请申外吏酷刑之禁有司滥用非刑久已通行申飭应无庸议

上谕大学士等曰刑罚关系人命凡谳狱用刑理应恪遵定制精详慎重不得恣行酷虐致滋冤滥此本内事情虽已经条奏申飭或有不肖官员日久玩忽仍於法外妄用重刑有负钦恤之意尔部仍通行内外审刑各衙门严加申飭如有故违即行指参从重治罪

五月丙寅朔

上谕大学士等曰前辅臣理事时有包衣佐领下人为盜於通州地方被擒该管包衣大赴通领粮遇见之历数其恶加以鞭责後鞫审时遂衔恨扳?包衣大同夥此包衣大竟坐强盜正法包衣佐领下人无不知此事者由此观之天下如此等事不少朕常以此为念凡裁决政事遇有重罪虽应死必於死中求其生路反覆推详下部再议必无疑窦然後完结此宁失出无失入之意也

十二月丙午刑科给事中杨尔淑疏言直隶各省军流人犯请比流徙尚阳堡宁古塔例严寒盛暑暂止发遣部议不准行

上曰军流人犯甫离刑狱一綫仅存炎暖之时尚可就道若严寒发遣恐有道路死亡之患嗣後令过严寒?遣康熙二十四年乙丑四月戊戌刑部题易州知州韩文煜等诬良为盗应革职遣戍知府以上降革有差

上曰此案可如所议不肖官员止为一已考成诬良为盗者甚多百姓受冤莫诉深可悯恤自後应作何立法劝惩俾善良得安民无冤抑庶不负朕祥刑之意其令九卿詹事科道集议以闻

十月庚子

上谕大学士等曰今年所拟秋决贪官甚多若尽行处决朕心不忍若不行处决贪劣之徒何以知儆且或有犯赃虽多而情有可矜者或犯赃虽少而情有可恶者若一律议罪殊属未允尔等将贪官情罪分别轻重朕当酌量定罪

十一月乙丑大学士等以在京秋审人犯覆奏

上曰尔等可执所议票旨以进朕当详览之但援引成例乃部院官奉行之事朕与尔等宜虚公裁断审度时宜酌量情罪岂可亦拘成例

康熙二十五年丙寅三月庚午

上谕刑部都察院大理寺大小诸臣曰刑曹民命攸关国典所系今见法司鞫刑狱或恐不得其情专事苛刻夫人命关系重大必以中正之心行平恕之道使法蔽其辜毋纵毋枉必得实情始免屈抑若惟以深文为能事鍛炼为尽职及狱词既具奏牒既成即反覆推详欲求其更生之路亦甚难矣朕於尔诸臣所上章疏有情可矜疑罪未允协者皆駁令覆审嗣後其各体朕怀殫竭心虑矢慎矢明以副朕祥刑之意朕披阅史册采择历代贤臣慎刑事蹟书之简牘内阁三法司官其详加省视又

谕曰刑者所以禁暴止邪若豪猾奸宄毋使漏网贫弱无知虽偶失於宽亦不为过纵

六月己未

上谕刑部等衙门近因天气炎热特遣部院大臣会同三法司详加审鞫将罪犯减等发落其直隶各省问刑衙门罪犯虽经详慎始定爰书但内外原属一体有情可矜疑者亦未可定着直隶各省督抚将已结案内见在监禁者逐一详审果可矜疑开明具奏尔三法司覆加详核照例减等以副朕慎刑爱民至意

七月辛丑



上諭刑部刑獄民命攸關聽斷雖貴精詳而案牒務無留滯庶事得速竣民免株累向例凡月朔初二日及齋戒等期不理刑名爾衙門一切奏章俱行停止因而案件間有停積恐聽審人犯久候拖累覆核事件迂延滋弊嗣後遇前項日期除循例不行刑外其餘照常章疏事務仍行審理啓奏務期獄無稽緩案得早清以副朕明慎用刑至意

是日

上諭大學士等曰每月朔初二日及齋戒等期刑部所上奏章照常發科刑戮重罪事關人命者勿可并數日奏章於齋戒畢之或留中或發內閣者皆如之

十月戊寅

上諭大學士等曰人命關係最重各省所審錄強盜人命事件文致周密無隙可窺故閱之最難此等事皆深宜詳慎

康熙二十八年己巳閏三月癸亥

上諭吏部尚書阿蘭泰等曰時已入夏天氣亢陽農事方殷雨澤未降朕軫念民依深為惓切或因刑獄中有無知罹法審擬失平情罪未符致干

天和亦未可定茲特遣爾等會同三法司將已結重案見在監禁者逐一詳加審理凡有罪可矜疑者即與察明事由開列具奏務俾情法允協不致淹滯圜扉以副朕省刑恤民至意

十一月戊午刑部議覆兵科給事中朱云條奏減死發遣人犯暫令圈守至春遣應不准行

上曰流徙人犯遇有勢力者每羈禁不嚴及至發遣又展轉迂延其貧困之人無力營求者即肆行凌虐瀕於死亡向來此等情弊甚多嗣後如遇有勢力之人即行發遣不得遲延其貧困者不許凌虐致斃着戶部刑部堂官不時詳加稽察如有前項情弊立行指參从重治罪

大清聖祖合天弘運文武睿哲?儉寬裕孝敬誠信中和功德大成仁皇帝聖訓卷二十八

## 卷二十九

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十九

慎刑二

康熙三十一年壬申十月甲申

上谕刑部朕保父黎元务崇宽大每於刑狱之事辄廑矜恤之怀秦省西安等处地方比岁洊饥闾阎困苦业已多方赈恤屡谕蠲租兹更大沛仁恩特加赦宥凡陕西巡抚所属今年秋审情实缓决人犯内除十恶及军机获罪不赦外其余自谕到日通着免死照例减等发落有现在审拟未结案者亦如之嗣後务令革心向善副朕法外生全至意

康熙三十二年癸酉十二月辛未

上谕大学士伊桑阿等曰适都察院议处吏部悞议知府卢腾龙等革职一案将堂官降三级司官降四级俱调用所议甚当朕观人之识见精神有限不能过其本来分量乌得无错但自知其错即宜承认若既知其错而不承认希图文饰则其错弥甚必致坏事前朕十三四岁辅政大臣理事时有悞行一事朕至今犹忆之彼时遇颁恩赦释放罪犯曾赦一不应赦之罪人该部以不应赦而赦应否释放请旨大学士李蔚奏欲将错就错朕问尔此言於此事尚可如遇不应正法之人悞行正法则人死岂能复生此言亦可乎李蔚慙服不能措辞大学士图海奏此事实臣等之错有何辨处天下事惟人命最重朕察之又察然已行之事其中能保无悞耶康熙三十三年甲戌四月庚寅刑部等衙门议覆民人高宏擢毆死伊兄高宏先应正法

上谕大学士等曰此案原供内有高宏擢之父高昇因伊子高宏先暴恶先行砍害之语今悉删去但苟且定义人命关系重大即使旨意未当亦宜据理执奏况议此案者止满洲官一员汉军官一员似此关系人命事情不多令司官详察会议苟且结案可乎将刑部严加申饬嗣後倘仍蹈前辙决不轻恕

十二月壬子刑部议覆阿哈尼坎盗伐风水禁地树木罪应立绞

上曰此伐木处虽与风水相近然非内地愚人无知犯禁此等情罪前此曾经宽宥着枷责发落

康熙三十六年丁丑十一月戊子

上谕大学士等曰凡关系人命事朕再三详阅务期平允昨见高阳县盗案情有可疑特差司官覆审今据奏张三等果非真盗严刑诬坐希图销案沈朝聘竟不详察草率审拟具题殊属不合着三法司会同吏部议处具奏

康熙三十七年戊寅四月己酉

上谕大学士等曰人命所关重大朕数年以来将为盗者止诛首恶为从者从宽免死此朕之特恩也又恐此等罪犯交发黑龙江聚集或致生事及问将军萨布素据奏新满兵众多将凶徒分给为奴势孤力散恶不能逞由此观之不但全活甚众且新满洲得之资益良多矣十一月甲申大学士等以朝审情实各犯四十八人请

旨

上谕曰奏献之成当预为详审临时可以无冤若不慎之於先而伺察於死生呼吸之间岂有及乎如今日各案朕先已熟览知其曲折犹欲与尔等斟酌而行耳

十二月庚戌

上谕大学士等曰缘事妇人除亲身犯罪外无论官员民人之妻有事属牵连应行质讯之处可遣司官笔帖式往其家问取口供其拘至公庭永行停止

康熙三十八年己卯三月壬午

上谕刑部朕爱养民生慎重刑狱凡有奏献时示矜全兹銮舆南巡见沿途老稚男妇环跪欢迎朕甚嘉悦念此编氓皆吾赤子原期生聚教训共底善良其或陷於刑章致困囹圄改过无路惻然伤之所经过山东江南两省见在监禁人犯除十恶死罪及诏款不赦等罪竝官吏犯赃不宥外其余自康熙三十八年三月十五日以前死罪以下已结未结俱着宽释此朕巡幸所至欲使竝生之至意可通行晓谕令咸悉朕怀

乙未

上谕刑部朕巡视东南行次浙省因官吏军民依恋诚恳特留蹕数日以慰喁喁奏请之情独念获罪人犯身淹刑狱一干法网无由自新兹乘舆经临惻然矜悯用沛好生之泽聿示格外之仁该省各属地方有罪犯见在监禁者除十恶死罪及诏款不赦等罪与官吏犯赃不宥外其余自康熙三十八年三月二十六日以前死罪以下已结未结悉着宽释可行文该督抚徧传所属张示晓谕

康熙三十九年庚辰九月癸巳都察院以秋审事请

旨

上谕大学士等曰若停秋审此内矜疑人犯又致多监一年将可矜疑者照常审理即行减等完结其情实人犯今年着停处决

己酉刑部以龙岩知县赵光荣诬良为盗一案两议具题一议前虽错审後察出实情应免议一议诬良为盗虽审出实情已经致死人命仍应革职

上谕大学士等曰将覆审得情之官仍因初审错误议处则人皆惧罪不肯露其实情朕意欲定一例凡部駁应审事件不交原问官审理则人断不致负屈倘仍令原问官询理彼必固执前议致令衔冤者多矣着九卿詹事科道一并详议具奏

庚戌

上谕刑部人命关系重大今年停审情实罪案尔等不必忙迫一应矜疑等犯必再三详审尽得实情方可

是日

上谕大学士等曰朕听政有年人命之事无不加详然亦不能保无冤抑者但有错处朕未尝不行指出也该州县取原供时虽不得其情亦必饰词以详上司上司复加详审然後到部此间即少有冤抑亦何由周知所以外省之事朕皆委任督抚督抚委任司道今以不可委任之人居司道之职督抚题参诚为得当且有失何妨但有失复隐讳不自任则恶矣

甲寅刑部奏口外偷盗马匹之范崧拟立斩

上曰用兵之际严盗马之禁故行即斩今海宇昇平兵革不试仍照前例即斩殊属可悯范崧着从宽免死照例减等发黑龙江给披甲新满洲为奴

康熙四十年辛巳十一月甲午

上谕大学士等曰岁内秋审重案朕皆一一详閱其字句错误处甚多此皆人命案件关系最重即一字一句不可错误乃九卿等自七月至今閱视数月其字句错误处竝未看出一二何也此属伊等专任似此怠忽不加详慎可乎刑部刊此档案先不详审殊属不合着交都察院严察议奏近看部院事件亦多错误朕凡事详閱即一字之讹亦为改正嗣後尔等宜加敬慎毋忽

康熙四十一年壬午正月丙午

上諭刑部朕欽恤民命念切好生每於法司奏上爰書必披覽再三詳求可生之理其或情罪允符不忍立置之法者則令監候緩決以俟來歲再讞顧罪犯一經緩決即皆冀望生全而長困桁楊淹留歲月自新無路朕甚憐之今方春始和萬物暢遂憫茲沉系之獄用沛矜釋之仁見在爾部及直隸各省監禁人犯凡經康熙四十年秋審奉旨監候緩決者著察明通行減等發落仍開具人數奏聞

康熙四十三年甲申十一月乙卯大學士等以情實人犯請

旨

上詳閱招冊審定再三

諭大學士等曰刑部招冊關係人命冊內字訛舛甚多殊非慎刑之道爾等傳諭刑部嚴行申飭嗣後於此等事宜加謹毋忽

康熙四十四年乙酉十月乙巳

上諭大學士等曰今年情實罪犯少着停止處決情有可矜各犯着分別核議照例減等發落再各省秋審尚無可議朝審則太寬書云罪疑惟輕以其罪之情由有可疑之處而輕之也若無疑則以公平為貴見在殺人之人情罪顯然又何所疑而欲從寬乎是以執法之人但當詳情據理以定罪一味從寬則惡人何所儆戒可以此諭刑部

康熙四十五年丙戌十月庚子

上諭刑部緩決罪犯至於三四年者俱即行察出免死減等發落

十一月丁卯大學士等以秋審情實罪犯七十人請

旨

上將招冊逐一詳閱反覆審定勾決者二十五人諭大學士等曰四輔臣時每年勾決動至百余人朕親政後數十年來每遇勾決凡有一綫可原者未嘗不從寬宥直至萬无可疑始予勾決至於光棍及有关主仆之分者其罪斷不可寬也

十二月乙巳

上諭刑部历年以來監候緩決人犯二百二十五名俱着免死減等發落在直隸各省者爾部

即移文各该巡抚令遵旨速行

康熙四十八年己丑十月壬子

上谕大学士九卿等曰江南浙江连岁灾荒地方困苦今年两省疾疫盛行人民伤毙者甚多虽该省督抚未经奏闻而朕访知灾病之状深用惻然民命至重朕宵旰孜孜惟以矜全百姓为念一切刑狱奏献尤加矜恤比年因江浙盗案叠见秋审时情实各案所议情罪俱属允协但念灾荒疾病之余复将数十罪犯一时正法朕心殊为不忍江浙两省应处决情实人犯俱着停止一年

十一月癸未

上谕大学士等曰向来勾决罪犯止开犯人姓名顺治年间有两犯同名者一勾一留唱名时二人同应监斩御史不能辨别具本请旨其被勾者亦留至次年正法今令开明承审各司及罪人籍贯年岁自无错误矣自顺治初年至康熙八年满洲内无杀人之罪犯后来渐多朕欲禁绝之故交与该旗即行完结着为定例其时大臣或谓朕立法太严朕决意行之由是杀人罪犯日少去年止有一案今年绝无矣

康熙五十年辛卯四月庚申

上谕大学士等曰朕综理政事以人命为重务必再三斟酌除情实死罪外其余皆酌量宽宥如盗人参等案为从者俱照例完结为首之人拟绞罪在狱者甚多时值立夏天气渐热监禁人犯易於染病致毙甚为可悯着交与刑部酌量减等议奏

五月己酉刑部等衙门题福建海贼郑尽心浙江海贼蔡元良山东海贼张景龙等俱拟即行正法

上曰此案正法人犯五十余名人数甚多朕心殊属不忍郑尽心并未与官兵抗拒不过迫於饥寒抢夺食物闻郑尽心等人颇壮健且俱系熟谙水性之人今将伊等从宽免死或归并旗下或发往盛京乌喇等处为水手当差着问九卿詹事科道以闻

八月辛酉

上谕大学士等曰顷者梁世勳题请复热审减等例朕听政多年惟日孜孜期以乂安万姓故凡发政施令务以真诚为尚倘博取矜悯犯人之虚名夏则遇热而审冬则遇寒而审不时遣官恤刑将督抚审拟案件频飭堂司官分行駁改则貽累於兵民官驿糜费於迎送馈遗互讦多端不知作何底止督抚之专责首在敦风厚俗导民於善不时训饬有司简清词讼速结案件不因细事多系妻子无辜以致荡析家资逃匿流亡即为良吏虽不热审亦无所害使不清本原不爱黎庶徒以热审为言则各省刑狱之事未至热时而审结者甚多是有热审之名而

无其实益滋烦扰矣

康熙五十一年壬辰十一月丙申大学士等以秋审情实罪犯请

旨

上将刑部重囚招册逐一审定凡情有可原免勾者十余

案

谕大学士等曰朕於招册皆细加研勘此情实五十人即尽诛之竝无冤枉而三覆奏後应当正法者朕必反覆详究於彼无可生之中求一綫可生之路无非矜慎民命之意也

十二月甲子

上谕大学士等曰朕办事有年凡人命审拟事件要期悉当乎理今陈汝咸条陈应照宋时洗冤录较定致命伤痕处所画一除枪刀弓箭铜铁等器械外木棍等俱不作凶器夫人命事件将拳殴脚踢木棍殴打致死者酌量凶器轻重以定罪之轻重则事必致舛错如针乃最微之物将针刺人致死岂可因针非凶器而免其罪乎孟子云可使制梃以挾秦楚之坚甲利兵由此观之木棍亦凶器也

康熙五十二年癸巳三月己丑

上谕大学士等曰赦诏一事关系甚大今颁诏日近若不预定恐临期舛错朕将历年所下诏款皆已徧閱应用者一一标记其中有款同而字句异者亦另行标出尔等详审酌定

七月辛酉

上谕大学士等曰昔听政时每令读本朕与公遏必隆公鳌拜共听之或因一时言笑往往忽略後朕向伊等言此内人之生死攸关我等不可不慎焉虽惩恶劝善亦有不可宥之处圣人法内有仁所谓惟仁者能好人能恶人也

康熙五十三年甲午二月甲戌

上谕大学士等曰今年秋审着停止情有可矜疑人犯着照常审理具奏见审人犯内罪不至死者亦着减等发落

十月丁亥

上諭刑部朕听政多年勤求民瘼刑獄之事尤所留心詳閱直隸及各省所議奏命盜各案自  
審結以至具題或踰時或經歲部議又間有覆駁再令詳審者案內牽連之人雖笞杖輕罪不  
免羈禁以俟完結淹歷歲時離家失業至於飢寒病斃者往往有之朕軫懷民命深用惻憫嗣  
後直隸各省除重犯案內軍流徒罪仍應候旨完結外所有杖罪以下輕罪着各該督撫於審  
結日即行發落不必羈候部覆只於疏內逐一聲明務使無知罪誤之民早得脫身寧家以副  
朕哀矜體恤至意其不關題請各該督撫應自行審結發落者仍着依舊例爾部即遵諭行

康熙五十四年乙未十月丙寅

上諭大學士等曰閱刑部秋審奏章繁復者甚多皆由府州縣司道各官審錄供招盡行全載  
所致該府司道所審若與州縣互異自應叙入否則但注明該府司道與州縣各官歷審皆同  
一語止將州縣初招竝督撫等大吏審擬之處叙明本內足矣此非為朕便於省覽蓋恐案牘  
繁多則事務必致遲延矣

庚辰

上諭大學士等曰刑部等衙門所奏各省緩決罪犯案件竝不將緩決情由聲明只書某人打  
死某人應行緩決一語嗣後應照舊例聲明情由其情實可矜犯人等案亦着照舊例聲明

十一月丁酉

上諭九卿等曰秋審案牘俱九卿所辦之事若令在朕前書寫未必能書十件何也此皆爾等  
漫不經心草率完結之故嗣後爾等應實心辦事并保舉參劾之處亦不可執私意

庚子

上諭大學士等曰今年京師情實罪犯甚少此內稍有可矜者再宥數人其應勾決者十四五  
人而已即至來年亦不過二三十人今年停刑亦無不可將此情實緩決案內折角處記檔來  
年審奏時聲明具奏

康熙五十五年丙申六月壬辰

上諭大學士等曰熱河地方涼爽尚未甚熱觀京畿奏報內六月初二日甚熱今時漸大暑應  
將監禁人犯暫行從寬拘系此旨速行傳諭刑部

十月丙申

上諭大學士等曰人命案件關係重大不可稍有疎忽朕御極以來於奏讞刑獄之事必極其  
慎重細察情罪反覆披閱几可成誦如此詳勘毫無疑竅方分別輕重批发施行閱今年朝審



情实人犯止七十余人迨三次覆奏後勾决不过二三十名除缓决人犯已有谕旨令将年久者分别减等发落外其朝审情实人犯今年处决着停止

康熙五十六年丁酉二月丁未

上谕大学士等曰嗣後各省大盗案件尔等会同三法司将此内有造意为首杀伤人者一二人正法余俱照例减等发往黑龙江等处着为令

六月癸巳

上谕大学士等曰口外原系凉爽地方六月初十日甚觉炎热京城必更甚矣尔等将此旨传与刑部所有罪人照每年寛释例行

康熙五十七年戊戌十月甲寅

上谕刑部凡人命事朕必各案详看方肯完结此次朝审情实各案朕欲一一详看觉精力不支若俟从容看过再行批出则该部必照例覆奏三次冬至以前总不能结前数年俱曾停决今年亦着停决

十一月戊戌

上谕大学士等曰直隶各省监禁缓决及秋後处决人犯甚多已经缓决断不至死迟至年久仍然得释若久监禁不但患病死亡且使狱中人犯亦渐增多尔等会同九卿将直隶各省缓决及秋後处决人犯情罪作何分别完结之处详加确议具奏再被殴受伤至保辜限外身死部内奏明缘由两行请旨者无庸议外有当时不曾殒命逾数日或因伤风或因他病而死仍将殴打之人议抵情有可矜此等向未有定例亦会同九卿确议定例具奏

康熙五十九年庚子十月癸亥

上谕刑部朝审情实人犯内有遇赦应寛免者有不应寛免者今若不详察分别则明年或遇赦诏将伊等於赦诏前混行正法殊属可矜其外省事情与京城事情不同外省罪人甚少照例完结恶棍亦知警惧至今年朝审人犯着九卿詹事科道会议除照常不赦罪犯外其余逐一详核分别具奏

康熙六十年辛丑闰六月丙寅

上谕大学士等曰每年暑热时将犯人暂行释放今年朕未降旨该衙门亦未陈奏着照前暂行释放

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷二十九

# 卷三十

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十

重农桑

康熙十四年乙卯三月乙丑

上谕户部国家赋税皆出於农而劝农又在有司近因供应大兵恐有私派累民虽屡禁止未必实心奉行值今春耕之时宜申饬有司毋得私派夫役滥准词讼并严禁胥吏指公需索土豪鱼肉良善致妨农业尔部速檄直隶各省督抚通行申饬如州县官有不实心抚字致民失业者即行指参

康熙十五年丙辰二月癸酉

上至巩华城道中

谕扈从诸大臣及侍卫等曰朕周视沿途田间春麦正当盛长着传谕扈从官员人等悉循路而行勿得蹂践春田其严禁之

康熙二十年辛酉三月癸酉

上奉

太皇太后幸遵化温泉

谕内大臣等曰今当田禾发生之候必须遵路而行安营时令於道途村庄沿途荒野处驻扎出入毋践田禾见遣户部司官隨後稽察遇有驻扎处或出入之时蹂躏田禾者严行议处回銮时仍从原路行朕将亲察之

康熙二十一年壬戌十二月丁亥

上谕礼部农事为民生之本必雨雪以时庶春耕不悞秋成可望今岁入冬以来尚未降雪愆阳日久时序失宜田亩曠乾恐妨明春东作应?行祈祷尔部即照例作速举行

康熙二十三年甲子六月壬寅

上驻蹕苏贝昂阿博尔齐尔

谕扈从诸臣曰小民赖谷以生倘西成无望必致冻馁尔等宜严行约束如人马践踏禾苗定加重处

康熙二十五年丙寅正月壬申

上命副都统马喇等往黑龙江督理农务

谕之曰农事关系兵饷须积贮充足其在驿递人夫亦令合力播种屯田尔等前往务期农政修举收获饶裕年胜一年懋着成效以副朕意

十二月丙辰

上谕大学士等曰日者遣部员自吉林乌喇至黑龙江以蒙古席北打虎儿索伦等人力耕种田谷大获夫民食所关至重来岁仍遣前种田官员以蒙古席北打虎儿索伦等人力耕种郎中博奇所监种田地较诸处收获为多足供驿站人役之口粮又积贮其余谷博奇効力视衆为优其令注册此遣去诸员可互易其地监视耕种博奇又复大获则议叙之

康熙二十八年己巳正月庚辰

上过献县民有进嘉禾一茎双穗者

上谕侍郎库勒讷等曰自古帝王不贵金玉而贵五谷谷者民之命也朕甚宝之

六月庚寅

上谕奉天府府尹王国安曰奉天为根本重地今闻游民甚多务农者少一遇旱潦即难补救今年亢旱朕遣赛弼汉往奉天诸处将糜费米粮如蒸酒等项悉行禁止尔至彼当劝民务农严察光棍游手之徒奉天田土旗民疆界早已丈量明白以旗下余地付之庄头俟满洲蕃衍之时渐次给与耕种近金世监奏请将旗下余地俱与百姓耕种徵收钱粮此地亩纵给百姓所增钱粮亦复有限所见何浅陋也今已另遣官前往丈量虽系彼处户部之事尔在地方亦须公同详察永定则例毋忽

康熙二十九年庚午正月甲辰

上谕户部朕惟阜民之道端在重农必东作功勤然後西成有赖畿辅地方去岁遭罹荒歉已经蠲免钱粮特发帑金兼支仓粟赈济虽小民餬口有资其籽粒牛具恐多匱乏今时届首春田功肇始若弗经营措给将悞俶载之期播种不齐仓箱何望直隶被灾州县卫所穷民有不

能自备牛种等项者该抚率有司劝谕捐输及时分行助给务令田畴徧得耕耨毋致稍有荒芜八旗官兵皆倚屯庄收获用以资生若有被灾穷乏耕作无力者该都统等通行各该佐领酌量资助牛种所有庄田勿致播种後时以副朕敦本劝农爱养兵民至意尔部即遵谕通行

十二月己巳兵部以三路官兵践踏田禾业经户部文明赏给田主银两其出兵都统公苏努等请免察议

上曰稼穡艰难自古志之苏努彭春海兰等出兵时朕再三面谕严禁兵丁勿践民田苏努等亦言臣等亲身殿後断不至伤残今将田禾践踏议为无罪不合着再严议

康熙三十年辛未九月辛未

上谕大学士等曰朕谕访蝗虫始生情状凡蝗虫未经生子而天气寒冻则皆冻毙来岁可复无患若既经生子天气始寒则虫已冻毙而遗种在地来岁势必更生今年寒冻稍迟蝗虫已有遗种朕心预为来岁深虑宜及早耕耨田亩使蝗种为覆土所压则其势不能复孳设有萌孽即时驱捕亦易为力可传谕户部移咨被蝗灾各地方巡抚责令有司晓示百姓务於今冬明春及早尽力田亩悉行耕耨俾来岁更无蝗患倘或田亩不能尽耕来岁蝗虫复起亦须尽力驱捕无致为灾十二月丙戌理藩院题归化城一带地方耕牛八旗内两佐领共助一牛其耒耜等项俱移文山西巡抚预备

上曰所用耕牛不必令其帮助即於御厰内牛取用耒耜等项若令巡抚制备将仍委之属吏一委属吏必致累民其铁器着支用库银制造从驿递运送边外木植甚多其木器即於彼处制用夫农田人生之根本朕凡所至之地先察其土田边外耕种必培护谷苗使高其陇此皆由土性寒而风又厉之故不如此则谷苗不能植立矣内地之田其陇不高各处耕种不同者皆随其地土之宜也

丁亥

上谕大学士等曰边外积谷甚属紧要達尔鄂莫地方着交与内务府派各庄壮丁耕种呼儿鄂莫地方令五旗王等庄屯人前往耕种其籽粒耒耜耕牛皆令预备着派谙农事官员前往监管布种完时酌留耘田之人余人遣归田熟时即令耘田之人收获其农夫所食米谷着於古北口所贮米谷计口带去席喇穆伦地方仍照前议令盛京人役前往耕种秋收之时有收获多者该部将监管官员议叙具奏朕观各处地亩肥瘠不同朕巡视南方见彼处稻田岁稔时一亩可收稻三四石近京玉泉山稻田一亩不过一石又见古北口谷田丰收之年一穗约三千粒口外近边地方丰收之年穗几万粒此皆土脉不同故收获亦异以此观之達尔鄂莫等三处垦种所费无几而所获必多矣

康熙三十一年壬申二月丙戌

上命都统瓦代等往達尔鄂莫等三处耕种田亩谕之曰耕种之事最为紧要尔等诸臣善为经营管理边外寒冷当及时广播麦种将田陇深耕勤谨耘耨耘时将草根勿令土压若草重发芽则有妨田禾耕种若太稠密田禾虽觉可观所得实少若稀疏耕种所垂之穗既好而所得甚多凡有河之处可造船捕鱼更须爱养耕夫和睦附近蒙古耕种毕时将夫役酌量留於彼处其余夫空费粮米先即遣回今年倘或米谷多获不可因後來难继遂致收多报少收获多寡虽由人力亦赖雨泽及时耳

四月辛丑

上御瀛台内丰泽园澄怀堂召尚书库勒纳等入谕之曰顷尔等进来时曾见朕所种稻田耶诸臣奏曰曾见过稻苗已长尺许矣此时如此茂盛实未有也

上曰朕初种稻时见有於六月时即成熟者命取收藏作种历年播种亦皆至六月成熟故此时若此茂盛若寻常成熟之稻未有能如此茂盛者朕巡省南方时将江南香稻暨菱角带来此处栽种北方地寒未能结实一过霜降遂至不收南方虽有霜雪然地气温暖无损於田苗谚云清明霜谷雨雪言不足为害也总之南北地气不同节候各异寒暑之迟早全视太阳之远近所以赤道度数最宜详审欲定南北之向惟以太阳正午所到之度為準即指南针亦不能无偏设有铁器在旁则针为所引亦复不準此是一定之理今将一片石以绳悬之使之旋转俟其既定刻记所向南北复动如前其所向南北仍复不变即此可思其理所以凡物皆有自然一定之理库勒纳奏曰闻黑龙江日长夜短虽晚日

落不至甚暗不知何故

上曰黑龙江极东北之地日出日入皆近东北方所以黑龙江夜短日落亦不甚暗又

命看澄怀堂後院所栽修竹前院盆内所栽人参及各种

花卉

上指示曰北方地寒风高无如此大竹此系朕亲视栽植每年培养得法所以如许长大由此观之天下无不可养成之物也

康熙三十二年癸酉二月丙子

上命内大臣公坡尔盆等诣归化城等三处督耕谕之曰种地惟勤为善北地风寒宜高其田陇寻常之谷断不能收必艺早熟之麦与油麦大麦糜黍方为有益去岁往彼垦种之人朕曾以此命之因违朕旨多种荞麦以致田禾失收尔等须问土人宜种何谷易得收获朕曾问老农皆云将雪拌种可以耐旱尔等试为之朕前带南方稻谷菱角种於京师虽以泉水灌溉因无南方蓄养之水且又霜早因此不熟以此观之若将此地之谷种带往北地亦难收成惟将

麦与大麦油麦糜黍及早播种庶可收获尔等谨识朕言克勤毋怠

十月己卯

上谕大学士等曰闻山东今年田收之後九月中蝗?丛生遗种在田况值今岁多雨来春少旱蝗则复生未可知也先事预图可不为之计与乘时竭力尽耕其田庶几蝗种瘞於土而糜烂不复更生矣若遗种或有未尽来岁复萌地方官即各於疆理区画逐捕不使滋蔓其亦大有益也命户部速檄山东河南山西陕西巡抚等传示所属郡县咸令悉知必於今岁来春皆勉力耕耨田亩蝗?之灾务令消灭若郡县有不能尽耕其田蝗或更生则必力为扑灭毋使蝗灾为吾民患

康熙三十四年乙亥正月乙酉

上谕大学士等曰去岁於直隶山东河南山西陕西江南诸省下诏捕蝗诸郡尽皆扑灭蝗不为灾农田大稔惟凤阳一郡未能尽捕去岁雨水连绵今岁春时若或稍旱蝗种复生遂成灾沴以困吾民未可知也凡事必须预为防备斯克有济其下户部行文直隶山东河南山西陕西江南诸巡抚亟宜耕耨田亩令土瘞蝗种毋致成患若或田亩有不能尽耕者蝗始发生即力为扑灭毋使滋蔓为灾

康熙三十五年丙子六月己丑

上谕大学士伊桑阿曰朕进独石口见今年麦禾俱盛朕衷欣悦念小民皆倚田禾度日如大兵陆续归时或致践踏或偷盗喂马又何恃以餬口今将独石口至怀来县交侍郎多奇自怀来至京城交侍郎马尔汉及随行部院官率地方官沿途巡察如有践踏田禾偷取喂马者立拏参奏如有纵徇朕闻之必以军法从事决不姑恕

康熙三十七年戊寅三月戊子

上谕大学士等曰闻湖广江西江南浙江广东广西福建陕西山西米价腾贵是必糜费於无益之事湖广江西地方粮米素丰江南浙江咸赖此二省之米今此二省米价腾贵诚为可虞酒乃无益之物耗米甚多朕巡幸直隶等处见虽有禁造烧酒之名地方官不甚加意未曾少止着令严禁以裨民食

康熙三十八年己卯三月庚辰

上南巡舟泊新丰

谕领侍卫内大臣等曰此地麦田茂盛朕心深喜此来原为民生凡驻蹕处勿使践踏田亩至於随驾兵丁已足守卫此处之兵尽着发回其将军副都统及各官员等既系该管地方着乘

舟随行可徧行晓谕凡有践踏麦禾者被获决不轻贷

乙酉

上驻蹕苏州府

谕兵部前者京口江寧接驾官兵亦曾扈送朕恐践损麦田尽行遣还今往浙江塘路狭隘可传谕该将军督抚不必令官兵扈从又朕见百姓欲覲朕颜接踵摩肩踰畴越陇彼虽心切瞻依不暇顾田禾朕实深惜之此後百姓聚观不必禁止但令勿损麦田可遵路而行

闰七月乙卯

上驻蹕遥亭

谕大学士等曰朕巡幸至此见田禾甚好可谓丰年但各处俱有蝗蝻恐地方官民旗下庄屯因田禾已收遂至怠忽今年若不将蝻子捕絶貽害来年悔之无及须於未能翼飞之时预先灭尽着即行晓谕

康熙三十九年庚辰二月辛卯右卫将军宗室费扬固题请开垦山代地方田地

上谕大学士等曰山代地方田既甚饶且逼近二河之间只引河灌溉无不丰收所以西边回子引水入田而耕之除虫食之外总无虞於旱涝必获丰登费扬固题请开种之处着允其所请待收获时奏闻

四月乙酉

上巡视永定河工驻蹕宝坻县城内

谕内大臣等曰方今青苗在野扈从大臣侍卫护军执事并行装人等在途须约束人衆遵路而行毋得蹂躪田禾朕还仍由此路倘田禾被践朕必责问大臣及管辖人员

康熙四十六年丁亥四月癸巳

上谕福建浙江总督梁鼐浙江巡抚王然江南江西总督邵穆布安徽巡抚刘光美江苏巡抚于準山东巡抚赵世显等曰朕顷因视河驻蹕淮上江浙两省官及地方绅士军民皆环道远迎恳请临幸朕勉顺羣情涉江而南巡省风俗所至郡县见雨阳应时二麦蕃殖比闾乐业可冀盈寧虽山东一路尚未悉覩而江浙田畴郁葱在望深愜朕怀方今麦熟将获一切扈从人员皆以次舟行不致蹂践诚恐百姓沿途迎送老稚扶携动盈千万越阡度陌不无践伤朕心甚为軫惜凡所过地方悉令停止迎送且节候渐热朕舟行乘夜迎凉亦未可定民虽远来无



由亲见尔等可张示徧加晓谕无负朕重农爱民之意

十月己亥

上谕大学士等曰边外地广人稀自古以来无从开垦朕数年避暑塞外令开垦种植见禾苗有高七八尺穗长一尺五寸者今年南巡曾以语张鹏翮伊未敢深信近值边外收获之时命特取数本驿送总漕桑额转送张鹏翮矣且内地之田虽在丰年每亩止收一二石若边外之田所获更倍之可见地方不同然人力亦不可不尽也

康熙四十九年庚寅五月丙子

上谕内阁兵部内务府数年以来已无蝗虫矣今复见一二宜急捕之朕於去岁秋间曾谕直隶巡抚赵宏燮山西巡抚苏克济河南巡抚鹿佑山东巡抚蒋陈锡加意捕捉今应传谕边外皇庄八旗之庄并提督马进良令各行捕除若不实心奉行断不轻恕观今年田禾甚佳当是大有之年所虑者惟此耳

康熙五十一年壬辰八月戊寅

上驻蹕遥亭

谕领侍卫内大臣等曰连日雨雪交下不得行猎诸臣必以朕闷坐为念不知此番雨雪於来年耕种大有裨益直隶各处亦皆如此则更佳矣可传谕扈从诸臣知悉

康熙五十四年乙未二月庚辰

上谕直隶巡抚赵宏燮曰朕尝读无逸篇留心稼穡久矣去岁腊前瑞雪盈尺时届阳和细雨连绵輿情怡悦早得布种矣所虑者起发太盛则收获之际恐有二疸之虞尔等徧示民间芸锄时令苗稍疎预防风霾朕以民生为念劝农为本已有所知不得不示特谕

康熙五十五年丙申四月戊申

上谕大学士等曰近问外省奏摺人等云麦苗甚好但路上未曾遇雨据此则嘆旱不特京北地方矣见今麦穗秀齐若再不雨岂能生发结实朕望雨心切着将此旨録出发往京师令大学士九卿等再行祈祷

康熙五十六年丁酉三月壬午

上巡视河西务耍儿渡等处堤岸自畅春园启行驻蹕南

苑

谕领侍卫内大臣护军统领等曰今麦苗方长应加意护惜不可蹂践朕仍从此路而回可徧行传谕交与诸大臣等派出人员严为管束

四月戊子

上谕大学士等曰今春地气潮湿所种春麦甚多朕顷閱视河西务堤岸时麦苗甚佳但近来风大渐有旱意尔等会同九卿如有事不合宜应更改之处详查议奏自初五日起斋戒三日祈雨

庚子

上谕九卿等曰目下雨泽愆期今早虽小雨未能沾足但从来月望时雨极难得昨十二十三等日朕固知未必有雨嗣後十八二十二二十三等日或可望其大沛也今岁少雨处甚多闻江南大麦收有十分小麦犹望雨山东巡抚未曾奏报得雨想亦未沾足河南巡抚有摺云今岁雨泽颇调洼地有十分收成朕心差慰又

谕曰天时地气亦有转移朕记康熙十年以前四月初八日已有新麦前幸江南时三月十八日亦有新麦面食今四月中旬麦尚未收又黑龙江地方从前冰冻有厚至八尺者今却和暖不似从前又闻福建地方向来无雪自本朝大兵到彼然後有雪云南贵州广东广西旧有瘴气从前将军赖塔进征云南留八百人在广西俱为瘴气所伤今闻云南惟元江微有瘴气余俱清和与内地无异矣

康熙五十八年己亥五月戊寅

上谕户部朕幸热河见一路麦苗盈野收获必丰但麦熟之岁往往雨水早而且多朕留心稼穡历年最久深悉其故尔部传谕直隶河南山东山西并口外地方速将已收之麦晒乾入囤收贮不致潮湿霉烂则今岁所收足用二年矣

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十

# 卷三十一

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十一

兴礼乐

康熙八年己酉七月壬子

上谕礼部祈谷之礼大典攸关应照旧例於明年举行

康熙十一年壬子正月乙丑

上谕太常寺祀典关系重大理宜敬慎嫺习近见尔衙门典礼俱未谙练所奏音乐亦未合节殊非慎重禋祀之义以後着详加练习勿仍前怠忽褻越祀典

康熙十二年癸丑八月丁巳

上谕礼部

坛

庙祭祀国家大典必仪文详备允符古礼乃可肃将诚恪昭格神明其致祭时辰斋戒处所稽诸往代各有定制尔部其详察典例定议以闻

康熙十六年丁巳九月丙子先是

上谕内大臣觉罗武默讷侍卫费耀色等曰长白山乃祖宗发祥之地今无确知之人尔等前赴镇守乌喇将军处选熟识路径者导往详视明白以便酌行祀礼尔等可於大暑前驰驿速去至是武默讷等自长白山还京

复

命

上曰长白山发祥重地奇蹟甚多山灵宜加封号永着祀典以昭国家茂膺神贶之意着该部会同内阁详议以闻

康熙二十一年壬戌二月壬午副都御史余国柱请厘正

郊庙燕享乐章

上曰飨祀乐章一代制作所系如郊祀

天地各

坛

庙乐章

太庙致祭乐章悉遵旧制其朝会燕享等乐风雅未备着礼部翰林院酌古準今求声律之原定雅奏之制集议以闻

戊戌

上命领侍卫内大臣舅舅佟国维大学士明珠往伯夷叔

齐庙行礼

谕之曰伯夷叔齐古之圣人清风可仰尔等前往可焚香展敬

六月乙巳学士陈廷敬譔雅乐十四章牛钮等恭译进呈

上谕曰所譔乐章甚善翻译又符合汉文可即发该衙门谨慎肄习

康熙二十三年甲子正月壬辰

上既定筵宴礼仪礼部奏自後筵宴请拨兵部司官及各

旗护军参领护军校监察

上曰筵宴关系大礼百僚齐集宜各加敬谨始无失礼之謬朕见元旦朝会旗下官员杂坐无纪大礼所在岂容慢忽礼部可会同兵部及八旗都统严加申饬毋至紊越

康熙二十四年乙丑正月辛巳

上诣

祈谷坛致祭毕

谕太常寺卿葛思忒等曰前见

太庙致祭时执事官捧福胙趋走失仪对越

祖宗典礼甚钜惟严肃不懈始可荐馨在庙奔走之人亦当诚敬将事共襄大礼不应稍有褻慢且亚献礼俱唱为次献亦与汉文不符尔等会同内阁礼部察例奏闻

康熙二十五年丙寅八月戊寅

上谕大学士等曰先儒先贤从祀位次应视其道德为先後不可援师弟为定例其酌议奏闻

十一月丙申

上谕礼部朕惟敬

天奉

祖郊祀庙飨必精白厥心竭诚致慎庶几有孚昭格用洽明禋朕於祭祀

坛

庙每躬诣行礼未尝不斋明祓濯实图感通凡从事祀典者皆宜表里精诚?尽职掌近见执事陪祀各官间有因循怠忽视为具文不能尽志致慙共効昭事之忱殊为非礼嗣後务俾各秉诚心克恭祀事凡行礼仪节始终整肃毋得慢易用副朕敬

天奉

祖至意

康熙二十八年己巳正月乙酉

上东巡至泰山之麓率文武诸臣向岱宗行礼毕谕部院诸臣曰朕巡历所至再经岱麓重瞻祠宇询其庙祝知香火荒凉日用难给岱顶诸庙亦复如之念泰山为五岳之长载在祀典有功社稷不宜使之渐就寥落合将每岁香税钱粮内量给数百金使上下岳庙与元君诸祠守祠者得有资赖晓夜尽心兼可时加修葺以壮往来观瞻示朕崇祀之意

康熙三十八年己卯十二月壬午

上諭大學士等曰元旦禘祭

奉先殿捧請

四祖神牌往來甚?朕心不安爾等會同內務府禮部太常寺考明代典禮議奏

康熙四十年辛巳十二月辛巳

上諭內閣禮部太常寺朕自御極以來一切祀典必敬謹齋戒躬親展祭以盡昭事之誠四十餘年於茲矣每當臨祭之時朕無一事不敬此禮部太常寺起居注官所共知從來祭祀登降起立莫不如常這次行禮將畢微覺頭眩朕之身體稍遜於前於此可見祀典關係重大朕恐精力偶有不周致敬心少間可以此意諭諸大臣等著議奏

康熙五十三年甲午十月己丑

上諭南書房翰林等曰向來陛殿所奏中和樂章皆仍明代所譌句有短長體制類詞後因文體不雅命大學士陳廷敬等改譌其章法皆以四字為句而奏樂人未易聲調仍以長短句法湊合歌之是雖文法易而聲調未易也今考察舊調已得其宮商節奏甚為和平必得歌章字句亦隨詞調則章法明而宮調諧此事所關最重着南書房翰林同大學士等詳考定議務使章法與聲調協和歸於允當

康熙六十年辛丑四月丙申

上諭大學士等曰朕披覽史冊於前代帝王每加留意書生輩但知訛評往事前代帝王雖無過失亦必刻意指摘論列短長全無公是公非朕觀歷代帝王廟所崇祀者每朝不過一二位或廟享其子而不及其父或配享其臣而不及其君此皆出自書生之論未為允當況前代帝王曾為天下主後世之人俱分屬臣子而可輕肆議論定其崇祀與不崇祀乎今宋明諸儒人尚以其宜附孔廟奏請前代帝王既無後裔後之君天下者繼其統緒即當崇其祀典朕君臨宇內不得不為前人言也朕意以為凡曾在位除無道被弑亡國之主外應盡入廟崇祀爾等將朕此旨錄出公同詳議具奏

大清聖祖合天弘運文武睿哲恭儉寬裕孝敬誠信中和功德大成仁皇帝聖訓卷三十一

## 卷三十二

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十二

省方

康熙八年己酉十月甲子

上谕户部朕巡历所至凡御用器物皆系所司由京城供办毫不取於地方除内廐之马不用饲秣即部拨马匹所需刍豆亦属无多向闻地方官指称御用私派民间预为储备既不销算又不还民贪污官吏侵肥入己苦累小民重违法纪嗣後务加严禁倘有仍前借端科派者所司官严察参奏重惩如匿不上闻事发一并治罪

康熙二十三年甲子九月乙亥

上东巡谕户部工部光禄寺朕凡巡幸一切需用之物皆从节俭今巡幸之处需用草豆木炭食物概勿令地方官派取民间扰害百姓尔等衙门各委员前往按每程所用照时价采买供给倘有扰民者着该督抚指名题参

癸未

上谕户部朕轸念苍生勤求治理迩年以来於畿辅郡县时行历览补助兼施今俯允廷议諏吉东巡正欲体察民情周知吏治一应沿途供用皆令在京所司储备毫不取之民间犹恐地方官役不能悉体朕怀借端支应妄行滥取今特加申饬如有悖旨私徵一经发觉定行从重治罪更念此番巡历原以抚恤编氓问俗观风於闾阎休戚务期洞晓凡经过地方百姓须各安生业照常寧处毋得迁移远避反滋扰累尔部即行令该地方官於府州县城市村庄穷乡僻壤大张告示遍行晓谕务令通知以副朕惠爱元元至意

丁亥

上以东巡特颁恩赦

诏谕天下曰帝王诞膺景命统御万邦道重观民政先求莫是以虞廷肆觐肇举省方周室怀柔式歌时迈诗书具在典制丕昭朕仰荷

天庥缵承

祖烈抚兹兆庶期底时雍夙夜孜孜懋求治理以富以教靡敢怠遑犹虑鄙屋艰难罔由上達故於直隶郡县周览巡行勤施补助更念山左等处土宜俗尚不加循省曷克周知矧历逢甲子世际昇平聿图泰运之恒新在措芸生於豫大乘时命驾咨彼民依但乐利祇慰夫一方而德泽未敷於九有朕心歉焉用是特昭公普以弘仁庶奏誠和之盛治时臻熙皞弥隆寬恤之恩户乐清寧丕笃绵长之庆布告天下咸使闻知

康熙二十四年乙丑二月庚戌

上谕大学士等曰朕夙兴夜寐勤求治理无非欲使小民遂其生计故每次巡幸必带科道官或有不肖之人强行买卖扰害百姓者令其稽察此番因在近畿未经带来着尔衙门学士不时严行稽察参奏

三月丙寅

上谕大学士等曰朕巡省南服见经过地方城垣圯坏者所在多有夫城垣者生民之保障所以卫吾人者也亟宜修筑之其令地方官作何葺治着工部详议以闻

康熙二十八年己巳正月庚午

上谕吏部等衙门朕统洩寰宇二十八年於兹早作夜思勤求治理务恤黎庶永图乂安如黄运两河运道民生攸系朕日切心劳比年工役虽渐就绪而应修应塞议论纷纭曩岁巡幸曾允淮扬士民所请疏濬下河前已兴工尚稽底绩屡经廷议请朕亲行閱视今特谕吉南巡躬历河道兼欲观览民情周知吏治所至沿途供亿皆令在京所司储侍一切不取之民间即有日用应需该衙门於所在地方照市估平买不许锱铢抑勒小民犹恐地方官吏不能悉体朕怀借名科派供应今特颁谕严敕如有悖旨借端私徵者察实即以军法从事地方文武大小官员不许与扈从官员指称交戚辄通馈遗违者馈送收受人员并以军法从事其扈从大小官员及随往仆役如有横行生事扰民者一并从重治罪朕兹巡省原以轸恤编氓咨諏风俗凡经过地方百姓各安生业务令?无废市陇不辍耕母得仓皇惊避辄滋烦扰其军民人等怀奸挟诈希逞私愤擅於驻蹕处所渎行告讐者一概严禁倘有妄控除所告事不与准理外仍严加治罪尔部即传谕扈从大小官员人等并各该督抚於府州城市村庄穷乡僻壤徧悬告示备行晓谕务令通知以副朕惠爱元元至意

壬午

上谕山东巡抚钱瑬曰朕轸恤民隐载举时巡懋宣德化勤求疾苦比至山东所经城邑百姓扶老携幼夹道欢迎朕问知连岁顺成民生稍得安业第思百姓足则国家充裕若期比屋丰盈必以蠲租减赋除其杂派为先迩年以来各省地丁钱粮已经节次豁免山东地丁正赋意欲来岁蠲免今因巡幸至此特先谕该抚速行晓示日传三百里遐村僻壤咸使闻知以副朕省耕问俗之意



癸巳

御舟泊山阳县京河

谕江南江西总督傅拉塔江苏巡抚洪之杰安徽巡抚江有良曰朕南巡以来軫念民依勤求治理顷至江南境上所经宿迁诸处民生风景较前次南巡稍加富庶朕念江南财赋甲於他省素切留心因尚有历年带徵钱粮恐为民累出京时会询户部知全省积欠约有二百二十余万今亲观历兹土访知民隐无异所闻除江南正项钱粮已与直隶各省节次蠲免外再将江南全省积年民欠一应地丁钱粮屯粮芦课米麦豆杂税概与蠲除自此民免催徵官无参罚尔督抚务须切实奉行俾均沾实惠副朕爱恤民生至意如有以完作欠侵收肥己等弊一经发觉定行从重治罪夫民为邦本足民即以足国朕平日躬行节俭一丝一粟未尝轻费所以如此简约者无非爱养物力为优恤元元之地在民间惟正之供军国所需岂易骤言蠲免还年国用稍裕故能频沛恩施总期藏富於民使家给人足则礼让益敦庶臻雍穆之治着速行传谕咸知朕意

丙申

上谕江南江西总督傅拉塔福建浙江总督王隲江苏巡抚洪之杰浙江巡抚金鉉曰朕因省察黎庶疾苦兼閱河工巡幸江南便道至浙江观风问俗简约仪卫卤簿不设扈从者仅三百余人顷经淮扬民间结彩欢迎盈衢溢巷虽出自恭敬爱戴之诚恐至糜费物力甚为惜之朕视宇内编氓皆吾赤子惟使比户丰饶即不张结彩幔朕心亦所嘉悦前途经历诸郡邑宜体朕意悉为停止又见百姓老幼男妇奔走杂遝瞻望恐後未免誼譁拥塞念此行原为民不严警蹕但人衆多高岸水次或有倾跌之虞一夫不获其所足軫朕怀此後止於夹道跪迎毋得紊乱追趋致有诸患着即详加晓谕使知朕爱民切实之意咸为遵行

二月己酉

上谕扈从部院诸大臣曰朕稽古省方咨求治理閱视河道期底平成凡有利於民生必令羣沾实惠兹行次浙省禹陵在望念大禹功德隆盛万世永赖应行亲诣以展企慕之忱其致祭典礼所司即察例举行政治所先在崇文教江南浙江为人文萃集之地入学额数应酌量加增永昭弘獎江寧镇江杭州驻防满洲汉军兵丁镇守要地久历岁时深用軫念应加恩赉以彰优恤又

谕曰朕南巡以来所经过地方官员除八法处分及列款纠劾外凡因公诖误降级留任者俱准开复降级调用者带所降之级留任其经过地方见在监禁人犯除十恶及诏款所不赦等罪并官员犯赃者不宥外其余自康熙二十八年二月十一日以前死罪及军流徒罪以下已结未结俱准寛释以示朕赦罪宥过之意备办船只地方各官効力勤劳着该督抚会同奉差官员确查具题各加一级纤夫供役劳苦亦着该督抚查明人数量给恩赏朕廑念民依特蠲租赋总期润泽苍生近见民间有建立碑亭称颂德意者虽出羣黎爱戴之诚但恐各郡皆然

未免致损民力诚使闾阎殷阜则裨益良多碑亭何与焉嗣後亦宜停止江浙钱粮既经蠲豁犹虑有不肖有司借端词讼朘削民生着该督抚严行禁飭至各处榷关原有则例朕舟行所至谘访过关商民每不难於输纳额税而以稽留关次不能速过为苦榷关官员理宜遵奉屡颁谕旨恤商惠民岂可反贻之累自今应力除积弊凡商民抵关交纳正税即与放行毋得稽留苛勒以致苦累违者定行从重处分朕早夜孳孳惟冀官吏军民士农商贾无一人不获其所故於民生吏治图维区画务极周详尔等可即传谕俾一体奉行称朕意焉

癸亥

上驻蹕江寧府城

谕刑部尚书图纳等曰朕巡行所过见兵民相安地方寧靖村居稠密然犹恐比屋不登小民有不得其所者且兵民虽享太平之福尚虑无知或抵触法禁用是大沛恩泽蠲免钱粮赦宥罪犯以至官兵商民咸加恩恤至於舟楫不通之所令营马预备以应一时之需并綠旗兵丁护从随行此皆伊等分内专责但兵丁备马劳苦马亦稍疲宜示軫恤一体加恩尔等将綠旗兵丁备马来者察明人数奏闻酌量给赏朕以綠旗兵止官马一匹恐随行备用日久疲乏已令各回泛地驻防满洲兵所有马匹业已足用扬州所备者亦着停止尔等即传谕通知

康熙三十六年丁丑二月戊戌

上驻蹕大同

谕大学士伊桑阿曰自古人君巡狩凡所过地方前代帝王陵寢先贤坟墓及名山大川无不致祭朕此行沿途所经古帝王陵寢先贤坟墓及名山大川着查明具奏应祭者遣官致祭

三月戊寅

上驻蹕宁夏

谕四川陕西总督吴赫曰朕巡幸沿边地方询察闾井生聚及土田沃瘠之状自晋及秦经行二千余里直抵宁夏所以勤求民隐至殷且切朔方资大河之灌溉疏渠溉田宜於稼穡当兹春气畅遂正三农尽力南亩之时诚恐有司官员不体朕怀因车驾经临调遣师旅借辞供亿扰累小民东作有妨西成奚望今一切军需刍糗俱储侍足用至扈从简约马悉放牧并不以供办草豆动烦民力尔可传飭有司勿借端科派违者治罪务使地方百姓各安本业?无废市陇不辍耕以副朕亲历边圉軫恤民依之至意

康熙三十八年己卯正月辛卯

上谕吏部等衙门朕抚驭寰区乂安中外孜孜图治宵旰勤民期於天下咸遂生成物无不得

其所今边烽永靖四方无事独是黄淮为患冲决时闻下河地方田庐漂

没朕轸念民艰曩曾屡遣大臣督修不惜数百万帑金务期早绥黎庶乃历年已久迄无成功今水势仍复横溢漫漫城闾沉没陇亩以致民多失业董其役者未有上策可以宜民时廑朕怀未尝少释在内诸臣咸请亲临指示为一劳永逸之图方今春时雨水减少正宜讲求疏濬以遂安澜爰谕吉南巡亲加勘閱更以吴地襟带江湖乃东南重地励俗省耕兼行临视凡一切往返供亿皆备办於京师即途次日用所需亦令各衙门照本地时值采买总於民间一无所累仍恐沿途官吏藉名科派致累闾阎故特颁谕严行申飭如有悖旨假托派索者察实即以军法从事该地方大小文武官员不许与扈从官员藉称亲旧擅相馈遗违者与受人员并以军法从事其扈从大小官员随行仆从人等如有横行生事者一并从重治罪凡经过地方百姓各安生业皆如常时务令?无废市陇不辍耕毋得惶遽引避其军民人等怀挟私怨受人指使擅於驻蹕处所辄行告讐者一概严禁不准仍照冲突仪仗例严加治罪尔部即传谕扈从大小官员人等并行各该督抚於各府州县城市乡村徧张告示务令亿兆通知以副朕体恤惠爱至意

二月丁未

上驻蹕杨柳青地方

谕领侍卫内大臣等曰朕念切民依往閱河工凡随驾官兵执事人员量供使用减少携带酌其人数分给官船仍恐沿途或有纷扰尔等再详议裁减以副朕爱民至意

三月壬午

上谕吏部朕以勤求民隐閱视河工特行巡省一切供御之费皆自内廷储侍不烦有司而经过山东江南地方各官备办夫船等项効力殊属勤劳此等官员有因公诖误罚俸住俸降俸降级革职留任者着察明悉从宽免

戊子

上驻蹕苏州府

谕吏部等衙门朕以黄淮冲决为患兼欲周知东南民生风俗特行巡省比亲历堤堰详加相度以疏导修筑之法指授河臣刻期兴作随南涉江表徧察民依顷至苏州府驻蹕有浙江文武官吏及在籍官员迎謁於行在言浙民望幸之心至殷且切合词淳恳不啻再三朕勉徇輿情扬旌前发以三月十九日启行自出京师以来一切供御之需皆出储备其沿途日用令该衙门照各地方时价采办一无所累於民如有官吏借名科派致扰闾阎者察实以军法从事地方大小文武官员与扈从官员私相馈遗及扈从大小官员随从人等有横行生事者并以军法从事凡经过地方百姓各安生业皆如常时务令?无废市陇不辍耕毋得惶遽引避方今

正届农时所过田亩勿令践踏其军民人等怀挟私怨受人指使擅於驻蹕处所辄行告讐者一概严禁不准仍照冲突仪仗例严加治罪尔部即传谕扈从大小官员人等并行该督抚於各府州县城市乡村徧张告示悉行晓谕务令亿兆通知以副朕体恤惠爱至意

四月辛丑

上谕户部礼部朕子育黎元勤求治理日孜孜以施德泽厚民生为急务而江浙二省尤东南要地朕时切軫念比岁以来蠲豁田赋赈济凶荒有请必行无灾不恤虽漕项钱粮向未蠲免者亦曾特旨蠲免爱养之道备极周详庶几民生日益康阜用是乘輿时迈於视河事竣巡历江浙谘访民间情形见淮扬一路既困潦灾而他所过州县察其耕获之盈虚市?之赢绌视十年以前实为不及此皆由地方有司奉行不善不能使实惠及民所以小民虽怀爱戴之诚而朝廷恩泽卒未下究朕目击厯怀亟思拯恤截留漕粮寛免积欠另有谕旨惟各盐差关差向因军需繁费於正额外令在差官员以所私得赢余交纳充用今思各官孰肯自捐私橐必仍行苛取商瘠民困职此之由着将加增银两一概停罢以纾商民之累其两淮盐课康熙十六年曾加增四十万两今恐商人办课维艰有渐至匱乏者着减去二十万两此外有应行应革事宜朕还都以後仍加商确次第举行该督抚藩臬皆地方大吏亦着悉心体访凡有可为民兴利除害者作速勘实陈奏严革杂派禁止刁讼俾胥吏不能作奸良民得以安业倘官吏有悖旨妄行者许商民首告该督抚察出即行参奏朕视民如伤惟恐一夫不获其所兹值海宇昇平兵革不事正当与民休息之时故特涣沛德音减徵寛税以为闾阎留有余之力至於江南浙江人文称盛入学名数前已酌定增额今着於府学大学中学小学各增五名举行一次以示獎勵人才至意尔部即遵谕行

五月丙戌

上谕大学士等曰朕兹南巡见地方官员诚心为民者甚寡一切务虚名而无实效甚无取焉朕观河工亦非难事任事者果皆竭诚効力加意奉公何难告厥成功耶若刷河底极深径趋入海诸水仍出清口归海则高邮等处不告水灾而下河亦可无虞矣又见沿途钞关已极颓敝皆由关差监督未经简选但较俸差往其中贫穷卑猥者或将亲戚家仆或雇佣人役挈之而往任此辈恣意妄行自有害於商贾且盘诘关津亦有害於百姓嗣後关差俱令本衙门堂官保举始行差遣

康熙四十一年壬午九月甲子

上谕吏部等衙门朕念黄淮两河为运道民生所系屡次南巡亲临閱视以疏濬修筑之法指授河臣闭六坝以束淮敌黄通海口以引黄归海比岁以来工程次第告竣修防渐有成效昨年冬月河臣张鹏翮曾以河工善後之策及应修之处请朕亲閱指示兹当农事之隙减约从员轻装南下自徐州一路循视堤堰沿途皆设营幄不御屋庐日用所需悉已储侍经过地方一切供帐宜通行禁止倘有官吏藉名科派累及小民或指称预办擅动库帑察出定严加治罪地方大小文武官员与扈从官员托言亲旧私相馈遗及随从人等有妄行生事者俱以军

法从事閭閻百姓各事本业不须引避有怀挟私怨於驻蹕处所告讦者一概不准仍照律治罪该部即传谕扈从人员并行各该督抚於所属府州县徧张告示务令通知以副朕体恤民生至意

康熙四十二年癸未二月丁酉

上驻蹕苏州府

谕大学士等曰观近日南方风景较之昔日似觉稍寒江北之竹尽皆黄色即此可知苏杭潮湿较前亦大减康熙三十八年南巡时潮湿即少差今更减矣民间生殖亦较前丰裕大约任地方督抚者安静而不生事即於民生有益倘徒事才干不体下情以此争先出衆民必受其殃矣所以朕於扈从人等恐其生事时屢於怀诸事惟务谨慎不时严禁倘朕欲将州县官员日加驱使未为不可所以不忍为者亦因体恤微员耳今总督巡抚能如此体恤者甚少也

十月丁丑

上谕吏部等衙门朕统御寰区勤求治理銮舆时迈省方观民春月阅视河工自畿辅山东以及江浙地方皆经巡幸兹两河渐已底绩所至之地民生风俗亦因以周知念陕西省为岩疆重地当出师塞外时曾经历其边境而西安一路未及亲莅顷陕西督抚诸臣言秦民望幸之心至殷至切合词陈奏河南山西巡抚等亦谆切具请乘此冬令农隙之际观览民风询察吏治简阅禁旅整饬军营实为要务用是轻装?从谕吉西巡沿途一切供御皆由内廷储备纤毫不取办於地方即偶有市易之物亦敕所司依时价给值不许錙铢抑勒所过大小官吏宜体朕爱民德意勿借词供亿私派閭閻如有悖旨科敛者察出即以军法从事地方官不许与扈从人员指称交戚私相馈遗违者并以军法从事其扈从人员宜约束仆役勿使妄行如不遵法纪生事扰民一并从重治罪朕视民如子凡乘舆所至市?陇亩宜各安生理米豆薪刍等物民间照常贸易不必禁止惟怀私挟诈冲突告讦者所告事不准理仍严加治罪尔等即传谕扈从官员人等并行各督抚令於经过府州县城市村庄徧示晓谕俾咸悉朕怀

戊戌

上驻蹕太原府城内

谕山西巡抚噶礼曰朕君临天下四十余载无一刻不以苍生为念近因西省望幸甚切故於冬时农隙减从轻骑由晋以及秦入境以来观风问俗见民生略有起色閭閻之间俗朴尚俭朕心少慰朕自弱龄读书往往以不知穷檐僻壤之疾苦为叹息所以留心於官方凡有往来者必先谘询民情丰歉偶有失时定加蠲赈且思晋省不通水运岁或不登即难筹画虽有州县存贮之米谷未必实数具在今岁山西收成颇佳尔等仰体朕爱民如子之至意晓谕民间若丰岁用奢则荒年必致匱乏教之以礼义导之以守法重农务本藏富於民则朕无西顾之忧矣凡朕所经之处必大沛恩泽因今岁东省灾甚已蠲四十三年地丁钱粮又免云贵广西

四川地丁钱粮所以不能施惠但将四十二年以前山西所属州县未完银两米草尽行蠲免以示朕加惠黎元之意

十二月丁丑

上驻蹕卫辉府城内

谕河南巡抚徐潮曰朕念西土兵民生计乘冬令农隙之时特事西巡返轸京师道由豫省自入潼关见阡陌以及河南府民生甚艰而怀庆少裕至卫辉府则又艰苦赖薄有秋成尚能餬口倘遇歉岁必至流亡此皆大小官吏互相容隐虽有衰老病废懒惰退谗之员仍使在任以致貽悞地方河南百姓质朴愚鲁输赋从未稽迟而今岁所欠甚多显系州县官闻朕蠲除秦晋积欠钱粮希冀恩免於中渔利见今民欠俱免催徵着将河南通省俸工银两补足所欠之数如有不完停其陞转俟完日开复

庚寅

上西巡回京

谕大学士等曰前南巡多由舟行官民羣集两岸迎驾顷西巡皆由陆路凡临幸郡邑官民无不扶老携幼懽腾道左每清问及之又令在乘輿左右备谘地方利弊彼皆输诚披沥畅所欲言是以风俗民情靡不洞悉朕巡幸七省畿辅秦晋民俗丰裕江浙则较三十八年时更胜山东近因水旱大异畴昔河南百姓生计甚艰此二省之民深厪朕怀又闻各省火耗俱是加一钱粮最少者惟有甘肃通计正额共二十八万有奇加耗亦止二万八千州县官钱粮既少加耗无几不敷用者宜或有之其余赋额皆多如一州县正额有二三万加耗即至二三千宜敷用矣而州县官仍有以艰难告者其故安在朕随地谘访督抚虽有不受馈遗者然馈藩臬者若干馈道府者若干岂可尽云廉吏乎

康熙四十三年甲申十一月戊午

上谕大学士等曰凡车驾巡幸之处一切需用从不取办於民而各省不肖官员指称修理行宫供备器物并建造御书碑亭等项名色辄行动用正项钱粮借词捐还究无偿补及至亏空数多复加倍私派科敛肥己以致重貽小民之累种种弊端不可胜指嗣後凡建造碑亭等事宜严行禁止

康熙四十四年乙酉正月戊午

上谕吏部等衙门朕厪念民生加意河道屡行亲閱一切疏濬修筑事宜悉经周详指画获告成功前黄河之水往往倒灌清口者皆由仲庄闸与清口相对骆马湖水势湍急遂逼黄流灌入青口朕视河时躬临相度命河臣移仲庄闸改建於杨家庄之下工竣之後河臣报称黄水

暢流入海絕无倒灌清口之患朕尚未经亲閱今欲特莅其地察驗形勢用籌善後之?其中河黄河运河有应加修防者亦随宜指示以图经久至於山东洊饥之民赖两年极力賑贍继以有秋幸皆得所其民间生聚果否殷阜并於沿途亲行周覽焉乘茲仲春解冻減从輕裝循河南下往返皆用舟楫不御室庖经过地方不得更指称繕治行宮妄行科歛其日用所需俱自内廷供御从无纤毫取办於民前此屢次南巡閭閻皆所深悉倘有不肖官吏借名預备擅动官帑并图日後加派补偿以为巧取侵漁之地者事覺严行治罪决不寬宥所在官吏私饋扈从人員及随行人役生事扰民者俱如前旨以軍法从事奸民挟私控讐者从重坐罪尔各部即通行傳飭仍令各該督撫張示徧諭俾小民咸知朕意

二月庚寅

上諭大學士等曰朕不意山東之民遽能如此前者南巡見閭閻失所不堪屬目今乃大異往時皆由承平日久國帑富饒故能蠲數年錢糧遣官贍養賑濟耳凡罹災荒倘預行奏報无不可賑救者止因山東各官匿災不報故大致飢饉向日陝西饥荒亦由於匿不報聞朕曾以地方官匿災不報之故詢之於民据云民一罹災朝廷即蠲歲賦則火耗无徵故地方官隱而不報也自古弊端匿災為甚誠預為奏報即設法賑濟矣民豈遽至飢饉耶

三月壬子

上南巡駐蹕蘇州府城內蘇州府屬萬民以恭逢萬壽節奏進諸品食物

上諭曰朕因閱視河工巡訪風俗而來非為誕辰也且朕來時一切应用之物俱備自内府所過地方秋毫無犯今尔兆民中心篤摯朕已知之即如朕受之矣尔等可携去

康熙四十六年丁亥正月丁卯

上諭吏部等衙門朕念淮黃兩河工程為東南要務屢次躬臨河上相度指示一切修防疏濬業已次第奏功昨歲河漕督撫諸臣詳勘地形請於溜淮套別開河道直達張福口以分淮勢此系創建之事合詞請朕親閱九卿等集議再三陳請以諸臣之言奏聞

皇太后祇遵

慈命擇於本年正月二十二日啟行閱河舟楫往返不御室庖日用所需取办内府经过府州縣毋得更以預备行宮供設御用冒侵庫帑科斂閭閻倘有不遵事覺定严加治罪其文武官員私自饋贈随从人役生事扰民及奸惡挟私告讐者俱重处不宥尔部即轉行各該督撫通飭所屬張示徧諭俾咸知悉

大清聖祖合天弘運文武睿哲恭儉寬裕孝敬誠信中和功德大成仁皇帝聖訓卷三十二

## 卷三十三

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十三

治河一

康熙九年庚戌九月丙辰工部议覆河道总督罗多疏言修河工程额用协夫请於江南山东两省金派协济查金瓜夫役恐道远民艰不便准行

上曰河工关系重大时近冬寒势不容缓倘临期应募无人复行金派必致迟悞着该督先行竭力召募尽所得人夫供役如万不能得就近量行金派协济仍一面作速题明该管官员务须加意抚恤不得借端科扰困累小民

康熙十一年壬子九月辛丑

上谕工部河道屡年冲决地方被灾民生困苦深軫朕怀据遣往视决口侍卫吴丹学士郭廷祚回京绘图进呈朕观黄河自宿迁以至清口皆为紧要虽有遥堤一层恐未足扞蔽水势应否於遥堤之外再筑一堤尔部即行文总河总漕公同相视商酌筑堤果否有益并所需钱粮逐一详确议奏

康熙十五年丙辰十月辛未

上遣工部尚书冀如锡等阅视河工

谕之曰河工经费浩繁迄无成效沿河百姓皆受其困今命尔等前往须实心相视将河上利害情形体勘详明各处堤岸应如何修筑务为一劳永逸之计勿得苟且塞责如勘视不审後复有事尔等亦难辞咎又近闻奉差至外省者地方官吏所在迎送甚为劳扰此皆有累民生之事尔等前往宜一概禁止

康熙二十一年壬戌五月丁卯

上命户部尚书伊桑阿等勘閱河工

谕之曰黄河溃决关系运道民生深切朕怀历观书史所载及从前条议章奏治河不在空言



而在实行未可轻言河工之易也若以为易则未可刻期奏功即收实效若以为难由杨家庄至清口一百二十余里系漕船往来必由之要路修筑堤堰岂容稍忽尔等前去务与靳辅公同商酌加意看验勿各执己见凡有会议事宜必逐一陈奏

庚午

上谕户部尚书伊桑阿等曰淮安等处河道频年冲溃靳辅作何修筑工程坚否特遣尔等往勘若到彼处各宜秉公持正悉心详画庶称任使如有通同徇私或行欺罔者必加重处

是日

上谕侍郎宋文运曰伊桑阿前曾閱过河道一次今尔系初往如有确见务必坚持详议毋以伊桑阿为尚书已为侍郎阿意顺从治河最为难事候补布政使崔维雅所奏款项尔等带往会同靳辅详加确议务期坚久以济河工除河患勿视为寻常玩忽贻悞也

康熙二十三年甲子十月辛亥

上巡阅黄河视北岸诸险工

谕河道总督靳辅曰朕向来留心河务每在宫中细览河防诸书及尔屡年所进河图与险工决口诸地名时加探讨虽知险工修筑之难未曾身历河工其河势之汹涌湮漫堤岸之远近高下不能了然今详勘地势相度情形如萧家渡九里冈崔家镇徐家坝七里沟黄家嘴新庄一带皆吃紧迎溜之处甚为危险所筑长堤与逼水坝须时加防护大略运道之患在黄河御河全凭堤岸若南北两堤修筑坚固可免决啮则河水不致四溃水不四溃则濬涤淤垫沙去河深堤岸益可无虞今诸处堤防虽经整理还宜培薄增卑随时修筑以防未然不可忽也又如宿迁桃源清河上下旧设减水诸坝盖欲分泄涨溢一使堤岸免於冲决可以束水归漕一使下流疏泄可无淮弱黄强清河喷沙之虑近来凡有决工处所皆仿其意不过暂济目前之急虽受其益亦有少损倘遇河水泛溢乘势横流安保今日减水坝不为他年之决口乎且水流浸灌多坏民田朕心不忍尔当筹画精详措置得当使黄河之水顺势东下水行沙刷永无壅滞则减水诸坝皆可不用运道既免梗塞之患民生亦无垫溺之忧庶几一劳永逸河工可告成也

十一月辛未

上谕河道总督靳辅曰朕观高家堰地势高於宝应高邮诸水数倍前人於此筑石堤障水实为淮扬屏蔽且使洪泽湖与淮水并力敌黄冲刷淤沙关系最重今高家堰旧口及周桥翟坝修筑虽久仍须岁岁防护不可轻视以隳前功

康熙二十四年乙丑正月戊子

上諭大學士等曰總河靳輔所奏黃河南岸毛城舖等處北岸大谷山等處宜建減水壩令水分流歸仁堤等處宜建石壩保護曾命九卿等會議朕南巡時靳輔亦稱自白洋河引黃水下流入洪澤湖駱馬湖以助淮水其下清河县黃淮合流之處因有洄渦自能洗逐淤沙朕思導流之水總會於清河县水勢既強流湍激涌必致踰越堤岸愈損民間田廬此減水壩雖有益於河工實無補於百姓不可不為熟計爾等以朕意傳示九卿務籌久遠其詳明議奏

康熙二十五年丙寅七月丙戌

上諭工部侍郎孫在豐曰朕前因巡幸江南見高郵寶應等七州縣積水汪洋民罹昏墊朕甚憫之應行開濬下河疏通海口俾水有所歸民間始得耕種特發帑金拯拯七邑災民屢集廷議兼詢輿情允協金謀事當厘舉茲命爾前往淮揚所屬下河一帶車路等河并串場河白駒丁溪草堰場等口挑濬事務專屬於爾監修爾宜親身相度多方經畫讲求源流脉絡次第興工督率帶去司官等務實心任事毋得怠忽扰害其司道府廳州縣等官如有違玩貽誤及勢豪紳衿妄行干預包攬生事阻撓工程者指名參奏爾受茲專委須竭忠尽力悉心區處速竣大工使海口疏通水消田垦蒸黎復業以副朕救民之至意如因循怠忽虛費財力責有攸歸爾其慎之

又

諭司官鄭都等曰爾等雖經部院辦事但治河非所熟練今將爾等差往必當同心協力務期有成毋得各執己見侍郎孫在豐將應修地方派與爾等須各遵所派料理不得圖易辭難互相推諉

十二月丙寅監修下河侍郎孫在豐等疏言請

敕河臣遇水勢稍減即將滾水壩盡行閉塞以便開濬下

河

上諭大學士等曰頃郎中鄭都至京奏稱伊回時即興工挑濬下河朕諭云此事恐未能即便興工今孫在豐等果如此具題其不能與靳輔抗明矣今若不閉塞滾水壩等口則下河一面挑濬上河一面放水何日方有成功若即閉塞日後運河潰決則靳輔借以為辭欲籌兩全之道實為甚難然靳輔前曾奏築堤以束下河之水使之歸海此疏內有無閉塞滾水壩等口之語爾等即會同九卿詳看如向欲閉塞今孫在豐修理下河又云不可閉塞可乎是日大學士等會同工部奏請令靳輔孫在豐來京其滾水壩等處應否閉塞二人各陳己見恭候

皇上裁定

上曰此下河決宜開濬斷不可止孫在豐不必令其來京堵塞堤閘之處孫在豐何敢輕言若

日後上河潰決渠能任其咎乎孫在豐所請不過上河不放水耳假使靳輔治理下河不塞水口能於巨浸中從事乎令靳輔為之必欲閉塞諸口今孫在豐為之又云不可豈非有阻撓之意耶着靳輔來京朕面問之

康熙二十七年戊辰三月壬午

上諭九卿等曰朕於河務留心甚久崔維雅所呈治河書亦曾細閱其勢必不能行即彼所云自蕭家渡直開至清口日用夫七萬期於五旬告成朕思夫役安得如許之多即夫役可得而飲食柴薪之類從何運濟此說於理難通朕未之信也屯田害民朕已洞悉各省民田未有不溢於納糧之額數若以余田作屯按畝定額豈不大擾民乎屯田不行無可復議至下河作何開濬重堤應否停筑爾等公同詳酌確議具奏

四月庚申

上命兵部尚書張玉書等勘閱河工

諭之曰前于成龙奏稱靳輔開中河無所裨益今凱音布等往勘中河奏稱中河內商賈船行不絕若塞支河之口則駱馬湖之水匯流中河水勢既大漕艘可通數年以來河道未嘗沖決漕艘亦未至有悞若謂靳輔治河全無裨益微獨靳輔不服朕亦不愜於心矣且黃河自宿遷以下沖決猶可修治若宿遷而上或致泛濫則為害甚大今據凱音布等奏稱中河所行漕艘慕天顏勒令退回支河之口不許閉塞如此阻撓深屬可惡着即行嚴訊問誰為唆使則實情畢露今遣爾等往閱河工務將毛城舖高家堰等地方徧閱就靳輔所修筑之處其甚善而斷不可改者有几不善而應更改者有几詳悉商酌定議以聞至靳輔言黃河沙底漸高此斷不可信譬之盆內貯水遇風尚且溢出使黃河沙底果高一有風濤其有不漫溢橫流決堤潰岸者乎

五月癸酉

上諭兵部尚書張玉書等曰往閱河工凡是非可否當秉公陳奏不可推諉朕聽政二十余年閱歷世務已多甚栗栗危懼每遇事必慎重圖維詳細商確而後定歷年所奏河道變遷圖形朕俱留內時時看閱朕素知河道最難料理自古治河之法朕自十四歲即翻復詳考如宿遷以下高家堰等處運河朕所深知爾等皆國家大臣此系公務非一己之事若果有異災大水堤岸沖決亦非爾等所能保爾等但據現在從公詳閱將情形大略先行陳奏看畢之後再行具疏奏聞

康熙二十八年己巳正月辛卯

上閱視中河至支河口下馬坐堤上出河圖指示扈從諸臣及江南江西總督傅拉塔河道總督王新命漕運總督馬世濟等

諭之曰河道关系漕运民生若不深究地形水性随时权变惟执纸上陈言或徇一时成说则河工必致溃坏且就目前观之修治此处似乎有益将来且连彼处受害矣朕虽屡遣大臣来视而河工是非终无定论朕夙念河道频坏羣黎屡罹灾害因详阅河图不离左右故地方堤岸河形朕衷深晰今朕躬特来观阅试以朕意言之朕观此河陜隘逼近黄河之岸且自徐州北镇口闸所出黄水及微山湖荆山口之水俱归内运河必流入中河骆马湖之水亦入此河若遇霪潦之年水势愈涨万一黄堤溃决失於防御中河黄河必将混而为一此中河开濬後小民商贾无不称便者盖由免行黄河一百八十里之险耳然此论徒知目前小利又安识日後长久有利无利也又

諭曰若重载与回空之船竝行则中河窄狭且逼近黄河朕意犹以为可虑镇口闸微山湖等处水大可仍开支河口其黄河运道原自不废仍竝存之

康熙二十九年庚午三月丁巳

上諭大学士等曰南旺湖之水自来流入运河朕去岁南巡回銮时沿堤而行细阅河势知南旺湖之水至分水龙王庙分流俱入南北运河当日始建堤岸之人经营甚善今若使南旺湖之水尽入北流则南运河将至水浅矣可传从前勘河诸臣及靳辅问明回奏

四月戊寅

上諭仓场侍郎凯音布原任河道总督靳辅等曰山东河道自分水龙王庙以南流入运河之水不一而足舟行无阻分水龙王庙以北汇入运河者惟河南卫水而已并无别渠相济南旺所蓄之水又不能多常致淤浅阻滞今将骆马湖之水不令其自禹王台流入洸河俾骆马湖之水蓄贮无泄於运道有无裨益至骆马湖与南旺等湖相距地势高低如何山东东阿县之盐河及别河有可通入运河者否河南卫河之外有别河可以疏入运河者否尔等访其地谳练之人委曲谘询若有可措施之处亲加详阅绘图来奏

康熙三十一年壬申十一月戊辰工部等衙门议覆河道总督靳辅疏言於黄河两岸栽柳种草设立涵洞应准行至挑濬河沟引水淤垫堤下积水之处又引水淤垫邳州低洼之处应令该督详议具奏

上曰引黄河水内灌使淤平洼地虽云有益朕断不肯轻信黄河水势危险倏尔彼处深此处浅倏尔船被阻淤水势变迁无定不独黄河为然即如浑河之水数十年前其流尚在南苑中未几渐徙而南在蠡县村落间犹去南苑未远今则分为二支一支出新安一支出霸州其流愈远矣朕曾闻土人云元朝欲引浑河之水通京师而未果想亦有所难行耳黄河水势湍迅欲引黄河内灌使淤平洼地事属危险难保万全不准行

康熙三十三年甲戌正月己未

上谕大学士等曰于成龙面奏云梯关以下至海口因水势散漫以致沙渐淤长朕思海口为黄河入海之路海水势迅急方能刷沙河水乃得顺流此为紧要所当疏濬者也

十月甲寅工部等衙门议覆河道总督于成龙疏言高家堰三官庙周桥大坝一带堤工所关甚鉅土堤易为水势冲坏请改建石堤以为永久之计并请於近堤开一小河运送工料应如所请

上曰修此堤工所需之石从何处取办应用此堤关系紧要必须修筑坚固方可无虞朕闻洪泽湖昔日俱系民田因高家堰筑堤淮水泛滥遂尔成湖彼时之民未必不怨今高家堰堤理应修固但需用石料浩繁若运办不得法恐致累民虽动正项钱粮给价募雇然地远工繁或仍派於民减给工价亦未可定朕前南巡观览此堤极为紧要惟恐扰民故尔踌躇必详悉筹画方可举行至开运料小河九卿所议殊未明白河道关系甚大朕从十五岁即为河道忧虑今欲开小河必指高家堰相近之处往年靳辅亦欲於高家堰另筑一堤於中浚小河令从两堤间通流运送工料九卿以两堤之间浚河则旧堤两面受水冲荡议不准行今于成龙请开运料小河即靳辅欲开小河之处若将此开濬势必引入洪泽湖之水浸润冲刷兼之湖水泛滥河水盈涨高家堰断不能保况修堤土石竝非高邮等处所出与其於小河以小船载运何如即由洪泽湖以商贾大船载运耶

康熙三十五年丙子九月辛酉先是

上以淮黄交涨遣户部员外郎绰奇往阅黄河水势至是回奏中河北岸之堤未遭水患其水已减六尺

上谕大学士等曰向朕逆料中河北岸之堤最为紧要定须坚固因命靳辅于成龙加意修治是以虽遇大水得无妨害若此堤一决不可言矣历年之水无有大於今岁者此番无害则似可永固黄河之水从云梯关入海云梯关沙涨壅塞水每为其所阻以致退流河堤不能扞御因而冲决今将淤泥挑濬河道加深所以水得通泄其利普矣

康熙三十六年丁丑正月甲戌江南江西总督范承勲河道总督董安国等疏言臣等会勘河道自永安以至邳宿二州阎王庙一带亟宜修筑

上谕大学士等曰河道事务关系甚大不可迟延俱着依该督等所奏速行修理云梯关乃海口要地此处淤沙深濬则黄河入海不致阻滞着总河每年遣才能河员专理毋致壅塞

康熙三十七年戊寅七月乙未工部议覆漕运总督桑额等疏请开濬下河应准行

上谕大学士等曰下河入海之处朕虽未及亲览尝闻人云盐城一带地极洼下海水反高建闸无益倘河高海低水性趋下虽不疏濬势必决开一道以归於海明代於海口设闸遇河水高则启闸以注诸海河水平则闭闸以御海水前虽特令于成龙凯音布修治毫无裨益今桑

额居官虽优但此事非亲身阅历加意推详者难以悬拟必深悉水性洞彻地形之人方可定议尔等问九卿并淮扬等处人在朝者确议具奏

己亥大学士等奏开濬下河九卿及在朝淮扬人等俱言开濬有益

上谕直隶巡抚于成龙曰尔意若何于成龙奏姚二沿船

厰芦坝等河若行挑濬於民有益

上曰朕幸五台山回欲观浑河清河因由霸州而来朕意浑河清河俱汇流霸州城南原欲沿河修筑堤岸不意至霸州询地方百姓据云浑河原经固安县後因迁徙汇合清河流至霸州二河水势浩大以致泛滥为灾朕遂一从民言於固安县开河事乃有成朕竝不固执己意尔等为总督巡抚者能如朕之不固执乎然此河道甚短易於修治南省地形洼下水势浩瀚难於修筑不比此河今若挑濬姚二沿等河尔果能保与民有益否着桑额与总督巡抚会同确勘定议具奏

十一月乙酉

上谕大学士等曰开濬下河民生攸系朕为闾阎疾苦深切軫念曾命凯音布孙在丰于成龙王新命等专司开濬伊等俱奏工程告竣民生大蒙利益载在册籍存部可考人亦俱在可以质询也由今观之止是虚糜国帑水势竝未消减田亩竝非涸出所谓有益民生者果何在耶今桑额又奏当行开濬而九卿竝不详诘从前开濬诸人亦不稽考册籍遽议准行如果此次开濬巨浸全消疆理尽复民生得济朕即如其所请疏凿开濬而桑额等能保水即消田即出有裨於民乎御史吴甫生亦以此事条奏可并发九卿详询前此督濬者复稽考诸册籍确议以闻

十二月辛丑朔

上谕河道总督于成龙曰闻淮扬河水泛涨清江浦百姓所居之地皆已被水夫洪泽湖实黄河之障湖水强盛力可敌黄则黄水不得灌入运河今淮水势弱不能制黄全注运河黄水又复灌入且两河相距甚近清江浦地处其中其一带地方受泛滥之水势所必然惟淮水三分入运七分归黄运道始安

是日

上谕大学士等曰朕昔年巡视河工曾至大墩堤步行十五里详加阅看今寰宇昇平海内寧謐惟河工关系运道民生朕数十年来夙夜萦怀留心研?故河道情形熟悉已久总之上流既理则下流自治矣桑额所奏开濬下河一事朕不即允行正是有益於彼桑额固居心平和为人诚实然遇事不免迟钝易被人欺如此纷繁事务何以责其成功于成龙屡委以事尚克勉

効河工事情紧急与于成龙敕书内须入各部不得掣肘之语使得相机料理庶不悞事河务浩繁于成龙年已渐老且一身难以兼顾奉天府尹徐廷玺曾任河工尚属谙练着令前往协理河务

康熙三十八年己卯三月庚午朔

上巡视高家堰等堤

谕大学士等曰朕留心河务体访已久此来沿途坐於船外审视黄河之水见河身渐高登堤用水平测量见河较高於田行视清口高家堰则洪泽湖水低黄河水高以致河水逆流入湖湖水无从得出泛滥於兴化盐城等七州县此灾之所由生也治河上策惟以深濬河身为要诸臣竝无言及此者诚能深濬河底则洪泽湖水直達黄河七州县无泛滥之患民间田产自然涸出不治其源徒治下流终无益也今朕亲阅下河通海之口及射阳湖一带填淤之处于成龙所带効力人员甚多可作速分委并力开濬蓄积之水倘能稍泄庶几有益至於黄淮二河交会之口过於径直所以黄水常逆流而入今宜将黄河南岸近淮之堤更迤东长二三里筑令坚固淮水近河之堤亦迤东湾曲拓筑使之斜行会流则黄河之水不至倒灌入淮矣再河流不迅急无以刷去河底之沙朕详加谘访河直则溜自急溜急则沙自刷而河自深宜於清口西数曲湾处试行濬直如直濬有益渐将上流曲处岁加直濬庶几黄河之险自除而河底渐深洪泽湖之水渐出七州县之水患可渐息矣清口应修之处着于成龙等绘图呈览

是日

上谕漕运总督桑额河道总督于成龙协理河务徐廷玺等曰朕念河道国计民生攸关亲行巡幸由运河一带以至徐州迤南细加看阅见黄河底高湾多以致各处受险至归仁堤高家堰运口等处见各堤岸愈高而水愈大此非水大之故皆由黄河淤垫甚高以致节年漫溢若治河仅筑堤防不将黄河刷深终属无益且运口太直黄河倒灌兼之湖口淤垫以致清水不能畅流各河与洪泽湖之水如何能敌黄水若将清河至惠济祠

埽湾由北岸挑引从惠济祠後入河而运河再向东斜流入惠济祠交滙黄水自然不倒灌矣朕欲将黄河各险工顶溜湾处开直使水直行刷沙若黄河刷深一尺则各河之水浅一尺深一丈则各河之水浅一丈如此刷去则水由地中而行各坝亦可不用不但运河无漫溢之虞而下河淹没之患似可永除矣且拦黄坝湾曲马家港窄狭虽将时家马头之口堵筑而淮水不能畅流山阳南岸韩家庄等处险工甚属可虞今应将清口之西坝台添挑水坝比东坝台加长包裹清口在内择洪泽湖水深之处开直成河使湖水流出黄河湾曲之处直挑引河使各险处不得受冲至於下河现有积水不得不引出归海将串场河射阳湖虾须沙沟一带挑通引积水流出归海拦黄坝应行拆毁时家马头决口俟黄水流定汰黄堤筑成之日再行堵塞至归仁堤之建专为毛城舖等处水涨冲决於此拦回仍归黄河之意此堤亦应酌量修筑尔等务必将各州县水灾尽除方不负朕南巡救民至意若挑挖引河原有工程仍照旧令各官修防不可怠忽俟引河工竣黄水归入故道再将下河串场河射阳湖虾须沙沟一带挑通

引积水流归海而河道永无冲决矣

庚辰

御舟泊新丰

谕河道总督于成龙曰朕自淮南一路详阅河道测算高邮以上河水比湖水高四尺八寸自高邮至邵伯河水湖水始见平等应将高邮以上当湖堤岸高邮以下河之东堤俱修筑坚固有月堤处照旧存留有应修堤岸仍照旧堤坚筑至於邵伯地方因无当湖堤岸河湖合而为一不必修筑堤岸听其流行高邮东岸之滚水坝涵洞俱不必用将湖水河水俱由芒稻河人字河引出归江入江之河口如有浅处责令挑深如此修治则湖水河水俱归大江各河之水既不归下河下河自可不挑濬矣

甲申

上谕大学士等曰朕巡阅河道将高邮州之湖与河水比量河水高四尺余夫湖水既低四尺有余纵水长一丈亦不至泛越且湖水亦断不至高长丈许朕意欲暂留毛城舖高家堰等处减水坝将高邮州以北减水闸坝尽行堵塞高其东岸堤防修筑坚固使在西之水不得泛越则下河之水归海而河道湖身皆出其时作何导濬再行定夺至於邵伯以南河湖合流奔江归海想不至於冲决其他处河道朕亦可保无虞独黄河工程尚难决定相其形势当缓图之

七月庚午

上谕河道总督于成龙曰朕观河图紧要应修者两处前在南方曾面谕尔将人字河芒稻河急行挑濬闻至今尚未动工甚属迟悞又河图内归仁堤便民闸等口俱已堵塞毛城舖迤下各口尚未堵塞既将便民闸等口堵塞则毛城舖等口所出之水由何处泄出必致散漫各处民大受害此处关系紧要宜速议奏闻

九月戊申

上以于成龙所绘河图示大学士等

谕之曰今四海太平最重者治河一事朕前巡视知水之不治皆由洪泽湖水势甚大既不能泄又加黄运两河合并势愈浩瀚以致泛滥昔时原有归仁堤遥为扞御此法最善今已淹没不可考靳辅则筑减水坝名为减水而四处奔泻漂决甚多彼但顾上河而不顾下河水何以治朕意惟有导河稍北使彼不得侵入清水而疏泄洪泽湖使之下流全用清水以刷沙淤如此则水自无不治矣今岁南巡见黄河逼近清口黄水倒灌以致淤垫洪泽湖水不出自高家堰减水坝流入高宝诸湖自高宝诸湖流入运河以致下河田地尽被淹没淮扬所属钱粮虽频年蠲免赈济动帑修理堤岸羣黎尚在水中朕深为軫念遂谕于成龙将洪泽湖出水堤岸



令速完工近差工部官员往看清口仍然淤垫洪泽湖水仍未出口堤岸尚未告竣清口甚为紧要如不将清口挑濬湖水不出高家堰并运河堤工虽加高厚均属无益尔等会同九卿詹事科道详阅河图速议具奏

癸未

上谕大学士等曰原任河道总督董安国所濬引河及挑水坝着发正项钱粮修理给事中张睿条奏中河之水由仲庄闸口流出直射湖口故不但清河水难出即黄河之水反易流入所言甚是于成龙疏内竝未叙及朕观于成龙但以修堤为要务若朕意则以决出清河之水为是尔等再议着于成龙亲至仲庄闸详视议奏

甲申

上谕大学士等曰朕抚御寰区爱养兆民务期人各得所比年淮扬所属地方罹於水患百姓田庐俱被淹没生业荡然深切轸念屡经蠲租赈济乃黄河垫高清口低下淮水不能流出百姓仍被水灾念此淮扬数州县生灵岂可不急为拯救乎今或坚修高家堰堤岸以束淮水使之刷黄或移清口於清江浦之左右或另濬河道以通舟楫俱宜一一讲求此事关系甚钜尔等会同九卿詹事科道细阅河图详议具奏

十一月乙巳

上谕大学士等曰于成龙奏称清江浦西界黄水高於淮水一尺淮水高於运河之水七尺运河之水高於平地七尺合而观之淮水高於运河西堤外平地共一丈四尺今惟以清口自河之下流沿武家墩由清江浦之北另行改移中间河身量留八九十丈空地两旁坚筑石堤俾清水畅達此所当急议者夫清水建瓴迅下则易出黄水不致倒灌其石堤之间已为河身不烦挑濬即水涨之时其高不过等於运河安能泛越高家堰哉但如是改移朕恐别有所碍不能永远故少为踌躇耳尔等确议具奏

是日工部等衙门议覆河道总督于成龙疏言挑挖烂泥浅等处及速完高家堰堤工应如所请

上曰河工关系甚大高家堰堤岸纵多方坚筑清水亦不能出今惟当议移清口於他处两岸俱用石工坚砌使清水流通朕南巡时曾以另开清口面谕于成龙彼亦奏称淮水可从武家墩向清江浦移改此事着河道总督于成龙及府尹徐廷玺会同河道各官亲看清口当移於何处即行详议於岁前具奏

丁未

上谕大学士等曰河图绘於纸上平漫难辨高下朕欲改清口刻木制成一图观看易明着侍

郎常綬前往河工会同于成龙清口应否改移详加看阅岁内着速回具奏

十二月辛巳奉差勘阅河工工部侍郎常綬等回奏

上谕大学士等曰据于成龙等之意以为改移清口清水固易宣泄遇水泛时新修堤岸难保无虞必将高家堰减水坝尽行堵塞而加筑之始有裨益洪泽湖原系陆地於此处筑堤蓄水与山东峰山湖南旺湖相同大水之年纳之以蓄水大旱之岁出之以助运彼时河身洼下故洪泽湖水一则敌黄一则济运今岁久沙壅黄河底垫不但黄水反高於清水清水势不能出而黄水复致倒灌於是洪泽湖底亦渐淤垫高地丈余水面上浮矣此清口所以淤塞也尔等会同九卿确议各陈己见直言勿隐

壬午大学士等会议河工事务入奏将给事中陈诜以深濬河身为要缮摺呈览

上曰河身宜加深濬人所共知但难得其法耳朕亦留心於此今永定河虽小仿佛黄水欲以水力刷濬之法试之使河底得深十月间往视之时曾谕李光地等令将河身束之使狭坚筑两边堤岸若永定河行之有效即将此法用之黄河否则另当设法安可轻举九卿内如有淮安扬州人令各抒所见奏闻侍郎李杲奏曰高家堰之堤一决则淮安扬州一带难保无虞请将高家堰堤工速加增修

上曰洪泽湖之水长势不得不将高家堰增筑待加筑高家堰後试观清水由清口出否至於邵伯冲决之口若不预行修筑则明春更可虑矣又

谕曰若将高家堰减水坝堵闭建造滚水坝土堤加帮高厚则湖水必高黄水又大湖水不出之时高家堰堤工危险而泗州等处必至水淹尔等会同九卿詹事科道确议具奏

康熙三十九年庚辰三月丁未

上谕河道总督张鹏翮曰海口至清口相隔辽远今所急者清黄相会之处最为紧要黄水高故清水不得通泄曩者高家堰去水尚远今与培筑堤岸相平但令清水何以得出河身何以得深此系尔当图画効力者更楼口亦属紧要所宜速为修竣水老鹳等物靳辅当时亦曾用之毫无裨益此数事尔到任详察宜作何举行再为奏闻朕以尔清廉因特简任所发钱粮仍於河工支用堤岸自然坚固事无不济矣

康熙四十年辛巳七月己丑

上谕大学士等曰前河道总督于成龙具疏欲将高家堰六坝堵塞蓄湖水以敌黄水疏通清口因遣尚书范承勲等堵塞六坝顷因巡抚高承爵题报泗州盱眙水灾朕敕张鹏翮会同江南总督阿山踏勘情形将泗州盱眙泛滥之水设法修治作何赈济蠲租又以洪泽湖水泛涨高家堰堤工恐致危险作何保守坚固着张鹏翮陈奏乃张鹏翮疏称泗州盱眙水灾自古已

然即六坝全开泗州等处亦被水灾且六坝既闭高邮宝应等州县田地涸出民得耕种皆河伯效灵所致朕着张鹏翮会同阿山将泗州盱眙泛滥之水作何设法筑堤帮修或赈或蠲俱有益於灾黎竝非欲开高家堰六坝救泗州盱眙之民而令淮扬百姓罹於水灾也朕念黄河运河关系国计民生三次看阅河工屡次简任河臣修筑堤岸每岁不惜数百万帑金夏月雨水时昼夜忧虑不时遣人看视凡被水之处截留漕米尽出仓粮赈济总为拯救灾黎岂止救泗州盱眙之灾而淮安扬州等处百姓听其罹灾乎今现有居住贺兰山後公云木春来朝见朕问河西雨泽黄河水势云木春奏今岁自正月至六月滴雨未降黄河水消二丈有余此实因黄河水小清口之水幸而得出竝非伊効力之所致也统一天下之主坐视灾黎不为拯救有是理耶

十二月庚午

上谕大学士等曰高家堰等处堤工虽竣然未遇大水俟来年经过水汛之後方可验其成功若烂泥浅一带水出不畅则高家堰?属可忧向意欲从武家墩出水此事尚须酌之前日问张玉书奏称淮水尚大旧堤俱为湖水所侵此则泗州盱眙安得不被水灾河身之浅深以洪泽湖水之高下为验湖水低得一尺河身方深得一尺今洪泽湖之水比甲子年高有数尺可见河身未

曾刷深高家堰之堤恐过此以往尚未可知也

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十三

# 卷三十四

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十四

治河二

康熙四十一年壬午五月壬辰户部题江南赈济盱眙等三县水灾饥民米数

上曰前议加筑高家堰堵塞唐埂六坝时朕曾言如此修筑虽有济於下流其上流州邑必致冲决今信如朕言观此散粮之事盱眙等三县大被灾害若昔议筑高家堰之日於此处亦筑一堤束其水势不令泛滥岂不甚善该督斯时虑不及此卒令此等地方悉受泛滥之水今欲修难矣其令张鹏翮往勘以闻

九月甲子河道总督张鹏翮疏言桃源县烟墩一带因对岸沙滩挺出河心逼溜南行恐被冲刷请於北岸邵家庄开挑引河建筑草坝以分水势又顔家庄水势逼射北岸亦请开引河一道则水流顺下而险工不受冲激矣

上谕大学士等曰此本若敕部议必致迟延着即照所题行朕观永定河修筑之法甚善河身直河底深所以淤沙尽皆冲刷今治黄河亦用此法方为有益此工多费不过十万两试照永定河修治之

丁卯河道总督张鹏翮疏报秋水情形

上谕大学士等曰览奏挑水坝筑成逼黄河大溜直趋陶庄引河循北岸而行黄水从大通口畅出海口极其深通淮水从清口畅流敌黄绝无黄水倒灌之患高家堰堤工完固加谨防守经伏秋大涨俱获无虞运河水由泾河涧河人字芒稻等河分泄各处工程亦皆保固观此河工大有望矣又

谕曰今所开陶庄引河甚善朕巡视南河时曾令员外郎黑硕色将引河之桩加意深筑其疏濬人字芒稻二河亦佳得此二河运河甚为有益朕观明朝治河俱自徐州以上在河南地方修筑我朝自康熙元年以来俱在徐州以下修筑然治下流须预防上流若上流溃决下流必至壅滞嗣後徐州以上地方河臣亦当留意再黄河之水迁徙无定朕前在宁夏之时见黄河大溜每年更移今年在此来年又移他处其性如此况九河故道原在河间地方後渐移向南历代以来果能每年防御相机修理则河道何至如此大坏皆因时当多事或十年或五年不修筑不开濬所以渐难治矣明朝三百年间尝讲求河工治法彼时措置亦得其宜如山东微山湖将水蓄聚山中涝则蓄之旱则泄之皆深有益於治河者也

康熙四十二年癸未二月庚辰

上巡视河工舟泊天妃庙

谕河道总督张鹏翮曰归仁堤引河用以分泄洪泽湖之水势若黄水加长则恐清口水弱着将祥符闸下板塔闭草坝将五堡闸酌量开放以助清水之势

三月戊申

上谕河道总督张鹏翮曰高家堰工程关系重大保守最为紧要朕今日乘舟由洪泽湖閱视见有残缺石工以苇草镶填倘遇水发危险堪虞至六坝见新修石堤坚固方慰朕怀其残缺石工着即兴修乘水未长之先完工用资扞御至高家堰防险之人用候选县丞经历等微员此不过例监书办出身家产微薄倘有疏忽干系不小须於候选官员内择其职衔稍大身家殷实者委令防险如此则彼知自爱身家又有选用之望自能尽心防守有裨工程

十月己卯

上谕大学士等曰朕观河道已治河道总督张鹏翮及河工官员俱甚効力黄河一切工程朕知之甚悉先是永定河用埽甚有裨益是以朕谕张鹏翮黄河亦宜用埽张鹏翮回奏永定河势小可以用埽黄河势大难以用埽朕谕姑用之张鹏翮因而用埽河堤今果坚固至於洪泽湖水势甚险而堤岸复高往来舟楫一遭漂没人命辄难救援朕曾谕沿岸将长木桩斜钉於水中船虽漂没人尚可攀援获命俟於钉桩後验之

是日

上谕吏部工部黄淮两河关系运道民生最为重要朕念治河国家大事夙夜廑怀未尝少释披图咨衆虽已悉其源流顾水势变迁不常必确知洞悉方可实见施行是以不憚勤劳屡亲巡閱察其险易之形势审其疏导之机宜缓急次第俱有成画至於简命河臣倚任甚切凡所属官吏皆听举用大修工程费以数百万计岁修帑金亦以数十万计乃康熙三十七年黄淮竝涨河道总督董安国不坚筑堤堰疏通海口因而河身垫高溢出河岸以致倒灌洪泽湖口湖水从六坝旁泄由运河入下河淹没民田於是罢董安国以于成龙代之朕随授以治河方略详加指示康熙三十八年亲往閱河驻蹕清口河干又面谕于成龙清口宜筑挑水坝挑黄水使趋北岸方可免倒灌清水之患随指定其地再三申

命于成龙不遵朕旨致无成功及用张鹏翮为河道总督面谕云坝已发帑金数百万令大臣官员往高家堰筑堤闭六坝使逼洪泽湖水畅出清口而清口筑挑水坝尤为紧要此坝不筑则黄水顶冲断不能使向北岸湖水必不得畅流张鹏翮遵奉朕言坝工筑成黄溜遂直趋陶庄清水因以直出疊经伏秋大涨竝无倒灌之事其浚张福口等引河筑归仁堤疏人字芒稻泾涧等河开大通口皆遵朕旨一一告竣今年春朕閱河至桃源见龙窝等处顶冲危险命增

筑挑水坝工刻日讫事河势遂平中河仲庄闸口以与清口相对特命改由杨家庄漕挽安流商民利济曩时黄水泛涨或与岸平或漫溢四出今黄河深流河岸距水面丈余纵遇大涨亦可无虞矣张鹏翮所修工程虽悉经朕裁断而在河数载殫心宣力不辞艰瘁又清洁自持一应钱粮俱实用於河工无纖毫浮耗朕心深为嘉悦所属大小河员竝皆勉力赴工共襄河务亦属可嘉自总河以下各官尔二部即加议叙具奏

康熙四十四年乙酉二月庚寅

上巡视河工舟泊土桥闸

谕大学士等曰河道总督张鹏翮昨日来问以河工形势彼云河已治矣从前骆马湖口设竹络坝湖水大则从坝流入黄河河水大则溢流入坝内今竹络坝止有湖水畅流黄水竝无浸灌则黄河之深通可知闻下河等处地方连年皆大熟亦从前所未有也

三月乙巳

上谕河道总督张鹏翮曰河工已经告成善後之策更为紧要朕今亲临閱视修建天妃闸甚当倘黄水长至五六尺而清水不长则势弱不能敌黄黄水倒灌亦必致之理岂可因此即谓治河失策乎若遇倒灌即将天妃闸暂时下板蓄清水全力以敌黄流不过数日黄水即退遇粮船过时即起板开放若黄水不灌入不必下板其惠济祠一带虽建有石工但运河与黄河止有一线之堤若黄溜冲刷石工恐不足恃可於上下适中之处相度形势修建挑水坝三四处挑溜开行其王公堤亦应相度形势修建挑水坝其运河东堤保守最为紧要堤岸应行加帮其高邮迤南湖河水势相平界首迤南河水高於湖水东西两堤卑薄应加帮修可量建石工淮安近城堤岸卑薄之处亦应相度形势修建石工黄河南岸堤工关系紧要应加谨修防至於直隶山东之河与河道总督相距甚远应照河南例各交与该省巡抚就近易於料理其杨村通判竝无经管之事应行裁去尔会同行在九卿速议以闻

壬子

上谕河道总督张鹏翮及河工官员等曰今河工虽已告成不可不预为修理防护以图善後之策朕见淮扬一带堤岸卑薄未甚坚固倘不加保护以致冲决则淮扬地方百姓何以能堪尔等宜急筹之

闰四月癸卯

上幸高家堰遍閱河堤

谕河道总督张鹏翮曰朕於康熙四十二年临閱高家堰时尔奏石堤可於八九月间告成今已三年尚未完工万一水大奄至恃此草埽詎能御之张鹏翮奏曰必能保固断然无害

上曰草埽俱经二三年矣腐烂沉塌者多猝遇大水事难预料如不谨慎修筑被水冲决枉费钱粮姑置无论但去年已奏河工告成今年又奏冲决其谓之何尔须日夜谨守保护夫治河莫要於得人观尔所用之人每多有失岂可倚任此辈分守此堤耶尔等惟见清口之水畅流即以为功成不思防御倘高家堰六坝之水泛滥则清水力弱而黄水必复致倒灌矣夫高家堰关系紧要宜谨识之毋忽

是日

上幸惠济祠閱视毕

谕大学士诸大臣及河臣等曰朕留心河道亲閱者屡矣河之形势必身历其地始知成功之次第朕每至河上必到惠济祠以观水势康熙三十八年以前黄水泛滥凡尔等所立之地皆黄水也彼时自舟中望之水与岸平岸之四围皆可遥见其後水渐归河岸高於水今则岸之去水又高有丈余清水畅流逼黄竟抵北岸黄流仅成一线观此形势朕之河工大成矣朕心甚为快然也

乙巳

上谕河道总督张鹏翮曰惠济祠前植标杆处可建挑水坝祠後埽湾处亦宜建挑水坝以保淤滩但此二处挑水坝俱不宜太长恐逼水尽向北岸有碍杨家庄河口至卞家庄旧坝修建甚佳再略加寬长更善

丙午

上谕河道总督张鹏翮曰九里冈堤工修理得法不似从前直埽不能挑溜今修鱼鳞埽逐段挺出逼溜开行使洼处渐淤此法甚善其埽工钉桩处可再建挑水坝二座若恐水深则先建矾嘴坝形出水俟其坝下渐淤层次加修则料不加多而功易成矣

七月壬申

上谕大学士等曰今春朕欲亲閱高家堰张鹏翮奏称堤岸工程俱完又时当炎暑蚊蟲正起求停止亲閱恳奏再四朕以高家堰关系甚大亲往閱视见石堤尚有未完之处所下之埽已经二三年者朽烂亦多将此情形一一指示张鹏翮及河工诸臣朕又谕张鹏翮大水时?难以预料尔务须昼夜防护至分守堤工人员委用不当朕亦谕及今据张鹏翮疏报古沟唐埂清水沟韩家庄四处堤岸冲决河工将有复坏之势大小河员惟知清水畅流为己功而不知高家堰之六坝水泄太多则清水力微黄水必复倒灌也此事着九卿詹事科道速行会议具奏

丙戌

上谕大学士等曰凡人必试之而始知张鹏翮多疑今即遣旗员前去未尝一试而张鹏翮早疑其不清人亦何心为彼効力夫高家堰之堤全当洪泽湖之水开六坝虽民田略有冲没淮扬地方断无可虞如以为利益民田而闭六坝万一大水骤涨而堤决淮扬大有可虞矣是以前总河靳辅开六坝以注水涨张鹏翮但知闭六坝则运河民田均有利益而不知为淮扬之大患高家堰之所关甚为紧要也

十月甲午

上谕工部方今海宇昇平惟以安阜黎元为急东南要务莫重於河防朕数经南巡指示修筑方略凡以筹运道济民生也自曩岁两河先後冲决而黄流淤垫继以高家堰唐埂六坝久决未塞而洪泽湖水直从决口旁泄以致淮水力弱黄水倒灌全河几至溃坏於是分遣廷臣发帑金数百万增筑高家堰尽闭六坝俾淮水全注清口又特筑挑水坝以逼黄溜趋向北岸仍开濬陶庄引河以导黄北流然後无倒灌之患康熙四十二年以

河工渐可底绩躬亲临视时高家堰石工尚多未竣飭令迅速修筑又因仲庄闸水势湍急恐逼黄流倒浸清口遂命闭仲庄闸改建杨家庄闸闸工既成今年春复往巡閱比至高家堰见石工仍未完固旧埽亦多朽塌谕河臣张鹏翮谓水势无常修防宜豫一有疎忽则前功尽隳且甫奏安澜旋报冲决天下其谓之何张鹏翮奏称堤工扞御可以无虞迨伏汛大水骤发果冲决古沟唐埂清水沟等处淮扬一路田亩被淹者甚多今已严飭堵塞决口刻期竣工朕屡亲莅河干详度形势当水涨之时若高家堰及运河减水坝不令开放则堤堰甚为危险若开坝宣泄则间阎陇亩必致淹伤方春水涸民间尽皆播种一经夏水骤涨开坝放流而所播之种尽皆淹没朕心惻然殊为不忍使不设法导流俾水有所收束则濒湖及下河民田究不免水患朕再三筹画宜於高家堰三坝之下挑濬一河两旁筑堤束水引入高邮邵伯诸湖湖外亦量筑土堤不使漫溢其高邮减水坝亦挑濬一河两旁筑堤束水由串场河入白驹丁溪草堰等河白驹等河淤浅之处竝开濬深通俾之入海如此则各坝所出之水不致有涣散冲流之害又洪泽湖水势大涨泗州盱眙等州县俱被水灾应於泗州一带受水之地亦酌量筑堤束水毋令泛滥则所全於淮安扬州凤阳三郡民生者多矣此事原於河道无涉在河官止知保护河道不复详计民生朕惟民间田亩所系甚重宜图万全可久之策筑堤束水行之北河业有成效则施之南河当亦有济应从何处筑堤延袤若干里需费几何行令江南江西总督漕运总督河道总督江苏巡抚会同确勘详议具奏

康熙四十五年丙戌正月己巳工部等衙门议覆江南江西总督阿山等疏言河工重大需餉浩繁伏候

皇上亲临河上指示方略

上谕曰朕屡经躬閱河道凡河工利病地方远近应分应合应挑应筑之处知之甚明虽有未及经历之地而向来輿图地名熟悉於衷亦可即行定夺迨者数次南巡见与陆路不同濒河官民不无劳扰因此朕不必亲往閱视阿山桑额张鹏翮等所看已属周晰但此工程不应



交与总河修筑应多派大臣官员分工速修

己卯

上谕大学士等曰朕昔亲临河上欲往下河因张鹏翮奏言断不可往是以中止今即去仍然不能亲莅其地则亦何事复往但河工钱粮断不可交地方官当照山东赈饥之例将八旗官及部院官内有行止端正者令该旗大臣及部院堂官多行保举派出再将江宁镇江杭州驻防旗员亦着该将军副都统保举派出或副都统或协领带赴工上其京城派出官员领户部钱粮带往各省派出官员各就近地领钱粮带往可派大臣督理工程所派官员每人各给银三千两务令照三千两工价分地开工如此始得河务速成有利民生着九卿再议具奏至高家堰若不预行修治必有可虞已有旨谕张鹏翮而彼坚称断断无虑若今年不修治高家堰倘有冲决即开河何用此两事中高家堰尤为紧要尔等可将谕旨付挑河大臣转交张鹏翮一并议奏

壬午工部等衙门覆奏挑河事宜

上曰尔等所议尚有未详至将情愿往河工効力者令照山东养民例尤为不可山东养民者名为捐助及其後皆无实际所欠银两皆朕豁免况所去人员亦甚放纵今挑河之事俱有丈尺稍或不实即悞公务而前去人员若仍行放纵尤贻害於地方尔等於严行禁止之处并未议及着再议具奏

五月戊午朔

上谕大学士等曰去岁巡视南河曾於衆人前言高家堰堤工不坚尚宜增筑张鹏翮以河工已完断然无害朕谓尔虽言工完朕不能信及後堤工溃决幸是唐埂六坝上流若在下流冲决如何堵御康熙七年九年二十二年七里沟清水潭龙窝等处冲决之时其水甚大去年水不甚大然而冲决者河臣自以为河工已完玩忽之所致也

十月辛丑

上谕大学士等曰河道总督报秋汛疏二十日方到朕屡次亲閱河工洞悉情形如奏报水汛事早到则其中或有所指示犹可及时预防嗣後有奏河工急务者限两三日飞驰递送

康熙四十六年丁亥二月癸卯

上巡视溜淮套驻蹕曹家庙地方

谕扈从文武臣工及河道总督等曰前阿山等察勘泗州水势奏称溜淮套地方另开一河出张福口可以分泄淮水免洪泽湖之异涨保高家堰之危险绘图进呈请朕亲閱在廷诸臣亦

以河工事关重大再四恳请朕始亲行今详看地势甚高虽开凿成河亦不能直达清口且所立标竿多有在坟上者若依所立标竿开河不独坏民田庐甚至毁民坟塚朕惟恐一夫不获其所时存已饥已溺之心何忍发此无数枯骨数年来两河平静民生安乐何必多此一事先年靳辅开中河以避黄河之险确有成效然亦止因旧河身疏濬今若欲开濬溜淮套必至凿山穿岭不惟断难成功将来汎水泛溢不漫入洪泽湖必致冲决运河矣又

谕曰明代淮黄与今迥别明代黄水势强淮水势弱故有倒灌之患朕自甲子年南巡閱视两河形势渐次修治今则淮强黄弱矣然善後之策尤宜亟讲与其开溜淮套无益之河不若将洪泽湖出水之处再行挑濬令其寬深使清水愈加畅流至蒋家坝天然坝一带旧有河形宜更加挑濬使通运料小河俾商民船只皆可通行即漕船亦可挽运为利不浅矣

乙巳

上谕河道总督张鹏翮曰尔身任总河河工事务漫不经心今又以溜淮套地方可以开河请朕亲临殊属欺诳张鹏翮免冠谢罪恳

恩寬宥

上曰赏罚者国家大权内而九卿外而督抚原为尽忠於国惠养斯民而设非徒使之荣显晏安而已大吏廉洁则小吏自然效法苟不能勤慎致悞公事岂可因保全一人而废国法乎凡事有可以保全者亦有当用刚断者国家臣工甚多姑息一二人何以服衆朕自甲子年至今六次南巡详观河形一年异於一年治河之道当看何处关系紧要便保守何处不可执一自古治河皆顺水性为今之计但当使淮水稍泄其流乘水未长时预为绸缪将来水虽大长必不致於危险天然坝一带旧有河形当挑濬此河酌量可容粮艘建立闸座水小则闭闸蓄湖水以敌黄水大则开闸使之畅流一面由武家墩通至运河一面通至高邮湖则商民船只皆得长行尔即公同在河能员定义具奏

五月癸丑

上谕河道总督张鹏翮等曰古今治河形势不同旧时常患清水不足敌黄水每有黄水倒灌之虞今清水敌黄水有余运河清水甚大反流入高邮湖设高邮湖水长溢入运河则运河东堤受险少有疎虞虽堵塞不难而生民田庐不可问矣应加谨防护以保无虞清口湖水七分敌黄三分济运今应将大墩分水处西岸草坝再加挑寬大使清水多出黄河一分少入运河一分则运河东堤不致受险又於蒋家坝开河建闸引水由人字河芒稻河入江新修五里滚水坝由下河及庙湾等处入海不惟洪泽湖之水可以宣泄而盱眙泗州积水田地亦渐次涸出水小则下板蓄水以敌黄水大则启板泄水且便於商民舟楫往来其祥符闸口门甚窄狭趁此黄水不甚高之时将归仁安仁利仁三闸委干员改寬泄水则徐州一带民田可无淹没之虞矣

康熙四十七年戊子五月辛巳工部议河道总督张鹏翮疏言高家堰下山阳盱眙二处增设救生桩银两请另行设法不动库帑应无庸议

上曰朕南巡閱河见洪泽湖风浪危险堤岸陡立商民船只触石损坏伤人甚多朕心时切轸念因特令河臣沿河堤创设救生木桩自设桩以来数年内竝未损船伤人於商民大有裨益此桩应时加增修愈多愈善嗣後着江寧苏州杭州三处织造每岁於节省银内各捐五百两解送总河衙门以备救生之用该省逐岁增修存案不必奏销如不实行修理於别项支用者从重治罪

康熙四十八年己丑十一月庚寅

上谕户部尚书张鹏翮曰河工虽奏绩然不可一日不防倘两堤稍有疎忽则前功尽弃盖河源出於崑仑朕曾遣官往视上流水长则陕西河南江南之水俱长知之甚详尔可宣旨赵世显令行文川陕总督甘肃巡抚倘遇水大之年黄河水涨即着星速报知总河预为修防始得保全也

康熙四十九年庚寅十二月庚辰河道总督赵世显摺奏御坝西坝工程请修筑加长

上谕大学士等曰御坝西坝关系紧要甲子年朕南巡时清流不畅黄水倒灌以致洪泽湖上流淤垫朕指修御坝西坝清水遂畅然流出黄水不致倒灌淮黄交会之区始得安澜但其地甚卑湿彼时朕步行閱视十余里泥泞没膝指授方略总之治水如治天下得其道则治不可用巧妄行靳辅善於治河惟用人力于成龙心计太过张鹏翮但遵旧守成法而已张鹏翮系汉人岂能乘骑在在驰驱料理惟於朕谕遵行不违是以河工底绩耳今御坝西坝加长工程俱如所请令及时兴工修筑

康熙五十年辛卯二月戊辰

上谕大学士等曰河务甚难朕昔因挖子牙河亲身往视有大城武清县民跪於两岸互相争诉朕慰之曰尔等勿得争竞朕自有处置之法因一一指授监修官员而回後河工告成於两处百姓均有裨益前张鹏翮任总河时来陛见朕训之曰尔於河工不可任意从事但守成?遵奉朕谕而行及修御坝之时朕亲身指授钉桩张鹏翮遵朕指授修建自此坝告成清黄二水始会流入海矣黄河水性善於更移朕幸宁夏时由黄河行二十一日至湖滩河朔因边外无修治之人故黄河处处更移视水性每向南流北岸尚可南岸多被冲决古时黄水由天津碣石而流此言载在书经禹贡後又移流在德州自後渐移於南方矣治河固宜顺水性亦在随时调度今使诸水入大海者岂尽随水性哉

康熙五十五年丙申十月丙申河道总督赵世显疏言管河官员遇有丁忧回籍者请仍留河工効力

上谕大学士等曰河工告成二十余年善後之方不可不讲在工之人必年久谙练方能办理譬如行军务须曾经出征者始於营伍熟谙况黄河之水迁徙不常最难疏治如下埽筑堤建挑水坝非久於其地之人不能熟悉着照所请行但筑堤亦有不同黄水难於修筑而易於保固清水易於修筑而难於保固此又不可不知清水畅流可以刷沙使河水深通永无倒灌之虞然欲使清水畅流必全闭六坝使尽由清口而出方能敌黄朕昔南巡乘船閱河堤内居民历历可见今於堤内望黄河行舟帆檣皆不可见可知近日河水之深矣

康熙五十七年戊戌三月壬子

上谕大学士等曰朕昔南巡时会乘舟閱视沛县在运河之西隅地势洼下积水甚多常因运河水浅穴堤引所积之水泄入运河今看每年沛县之田皆以被水灾具奏特以沛县地势洼下常被水灾遂视为一定之事虽不成灾亦以成灾奏请蠲免钱粮耳将沛县所积之水作何区画与民有益之处尔等会同九卿议奏

康熙六十年辛丑四月庚子

上谕大学士九卿等曰朕於河务留心最切经历最深往年屡次閱河时精力尚强亲乘小舟不避水险各处周

览凡水泉源委皆知之甚悉山东运河全赖衆泉蓄泄微山诸湖以济漕运今山东多开稻田截湖水上流之泉以资灌溉上流既截湖水自然无所蓄滞安能济运水在地中如人身之有血气血气有余方可用渗泄之药若血气不足正需滋养安可再加渗泄乎地方官未知水之源流一任民间截水灌田以为爱恤百姓不知漕运实因此而悞也若不许民间偷截泉水则湖水易足湖水既足自能济运矣今不讲究本源但见湖水日少河身日浅徒事开濬假使河身日深泉水不继虽费百万帑金终归无用且古人所置南北诸闸更将何处以处之古人置闸其远近疎密皆因地形高下水势缓急以为蓄泄或一处二闸或一二十里一闸确有一定丈尺不可更易分水龙王庙闸座尤关紧要当时宋礼用白英老人之策筑戴村坝以遏汶水导之出鹅河口入南旺湖然後水流南北以分水口为水脊盖山东登莱诸山之脉自关东来结为泰山是北干分支之一在黄河之东而黄河之西山脉自终南太一南屈淮汝为中干分支之一黄河行乎两支之中故昔时河自天津入海以後渐徙而南至淮安入海而登州以上马谷山以下从无黄河之迹者山脉限之也分水口之水脊又为泰山分支之分脊处白英积数十年精思确有所见定为此议宋礼从之因势均导南得七分北得三分增修水闸以时啓闭漕运遂通此等胆识後人实所不及亦不能得水平如此之准也今此二闸最宜斟酌啓闭若浅於南则当闭北闸使分北之水亦归於南浅於北则当闭南闸使分南之水亦归於北湖泉竝注南北合流虽有旱暵亦无虑矣岂若徒事开濬劳费而无益乎往年山东百姓欲开新河朕恐其下流泛滥降旨弗许今巡抚请开彭口新河此地一面为微山湖一面为峰县诸山更从何处开凿耶着张鹏翮到山东将朕此旨详谕巡抚申飭地方官令其相度泉源蓄积湖水俾漕运无悞特易易耳黄河关系最大自元至明岁有冲决未有安澜二十年如今日者然图治於已治保安於已安河工虽已告成尤当时加巡视不可疎忽今春多风而少雨恐秋间雨

水必多地方官宜加意堤防张鹏翮去看山东运河由临清起至韩庄闸韩庄闸离邳州不远并往视邳州低洼之水曾否泄出太行堤有坍塌之处亦当往看有贤能司官多带几员去地方有用着之处即留彼处料理

九月甲午

上谕大学士等曰黄河迁徙无常每有冲决堤岸淹没田庐之患昔黄河会九河从天津入海後渐迁徙而南约讨迁徙之地已千余里矣汉武帝塞瓠子口嗣後代有冲决朕留心河务屡行亲閱动数千万帑金指示河臣修筑高家堰石堤及凡应修筑之处奏安澜者几四十年於运道民生均有裨益前巡幸至湖滩河朔保德州横城潼关孟津徐州宿迁邳州桃源清口等处俱曾渡河自横城顺黄河下流历人所未经行之河套凡舟行二十二日直达数千里所至之处无不详视惟孟津渡河时因淤沙不能直渡委折而行彼时朕即虑沙淤则流滞堤岸必致冲决今据报黄河冲决流入沁河泛滥至直隶长垣县等处若今冬将决口堵筑坚固可保无虞否则自决处以下势分沙壅河水陡长堤岸之危非一所矣昨赵弘燮奏河决之处或在瓠子口以上或在瓠子口之下并河道情形着详问九卿及在京河南省官员具奏

壬寅

上谕大学士九卿等曰直隶总督赵宏燮奏河南黄沁冲决堤岸水势泛滥至长垣等处朕即遣官查视所决地方据奏河南武陟县黄沁之水冲决堤岸由长垣流入山东张秋镇又据山东巡抚李树德奏河水泛滥自直隶开州流入山东张秋镇由盐河入海以致运河堤决漕船阻滞其冲决堤岸见在修筑朕思此冲决之处只可略加修防使漕船无阻如竟行堵塞水无归泄之地他处又必冲决断乎不可开州系古黄河故道今黄沁泛滥由开州至山东地方已成河道矣将来堵塞完工不使沁水入黄直引至山东或有裨益亦未可定朕留心河务各处黄河渡口俱曾亲历适遣往看河之官所呈图样及李树德所进河图朕俱详览知之最明尔等缮写谕旨发往张鹏翮处伊所审事毕着即会同总漕施世纶至张秋镇等处详行查勘料理使漕船往返不致迟悞如张鹏翮已回即於接旨之处作速前往至修筑决河甚属紧要朕自京中另遣专官着总河赵世显将熟练河务官员工役派出并将修筑物料多行备办速发往河南冲决地方

丙午

上谕大学士等曰朕因黄沁二水泛滥漫及长垣等县曾谕尔等以堵塞之後不使沁水入黄引入山东漕河於运道民生大有裨益尔等可将此河图发与九卿共閱即着定议具奏将来引沁入运之後遇水大时流至天津恐河身不能容纳必令於盐河泄其水势方可无虞直隶山东河南被水之民应行赈济着该督抚各行查奏

丙辰

上諭大學士等曰堵筑黃河漫溢工程此第一緊要之事着副都御史牛鈕侍講齊蘇勒員外郎馬泰前往監修其堵筑時宜先於上流建挑水壩以殺水勢俟沙淤後再漸次加筑則漫溢之勢自平而堵塞不甚費力矣朕於清口建築挑水壩時曾經指示此事齊蘇勒馬泰等悉知之至於前項工程毋得吝惜錢糧河南地方河底不凍今冬宜作速興筑其建挑水壩之時應挑引河黃河有曲折之處即成洲渚務詳勘酌量取直挑成引河俟黃河決口堵塞報竣之後再引沁河濟運分水龍王廟之中八閘北八閘春時水淺船行有阻應將沁河之水於此處引入運河如不能容納由鹽河洩其水勢自於運道大有裨益分水龍王廟南八閘水多不需水濟朕另有旨與張鵬翮令學士格爾布前往宣諭再徐州下流黃河可以無虞獨徐州上流黃河多有沙淤不可不預防冲決將此旨宣諭該管各官宜先防備

大清聖祖合天弘運文武睿哲恭儉寬裕孝敬誠信中和功德大成仁皇帝聖訓卷三十四

# 卷三十五

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十五

治河三【附】运河

康熙三十五年丙子六月戊戌先是

上以每年漕运迟滞命大理寺卿贝和诺往漕河封闸蓄水故粮艘抵通较速於昔至是贝和诺回奏

上曰济宁以南各闸止赖一峰山湖之水以济其流岂可令其启闸不时耶此法既於漕运有益着每岁遣官行之

康熙三十七年戊寅十二月丁未

上谕大学士等曰运河一带惟黄水清水交汇之处甚属紧要此处得宜则他处易治前日于成龙亦谓大墩地方紧要此处修筑坚固始可无虑此言极是夫河务深微不访土着之人不可而全听其言亦不可如向日天妃闸以板阻水启板行船须五六百人撙挽方得过闸今已平缓船只不需撙挽坦然而行以此观之乃时候之不同也

康熙四十三年甲申十月戊辰朔

上谕内务府郎中齐苏勒曰耍儿渡东旺西旺等处运河两边向来皆沙其堤工系沙土筑成故不坚固且又敌数处山水兼之海潮一日二次倒灌所以逼回运河之水不及流行常涨满盈出於堤者因不能容受之故朕前閱杨村相近有旧河形迹一道即於此间建减水石坝以分水势甚为有益此处近海疏通甚易所分之水不可使通百灵港宝坻县香河县此三处地势低洼难以抵敌至建造减水坝须口宽四五十丈以石铺之使尾长而斜坚固修筑若水长不至四尺不能越减水坝可将见存旧河形迹挑宽十丈将土即筑两边之堤尔会同直隶巡抚李光地前往验看丈量具奏

己巳

上谕大学士等曰曩日耍儿渡等处堤岸常被冲决是以朕亲临遍视见杨村原有一引河去海尚近即欲疏此引河建滚水坝水长开闸使河水入海因需饷浩繁又恐无益故不轻举朕今遣李光地等往估欲仍开此引河大都天津海潮至时一股向王庆坨一股向杨村逆流故

河水长时即相触旁流以致堤岸冲决今将杨村旧引河挑濬建坝自必有益再子牙河广福楼亦有引河昔开引河时文安大城百姓谓开河於彼有益而青县等处百姓则称开河於彼不便互相争论皆集河干各控其情及朕谕以挑此引河不独便於文安大城而青县亦自无虞民始各退後果两处皆便矣

癸巳

上巡幸畿内临閱齐苏勒等所勘薛家庄拟筑减水坝之

处

谕大学士等曰此处迎溜顶冲若筑减水石坝遇水涨时石坝虽不妨而两边土坝可虞如水涨过四尺由减水坝流出视其流高几寸可算知一昼夜水泄几分如能流泄水之三分则大有济矣此处河势南岸露出矾嘴北边暗被冲刷今已近北岸矣朕向巡幸西塞之外见黄河一边露出矾嘴则一边必然冲刷水性原如此朕故知之此处断不可筑减水坝也因问之土民皆云三

十年前河原近南岸衆皆惊服

甲午

上閱视筐儿港堤工

谕齐苏勒等曰昨日踏勘之处迎溜顶冲彼处若筑减水坝甚为可虞倘水发时冲刷其东则所筑减水坝反在河中徒费人工矣其杨村以南河岸离堤虽远而相其地势亦难修筑此筐儿港近处有矾嘴与河堤相去不远且河路又直通旧河取道甚顺况东边原因修筑坚固屡经大水并无妨碍此处修筑减水坝甚好朕制木桩式样与之减水坝两边鴈翅须令加高与堤平其外边流水之处尽用石铺预凿两路柱眼其上则搭桥以便行人筑减水坝时须令其尾长如此则下注之水可无妨碍若欲保减水坝之水溜当於东边酌量修筑数处挑水坝以分顶冲水势俟後再定至新挑河两边筑堤则两边田地之水为堤所阻不能流出或恐不利於田地若使通於新挑河及分减大河之水令入漯河淀湖内则水集而满必致泛滥恐民田地淹没可将湖边丈量圈筑小堤使水不致漫流以保护田地修筑大河两边堤工附近居民俱请加高朕看此堤加筑大有裨益可将此堤先修俟工部堂官到日尔会同前来将旧堤加高之处丈量估算需用钱粮几何具题之日再将修筑减水坝之处定夺

康熙六十一年壬寅六月丙寅

上谕大学士等曰秦家厰堤工杨宗义牛钮不能堵筑马营口所出之水想又如去年流至直隶长垣县等处着行文直隶总督赵宏燮查看民间房屋地亩有被水淹者加意抚绥毋致失



所此水泛滥必由张秋流入运河於漕船亦有关系着山东巡抚李树德亲身前往监看料理修治若水势甚大可引入盐河流泄使漕船可过毋致有悞

### 【附】北河

康熙二十九年庚午六月丙寅

上谕内务府玉泉山河水所关甚钜西山一带碧云香山卧佛寺等山之水俱归此河从前此河由青龙桥北汇入清河後因欲引此水入京城将高处挑濬河之两旁复加谨防固以分水势今值霪雨之际水势漫溢堤岸冲决数处尔等速将闸板启放使河水畅流一面令工部将冲决之处速行堵筑

康熙三十七年戊寅二月庚午

上谕大学士等曰霸州新安等处此数年来水发时浑河之水与保定府南之河水常有泛涨旗下及民人庄田皆被淹没详询其故盖因保定府南之河水与浑河之水汇流一处势不能容以致泛滥浑河着左都御史于成龙往察保定府南河着原任河道总督王新命往察作何修治令其水自分流详看绘图议奏今值农事方兴不可用百姓之力遣旗下丁壮备器械给以银米令其修筑伊等往时部院衙门司官笔帖式酌量奏请带往於十日之内即令启行

三月丁丑

上谕直隶巡抚于成龙原任河道总督王新命曰清河发源太行山脉会漳河子牙河滹沱河易水诸流其势虽盛但坚筑堤岸以遏之即岁潦亦可无虞又漳河支流经大城县入子牙河其势湍悍数年以来文安大城诸处屡遭水患皆此河之故也尔等宜详悉查勘至浑河发自马邑其源甚微每遇大水之年则横流泛滥致淹民田详审其故盖由浑河淤沙既多或遇春时水乏保定以下居民又引河水灌田沙砾壅垫河身积高霪雨水发则避高就卑水势弥漫遂致田土冲没尔等惟挑濬淤沙河之两岸掘五六尺深濶令水得畅流当不至於涨溢矣尔等须详视具奏筑堤濬河工竣设立河夫委官监视及时预为挑濬遇旱岁力去淤沙庶无水患矣

辛卯直隶巡抚于成龙以浑河图形呈

览

上曰朕经行水灾地方见百姓以水藻为食朕曾尝之百姓艰苦朕时在念是以命尔於雨水之前速行濬河筑堤使田亩得耕百姓生计得遂也

五月甲戌朔

上巡视武清县堤岸衆民跪奏曰要儿渡地方自蒙皇上修筑迄今永无水患此地堤岸正当水势冲射请於

堤岸之外另筑一堤

上谕曰此堤岸之外若另作一堤尔等田亩岂不多致占废衆民奏曰原非一家田亩即稍入堤内於小民亦无

大损倘河水一决其患更甚

上谕曰转盼间雨潦将届今岁不及修筑暂立木桩坚护堤岸另开小河以杀水势今岁田亩可以无虞俟明春雨水前另筑重堤尔等田庐俱得安固矣

康熙三十八年己卯二月壬子

上谕直隶巡抚李光地等曰漳河与滹沱河故道原各自入海今两水合流所以其势泛滥尔等往视如漳河故道可寻即可开通引入运河如虑运河难容即於运道之东别挑一河使之赴海其可否修浚情形尔等閱後再奏

十月甲戌

上巡视永定河堤至芦沟桥以南

谕原任河道总督王新命等曰此河性本无定溜急易淤沙既淤则河身垫高必致浅隘因此泛滥横决沿河州县居民常罹其灾今欲治之务使河身深而且狭束水使流藉其奔注迅下之势则河底自然刷深顺道安流不致泛滥今朕遍观两岸将紧要应修处逐一详审尔等务期次第修筑遵谕而行

乙亥

上閱北蔡村夏庄村南蔡村等处

谕原任河道总督王新命等曰於此三处从上流作挑水坝不必过长长则大溜为其所逼对岸淤处略加挑濬水即泻入直流矣着俟明春兴工又

谕曰官不清则为民害水不清亦无利於民天下之浊者皆如此也不清之官朕有法以正之不清之水朕有策以治之

丙子

上至郭家务村南大堤以豹尾枪立表於冰上亲用仪器

测验

谕原任河道总督王新命等曰测验此处河内淤垫较堤外略高是以冰冻直至堤边以此观之下流出口之处其淤高必甚於此如此壅滞安能畅流此等堤工卑矮可虞若不预行修筑明春水发难以堵御必自今冬下埽加帮增高不可取近堤之土若取土成沟水流沟内有伤堤根着取近河土用之即运土稍远亦无不可也

辛巳

上谕直隶巡抚李光地原任河道总督王新命等曰今永定河自郭家务以下壅淤已高出七八尺若掘毕方濬河身不但多需工力必致岁岁壅淤南堤之南地最洼下若随其洼下濬治於掘出之土即行钉桩筑堤坚固则修理最易抑且北堤三层於河更属有益尔等修理时可将河口修窄渐次放宽於两边筑堤使高大则水势迅急沙自不能停住矣若遇村庄近处宜详视妥当委曲远移或砌之以石与村居无碍始行修理俟新修河工告竣朕亲临视开放河水

康熙三十九年庚辰二月乙亥

上谕大学士等曰朕往閱永定河见河工诸员并无知晓因朕指示周详河工诸臣方悟而大悦总之经任河务者勤而且廉即克底绩此河告竣则黄河亦可仿此修之朕御小舟入郎城等淀淤浅之处徧视之则河之当移柳岔也益无疑矣郎城之河全被沙淤垫高至来年可耕为田而欲於此处出水直强之耳水口所关重大若非亲临目击可轻断乎至治河大臣畏缩不前反再三陈奏以为不可行者今复何辞又

谕曰郎城之遥堤甚有用清水浑水俱以此当之新河开毕着即修筑南北两岸遥堤完工之後交地方官各自分守稍有损坏处用民夫补修着传谕直隶巡抚李光地朕将於四月来临不时遣人察视尔等敬慎无忽

四月庚辰

上巡视永定河堤

谕大学士等曰朕前者到此曾指示挑濬河湾令其下桩今日观河水已涸乘此水涸之时易於成功其径直挑濬处须令宽濶即以所挑之土培筑堤岸甚为有益见无雨水二十日可以告竣目今东作方兴夫役难於骤雇八旗并包衣属下每佐领派护军骁骑各二名步军共一千令其挑濬凡人员废官有愿濬河効力者亦令前往

康熙四十年辛巳四月戊寅

上巡閱竹络坝河道

諭直隶巡抚李光地等曰莽牛河出水之口亦宜下埽防之隆冬冰结之时莽牛河口着照常开泄清水流於冰下则水为冰所逼向下冲刷河底自然愈深又

閱新修石堤諭曰朕修此石堤特欲其坚而更坚之意如此则河水断不复归旧河此地黎民亦可安枕矣又

閱竹络坝迤东河道大湾諭曰此地正当顶冲甚为危险见今此处续修石堤尚未兴工着速取南方运来杉木即下排桩及埽坚固修筑又

諭曰观新挑河道水流既直出柳岔口亦顺河岸较前甚高而河亦深此皆被莽牛河水冲刷之故閱其地势南岸最为要紧故将应行坚修诸处详行指示尔等勿谓其已成而遂忽之

#### 【附】水利

康熙二十六年丁卯十月壬戌大学士等议覆河道总督靳辅疏言於高家堰之外再筑重堤停止丁溪等处工程应如所请

上曰朕今挑濬此河原欲有益七州县生民靳辅疏称高家堰等处筑堤以为屯田可获百余万钱粮朕从利益民生起见非为钱粮也若止为钱粮起见则不必蠲免江南陕西应徵六百余万矣此挑河关系紧要着户部尚书佛伦吏部侍郎熊一潇给事中达奇纳赵吉士会同江南总督总漕确勘议奏

康熙三十九年庚辰九月庚戌福建道御史刘珩疏言直隶永平真定等府田地应令巡抚李光地视其近河之处引水入田耕种

上諭大学士等曰水田之利朕所洞悉已交李光地见令引水耕种水利一兴田苗不忧旱涝岁必有秋其利无穷但不可太骤耳今若竟定一例诸处克期齐举该部复行催查则事必至於难行矣亦惟兴作之後百姓知其有益自然鼓舞各相效法於是因地制宜设法行之事必有成今观此处亦不必开池惟如宁夏水田开濬沟渠潦则撒田中之水自渠出之旱则放渠之水引入田中灾荒总可无虞矣

康熙四十五年丙戌三月壬戌大学士等议覆直隶巡抚赵宏燮疏请开垦水田应准行

上曰此处水田不比江南与宁夏泽州等处水田约略相似大都俱恃开沟以引河水今直隶河道处处俱通若开通三河县河亦可直抵蓟州昔开护城河甚有利益今朕又欲挑濬清河

此河一开於右翼人衆亦大有利益矣

康熙四十六年丁亥十一月乙亥

上命江南浙江两省在京官员齐集乾清门外

召大学士张玉书等入谕之曰朕在宫中无刻不以民间疾苦为念恐遇旱涝必思豫防至巡幸各省於风俗民情无不谘询即物性土宜皆亲加详考今岁南巡江浙见天气久晴所经河渠港荡之水比旧已浅即虑夏间

或有亢阳之患是时麦秋虽见丰稔然南方二麦用以为麴蘖者多不似北方专需麦食南方惟赖稻米北方不独种稻兼种黍稷粱粟此水上异宜不可强也且江浙地卑下不雨则蒸湿人不能堪有雨则凉燥人皆清爽虽称水乡然水溢易泄涝岁为患尚浅旱岁为患甚剧若北方则经月不雨亦无碍南方夏秋间经旬不雨则田皆坼裂禾苗渐槁矣故喜雨亭记云十日不雨则无禾也江浙农功全资灌溉今见其河渠港荡比旧已浅者皆由素无潴蓄故雨泽偶愆濒河低田犹可辱水济用高燥之地力无所施往往三农坐困朕兹为民生再三筹画永远之计无如兴水利建闸座蓄水灌田之为善也江南之苏松常镇及浙江之杭嘉湖诸郡所属州县或近太湖或通潮汐所有河渠水口宜酌建闸座平时闭闸蓄水遇旱则开闸放水其支河港荡淤塞者竝加疏濬引水四达仍行建闸多蓄一二尺之水即可灌一二尺之高田多蓄四五尺之水即可灌四五尺之高田行之永远庶高下田亩无忧旱涝矣朕特念江浙财赋重地小民粒食所资故欲讲求经久之策着该部速行文两省督抚将各州县河渠宜建闸蓄水之处通行确查明晰具奏以朕度之建闸之费不过四五十万两且南方地亩见有定数而户口渐增偶遇岁歉艰食可虞若发帑建闸使贫民资佣工度日餬口亦善策也

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十五

# 卷三十六

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十六

澄叙

康熙四年乙巳三月壬辰

上谕吏部都察院民生之安危由於吏治之清浊吏治之清浊全在督抚之表率若督抚清正实心爱民则下吏孰敢不洁已秉公近见各省督抚弹章祇将一二衰老微官塞责岂所属地方果无贪酷害民之辈总由姑息徇庇莫肯直纠吏治民生安所恃赖尔部院任职澄清督抚中有不肖昭着者即行参处以後督抚纠劾官员除情轻者照例处分外其列款贪酷者即行解任究审儆因循旧习不肯实心任事一并治罪

康熙六年丁未二月戊辰

上谕吏部兵部都察院国家政务委任庶官必内外大小臣工咸得其人乃可共襄治理京察大计军政俱应於今岁举行将内外大小各衙门满汉文武官员分别澄叙以励官方应行事宜尔部院察例议奏

十一月甲子吏部遵

旨议覆工科给事中李宗孔疏请复行荐举查考满停止见行大计既有三年卓异之官似毋庸又行荐举应仍照前议其所举卓异之员不论本任内及陞转任内一有不职应将从前申详荐举等官分别降革

上曰前卓异荐举原系竝行後因举行考满将荐举停止举劾关系劝惩大典今考满既经停止荐举仍着复行其卓异官原任有事举荐官理宜处分至後任有事仍将前荐举官处分永塞荐举之路又所拟处分之例太过着再定议具奏

康熙七年戊申六月戊子

上谕户部向因地方官员滥徵私派苦累小民屡经严饬而积习未改每於正项钱粮外加增火耗或将易知由

单不行晓示设立名色恣意科敛或入私囊或贿上官致小民脂膏竭尽困苦已极朕甚悯之

督抚原为察吏安民而设布政使职司钱粮厘剔奸弊乃其专责道府各官於州县尤为亲切州县如有私派滥徵枉法婪赃情弊督抚各官断无不知之理乃频年以来纠疏甚少此皆受賄徇情故为隐庇即间有纠参非已经革职即物故之员其现任贪恶害民者反不行纠参甚至已经发觉之事又为朦溷完结此等情弊深可痛恨嗣後如有前弊督抚司道等官不行严察揭参或经体访察出或被科道纠参或被百姓告发将督抚一并严处不贷至尔部收纳直隶各省解到钱粮亦须随到随收速给批回毋得纵容司官笔帖式书办等勒索作弊苦累解役倘有违法即行参奏如不行严禁察出将堂司各官一并从重治罪又言官於作弊害民者理应察访指名纠参乃近日章奏大率摭拾细故苟且塞责嗣後当据实陈奏毋得挟私讐害尔部即遵谕速行直隶各省大小官员刊示晓谕百姓

康熙八年己酉八月壬申

上谕吏部国家政务惟藉羣工赞理在京各衙门大小官员必各称其职乃可以襄郅隆之化部院等衙门满汉各官应行澄叙以示劝惩大学士尚书及三品以上堂官俱着自陈三品司官及四品以下各官尔部会同都察院详加甄别具奏在外总督巡抚系封疆大臣职任紧要着该部院查明任内功过称职与否详加甄别具奏

康熙十年辛亥五月辛酉

上谕兵部武官有防守地方缉捕盗贼之责必弓马熟嫻方克胜任其不称职者虽总督提督有不时纠参之例但与其纠参於後貽悞地方不如於选授之时详加选择以後除见任推陞各员外凡系应到部掣籤之官尔部即考验弓马然後令其掣籤如有不堪者即行题明照例给以原品顶带停其补授

十二月癸未

上谕兵部侍郎色塞赫等曰每见尔部题授江南浙江西安等处章京俱系有资力者於盛京寧古塔等处员缺则属之贫弱之人岂无情弊又护军校即陞佐领亦属越次不公尔部宜详察之

康熙十七年戊午五月己酉

上谕吏部兵部向以闽省海疆要地虽经恢复海逆未平民生凋敝抚绥防御惟在文武大吏相与殫心料理方於兵民有裨今总督郎廷相提督段应举自简任以来为时已久山谷之伏莽未靖閭閻之困苦未苏吏治未见澄清营伍漫无整顿寇警频闻地方躡扰更有甚者海贼侵犯内地事前不能豫防事後不能剿御皆由该总督提督庸懦无才职业不修所致殊负简任之意仍令在任貽悞封疆着康亲王杰书察议具奏

康熙十九年庚申五月庚寅

上谕大学士等曰云南巡抚伊辟疏请将随行人员坐名题补朕思此等人员果堪用者亦复何害乃一时仓卒奏请往往不能尽当如知府知县等官俱将此辈补授徒悞地方此後坐名题补各官概行停止吏部仍照例铨选

八月己卯

上谕吏部科道为耳目之官关系最要必选用得人方能称职汉官皆由行取考选补授惟满官论俸叙陞着吏部都察院将见在满洲给事中监察御史会同选择堪用者仍留原任不称职者对品调补部院衙门康熙二十一年壬戌九月癸酉户部引

见各部院保举关差官员以苏赫臣办事有才与其列上曰凡部院司官果能谨慎奉职方不愆事如苏赫臣及科臣莫洛辈俱狂妄自恃虽有才干亦无足取可另行保举以闻

康熙二十三年甲子正月壬辰

上谕大学士等曰各部院司官内才力庸劣者曾降旨令不时纠参然参处者甚少虽有一二纠参皆系末员其实系庸劣无能多徇情面不行纠参又有狂妄好胜专恣行事者较之庸劣无能为害更甚各部内朕所明知而徇情不参者亦有之可严谕部院衙门查各属司官内有庸劣无能狂妄好胜专恣行事之员即行指名题参

丙申

上谕大学士等曰副都御史塞克德自简任以来竝未见陈奏一事才具庸劣可令解任朕观部院官员懒惰者甚多一遇苦差或有称病规避者嗣後部院官员或病或有事故俱注册以凭分别勤惰又

谕曰督抚乃封疆大臣通省民命所关

世祖皇帝时所用者尚属循良逮至辅臣时用张长庚白如梅张自德贾汉复屈尽美韩世琦等扰害地方以致百姓困苦今之督抚较前虽觉稍愈而相沿成习尚未尽改见在浙江湖广总督江苏巡抚员缺最为紧要必择贤能补授方於地方有济如不得其人则百姓受害不可胜言矣此三缺尔等加意详审务得相宜之人公同举出听候酌用

五月辛巳

上谕大学士等曰凡居官以清廉为要今九卿若有确知其人者无论内外大小官员可据实举奏近闻陆陇其居官甚善衆皆称之谅非矫饰从此操守不改永着芳声是为真实好官耳

十二月己亥



上諭安徽按察使于成龙之父原任阿達哈哈番于得水曰尔子于成龙居官清廉惟尔教子有方特加赏賚尔其勗勉尔子殫心竭力始终如一朕不难频加显擢苟末路不终辜负国恩定行惩治亦尔家门之玷也又

召八旗汉军都统副都统侍郎等

諭曰国家自

祖宗定鼎以来委任汉军官员与满洲一体其中颇有宣猷効力者如孟乔芳张存仁輩朝廷亦得其用比年汉军居官者大不如初每赴外任多携仆从汰侈糜费惟务黷货累民恣肆放逸未能谨守法度如张长庚贾汉复白色纯等不可胜举屡加申饬尚多因循未见改辙兹者巡行江南见文武各官及军民人等衆口一辞称江寧府知府于成龙清廉爱民朕心喜悦已面加獎勵超迁为安徽按察使又特召于成龙父赏赐以示褒美廉吏至意凡尔八旗汉军人等自今以後悉宜洗心涤虑痛除旧习或子弟官守在外宜各貽书训勉果有洁己爱民如于成龙者朕立行擢用如犹怙非不悛国有常法不能为此輩貸也

康熙二十四年乙丑九月辛未

上諭吏部督抚藩臬官资相近请托易行每逢大计各省督抚多以藩臬举报卓异不无结纳徇情之弊着通行禁止

康熙二十五年丙寅二月辛丑

上諭大学士等曰近云贵督抚及四川广东巡抚俱疏请征剿土司朕思从来控制苗蛮惟在绥以恩德不宜生事骚扰今览蔡毓荣奏疏已稔悉其情由盖因土司地方所产金帛异物颇多不肖之人苛求剥削苟不遂所欲辄以为抗拒反叛请兵征剿在地方官则杀少报多希冒军功在土官则动生疑惧携志寒心此适足启衅耳朕但以逆贼剿除四方底定期於无事如蔡毓荣王继文哈占身为督抚不思安静抚绥尚诛求无已是何理也前出征云南赵良栋将彼等过端几至发露穆占之家人举首朕寢其议若此等尚多朕无不洞悉但事系已结朕不复究置之寬宥至云贵督抚居官殊无善状或地处辽远朕不悉知亦未可定尔等将此諭旨传示九卿詹事科道令其详议具奏

四月甲辰

上諭领侍卫内大臣公鄂黑福善坡尔盆等曰学士常书原系微贱之人理应仰体朕委任之意効力图报考试之事乃伊职掌应立法严肃查察情弊乃於怀挟诸弊明知不举惟於朕前蒙蔽行诈见今发觉被获应将常书革去学士改为三等侍卫照常行走

七月庚戌

上谕吏部翰林官员内或有不善书法者或有不能撰讲章者或有不能句读通监者甚有以饮酒宴会为事博奕为戏者其读书立品思副委用裨益国事者甚少今若依部议道缺调用恐伊等登第之後未经敷历骤任监司则无才之人反为侥幸何所惩创应以学问不及者分别一二人降调庶衆皆知儆着吏部翰林院学士会议具奏

十月壬申

上谕大学士等曰镇国公哈尔萨为人鑽营有玷公爵应将此公爵令伊兄六格袭替苏努虽系宗室其行事乃如人之奴仆在安亲王及索额图家谄媚行走至在议政处但遇势要之人发一议论伊辄唯唯听从不更有论说其阿顺之态与家奴无异尔等将此旨传谕哈尔萨苏努二人

康熙二十九年庚午正月甲寅

上谕吏部用人之权关系最为重大于成龙破坏定例将曾经超擢历年未久如许官员保题尔部不以为非但称无庸议殊属不合且既云直隶好官甚多今竝不能拯救饥民频多流散如此则平日才能所办何事武廷适等陞转着停止令其在任久远効力

康熙三十一年壬申十一月戊辰

上谕大学士等曰嗣後所参才力不及官员仍补授部院衙门殊未允当既因才力不及议处若仍补授録用有何裨益着照伊等所降之级随旗行走则旗下官员增多且伊等曾在部院办事自能称旗下之任至因公诖误降级而复用者若仍算初任年俸仍不久即陞矣应俟复用三年後无过称职始准算初任年俸则官员方知鼓励有过者得少分别矣可将此旨明谕九卿

康熙三十三年甲戌十二月戊申

上谕吏部观部院衙门官员皆系总计年俸补授因而庸常者多尔等传谕内阁及部院衙门将庸劣之员各行参奏

康熙三十六年丁丑五月丁酉

上谕吏部国家举行大计原期黜幽陟明使大法小廉以为义安民生之本所关甚重比年以来督抚等官视为具文每将微员细事填注塞责至真正贪酷官员有害地方者反多瞻徇庇护不行纠参以致吏治不清民生莫遂重负朕爱养元元至意殊可痛恨今当举行大典各督抚等官应洗心涤虑力改前辙矢公矢慎整肃官方务期举荐一人俾衆皆知劝纠劾一人俾衆皆知儆儆仍苟且因循徇私溺职国法具存必不轻恕

壬寅

上谕大学士等曰今噶尔丹已平天下无事惟以察吏安民为要务然官吏之贤否民生之休戚所关朕一人端居深宫何能徧知昨巡行山陕或先闻其有声名而居官不善者有之或竝未闻其声名而居官实善者有之此皆上下相隔不能通達之故也虽古圣君以知人为难朕岂料温保行事一至於此往者江浙山东等处地方官以朕不时巡幸各加勉力操守皆优山陕官员则劣甚朕恨贪污之吏更过於噶尔丹此後澄清吏治如图平噶尔丹则善矣

十月己酉

上谕兵部军政大典五年一举所以黜陟将弁砥砺官方使贤者知劝而不肖者知儆关系甚重每见督抚提镇不能实心奉行辄向所属需索部费恣意诛求因而将弁以下节次侵削重为兵害至於所举所劾或瞻徇情面或庇护私交将尅扣额饷虚冒兵粮滥受馈遗虐取规例实系贪酷及衰懦闕冗不能骑射之员不行参劾止将微员细事草率塞责以致贪酷庸劣之辈无所诫惩而守法奉公宣劳尽职者遏抑不彰无所激劝殊负朝廷旌别淑慝之至意尔部可即通行各督抚提镇此次举行军政务矢公慎力破积弊俾举一人衆皆以为贤劾一人衆皆以为不肖庶激扬咸当而国家允收得人之效倘因仍陋习不加悛改後有发觉定将督抚提镇等官一并从重治罪

康熙三十八年己卯正月丁酉

上谕大学士等曰武职官员掣签後即准赴任虽有庸劣之员该管官多瞻徇情面苟且姑容嗣後武职掣签官员着即引见其庸劣者当罢斥之

五月丙戌

上谕大学士九卿詹事科道等曰朕南巡至浙江见百姓生计大不如前年来已将旧欠钱粮尽行豁免其被灾地方概行赈济恩泽屡加在百姓应比往年丰足今反不及从前者皆因府州县官私派侵克馈送上司或有沽名不受而因事借端索取更甚者至微小易结案件牵连多人迟延索诈者甚多此等情弊督抚无有不知乃不厘剔察参反将行贿官员荐举廉正官员纠劾以至民生失所殊失朕爱养元元至意且畿辅重地因朕不时巡察故无私派侵克等弊若各省督抚俱体朕爱民至意实力奉行自然吏治澄清万民乐业科道不畏人不徇情能将不肖劣员察访纠参则有司亦知忌惮今作何永革横派严禁贿赂以察吏安民尔等会同确议具奏

康熙三十九年庚辰四月辛未

上谕大学士等曰各部院衙门司官皆论俸陞补或因坐台运米议叙陞补以致庸劣者多着谕部院将该衙门庸劣司官察参其司官笔帖式内有才优者亦着保举引见

康熙四十二年癸未五月己未

上谕大学士等曰直隶各省总督巡抚提督总兵官补用千总等官秉公者少除功加及稍有优长者俱已録用外其余年满千总骑射未必皆能骑射尚且不能岂可令之管辖军士着行文各省谕令此项人员限於冬季前到京命大臣监试优者録用不堪者革退限内不到者即令除名可谕兵部知之

康熙四十四年乙酉五月己卯

上谕大学士等曰官员荐举卓异关系激劝大典必无加派无滥刑无盗案无钱粮拖欠无亏空仓库银米者方可膺卓异之选其他所开虚文俱不必入可会同九卿定义具奏

康熙四十六年丁亥五月丙子

上谕大学士等曰部院笔帖式自初任时即当黽勉以冀大用朕见今关差笔帖式有从都统护军统领之笔帖式派出者问其事务茫然不知着裁去候缺令都统取拨什库及披甲中知书者用之护军统领取护军中知书者用之伊等二三年一换又各门笔帖式亦皆裁去候缺其缺取护军用之亦二三年一换此外再有应裁之笔帖式亦皆裁去至中书内竟有年方童稚者此皆徇情补用嗣後补授中书着引见

十月辛丑

上谕吏部今观部院衙门司官甚是不及至有不能做稿说堂者甄别既经停止若不考察渐至废弛尔等俱系大臣不可互相徇情或各部院官员有彼此迁转任事未久者本衙门堂官不能悉知其人可着九卿会同考察参奏

十一月壬申吏部议覆山西巡抚噶礼疏参潞安府知府白邦杰借欠官银限满未完请令戴罪完结

上谕大学士等曰凡借官银者因不能完银治罪若留任追赔必希图还债以致克剥小民矣嗣後凡牧民官员借欠官银不能完纳即令离任追赔已还後准其开复如不能清还即以家产抵偿如此则官银不致亏欠而亦无剥民之事矣

康熙四十八年己丑十二月甲寅

上谕大学士等曰世袭之员较佐领尤为紧要袭职之人庸劣者甚多嗣後令该旗大臣引见如其人善则准令承袭否则不拘其幼子族人择可用者令其承袭

康熙四十九年庚寅三月戊子

上諭吏部前以補授雲南貴州廣西四川四省官員不能如期到任懸缺甚多故豫發人員備用今觀此等官員但圖以邊俸速陞居官无一善者地方關係甚屬緊要嗣後四省停其豫發仍照旧例歸於月選得缺人員嚴限速催赴任如此則缺不致久懸而於地方亦有裨益其以前發往未經得缺人員俱着掣回各歸月分補用

康熙五十三年甲午四月丁亥

上諭大學士等曰昔人有言正朝廷以正百官正百官以正萬民舉賢退不肖正百官也二者不可偏廢如但舉賢而不退不肖則賢者知所勉而不肖者不知所懲終非勸衆之道惟黜退不肖之員則衆人方知所戒俱勉為好官矣

十月乙亥

上諭九卿等曰九卿內各省人俱有凡翰林中曾差正副主考及房考者其聲名賢否必皆知之着從公舉出優者陞用劣者革退九卿於本省出差人員不必與議蓋伊等子弟試而中即以為好試而不中即以為不好殊不可為據若不存私意賢否皆從公舉出則科場可得清理矣即如月選官員悉令九卿驗看凡出身不明行止不端者俱知畏懼不敢謁選此甚有益

康熙五十四年乙未四月庚午

上諭吏部凡月選官員與民最親故令九卿驗看今竝未將劣員舉出嗣後月選官員內有出身不明或系人家仆及開復官員內從前居官有劣蹟者九卿各據所見即行參劾黜退如此則吏治咸修民生大有裨益將此傳諭九卿

康熙五十六年丁酉四月丁亥福建巡撫陳瓚疏言會安縣知縣田廣運等徵收錢糧有方居官聲名俱好懇

聖恩破格鼓舞於吏治民生大有裨益

上諭大學士等曰此奏甚善徵收錢糧惟少加火耗百姓易於輸納從前馬齊任山西巡撫張鵬翮任浙江巡撫時錢糧俱清楚蔣陳錫任山東巡撫時錢糧亦清楚外省總督巡撫居官好少加火耗錢糧斷不至缺欠也田廣運等俱着該部議叙

康熙五十七年戊戌十月甲寅

上諭吏部考試月選官令作八股時文大都抄錄旧文苟且塞責嗣後不必作八股時文止令寫履歷以三百字為限觀其書法妍丑文理工拙則人之優劣自可立見矣

甲子

上谕吏部各部院衙门满洲官员在侍卫班行走汉官每遇奏事派六员引见科员及御史无论巡城不巡城奏事日令派出满洲三员汉人三员侍班翰林亦派出五员侍班此侍班人员内如有不得来者不妨听其缺少其数不必补足如此伊等可得认识矣

康熙五十九年庚子十月癸亥

上谕大学士等曰科道官系从部员内拣选补授每年内陞外转竝未论其原陞品级一体开列今科道官内陞有即超擢至堂官者果其卓然特出虽为布衣朕亦可不次任用况科道乎若本属平常而不查原陞品级竟一体内陞超用未免越次着交与九卿将科道官由何衔陞任应作何分别开列之处会议具奏

十二月己酉

上谕大学士等曰翰林官员虽多能作祭文碑文者不过数人此内有人才不及不谙进退之礼者亦有一无所知饮酒游戏者伊等俱候派考试之官如此等人岂堪备用尔等同吏部翰林院查明参革或人虽平常实有学问者不必革退或年老翰林见在修书行走者亦不必革退又部院衙门满汉官员内有才力不及并懒惰者亦会同部院堂官查明参革

癸丑

上谕大学士等曰朕观九卿詹事科道保举人员并非矢公悉有所为或有视地方优劣而举者或有自谓屏絶交游闭户不出而缄口不举一人者或有自己不举转令他人保举者凡此等情弊伊等以朕为不知朕则知之甚悉也存是心者乃名教中罪人安得谓之读书人乎如果矢志公忠则伊所举之人一有改操之处即宜纠参矣少詹事龚铎保举之人甚多伊竝非外任何所见而滥行保举耶此风渐不可长宜加惩究使知敬畏尔等会同吏部都察院查从前保人甚多而无当者悉行参奏

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十六

# 卷三十七

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十七

赏赉

康熙九年庚戌三月辛未

上谕户部十库所有旧物与其虚置於此何如分赐旗下贫丁尔部即偕工部察有当给予者集议以闻寻户部工部议覆

上命发库内木棉丝布茶盐衣服弓矢等物令都统等酌给各佐领下护军拨什库及甲兵之贫者康熙十五年丙辰二月癸酉

上谕大学士索额图曰近发内帑银十万与提督赵良栋赏给兵民今在平凉大兵及绿旗兵俱勤劳报効大将军图海前往亦可酌议发帑给赏川中撤回之兵前攻取朝天七盘等处後又图取秦州効力甚多凡失事皆在主将非关军士可写谕旨二道与大将军图海令申饬诸将其总督巡抚亦有失事之责宜严行晓谕

乙亥

上谕平凉诸军士曰尔等年来各处征剿为国効力之处朕悉闻知今围攻平凉屡次冲锋陷阵奋勇杀贼严冬掘壕远道樵采备历艰苦朕心深为悯恻兹命抚远大将军都统大学士图海统率禁旅往讨逆贼虽目前国用殷繁念尔等戮力行间勤劳已久特发帑金五万齎至军前普加恩赐以昭朕优恤之意尔等同心协力益励忠义速剪贼寇朕且更加优赏尔等勉之

康熙十八年己未六月戊辰云南提督桑额疏言新任湖广提督暂驻彝陵请以彝陵官兵隶其标下湖广提督官兵属臣统领前往云南

上谕曰提督桑额随大兵进取云贵其湖广提标官兵准入云南提督标下俟底定之日仍回楚中彝陵镇标官兵准为湖广提标至於随桑额前往官兵方事剿贼收疆标下官员可各加衔一等兵卒可动正项钱粮赏赉以示鼓励

九月乙未

上谕理藩院蒙古兵随大兵征剿虽未有奇功显绩然勤劳数年宜加恩赉其将领赐以鞍马

余衆各给以羊今将至京师遣蒙古内大臣二人前往劳之

康熙二十年辛酉七月壬申

上召大学士以下各部员外郎以上赐宴於瀛台谕曰内大臣侍卫在朕左右时加赏赉惟内阁及部院诸臣比年以来办事勤劳未沾恩赐故特召集尔等以尽一日之欢竝非大宴因朕方驻瀛台即以太液池中鱼藕等物赐诸臣共食又特赐表里为衣亦非大赏赉可比今日宴集诸臣本当在朕前但因人衆恐恩泽未能周徧故不亲莅诸臣可畅饮极欢毋拘谈笑以副朕意

康熙二十二年癸亥正月乙卯

上召大学士九卿詹事科道等赐上元节宴於乾清宫宴

毕

谕曰从来君臣之分虽甚尊严上下之情贵相浹洽观古昔盛时惟堂廉不隔用成交泰之美今卿等朝夕勤劳出入奏对朕心时切嘉念特将内厩马匹择其驯良易於控御者颁赐卿等加以内紵卿等其各承受示朕优眷之怀

康熙二十三年甲子六月甲寅

上谕副都统巴图一等侍卫阿南達等曰边外八旗蒙古与在内八旗一体朕未尝分别内外今朕巡行之次见其衣食穷乏朕心深为惻然可通行晓谕所过地方蒙古人等有鰥寡孤独老病不得其所者令其来见加恩赏赉且因其来见朕亦可悉其生计嗣是每日诸蒙古

人等各扶老携幼至

行宫前叩首

上详问年齿生理颁赐酒食并令酌量给与银两布疋

康熙二十四年乙丑三月戊子

上谕大学士等曰凡军功议叙恤赏俱关紧要如迟延日期往返咨查恐奸宄之徒舞弊作巧易生弊端朕思此等贫兵早给一日恤赏便得早受一日实惠此後着一槩速行议叙

康熙二十七年戊辰九月丁亥



上谕大学士等曰佐领伊库等所送黑龙江官庄壮丁若至其地已过耕种之时则无所得食矣可遣户部司官一员往察之果逾耕种之期无食者量与之粟以资赡养

康熙二十八年己巳九月辛酉

上谕户部今岁畿内亢阳田亩鲜获朕所深悉被災人民已加恩蠲赈八旗田庄俱在畿辅近地固属灾伤满洲蒙古汉军甲兵皆须养马原资禾稼以供饲秣今谷既不登刍豆必至腾贵虽给有月饷银米可以贍育家口贫乏兵丁经营草料恐滋困累朕殊用轸念着详察实系穷兵无力养马者开列名数送部自本年十月起至来年秋成时止其马匹所需钱粮应加给赐以昭朕一体爱恤兵民之意

康熙三十年辛未十月丙申理藩院议覆运送赏给米穀

上曰此赏给米穀调蒙古骆驼马匹运送时值寒冬输挽甚难况来领米穀之人不能运到必致沿边棗卖则贫人不能皆沾实惠今应量折银给之庶到彼甚易而贫人得沾实惠也又

谕曰投诚喀尔喀已给地居住今定例之初应将喀尔喀并议凡一应差役维均则人不偏劳差往扎赖特等处人役俱由喜峯口行走则喀喇沁等旗甚为偏累若出山海关由盛京地方法库口行走道路甚便不劳可至喀喇沁等旗亦免偏累古北口喜峯口外见各有五十家一村设为驿站自此至科尔沁等处其间亦须照此例於各旗内察出贫穷之人给与牛羊等物使为产业设立驿站则贫者咸得生理而各处亦免苦累其传问朝正诸王贝勒台吉等具奏

康熙三十二年癸酉十二月戊子

上谕兵部本朝满洲官兵从来精銳骁勇遇寇必克所向无敌前厄鲁特噶尔丹之役官兵不能悉体朕意即行剿灭致失机会罔奏肤功朕心为之不悵故比年以来简閱官兵岁凡两举朕躬临指示训诲顷閱武时见诸士卒行列整齐队伍明晰进退娴熟严肃无譁所有军令无不遵守该管官员号令约束既严且善此皆官兵协志同心各加奋励所致朕心深为嘉悦八旗前锋护军拔什库骁骑兵等各赏给一月钱粮无职掌官照护军给一月钱粮火器骁骑兵亦照护军赏给有管辖职掌官员悉赏给内库緞疋其赏赐緞疋户部会同内务府议奏此番閱武时官员内有降级罚俸者俱准开复以示朕体恤将士申明赏罚之至意至八旗步军官兵有捕缉盗贼巡查道路等役甚为劳苦步军亦各赏给一月钱粮管步军官亦各赏给緞疋獎勤恤劳用称朕意

康熙三十五年丙子正月乙酉

上谕中路督运都察院左都御史于成龙等曰大军讨寇全赖兵力内外满洲汉军綠旗诸路从征兵丁俱已各加恩赉其外省调集步兵挽运军粮载涂况瘁尤可轸念所有每月应支银米本营照常支給俾贍养家口仍各给与行粮以为道路之资所运米石如悉依期挽至克济

军需不致亏缺迟悞俟大兵凯旋准补入马兵营伍用彰獎勵有效力勤敏才堪拔擢者尔等可记名彙奏以俟酌用兵丁劳苦饥寒凡督运大臣官员宜时加拊循慰勉庶人争自効踊跃赴功西路挽运兵丁亦照此例行尔等可移文各该巡抚通行传谕示朕体恤军士至意

九月戊寅

上赐宣化府骑兵张家口步兵白金

谕曰此银尔等可留家中日用俟到张家口再给米粮尔等安营可附近行宫屯扎以便不时赏给

十月甲申朔

上驻蹕鄂罗音布拉克

谕随驾户部尚书马齐曰大将军费扬古所领军士甚为劳苦食用必致缺乏欲将朕所用牲口发去道路遥远必致疲瘠且到日必迟可遣人往尚书班第处取杀虎口大同等处见存银五千两遣官送至大将军费扬古军酌买皮裘牛羊等物给与从征军士

戊申

上驻蹕衣赫图尔根郭尔之南右卫兵自军前至上亲视赐食传

谕曰戎行効力我朝之常朕欲剿灭噶尔丹亲统大军进讨噶尔丹望风逃窜遇尔西路之兵遂大败之尔等乏粮步行而能奋勇败敌殊为可嘉是以朕亲临赐食尽免尔等所借官库银加恩於阵亡及被创病故之人衆

官兵叩首谢恩欢声动地

康熙三十六年丁丑闰三月辛丑

上谕内大臣明珠曰鄂尔多斯贝勒松阿喇布等各率其兵随驾劳苦尔其率学士黄茂齋银前去同左都御史于成龙赏鄂尔多斯见到之兵务使均沾实惠

康熙四十二年癸未三月辛酉

上谕大学士等曰朕御极以来无时不以民生为念虽纤微之事亦不肯稍怠忽勤劳已四十余年矣今四海奠安民生富庶而河工适又告成朕欲颁诏天下大沛恩赉故星夜回銮诏内款项尔等可会同详閱

十一月甲寅

上召兵部侍郎布雅努近前

谕曰朕巡历诸省观绿旗兵丁无如提督潘育龙之兵者射既熟嫻人复矫健此皆统率将领之训练有方也自提督以下官员可俱加一级

康熙四十六年丁亥十一月甲戌

上谕户部尚书希福纳等曰今时届严寒步军每夜巡逻殊可怜悯着赏拨什库银各五两布各二疋步军银各四两布各二疋若家下人则谕令伊主以所赏银布与之勿得扣取

是日

上谕领侍卫内大臣前锋统领八旗护军统领等今届岁暮朕欲恩赏兵丁尔等将所统兵丁细查曾出兵从猎十次者为一等七次者为一等或中伤有功牌者亦入在十次一等之内其余者另作一等共分为三等此内有不曾出兵从猎一次者亦开明具奏尔等务行严查若少有徇庇其该管官员必斥退之

康熙五十二年癸巳三月甲午

上谕大学士等曰今岁天下老人为朕六旬大庆皆从数千里而来应赐伊等筵宴然後遣回着查八旗满洲蒙汉军汉人大学士以下民以上年逾六十五岁者奏

闻老人内有艰於动履不能前来者听之其能来者俱令之来即不能来者朕亦另行颁赐今天时渐热赐宴後即令回籍耕种其家奴勿入所查数内又八旗满洲蒙古汉军以至包衣佐领下不论官员闲散人等年七十以上老妇亦着查奏俟老人赐宴後再定一日送诣

皇太后宫赐宴有艰於动履不能前来者听之其能来者俱令之来若有贫乏不能来者着各属协助车马使之前来俱开确实年岁不可捏报再传谕宗人府诸王以下宗室子孙内二十岁以下十岁以上选择其聪明堪供任使者六七十人令於耆老前执爵即朕子孙亦令之出宗室外不用他人也

壬寅宴直隶各省见任致仕给还原品文武汉大臣官员士庶等年九十以上者三十三人八十以上者五百三十八人七十以上者一千八百二十三人六十五以上者一千八百四十六人於畅春园正门前传

谕衆老人曰今日之宴朕遣子孙宗室执爵授饮分颁食品尔等与宴时勿得起立以示朕优待老人至意

康熙五十六年丁酉十一月甲戌

上谕户部朕统御寰区抚绥万国无分中外凡兵民生计未尝一日不为勤求也自剿灭三逆以後为八旗甲兵详加筹画曾颁发帑金数百万两代清积逋又资其匱絀复赏银数百万两凡随围出征虽给行月钱粮官驼马匹犹恐用度不继设立八旗官库以济官兵康熙四十五年复施恩将官库未经扣完银三百九十五万六千六百两尽与除免嗣後官库事务渐至扰乱故停止八旗之库设立总库自兹以来官兵有益库内案件亦甚清楚但每月扣取钱粮朕甚为廑念曾有无耻积恶拨什库侵欺兵饷朕故交与户部将两月钱粮一次支放俱令给与本人近闻领取银两兵丁甫出部门即被人持去公库既行扣除又复偿还私债兵丁所剩甚少以此养贍室家奉行差务断然不足朕每怀及此深切軫恻兹特大沛恩施式弘抚育停止公库将见今未行扣完银一百九十六万八千两有奇通行豁免自康熙五十七年正月为始着给与兵丁全分银两尔部即传谕八旗都统等出示通晓俾咸知朕优恤禁旅至意

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十七

## 卷三十八

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十八

蠲赈一

康 三年甲辰六月庚申

上谕户部等衙门各项钱粮关系国计民生必徵输起解历年清楚然後国用有裨军需不匱小民无催科之扰官员免参罚之累向因直隶各省自顺治元年至十七年拖欠银共二千七百万两有余米七百万石有余药材十九万筋有余紬绢布匹等项九万有余先曾有旨应作何催徵作何蠲免着议政王贝勒大臣九卿科道会议具奏今据奏将河南湖广等省所欠钱粮内有议蠲免者有仍催徵者此累年积欠钱粮岂尽属小民之故与前者假托催徵贪污官吏科派小民侵吞入己者甚多此皆贪官污吏侵尅那移掇借运粮官侵渔解粮官役自用盗贼劫夺火烧水溺等项拖欠至此而追徵

之时有将人系狱者亦有实欠在民虽遇恩诏未得尽蠲免者若将此项严催小民无故派徵见任官空受处分且以此拖欠钱粮拨给兵丁必致兵饷缺额尤为无益况不肖官役严加追比借端多派小民朕甚悯之今将自顺治元年以来十五年以前所欠银米药材紬绢布匹等项钱粮悉予蠲免其先经议处官员人等不议外见在催徵监禁追比各犯之罪俱着宽释以後贪官奸吏若将奉旨蠲免款项复借端苛扰派徵加等从重治罪至直隶各省兵丁征剿守御効力备极劳苦唯需粮饷以资生计向因新旧兼徵钱粮不完以致兵饷亦多压欠十五年以前所欠兵饷理应找给但民欠钱粮俱经蠲免不必复给自顺治十六年以来所欠兵饷俱着找给以後务按期支給俾兵丁无内顾之忧乃副朕军民一视同仁至意如仍前将应给兵饷不实给发及违禁侵尅那用等弊从重治罪尔等通行晓谕俾咸知朕意

康 七年戊申七月丁未

上谕户部小民资生惟赖田亩一遇灾祲禾稼损伤诚可悯恻急宜蠲赋以昭恩恤嗣後凡有水旱蝗蝻等灾有司官星夜申报督抚督抚各照驻劄附近地方随带人役务极减少一切执事尽行撤去勿致累民将被灾田亩作速亲勘定明分数造册达部照例蠲免务令人沾实惠尔部速飭直隶各省遵行

康 九年庚戌十月甲午

上谕户部淮扬所属地方岁比不登屡虞朕怀今年又遭水灾黄淮交涨堤岸冲决百姓室庐多被淹没夏麦未获登场秋禾播种水潦难施民生失所特差部臣速行踏勘准动正项钱粮存积银米将饥民赈济但被灾之民既无耕获何以输粮如再加催科愈不堪命今年淮扬所属被灾地方应徵钱粮尔部速行酌议蠲免以副朕恤灾爱民至意

康 十年辛亥三月己巳

上谕户部顷因差往江南郎中禪塔海奏事来京朕面询民生休戚据奏淮安一带地方水患未消人民饥馑流移前虽行赈济今无以餬口困穷已甚闻此情形深切悯恻民为邦本如斯困苦岂可不速行拯救今应即行差官前往赈济或就近截留漕米或动支库内银两籴米给散饥民尔部速议具奏

六月壬午

上谕理藩院闻苏尼特等八旗人民被灾牲畜俱死难以存活朕心深为惻然尔部会同礼部太仆寺将马场之马与礼部所管之牛羊酌量派出赏给被灾之人

康 十一年壬子四月己卯

上谕户部江南连年水旱相仍灾伤甚重所有旧欠钱粮若一并追徵民生愈苦朕甚不忍其以前未完钱粮实系逋欠在民者可暂停徵俟民力稍苏时再行请旨

康 十二年癸丑四月辛亥

上谕户部江南苏松常镇淮扬六府连年灾荒民生困苦与别处不同朕心时切轸念除今年钱粮已经派拨兵饷外其苏松等六府康 十三年分地丁正项钱粮特行蠲免其半以昭朕存恤灾黎至意

壬戌甘肃巡抚花善奏称巩昌府属西和礼县去年疫疠盛行牛驴倒毙甚衆若待请

旨散赈恐播种愆期已於康 十一年徵解银内发买耕牛於积贮屯粮内散给籽种并计口量赈部议该抚未经题请任意违例不合应交吏部议处其擅动银穀仍令赔补

上曰此所支银穀既经给发小民巡抚司道府等官免其赔补议处

六月甲子

上谕户部江南泰州积水决堤淹没田亩正赋已悉豁免尚有牧马场租等杂办银两小民无从措纳可竝除之

九月丙戌

上谕户部山东寧海州荒芜地二千七百余顷逃亡户三千余丁累年逋赋小民力难赔补自康 九年以後钱粮如数悉为豁免仍敕巡抚设法招徕劝垦

康 十三年甲寅二月辛丑

上谕户部江南清河安东盐城兴化高邮宝应泰州山阳诸州县疊被水灾虽已经蠲赈而将来涸出田地收获之期尚遥赋无从出按期徵课必致累民尔部行查涸出地亩其应徵额赋及漕项漕粮俱俟三年後起徵

康 十七年戊午闰三月丙辰

上谕议政王大臣等曰海寇盘踞厦门诸处勾连山贼煽乱地方皆由闽地濒海居民为之藉也应如顺治十八年立界之例将界外百姓迁移内地仍申严海禁絕其交通但穷苦之民一旦迁徙必弃其田舍难以为生殊可悯恻可将本年地丁额赋差徭杂项尽行豁免该督抚拣委能员料理俾安辑得所勿致苦累

六月癸酉

上谕户部浙江属江山西安等十九县温衢各卫所逼近闽中首先被?百姓困苦其康 十六年以前钱粮槩从蠲免并令该督抚多方招徕避贼黎庶各还故土俾事耕垦

十一月庚戌

上谕内阁学士噶尔图屯泰曰遵化州所属有附近汤泉之娄子山袁各庄啓新庄梁家庄石家庄此五庄供办徭役其一年地丁钱粮俱令蠲免如今岁已经徵收准於来岁蠲免至鮎鱼关城内外居民七十一家免其一年正供外仍每户赐银二两尔等从户部支取亲閱分给所蠲钱粮令州官即徧谕娄子山等庄及鮎鱼关居民务使均沾实惠

康 十八年己未二月己巳

上谕户部江南旧欠钱粮屡经督抚及科道等官奏请蠲免朕已洞悉但当逆贼煽乱之时各省地方与贼接壤者被其侵犯迫而从逆情非得已故於平定之後其旧欠钱粮悉行蠲免江西於贼未到之先地方奸徒辄行倡乱广信南康饶州奉新宁州宜黄安仁永新永丰彭泽湖口泸溪玉山铅山等处所在背叛绅衿兵民人等或附和啸聚抗拒官军或运送粮米助张贼势或布散伪劄煽诱良民或窝藏奸细潜通消息轻负国恩相率从逆以致寇氛益炽兵力多分迟延平定之期劳师费饷揆厥所由良可痛恨即今田庐荡析家室仳离皆其自作之孽逋赋未蠲职此之故但思逆寇渐经殲除地方凋敝追比旧欠民困愈深朕心殊为不忍其康

十六年以前旧欠钱粮着尽行蠲免尔部即行该督抚通行晓示务使小民均沾实惠以昭朕爱养百姓至意

四月庚寅

上谕户部江南财赋繁多如旧欠无徵钱粮更行追比恐累小民其康 十年十一年十二年钱粮俱行蠲免其十三年十四年十五年十六年钱粮俱令於十九年始分年带徵以纾民力着该抚通行晓谕务令均沾实惠以副朕休养斯民至意

康 十九年庚申二月丙戌

上谕户部尚书伊桑阿曰朕闻宣府等处岁值大祲贫民乏食甚至鬻卖妻子以求存活夫人孰不爱其家室哉乃欲延朝夕之命而割其所亲惨恻莫甚焉其遣尔部郎中明额礼驰驿速往会同地方官赈济急拯艰危以纾朕怀

三月己未

上谕御史洪之杰曰据奏赈粥期满请行停止朕思饥民流集京师今非麦熟之时若资遣还乡仍恐失所着添设粥厂於五城关厢外再行赈粥两月俟麦收之时听其各回乡里

四月庚辰

上谕户部前差尔部侍郎萨穆哈赈济直隶饥民至春麦收成之时停止今闻春麦已枯秋成难定其间灾重地方麦既无望饥民何以聊生仍着萨穆哈等前往赈济直接秋收勿令灾黎有失生理

康 二十年辛酉五月壬戌

上谕户部比年以来宣府大同疊罹饥馑而边外蒙古亦复凶荒故发宣大二府存贮米石尽用赈济朕思边境粮储所关最要古称三年九年之蓄盖合侯甸藩畿通为之计岂仅谓公廩之充盈已也养人足食道贵变通可发京仓米二十万石运往宣大备用其运送米石用就近地方驿站车夫不致糜费尔部派才能官一员前往会同该抚确议以闻

六月丙戌

上遣员外郎穆称额等往大同赈济

谕之曰前尔等奏饥民因赈济又得雨泽不至流移各安其业顷朕复遣人往视人民饥馁流移如故雨泽犹然未降则所云赈济尚未徧及矣前此姑置不问尔母自护前非朕知之最悉



今往同抚臣赈济务令饥民得遂其生及作何设法拯救确议奏闻

康 二十二年癸亥四月辛巳

上谕户部黔省为滇南孔道地瘠民贫大兵凯旋挽输刍糗供应人夫极其浩繁且起解吴逆家口络绎运送不无苦累小民竭力供亿生计艰难朕心深为悯恻所有本年秋冬及来年春夏应徵地丁正项钱粮尽行蠲免以示朕轸恤民隐之至意

十二月丙辰

上谕户部陕西西安甘肃等处前当大兵进剿之时转输粮糗办运刍茭一应军需取给闾里小民由陆路供亿劳费烦多今既经荡平朕心时切轸念康 二十三年应徵地丁各项钱粮着蠲三分之一以昭朕矜念民生劳苦之意又山西崞县忻州定襄五台代州振武卫新经地震被灾颇重虽经遣官赈济仍应量行加恩以示轸恤其被压身故民人所有康 二十三年应徵地丁钱粮着与全免其房舍倒坏力不能修者丁银全免地亩钱粮着免十分之四尔部速行该地方晓谕小民务俾各沾实惠如有司官役借端朦混私行重徵者或经参奏或被告发将经管各官从重治罪

康 二十三年甲子三月癸未

上谕户部民为邦本必年穀顺成家给人足乃惬朕抚育羣生之至意比者巡行近畿见闾阎生计仅支日用米价渐贵民食艰难又闻河南地方年岁荒歉所在苦饥小民无以资生恐致流移失所朕心深切轸念直隶河南应作何赈济事宜着九卿詹事科道会同确议具奏四月丁酉河南巡抚王日藻疏请发常平仓穀赈济饥民

上谕大学士等曰设立常平原为饥荒之备可令速行赈济随遣户部郎中吴什巴往河南

谕之曰赈济饥民最为迫切尔其驰驿速往同该抚察赈务令得沾实惠其被荒地方钱粮亦详查奏请酌量蠲免不得将未被灾地方钱粮借端混入槩行奏请须严飭该司道官员令其确查申报

康熙二十四年乙丑三月丁丑户部题赈济顺德等处饥民应如抚臣所请令地方官捐助

上曰朕闻顺德河间真定广平等处百姓殊苦饥谨今正值青黄未接之时不速赈济恐致流移离去乡土可令巡抚动支正项钱粮亟行赈济以救灾黎

辛巳

上谕大学士等曰朕南巡时见闾阎疾苦深为轸念所经过地方如此其他省可知今国帑充

足朕欲蠲免直隶各省明岁钱粮以纾民困尔等会同户部豫行酌议俾天下均沾实惠其直隶顺德等府正在饥荒且此地供应甚多徭役殷繁今宜即行议蠲直隶抚循得所实为有益尔等会同户部议奏

四月辛丑

上谕户部朕抚御方夏爱养黎元早作夜思勤求治理间阎疾苦无时不深軫念欲使民生乐业比屋丰盈惟当已责蠲租万姓得沾实惠直隶地方频遇旱灾小民匮乏宜加恩恤顺永保河等处圈占地方应徵康 二十一年地丁钱粮已经诏行蠲免所有直隶八府康 二十三年未完地丁钱粮尽与豁免除其顺永保河未经圈占地方及真顺广大等处康 二十四年应徵地丁各项正赋俱着免三分之一尔部速檄该地方官通行晓谕务使人人得被膏泽以副朕勤恤民隐至意如有不肖有司借端朦混私行重徵者或经参奏或被告发定行从重治罪尔部即遵谕行

九月丙寅漕运总督徐旭龄疏报淮扬等处水灾请行赈济户部议赈济事应令地方官料理

上谕曰淮扬等处叠罹水患百姓被灾甚苦朕心深为悯恻若令地方官赈济恐灾黎未沾实惠应急为拯救使小民不致流移失所可速遣部院堂官一员驰往踏勘情形具题到日详议奏闻

十一月己未户部议侍郎苏赫往勘淮扬水灾疏请免被灾百姓钱粮将运丁所余米麦赈济应如所请

上谕大学士等曰今国用亦云充足前曾令详察各省钱粮於来岁蠲免夫欲使民被实惠莫如蠲免钱粮朕南巡时观宿迁邳州百姓生计今年尚可支持淮扬等处饥民已经被灾不能办纳钱粮今仅免本年钱粮百姓沾恩有限须将明岁钱粮一并蠲免庶於民大有裨益至直隶各省遇灾钱粮亦欲蠲免尔等会同户部将被灾地方蠲免钱粮数目一并察明详议具奏

庚申

上谕户部朕惟自古帝王统一寰区懋宣德化必子惠黎元勤求民莫干止寧成家给人足而後世跻雍 治登上理朕御极以来宵旰图治未敢即安念切民依思培邦本虽编氓渐得遂生而间阎正资惠养欲使羣生乐利比户丰盈惟频行减赋蠲租万姓得沾实惠前此用兵以来河南湖北两省人民转输供亿劳费繁多特沛仁恩以昭軫恤所有康 二十五年应徵地丁各项钱粮可免其半其康 二十四年未完钱粮尽与豁免又直隶献县河间县河间卫江南宿迁县兴化县邳州高邮州盐城县山东鄒城县鱼台县地方今年重罹水灾小民艰苦亦应加恩軫恤所有康 二十四年秋冬二季二十五年春夏地丁各项钱粮俱与豁免尔部速行该地方官通行晓谕务使人人均沾恩膏以副朕爱育羣生至意如有不肖有司官役借端朦混及私行重徵者该督抚指名题参从重治罪如该督抚徇隐不行纠举或经参奏或经告

发定行一并从重治罪

康 二十五年丙寅九月庚寅

上谕户部自古帝王抚驭九有軫念民依凡鞠谋生养为计甚周犹以赐复蠲租为布德行仁之要务朕嘉与海内元元共图乐利弛征减赋时厪於怀惟频渙恩施俾万姓得沾实惠念直隶畿辅重地天下根本寛租之诏屡沛但顺天永平保定河间较之畿南诸府差徭加倍供亿尤剧又湖南福建四川贵州地方昔年为贼窃踞民遭苦累今虽获有宁宇更宜培养以厚民生其将直隶顺永保河四府及四川贵州两省所有康 二十六年应徵地丁各项钱粮俱着蠲免二十五年未完钱粮亦着悉与豁免湖南福建两省所有康 二十六年秋冬二季二十七年春夏地丁各项钱粮及二十五年未完钱粮亦与尽行豁免

十二月戊辰

上谕户部朕惟自古帝王抚驭寰区勤宣德意必軫恤民隐加惠闾阎俾黎元乐业比户丰盈则化洽时雍治登隆理朕念切民依鞠谋生养欲使羣生乐利干止寧成惟频行减赋蠲租庶万姓得沾实惠前念直隶畿辅重地王化所先宜大沛恩膏用培邦本而顺永保河四府地方人民较之畿南差役倍多繁苦故将康 二十六年地丁各项钱粮同湖南福建四川贵州四省钱粮尽与蠲免比虑兵饷或有不敷真顺广大四府地方未经一体蠲免今闻此四府人民亦有艰苦朕心深为軫念宜速施渥泽均示仁恩着将此四府康 二十六年地丁各项钱粮俱行蠲免尔部速遵谕行

康 二十六年丁卯九月乙未大学士等会同户部奏称蠲免江寧等七府陕西全省钱粮合计六百万有余亘古以来未有如此之多者臣等不敢轻议

上曰朕从爱百姓起见六百余万未足为多也

十一月辛丑

上谕户部朕惟自古帝王统御万方又安九有殚心怀保节爱攸先期於物力充裕爰以惠养黎元俾膏泽旁流咸蒙美利朕自御极以来軫恤民依力图休养惟理财为国家之大经蠲贷为爱民之实政历年敦崇节俭严核浮冒盖欲为布德行惠之资迨年各省钱粮虽已次第蠲免但江苏所属各郡县为财赋重地额徵钱粮甲於他省且累岁输将供亿効力惟勤兹用大沛恩膏除漕项钱粮外所有康 二十七年应徵地丁各项钱粮俱令蠲免二十六年未完钱粮亦悉与豁免又陕西省钱粮前虽已曾蠲免但念该省人民用兵之际转输馈饷効力可念再宜加恩以弘乐利其康 二十七年应徵地丁各项钱粮及二十六年未完钱粮亦俱与豁免尔部速行该地方官通行晓谕务使小民均沾实惠以副朕爱育苍生至意

康 二十八年己巳七月丙辰

上谕户部朕巡幸江南凡所经历之地於编氓疾苦必详加体察如伤念切每沛恩膏勿令一物不得其所朕过邳州亲见彼处田地多为水淹耕耘既无所施赋税於何取办若仍徵收钱粮小民必致重困其见在被淹田亩应纳地丁及漕项钱粮俱行蠲免历年逋欠亦尽与豁除该督抚即行出示徧晓穷乡仍不时廉察倘有仍行私徵者题参从重治罪以副朕爱恤民生至意九月庚戌户部议覆郎中殷特等会同直隶巡抚于成龙疏言察勘直属被灾地方七八九分不等请照定例按分数酌免钱粮应如所请

上谕大学士等曰小民生计最多苦辛今人动称耕九余三谈何容易农家终岁勤动幸遇有秋而穀价又贱欲办八口衣食与来岁耕种之资犹恐不足安得寬然有余一遇歉岁不免顛连困苦矣惟富饶业户陈陈相因贱买贵卖每获厚利然赖有富户居积犹得散赍民间以济荒歉若使尽为灾黎其何以堪自古帝王生长深宫少知稼穡艰难与民生疾苦朕軫念民艰时常巡省周諮博访悉知穷檐困踣之状实可哀怜直隶被灾地方本年未徵钱粮及康熙二十九年春夏二季钱粮俱应蠲免着候谕旨行

十月辛巳户部议覆盛京辽阳兴京屯庄所种田地因亢旱及霜陨米穀不收应免其纳租移咨盛京户部详计所需米数采买赈济

上曰盛京地方今年亢旱米粮不收闻兵丁见在买米而食朕心深切軫念其令户部侍郎阿山乘驿速往与盛京各部大臣公同察明量其度岁所需令内务府官往取庄上所有之米散给俾得均沾实惠

是日理藩院议喀尔喀信顺额尔克戴青等六台吉所属之人饥馑难以度日应遣官将杀虎口仓内所贮之米给发

上曰给发此米可差贤能司官前往勿令减少照数取给务令得沾实惠若米内有杂和糠土及给发短少等弊发觉之日将给发官员从重议处

康熙二十九年庚午二月乙丑

上谕内阁九卿詹事科道等曰昨岁畿辅荒歉朕虑民食维艰或至流离失所既蠲除其田租矣复特发帑金三十万两并动支常平等仓粟令该抚徧行赈贷盖期灾黎得所毋使离散也今闻通衢相近之民虽已获沾恩泽而僻壤穷檐究不能自存至於越乡去土者甚衆夫小民流移若此则司牧大吏所赈救者安在耶前所发三十万帑金未审如何散给所在人民有无转徙应遣部院大臣往加详察至於四方流民率多就食京师今年五城粥廠虽经倍给银米寬其期日但恐饥氓渐集无以徧贍罔克均沾恩惠宜增设粥廠择各部满汉贤能司官俾亲赈焉尔等其会议以闻

康熙三十年辛未十二月甲申

上谕户部朕抚御寰区三十年以来早夜图维惟以爱育苍生俾咸臻安阜为念比岁各省额徵钱粮业已次第蠲豁其岁运漕米向来未经议免朕时切轸怀所有京通各仓米穀撙节支給数载於兹今覩历年储积之粟足供三年给放应将起运漕粮逐省蠲免以纾民力除河南省明岁漕粮已颁谕免徵外湖广江西浙江江苏安徽山东应输漕米着自康熙三十一年始以次各蠲免一年至江宁京口杭州荆州大兵驻防地方亦应豫行积贮着将康熙三十一年起运三十年漕米各截留十万石存贮仓廩令该地方官敬慎守视以备需用

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十八

# 卷三十九

钦定四库全书

大清圣祖合天弘运文武睿哲?俭宽裕孝敬诚信中和功德大成仁皇帝圣训卷三十九

蠲赈二

康 三十一年壬申二月甲申

上谕户部朕勤求治理念切民依凡有往来人等必以年岁之丰歉雨泽之有无一切闾閻情形备悉谘访前闻陕西西安凤翔各属饥荒已经特颁谕旨蠲免钱粮竝发帑金专遣大臣赈济仍拨给别省钱粮刻期运送务使均沾实惠人获更生近又闻颁赈之前尚有贫民散入四方流离失业势不能复还乡井倘不曲加抚绥必致转於沟壑深为可悯凡流民所至地方应令该省督抚董率有司官员区画赈济令各得所其赈过人数及有能酌量资给俾回原籍者一并造册具奏至於湖广襄阳等处距潼关相近且道路平坦易於转输襄阳等处所有积贮仓穀应令该督抚运至潼关陕西督抚接受转运庶於散给兵饷赈济饥民均有裨益

十月己卯

上谕户部陕西西安等处连岁凶荒继以疾疫因而闾閻失业洊致流移朕軫念民艰焦劳宵旰自去岁冬月以来颁发帑金蠲免正赋挽运积穀转输漕粮屡遣大臣察勘多方赈济念国家所重惟在养民目今秦省虽薄有秋收但民间匱乏已极倘非格外加恩无以使积困尽苏转徙尽复陕西所属府州县卫所康 三十二年地丁银米悉予免徵从前所有积欠亦悉予豁免务俾比屋均沾实惠小民咸庆更生用称朕子惠元元抚育安全至意

康 三十二年癸酉八月甲戌

上谕户部朕抚御寰宇早夜孜孜惟以实惠及民俾登康阜为念广西四川贵州云南四省俱属边地土壤硗瘠民生艰苦与内地舟车辐辏得以广资生计者不同朕时切軫怀历岁以来屡施恩恤广西贵州四川云南四省积欠钱粮俱经次第蠲豁兹念育民之道无如宽赋矧边省地方非再沛优恤之恩则闾閻无由充裕所有康 三十三年四省应徵地丁银米着悉蠲免仍行该督抚徧加晓谕令人均沾恩泽以称朕加惠远省民生至意如有不肖有司借端朦混私自徵收者该督抚指名奏劾从重治罪

九月丁巳

上谕大学士等曰江浙二省今年夏旱虽不成灾秋收谅必有限若漕粮照常徵收恐民食将

至匱乏朕为此常切軫念除浙江漕粮已经改於今年蠲免外其江南漕粮今年或三分免一或免一半俟至该省应蠲年分将今年所免米石照数补徵起运於漕粮既无缺少官民大有裨益

十一月甲子

上谕户部朕念切民生时廑宵旰或在宫禁之中或经巡省之地务以编氓疾苦备悉谘询其从各省来京陛见官员及往来奉使人等亦无不以该省雨泽曾否应时田亩有无收获竝闻闾资生情形一一访比年以来因国家经费尚充遂将各省地丁额赋及旧欠钱粮节次蠲免即从前未经停徵之漕粮亦逐年免徵总欲使海隅苍生培固元气庶臻於家给人足之风今岁畿辅地方虽禾稼未获稔收初意小民餬口之需犹足资给生计未必遂致艰难顷者展谒

山陵沿途访察民隐今岁雨水过溢田禾歉收米价翔贵又闻顺天河间保定永平四府所属皆然目前米价既贵将来春夏之际价值益昂小民必艰粒食此朕目所亲覩若来年钱粮仍然徵收朕心实有未忍顺天河间保定永平四府康 三十三年应徵地丁银米着通行蠲免所有历年旧欠悉予豁免除行文该抚晓谕各属务令人沾实惠以副朕子育黎元至意

康 三十三年甲戌三月辛酉

上谕户部山西平阳府泽州沁州所属地方前因蝗旱灾伤民生困苦已经蠲免额赋竝加赈济而被荒失业之衆犹未尽覩干寧其康 三十年三十一年未完地丁钱粮及借赈米银若仍令带徵克期完纳诚恐闾阎力绌益致艰难着将所欠钱粮五十八万一千六百两米豆二万八千五百八十余石通行蠲豁用纾民力尔部行文该抚严飭该府州县官悉心奉行务必人沾实惠倘有已完在官捏称民欠及已奉蠲免仍复重徵官吏作奸侵渔中饱一有发觉定以军法从事遇赦不宥五月癸丑户部议覆江南江西总督傅拉塔疏言盐城高邮等处水涸田地求免徵粮应不准行

上曰粮从地出此地尚为水浸若徵钱粮则於民甚困致治之道民为最要凡事於民生有益即宜行之此水浸之田皆令免徵钱粮

七月壬午

上谕户部盛京等处去岁禾稼不登粒食艰窘闻今年收获亦未丰稔米穀仍贵兵民生计恐致匱乏盛京等处地方关系紧要朕心时切軫念着遣部院堂官一员前往自甲兵以至匠役当差人等有不能餬口者将人口数目查明赈济

康 三十四年乙亥五月庚寅

上谕大学士等曰副都统齐兰布等自盛京还奏言今岁盛京亢旱麦禾不成米价翔贵虽市有鬻粟而穷兵力不能采遂致重困盛京根本之地可令侍郎朱都纳学士嵩祝等驰驿迅往会同盛京将军副都统诸臣详察穷乏者於去岁海运米二万石中动支一万石计会散给令可食至秋成余一万石平价发糴兵民均有裨益又诸地有告粮乏者遣城守尉部员贤能者散给赈之如二万石不足散给发糴其速以闻

七月戊子

上谕户部盛京地方比岁荒歉粮食艰难朕心軫念本欲巡行省问疾苦情形徧敷恩泽今虽停止东行而所在贫窶兵丁尚望临幸是宜仍加恩恤用裨资生应作何加恩尔部议奏又盛京兵丁钱粮两季支领未支领前兵丁每至称贷嗣後按月支給今岁秋禾不甚丰茂恐生计渐难今自冬以至来秋应作何赈给不致失所共计需粮若干着盛京将军副都统会同盛京户部侍郎察明详画具奏

九月癸未

上谕内阁学士嵩祝曰盛京将军等疏请给米但言兵丁而已其

陵上执事人等及衆百姓竝不言及此皆朕赤子尔等亦可会同将军查明一并散给若使海运之米明年可到盛京兵民方可无虑

是日

上谕户部直隶顺天保定河间永平四府所属地方今岁水潦三农歉收朕巡行所至徧处访问高阜之产尚有秋成而洼下之田被潦者多计所收获不能相敌虽经勘灾颁赈不致仳离失所而额办钱粮若仍徵取民力匱乏难以输将朕心深切不忍着将四府康 三十五年地丁银米全予蠲免用示宽恤其霸州雄县香河宝坻皆有水道可以转输每处着发米一万石各差司官一员齎往照彼地时价减价发糴以资民食着行文该抚通行晓谕俾均沾实惠副朕軫念灾黎至意康 三十五年丙子二月壬辰内阁学士陶岱往盛京赈济奏请由天津海口运米至盛京

上曰从天津海口运米但以新造船与商船转运尚恐船少应遣人往福建将军督抚处劝谕走洋商船使来贸易至时用以运米仍给以雇值其装载货物但收正税槩免杂费往取此船着各部院衙门派出贤能司官笔帖式各一员令驰驿前去

九月丙子

上谕户部宣化府钱粮前已屡经蠲免但比年以来所属各州县牧养军前需用马匹又大兵络绎往来虽各有支給经费而供亿甚繁殊劳民力朕巡幸经临深切軫念着将康 三十六



年宣化府属地丁银米全予蠲豁仍行文该抚通行晓谕俾民间均沾实惠以副朕宽恤黎元至意

十二月己丑

上谕户部朕惟治天下之要惟以乂安民生为急顾欲安民生必除寇虐欲除寇虐必事师旅方今寰宇昇平人咸乐业独厄鲁特噶尔丹敢犯边塞荼毒生灵朕思为边境人民永绝後患故特遣发貔貅分道进剿朕躬不憚勤劳以今岁春月亲统中路大兵深入无水草之地直抵拖诺比噶尔丹闻朕亲临尽弃辎重仓皇宵遁适与西路大兵相遇大败溃散俘获其人口其寨桑等来归甚衆而噶尔丹收残贼千余人仍窜伏枯伦白尔齐尔等处地方朕於冬月复统军出边相机剿抚行抵鄂尔多斯於是厄鲁特人民来归者络绎相属噶尔丹力穷势蹙亦遣格垒沽英具奏乞降随经颁示敕谕许其归顺惟是噶尔丹乃狡诈叵测之人其果否来降未可深信应仍厉兵秣马待来岁出师扑剿务绝根株比年以来军前需用马匹在大司府属牧养者甚多措办草料等项虽俱支用正项钱粮而供亿浩繁殊劳民力但必此贼尽灭然後边外蒙古赖以辑宁而在内生民亦获休息师旅之兴大非得已该郡官民尚各勉力急公勿以烦苦为虑朕兹从边外回蹕云中深轸民力之艰用沛特恩以示宽恤康 二十六年大同府属州县卫所应徵地丁银米着全予蠲免俟噶尔丹殄灭之後朕自诞布德音涣敷麻泽尔部即行文该抚通行晓谕俾咸悉朕惠爱黎元至意

辛亥

上谕户部朕惟治安天下惟期民生得所而欲民生得所必以敷恩宽赋为要朕於一切事务倘少有动用民力之处即廑怀殷切刻不能忘比年以来因厄鲁特噶尔丹狂逞逆命遣发大兵分道进剿军兴供亿不得已而烦民力甘肃所属各州县卫所及榆林等处沿边各州县卫所适当师行要道喂养军前需用马匹竝大兵往来经过各项措办虽俱支給正项钱粮而供亿繁多闾阎劳苦朕心深用轸念着将康 三十六年甘肃巡抚所属州县卫所陕西巡抚所属榆林等沿边州县卫所地丁银米尽行蠲免行文各该抚徧加晓谕务俾小民均沾实惠称朕体恤黎元至意甘肃所属银米既经全免需用钱粮着於邻近省分作速拨给尔部即遵谕行

康 三十六年丁丑正月戊寅

上谕户部准扬徐各处去岁水势骤发被灾小民困苦万状朕心深为悯恻康 三十五年一应钱粮着尽行蠲免其三十四年未完钱粮於三十七年带徵着即通行晓示务使灾民均沾实惠

二月戊申

上谕山西巡抚倭伦曰朕抚御区宇念切民依故不憚勤劳亲历边境惟孳孳以靖寇安民为

急兹简约扈从人员从大同一路缘边地方进指宁夏因徧察间阎生聚及土壤肥瘠收获丰歉之状边民生计维艰虽一切供御之物纖毫不以累民而乘輿临幸宜敷庥泽除大同额赋已有谕旨豁免外其经过岢岚州河曲县保德州所属地方竝各卫所康 三十六年应徵地丁银米通予蠲免尔部行令该管官吏张示徧谕务俾穷乡僻壤均沾实惠

四月甲戌

上谕大学士等曰前山西巡抚倭伦以去岁山西数州县歉收今年米价甚贵奏闻顷噶尔丹殲灭天下悉已无事惟爱养兵民为要务山西米价腾贵民生困苦朕闻之中怀轸惻扈从大臣侍卫官员执事人等前来乘坐船站之船现有水手若至湖滩河朔後将此船逆流牵挽回至宁夏甚难前亦曾谕总督吴赫就此船将湖滩河朔积贮米或五千石或再加多量行装载交巡抚倭伦所属贤能官员转运顺流而下至保德州减价平糶於民大有裨益着学士黄茂前往率部院司官二员同行侍郎安布禄留此监发米石

九月乙巳黑龙江将军萨布素疏言沿河被水之十八庄请计其人数将黑龙江所贮米粮散给

上谕户部理藩院朕前至宁夏黑龙江将军萨布素曾奏伊处收贮粮米三万余石年久渐朽与其积之腐烂何若散之为有益乎且出陈可济军粮易新便於收贮宜如所请行

十月壬戌

上谕户部比年出师讨寇总为中外民生永图休息故不憚劳苦远历边塞其一切飞刍挽粟皆动支正供额赋不使累及间阎独是大兵牧马及三次师行出入皆经山西地方缘边州县卫所固属勉力急公其余郡县虽非师旅所经亦有协办转输行齎居送之事且该省岁屡不登穀价翔贵民间生计甚属艰难朕乘輿频临目所亲覩轸念殷切未尝一日释怀昨岁曾有谕旨俟噶尔丹殲灭之後诞敷德泽今寇氛荡涤边境牧宁是宜格外加恩用绥黎庶康 三十七年山西通省地丁银米一槩蠲免尔部移文该抚令徧飭各属实心奉行务俾深山穷谷均沾德惠倘借端徵派泽不下究事觉定行从重治罪

十一月甲辰

上谕大学士等曰各省被灾地方巡抚先行奏闻俟部覆之後始行察勘被灾分数直隶山东近地犹可若远省则往返奏请为时既久虽议蠲賑於民无及嗣後有被灾宜报者即将分数一并察报该部亦一并议覆

康 三十七年戊寅二月辛亥

上谕户部据山西巡抚倭伦奏平定州十一州县连年歉收米价腾贵民间乏食朕心深为轸

念此十一州县所欠康 三十六年钱粮行令该抚查明到日蠲免并将各仓所贮米穀即行賑济毋致流离失所有妨耕种

五月癸未

上谕大学士等曰朕巡行天津閱视沿河堤岸见山东饥民流移至直隶者尚多小民遭此荒歉若仍於秋间徵其逋欠百姓岂能上纳泰安州等二十七州县本年钱粮着於来秋徵收

庚寅户部议覆山西巡抚倭伦疏言静乐等五县未完康 三十六年钱粮请缓至本年十月全完应如所请

上谕曰山西省康 三十七年钱粮已有谕旨通行蠲免今静乐等县未完康 三十六年钱粮倘於本年徵收则小民仍有催徵之累尔部不行详察照该抚所题具奏殊属不合其未完钱粮着於康 三十八年带徵

十月丁卯

上谕户部盛京系

列祖创兴之地朕谒祭

陵寝咨询民瘼承德等州县今岁田禾未获全登宜加恩恤应徵米豆槩行蠲免尔部即移文该府尹徧示闾阎家喻户晓务俾均沾实惠以副朕爱民至意

十一月乙未

上谕户部淮安扬州凤阳等处比年水患频仍漫漫堤岸田多淹没耕获无从百姓艰於粒食朕时加轸恤屡賑屡蠲被灾地方赖以安堵但念久歉之余恐致资生匮乏朕廑惻殷切未尝稍释於怀前此虽频敷麻泽至再至三用裨羣黎生计犹恐开春东作农事艰难若不大沛恩施安能令小民各得其所着将海州山阳安东盐城高邮泰州江都兴化宝应寿州泗州亳州凤阳临淮怀远五河虹县蒙城盱眙灵璧等州县竝被灾各卫所康 三十八年一切地丁银米等项及漕粮尽行蠲免务使民间均沾实惠以副朕体恤元元生息爱养至意

康 三十八年己卯三月辛未

上南巡閱视烂泥浅等处

谕户部朕君临天下期於黎民乐业各获其所凡兴利除害之事靡不举行蠲免賑济之恩靡不下逮比年以来因淮扬所属地方疊罹水患业已岁蠲额赋賑恤频施

又动支数百万帑金责令在河诸臣於应挑应筑之处酌量修理欲使泛滥之水汇归入海被淹之田庐涸出庶底干宁乃糜费钱粮卒不能使积淹有归田庐未涸民生未遂朕闻之惻然軫怀值兹四海无事之时欲将一切修举事宜详閱指示用是躬亲临幸沿途审视黄河水势咨访地方父老比至归仁堤高家堰量度地形高下应挑应筑一一明示河臣惟是被淹地方米价腾涌生计维艰朕目击民依深用廑念着将漕粮截留十万石於高邮宝应兴化泰州盐城山阳江都受灾七州县各留一万石悉较时价减值发糴余米三万石着於邳州留八千石宿迁桃源清河安东四县各留五千五百石亦较时价减糴此各州县发糴之米着就近交与漕运总督河道总督邳州着遣司官一员前往监视再截留米十万石於扬州淮安各收贮五万石此应留漕粮不论何处米石着就近截留

壬午

上驻蹕无锡县

谕户部东南为财赋重地朕时加軫念频岁以来虽在边塞用兵之际未尝不早夜殷殷矧怀寬恤兹以中外昇平特事巡省竝閱河工比至江南观察民间饶瘠之状见淮南北地方疊罹水患深用惻然已经屡蠲屡賑仍命截留漕粮减价平糴其各州县虽市肆安辑耕凿恬而额费浩繁民生拮据历年逋负计算日增江苏安徽所属旧欠带徵钱粮几及百万念小民方供新税复急旧逋物力维艰势难兼办应沛特恩行蠲豁除康 三十三年恩诏内已经赦免外其康 三十四五六年奏销未完民欠一应地丁钱粮米豆麦杂税尔部行文该督抚察明俱着免徵务饬有司悉心奉行俾穷檐蔀屋均沾实惠如有已徵在官诡称民欠希图侵蚀肥己者一经发觉定从重治罪凡厥官吏军民宜咸知朕意

辛卯

上驻蹕杭州府

谕户部朕因淮扬地方数被水患躬临巡省目击田庐淹没之苦深加軫恤既截留漕粮以济民生仍蠲除积欠以纾民困其昨岁淮扬两属被灾钱粮曾经该督抚具题部议照例减免三分今念百姓餬口维艰安能办赋应破常格用沛特恩淮安府属海州山阳安东盐城扬州府属高邮泰州江都兴化宝应九州县竝淮安大河二卫康 三十七年未完地丁漕项等银一十九万两有奇米麦十一万石有奇着全予蠲免

乙未

上谕户部朕以省方问俗巡历三吴比至浙省见沿路农桑虽徧陇亩而地有肥硇时有丰歉历年正供钱粮因输纳维艰致多逋负已准分年带徵而新旧之赋取给一时恐力作之民终难兼办应通行蠲豁以弘庥泽除康 三十三年以前恩诏赦免外其康 三十四五六年奏销未完民欠地丁钱粮米豆麦杂税着一槩免徵尔部行文该督抚责令有司悉心奉行务俾

均沾实惠毋俾官吏以完作欠诡词侵蚀致干重罪

四月乙卯

上驻蹕江寧府

谕户部朕巡幸江南徧察地方疾苦深知民间生计艰难将通省积欠钱粮尽行蠲免所过州县有被灾甚重者俱经赈济务俾得所兹闻凤阳府属去岁潦灾甚重是用破格加恩以示优恤康 三十七年该府属寿州泗州亳州凤阳临淮怀远五河虹县蒙城盱眙灵璧十一州县竝泗州一卫未完地丁漕项等银米着一免徵

五月甲戌

上驻蹕李海务

谕户部朕巡省民生风俗南至江浙兹以回蹕行经山东沿途延见父老咨询农事幸今岁雨阳时若二麦继登小民可以无忧粒食但前年被灾泰安等二十七州县生计尚未丰盈宜更加恩休养所有康 三十六年未完地丁银米俱着免徵其康 三十七年应徵钱粮原因灾伤令於康 三十八年完纳今念一岁之内竝输二岁之租恐物力艰难未能兼办着分作三年带徵以示宽恤尔部移文该抚转饬有司明白张示务使穷乡僻壤均沾实惠以无负朝廷曲轸民依至意

七月甲申

上谕大学士等曰朕虑各处闸坝俱已闭塞大水一至必至泛滥屡谕于成龙作速挑濬芒稻人字两河今竟未挑濬卒如朕言着速行文巡抚宋荦令亲赴扬州淮安收养被水百姓江西巡抚马如龙前奏江西地方连年大熟今岁亦有秋着行文马如龙令运米十万石至扬州淮安交与宋荦或煮粥或赈济相机而行

十一月己亥

上谕户部朕思小民生计惟农亩是赖必年穀顺成斯衣食无缺淮安扬州所属州县卫历年以来河流漫漫田庐编氓艰於粒食朕心深切轸念已将康 三十八年钱粮俱行蠲免今春南巡目覩民间疾苦恐致失所复将康 三十七年未完钱粮尽予豁除谕令所司将沿河堤岸坚固修筑乃修防未竣夏秋又致冲决田庐尽没水中特命该抚往驻被灾地方动支积贮米穀竝将漕粮截留亲行赈给今念清口河流未通民田仍遭淹没耕获无从百姓饘粥尚且艰难来年租赋安能输办着将被灾海州山阳安东盐城大河卫高邮泰州江都兴化宝应等州县卫康 三十九年地丁银米等项及漕粮漕项银两尽行蠲免速令该督抚通行晓谕务俾均沾实惠以副朕拯恤灾黎至意

壬寅

上谕户部朕君临天下抚驭兆人无日不以休养生息为念嘉与元元共图丰乐蠲租赐复时切於怀故从前於直隶各省权其缓急先後频渙恩施今海宇昇平四方无事欲使普天率土咸登饶阜惟湖南地方素称鱼米之乡比年虽年穀顺成而民间犹未尽充裕是用格外加恩以绥黎庶所有康 三十九年湖南所属地丁杂税等项钱粮着一槩蠲免移文该督抚令徧飭所属实心奉行

康 三十九年庚辰二月乙酉江苏巡抚宋荦以赈济淮扬饥民米石奏闻

上曰朕发内帑修理各处堤岸总为下河民生起见河工一日不竣下河之民一日不得乐业朕甚惻然今岁漕运可截留二十万石交付宋荦备赈

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷三十九

# 卷四十

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十

蠲赈三

康 四十年辛巳二月癸酉

上谕直隶巡抚李光地曰朕历年省耕畿甸谕访民隐屡行蠲赈加惠黎元近见霸州大成文安地居洼下被水最甚虽遇丰年民犹艰食其三州县累年积逋及本年应徵地丁正项察明豁免务使穷民咸沾实惠如有势豪土棍包揽侵冒不肖有司听胥吏作弊指富作贫假捏灾伤以致泽不下究据实题参期於民困获苏以副朕爱养轸恤之意

十月己未

上谕户部朕孜孜图治宵旰靡宁於民生疾苦时切轸念甘肃等处地方切近边陲土瘠田薄今年雨泽愆期田禾多有未获闾阎饥困朕心深用悯恻已特飭该督抚等官将被灾之处亲行蠲赈令其得所更念来岁青黄不接西土小民输纳维艰着将甘肃巡抚所属州县卫所康 四十一年分地丁钱粮通行豁免地方有司务期切实奉行毋令官吏借端侵渔俾小民得均沾实惠以副朕轸恤灾黎至意

癸亥

上谕户部朕惟帝王致治裕民为先免赋蠲租实为要务矧江苏等处地方尤为财赋重地朕比年巡幸东南目击民艰多方轸恤令其安爰犹恐有司奉行不力德泽未尽下究民生罕遂康阜莫登兹将江苏巡抚所属州县等处除漕项外康 四十一年地丁钱粮尽行蠲免地方有司务期实意奉行使闾阎穷黎均沾实惠庶几民生乐利丰裕可期倘不肖官吏阳奉阴违私立名色借端科派恣行侵剋负朕爱养生民至意事发定行正法决不姑贷

康 四十一年壬午十一月乙卯

上谕大学士等曰蠲赋为爱民要务徵取钱粮原为国用不足国用若足多取奚为比年以来附近省分俱屡行宽免惟云南贵州四川广西等处未得常邀蠲恤今户部库帑有四川五百万两每年竝无糜费国帑大有赢余朕欲将此四省四十三年钱粮悉行蠲免倘更宽裕并及广东省亦令蠲免其蠲免四省谕旨明春即行晓示庶经费易为措置也

丙辰

上谕户部今岁山东河南地方俱报丰稔惟被灾州县民多匮乏顷朕巡幸至德州见有一二灾民流移载涂者询问疾苦深为軫念虽据山东巡抚称被灾州县已令地方官发粟散赈但自冬徂夏青黄不接之际颁赈不继无以资生应行山东河南两省巡抚凡被灾地方令有司加意赈济至明岁麦收时方止其灾伤田粮虽已照分数蠲免犹恐被灾之後民力艰难宜更沛特恩用加休养山东莱芜新泰东平沂州蒙阴沂水河南永城虞城夏邑被灾州县康 四十二年地丁钱粮除漕项外着察明通行蠲免该地方官务悉心奉行俾间巷穷黎均沾实惠以无负朕宵旰勤民殷殷軫恤至意又

谕曰从来致治之道裕民为先故必蠲免田租时加膏泽而後闾阎充足永享乐利之休朕临御以来咨求民瘼蠲赈频施诚恐小民疾苦未苏生业未遂用是宵旰靡宁江北田土瘠薄生计尤艰朕心弥切軫念着将安徽巡抚所属府州县卫等处康 四十二年地丁钱粮除漕项外通行蠲免地方有司务切实奉行俾小民得沾实惠以副朕爱养黎元至意倘不肖官吏阳奉阴违或借端苛取泽不下究事发定从重治罪不宥又

谕曰朕抚御寰区四十余年无一刻不以民生为念天下至大兆民至衆惟恐穷乡僻壤百姓疾苦不能上达所以孜孜勤求未尝少懈天时水旱自古有之备荒之法全赖督抚得人倘平日亏空一遇歉薄莫知所措遂讳灾不报视民命如草芥何以为民父母况秦省不通水运若不谨於盖藏俭岁难於赈恤河西一带地方素称贫瘠虽免康 四十一年钱粮民生未裕再将康 四十二年地丁钱粮通行蠲免该督抚遍示所属地方务使闾阎均沾实惠以副朕爱养黎元至意如有不肖有司违旨私徵希图侵蚀者督抚察参从重治罪或被傍人告发或被科道纠劾该督抚一并严议

康 四十二年癸未正月壬申

上谕户部朕甲子己巳两次南巡路经东省见民生丰裕士庶乐利近来淮黄告成朕不辞远涉减从轻装待旦而兴夜分乃寐再经齐鲁存问民生休戚似不及甲子己巳朕深憺怛如痼瘵之在抱也若闾阎蓄积有余即遇有水旱亦不致困苦今特加恩蠲恤用弘爱养朕所经过地方德州平原禹城齐河历城长清恩县夏津武城馆陶临清清平博平堂邑聊城东阿阳穀寿张滕县峄县二十州县康 四十一年未完地丁钱粮着通行蠲免济南府属之海丰利津沾化兗州府属之寧阳滋阳泗水金乡单县曹县郛城曲阜费县十二县去岁农收歉薄康 四十一年未完钱粮亦行免徵其去岁曾被水灾之东平新泰蒙阴沂州沂水莱芜六州县康 四十一年未完钱粮亦着全免其泰安郛城鱼台汶上嘉祥钜野济寧七州县虽未成灾康 四十一年未完钱粮俱着蠲免康 四十二年地丁钱粮着分三年带徵尔部即移文该抚率各州县有司详慎奉行务令人沾实惠户有余藏以称朕重期黎元殷阜之至意

二月丁丑



上谕河道总督张鹏翮曰朕经过泰安新泰蒙陰沂州郯城等州县见民有饥色应即行赈救经过地方虽经赈济蠲免钱粮但州县仓穀年久朽烂无裨於散赈今着漕运总督桑额以漕米二万石付尔拣选贤能官员运至济寧州兗州府等处即行赈济桑额亦将米二万石於泰安州一路散给又将收税有力之官七员竝发在京旗民犯罪降级赎罪人一百名伊等俱照养蒙古例以所用之多寡分别议叙

壬午

上南巡舟过邵伯更楼

谕河道总督张鹏翮曰此地旧日被灾情状与今山东饥民无异岂朕今日觀此地安居景象而忘山东之饥民乎朕念运粮赈济事不可缓乘今日顺风尔作速回清江料理转运截留漕粮差官前往山东散赈

七月戊申

上谕大学士等曰今岁山东雨水连绵黎民被灾若不豫为赈济一经逃散难复安集今当照前养山东饥民例多遣人员令其抚养尔等可会同九卿议奏

己巳

上谕大学士九卿詹事掌印不掌印科道等曰今六月内因有二王之事朕心不胜悲恻至今犹未释然至饥民救济之计未尝时刻不廵於怀近有苏州织造李煦人来询知郯城至泰安田穀稍有可望由泰安至德州被灾甚重今岁口外田穀大收口内各处田禾俱属平常合共计算所槩之谷必不能多今应将漕粮多行截留与山东沿河州县村镇俱各存贮以备赈济平槩之用朕意八旗满洲蒙古汉军佐领一千有余每三佐领下共出一人可得三百人每三佐领借与银三千两分派各州县仍照前去人员瞻养饥民至来年七月为期及今八月内可即到彼尔等确议具奏至东省今岁钱粮漕米俱应速行停徵为此手书特谕

癸酉

上谕大学士等曰赈济山东饥民事关紧要应差大臣分为三路每路差大臣一员将先派去人员一并往返巡察於事有益自泰安至郯城为中路着穆和伦去自济南至登州为东路着辛保去自德州至济宁为西路着卞永誉去截留漕粮亦属紧要总漕桑额现今无事着作速前来亲看截留其赈济饥民人员所领虽系公物而勉力自効有济於民事竣回时一并议叙

八月丙子

上谕户部邳州等处地方屡被灾伤不减於东省但尚有水路可通着该督抚亲往察閱应作

何速行拯济一面颁赈一面奏闻俟具题到日将应蠲豁钱粮另议具奏

十月壬午

上谕户部山东省去岁收成各州县丰歉不一今春朕南巡过山东时已分别被灾轻重蠲免钱粮竝遣効力人员星驰赈济比及回銮东省又告潦灾朕宵旰轸怀悉心筹画截留漕粮平价发糶兼出帑金遣八旗人员分道散赈仍於三路各遣大臣经理所在饥民庶得资以全活不致化离失所犹念被灾之後民力未纾宜更加德泽以宏休养康 四十三年地丁银米着通行蠲免有积年钱粮拖欠在民者亦着察明免徵行文该抚率所属有司详慎奉行务令人沾实惠有违旨私徵者察出定行从重治罪仍令各州县遍示晓谕俾穷乡僻壤咸悉朕惓惓惠爱灾黎至意又朕南巡回时原拟蠲浙省明岁钱粮兹因东省灾伤先行蠲免其浙省钱粮俟至明岁另颁谕旨

甲午

上谕大学士等曰朕闻山东巡抚布政使将赈济饥民人员齎去银两俱收布政司库内迄今尚未赈济如此则赈济之事不致迟误乎此项银两俱自京师发往竝非伊等库内之银且前往赈济人员系三佐领合同荐举殷实才能之人王国昌等但可查其养饥民之优劣其钱粮浪费与否乃赈济官员干系与伊等何涉而为收贮乎是何意见朕所不解此又刘煦之诡计也况派去三百余员不作速分派地方俱令久留济南必致米价腾贵人皆受困可将朕旨速交该部移问王国昌等

十一月戊午

上谕四川陕西总督觉罗华显陕西巡抚鄂海甘肃巡抚齐世武等曰朕抚有区夏思臻上理期於举世又安宵旰勤劳未尝少释而秦省为天下要地时厯朕怀曩者

连岁荒旱所司未经奏报朕访问得实即多方筹画运米赈救一由襄阳运至商州一命河臣由黄河运至潼关一由湖滩河朔运至渭河一由甘肃运至西安分行赈济蠲正赋免宿逋安集流离秦民始得少苏自康 三十二年遣皇长子允禔致祭华山以来雨阳时若年谷丰登闾阎稍有起色但秦省关系最重且不通水运抚绥尤宜加意故不憚隆冬跋履风霜远临兹土见百姓欢迎载道且知今岁有秋地方文武官吏更能恪勤奉职满汉军士亦皆训练有方朕心甚悦凡巡幸所至必大沛恩膏今将陕西巡抚及甘肃巡抚所属地方康 四十二年以前各项积欠银米草豆钱粮尽行蠲免俟四十三年直隶各省咸获丰稔当将秦省四十四年正供亦行免徵该督抚通行晓谕俾穷乡僻壤小民均沾实惠倘有不肖有司希图侵蚀以致泽不下究该督抚严加访察据实指参以副朕爱养黎元之至意

康 四十三年甲申三月庚戌

上諭八旗都統等曰聞京城附近有山東之民河間之民行乞頗衆已於五城給食而施與未均或不徧及着八旗各於本旗城外分三處煮粥飼之八旗諸王亦於八門之外施粥大爲利濟今已派出諸人赴山東養民但此輩俱集京師求乞若不如此設法賑濟則皆立斃矣茲派出鑲黃旗國舅佟國維正黃旗內大臣明珠正白旗內大臣阿密達尚書馬爾漢伊家人衆監散爲易其他五旗着派大臣家計殷實者監賑凡粥廠所飼之民病則醫治歿則棺殮至給粥時詳加識認恐此處既食又顧之他務使清楚周徧爲善如或怠玩施不周徧察出竝罪都統副都統斷不輕恕至漢大臣有仰副朕旨施賑者亦分爲三處內務府大臣亦將內務府人分爲三處俱令殷實可托之人監賑

六月戊子

上諭大學士等曰觀山東巡撫所奏今歲春麥大獲又聞自山東省來人咸云民生大有起色不似從前被災景象此甚非易致也山東百姓今始獲蘇明歲錢糧不可急徵若秋田有收再當商酌爾等識之俟十月十一月間啓奏

十月甲戌

上諭戶部今歲直隸地方雨陽應候禾稼有秋各郡民生皆獲安恆業惟是去歲山東被災之民自冬月以迄春夏流離轉徙入順天河間境內者甚多於時設廠煮糜所在賑救而米價至今未減誠恐近畿一路間井小民拙於生計是宜加恩寬恤用弘休養順天河間二府屬康四十四年應徵地丁銀米着俱蠲免該巡撫卽飭府州縣官徧諭窮鄉僻壤以副朝廷優軫畿輔黎氓至意又

諭曰山東比年歉收民生艱窘朕焦勞宵旰未嘗晷刻稍釋於懷康四十一年錢糧既分別減免帶徵又停四十二年徵收蠲四十二年額賦截漕平糶發帑賑施遣用多員分道瞻養有就食京城者復設廠煮糜命滿漢官員資送回籍給以籽粒之需然後民間漸有起色今歲幸風雨和調二麥畢登秋禾稔獲流移悉返里閭復業者咸安耕耨朕於往來山東人員備加詢問深用心慰但念被災之余甫離重困若非大敷恩澤終不能遽底盈寧將康四十四年山東省應徵地丁銀米等項除漕糧外悉行蠲免從來水旱靡常撫綏百姓之道全視大小官吏實心讲求庶幾民有攸濟諭旨到日該巡撫卽飭有司張示曉諭務俾通省均沾實惠仍牘導小民撙節蓋藏期於比戶皆有余蓄則於朕惓惓爲民經畫之意可以無負矣又

諭曰朕昨歲南巡至浙江見其農桑徧野戶口蕃殖閭閻氣象較勝於康三十八年巡幸之時甚爲心慰浙省錢糧雖前此屢經蠲貸而朕車駕親臨應更敷恩寬恤俾民生益加充裕當回銓以後卽擬免康四十三年額賦因山東急賑災荒遂爾少緩茲直隸各省皆獲有秋特申前命康四十四年浙江通省應徵地丁銀米等項除漕糧外着俱蠲免諭旨到日該督撫卽嚴飭有司張示徧諭務使窮檐蔀屋均沾實惠地方大小官吏仍不時訓誡小民令各守分節用不論年歲丰歉咸有蓋藏庶無負朝廷殷殷愛養賜租給復之至意

辛巳

上谕户部朕宵旰孳孳惟以康济生民为念每岁四方水旱皆谕令各督抚不时奏闻仍间遣人员驰往各路谘询农事有自外省来者必详问所过地方雨阳耕作之状凡以民生所重无如粒食不得不预为经画也康 四十一年冬朕巡幸至山东德州闻知莱芜等六州县民被灾伤即将四十二年钱粮悉予豁免及四十二年春南巡视河经行泰安一路见其间阎生聚远不逮於从前随下谕详察被灾州县蠲除额赋竝动仓穀赈济但蠲赈虽行而人民甚属窘迫非以瞻养蒙古之法行之不能立遂生计再三筹策乃命官民愿効力者百余人星速前赴山东计口授粮给衣济用兼量助牛种等

物贫窶之民皆赖以全活比朕避暑口外觉夏月雨水颇多即命行文移问山东等省而东省果告潦灾秋禾失收民滋困苦但地方人情犹帖然安堵此即遣官养民之实效也因又下谕增益多员分往被水失收处再加赈济顾各州县地广人衆需费浩繁犹必大张赈施方能遍及特命漕臣亲赴东省截留漕粮五十万石分贮沿河镇市冲要之地散赈而外即平价发粜又谕八旗满洲蒙古汉军每三佐领各派一人计得三百余人此所派人员每佐领领帑金一千两给之竝备车辆驼马等物令分往山东各州县照前遣人员瞻养以至来年七月为期其登青莱三府则截留漕米由天津海道运至其地每府各三万石又遣大臣三员分三路往来巡视稽核散赈事宜酌定平糶价值而民间始尽沾实惠至於未经散赈之际饥民有流入京城者老幼牴离急於得食爰於今岁正月命八旗王贝勒大臣内务府官员竝汉大臣官员设厰数十处煮赈一月有余复念饥民抛弃乡土久住京师究非长策於是遣官雇募船只悉送还籍仍给以银两为日用籽粒之资而流移之人遂得复安本业入夏以来风雨调和二麦稔登秋田多稼该省呈进穀穗合之往来人等奏对之语朕心始为大慰夫水旱灾伤事所时有非恃庙堂之上多方赈救则民将何依朕为山左劳心筹画者两载於兹廼幸奏有成效今三路大臣及该抚俱奏年穀顺成民生得所赈事告竣前後效力诸臣宜加奨劝去岁春秋二次遣往养民各员着察明议叙内有自出己力瞻养饥民者从优议奏其在京捐银及资送回籍人员亦着一并议叙东省停止陞转官员俱令照常陞转

十一月戊戌

上谕大学士等曰明岁春间正青黄不接之时当自正月为始於京师及通州地方发仓米照今年例平糶尔等会同户部议奏

康 四十五年丙戌五月丙寅

上谕大学士等曰前日直隶巡抚赵弘燮摺奏河间数州县历年拖欠钱粮请分年带徵朕已批发令其具题至直隶各省历年拖欠钱粮总数着交户部查明速奏内有民困无徵者酌量豁免

甲戌

上谕户部朕宵旰图维勤求民隐每欲敷蠲贷之恩以为闾阎留有余之力直隶山东地方康四十二年偶遇灾荒因特免山东康四十四年四十四年额赋竝康四十一年以前积欠钱粮直隶则顺天河间两府康四十四年额赋亦俱行豁免今虽屡年收获民气渐舒而所有宿逋尚应输纳朕念黎元方有起色办赋犹艰若一时新旧竝徵势难兼应宜更宽恤以弘休养直隶自康四十一年至四十三年各府属未完民欠银八万二千七百两有奇粮五千九百石有奇山东省康四十二年各府属未完民欠银一百六十九万一千七百两有奇粮五千九百石有奇或现在徵取或分年带徵俱着蠲免俾小民悉除逋负之累倘应徵旧欠有现完纳在官者即准抵本年正赋谕旨到日各该抚速行所属有司徧示晓谕倘有不肖官吏朦混徵收不与开除明白者该抚即时参劾严加治罪

十月己酉

上谕户部朕子育黎元日求所以休养利济之道念惟赐租减赋实有裨益於民生直隶各省钱粮次第全蠲一年者业经数举独是历岁逋负积累加增旧税新徵势难兼办纵使稍宽民力分年带输而督令续完仍多拮据朕睠怀及此深切轸恤用是大沛恩膏俾闾阎获免追呼官吏亦不罹参罚直隶山东积欠钱粮今年俱已蠲免其山西陕西甘肃江苏安徽浙江江西湖北湖南福建广东各省自康四十三年以前未完地丁银二百一十二万二千七百两有奇粮十万五千七百石有奇着按数通行豁免或旧欠已完在官而现年钱粮未完足者亦准扣抵

十一月甲戌

上谕户部今岁汉江水大南郑等县城垣田舍被水冲没且米价腾贵小民艰食所有本年应徵钱粮着豁免明年以後地丁钱粮亦暂行停徵俟应徵收之年该督抚察明具奏起科现在被灾人民着督抚速行赈济

康四十六年丁亥十月乙酉

上谕户部江南地方频年雨阳时若百穀阜成间井黎氓咸得遂生乐业但民间宿鲜盖藏御荒无术一遇岁歉即有匱乏之忧朕屡次南巡素所洞悉今年自夏入秋雨泽愆期该督抚先後奏至朕念小民久未被灾骤罹荒旱所关甚钜业今敕令停徵竝发仓穀赈济顾仓储数少未足徧给惟各州县截留漕米可以实惠及民目下时已届冬着总漕桑额会同总督邵穆布巡抚于準亲历各州县被灾地方备加察勘将今年所徵漕粮每州县或留八九万石或留十万石酌量足支給赈济之数分别多寡存留支散及今漕米尚未开兑截现收之粮以济待哺之衆实於民生大有裨益此朕殷殷怀保赤子轸念如伤之至意尔部即移文该督等实心奉行仍开具赈济实数奏闻又

谕曰从来漕粮关系仓储最为重要每岁刻期输挽概不停徵即蠲除节年额赋亦不及漕项朕前以国家经费尚充曾有酌免漕粮之事系出特恩去年颁发谕旨已将江南省民欠地丁

银米自康 四十三年以前通行豁免而漕项所欠尚在徵收今念江南地方现被旱灾除新徵粮米另有谕旨酌量截留散赈外其康 四十三年以前江苏巡抚所属各府州县未完民欠漕项银六十八万七千两有奇米麦三十一万一千八百石有奇着该抚一一察明悉与豁免用舒闾阎之余力俾办额运之正供事切利民蠲逾常格尔部行文该抚令张示遍谕务使均沾实惠以称朕深軫民依之意

十一月己酉朔

上谕户部江南浙江地方赋役殷繁倍於他省朕屡经巡历时切朕怀比年以来业已节次敷恩频行蠲贷顷因两省偶被旱灾随命按数减徵豁免漕欠竝分截本年漕粮今该督抚亲往散赈犹念民间素鲜积储生计不充非更加格外滋培则荒歉之余未能骤臻康阜兹特再施恩泽用弘休养康 四十七年江南浙江通省人丁共额徵银六十九万七千七百两着悉予蠲免其今年被灾安徽所属七州县三卫江苏所属二十五州县三卫应徵康 四十七年田亩银共二百九十七万五千二百两粮三十九万二千余石浙江二十州县一所应徵康 四十七年田亩银九十六万一千五百两粮九万六千余石俱着免徵所有旧欠带徵银米竝暂停追取俟开徵时一并输纳务使小民一岁之内絶迹公庭安处陇亩俾得优游作息经理农桑庶几闾里气象可以日加丰豫谕旨到日该督抚体朕惠爱黎元至意各飭有司实心奉行仍张示通令知悉倘蠲除不实致有侵冒察出从重治罪

康 四十七年戊子十月戊午

上谕户部朕屡次南巡见闾里殷阜之象远不逮於旧时虽不时蠲免额赋停徵积逋仅可支吾卒岁絶无余积朕每念及此未尝不为之惻然去年江南浙江两省俱被旱荒多方軫恤民力稍苏迨今岁复报潦灾旋经照例蠲赈竝留漕资济但岁再不登生计益匱欲令办赋力必难供康 四十八年除漕米外江南通省地丁银四百七十五万四百两有奇浙江通省地丁银二百五十七万七千两有奇着全行蠲免所有旧欠带徵银米仍暂行停止此朕因江浙二省为东南重地特於格外施仁用弘休养之至意该督抚各飭有司张示徧谕务令穷乡鄙屋咸共知悉倘或别借事端侵冒徵派事发定从重治罪

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十

# 卷四十一

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十一

蠲赈四

康 四十八年己丑十月壬戌

上谕户部今岁入夏以来朕因南方二麦不登北地微潦宵旰軫念甚切焦劳继而畿辅稔收三吴秋熟兼以四方奏报咸获有年朕心始为稍慰夫水旱灾伤虽事所时有而小民皆如赤子一以疾苦见告即不忍愒置於怀今念江南淮安府扬州府徐州三属地卑积水被灾独重秋禾未播种者甚多本年钱粮业经全免又遣官分赈而失业之民更宜加格外之恩以弘爱养康 四十九年淮扬徐三属之邳州等二十二州县卫额徵地丁银五十九万三千八百两有奇着悉与蠲免又河南省归德府属商邱等六县山东省兗州府属济宁等四州县或被夏灾或被秋灾虽已各依分数例免额赋竝宜更施膏泽用厚民生康 四十九年商邱等六县应徵地丁银二十万二千四百两有奇济寧等四州县应徵地丁银十四万六千六百两有奇俱着蠲免州县有旧欠未完钱粮亦着停徵一年谕旨到日各该督抚务严饬有司体朕殷殷恤灾至意张示徧谕悉心奉行俾穷乡僻壤均沾实惠如有不肖官吏借端私徵者即行察参

十一月庚辰

上谕大学士等曰本朝自统一区宇以来於今六十七八年矣百姓俱享太平生育日以蕃庶户口虽增而土田竝无所增分一人之产供数家之用其谋生焉能给足孟子曰无恒产者无恒心不可不为筹之也朕意欲将康 四十九年应徵钱粮预配各省用度为之抵算至五十年将天下应徵钱粮一槩蠲免如近省有支用之事则以户部库银给发应用

康 四十九年庚寅八月乙亥

上谕户部福建将军祖良璧奏称福建泉州漳州等处被旱未收福建民多田少不可不急为拯救虽总督梁鼐曾疏请借银买米平价棗卖但所买米数不多且一时不能运至曩昔山东江南等处被灾朕一闻知即为拯救天下人民皆朕赤子应即遣部院大臣会同江浙督抚截留本年起运镇江漕粮十万石松江湖州漕粮各十万石镇江之米运至狼山松江湖州之米运至乍浦着福建督抚提镇不拘一人率领福建战船将运往狼山乍浦三十万漕米转运至福建赈济被灾之民务期均沾实惠虽此米不能速至而被灾之民闻朕此旨即欢悦而定矣其泉州漳州今年未完钱粮亦着暂行停徵

十月甲子

上谕户部朕恭膺

天眷只承

列祖鸿庥统御万方子育兆庶廑怀至治宵旰靡寧幸际海宇同风边隅向化遐迩中外帖然  
衽席之安是皆仰荷

天地

祖宗福佑之所致也方朕八龄践阼之初

太皇太后问朕何欲朕对臣无他欲惟愿天下治安生民乐业共享太平之福而已迄今五十年矣惓惓此心未尝一日稍释每思民为邦本勤恤为先政在养民蠲租为急数十年以来除水旱灾伤例应豁免外其直隶各省钱粮次第通蠲一年屡经举行更有一年蠲及数省一省连蠲数次者前後蠲除之数据户部奏称共计已逾万万一无顾惜百姓足君孰与不足朝廷恩泽不施及於百姓将安施乎朕每岁供御所需槩从俭约各项奏销浮冒亦渐次清厘外无师旅饷馈之烦内无工役兴作之费因以历年节省之储积为频岁涣解之恩膏朕之蠲免屡行而无国计不足之虑亦恃此经画之有素也比来省方时迈经临七省南北人民风俗及日用生计靡不周知而民生所以未尽殷阜者良由承平既

久户口日蕃地不加增产不加益食用不给理有必然朕洞瞩此隐时深轸念爰不靳敷仁用苏民力明年为康 五十年思再沛大恩以及吾民将天下钱粮一槩蠲免因衆大臣议奏恐各处需用兵饷拨解之际兵民驿递益致烦苦朕因细加筹画自明年始於三年以内通免一周俾远近均沾德泽直隶奉天浙江福建广东广西四川云南贵州所属除漕项钱粮外康 五十年应徵地亩银共七百二十二万六千一百两有奇应徵人丁银共一百一十五万一千两有奇俱着察明全免竝历年旧欠共一百一十八万五千四百两有奇亦俱着免徵其五十一年五十二年应蠲省分至期候旨行民间旧欠既经豁免嗣後每年额徵钱粮务如数全完倘完不及额或别有亏空托称民欠则负国甚矣即责令督抚以下官员偿补仍从重治罪夫地方大吏以及监司守令皆与吾民谊均休戚者也诚克体朕孳孳保赤之怀实心爱养力杜侵渔峻削则闾阎咸得衣食滋殖无有失所而为官吏者亦身名俱泰岂非昇平乐利之盛事欤尔部移文各督抚谕旨到日即刊刻颁布徧示穷檐咸令知悉

十一月辛卯朔兵科给事中高遐昌疏言凡遇蠲免钱粮之年请将佃户田租亦酌量蠲免着为例

上谕大学士等曰蠲免钱粮但及业主而佃户不得沾恩伊等田租亦应稍宽但山东江南田亩多令佃户耕种牛种皆出自业主若免租过多又亏业主必平均无偏乃为有益着交部议



奏

康 五十年辛卯十月戊午

上谕户部朕诞膺大统抚育寰区夙夜孜孜不自暇逸凡以为民生勤图利济休养安全即无水旱之虞时布宽仁之政蠲租除赋务使遐方率土无不均沾或值雨阳偶愆出帑发粟多方赈恤其有益於吾民者靡弗备举而亟行之朕殷 周祥之至意前康 四十九年所颁谕旨甚明原欲将五十年天下钱粮通行蠲免以诸臣集议恐需用兵饷拨解之际兵民驿递益致烦苦故自五十年为始三年之内全免一周除将直隶奉天等九省康 五十年地丁钱粮一槩蠲免及历年旧欠钱粮一并免徵外山西河南陕西甘肃湖北湖南各抚属除漕项外五十一年应徵地亩银共八百四十万四千两有奇人丁银共一百二十万八千一百两有奇着察明全免竝历年旧欠共五十四万一千三百两有奇亦俱着免徵其康 五十二年应蠲省分至期候旨行民间旧欠既经豁免嗣後每年额徵钱粮务如数全完倘完不及额或有亏空托称民欠即责令督抚以下官员偿补仍从重治罪该督抚须实心力行期副朕惓惓爱民之意如有指称事故侵欺科派事发之日必严行究治谕旨到日徧示城郭乡村深山穷谷咸使知悉

康 五十一年壬辰十月癸丑

上谕户部朕宵旰孜孜勤求民瘼永惟惠下实政无如除赋蠲租除每岁直隶各省报闻偶有水旱灾伤照轻重分数豁免正供仍加赈恤外将天下地丁钱粮自康 五十年为始三年之内全免一周使率土黎庶普被恩膏除将直隶奉天浙江福建广东广西四川云南贵州及山西河南陕西甘肃湖北湖南康 五十年五十一年地丁钱粮一槩蠲免历年旧欠钱粮一并免徵外所有江苏安徽山东江西四省除漕项外康 五十二年应徵地亩银共八百八十二万九千六百四十四两有奇人丁银共一百三万五千三百二十五两有奇俱着察明全免其历年旧欠银二百四十八万三千八百二十八两有奇亦并着免徵计三年之内总免过天下地亩人丁新徵旧欠共银三千二百六万四千六百九十七两有奇各该督抚务须实心奉行体朕轸念民生至意如有侵欺隐匿使惠不及民借端科派者该督抚严行察参督抚失察事发之日亦严加究治

康 五十二年癸巳三月庚子

上谕大学士九卿等曰朕闻广东米价腾贵朕轸念天下民生无间远近虽边徼之外视之犹輶轂之旁也粤地素号产米之区今米价骤增小民必致艰食督抚系封疆大吏凡有关地方事务随所见闻应即据实陈奏朕处深宫已周悉万里之情形而伊等漫无奏报殊属懈忽前福建岁歉米贵朕令截留江浙漕米由海道转运赈济谕旨方颁市价立平於地方大有裨益今广东亦宜照福建截留海运朕详询投诚海贼陈尚义等见今截留江南漕粮由海运八九日可至福建自福建八九日可抵广东值今风势不顺不可转运必至八九月後北风渐利始可转运朕意於八九月後将水师营战船装载米石运送易於到广而兵丁亦可熟练水势其

天下地丁钱粮前已於三年之内全免一周今粵地米贵若将本年地丁钱粮仍行催徵则民力维艰不免输将之苦应将本年地丁钱粮停其催徵遣赵申乔前往广东会同督抚将朕轸念民生至意刊示宣布以慰輿情恩诏内有赏賚綠旗兵丁一欸即令赵申乔动支广东库帑亲行核实按名赏给使各沾实惠又

諭曰国家幅员甚大水旱丰歉势有不齐凡遇歉收之年督抚等但据实速报则或蠲賑或停徵先期酌行於百姓乃有裨益至所奏地方官员捐捧賑济皆虚名而已何益之有

十月庚寅

上諭九卿等曰朕念福建广东沿海州县值此青黄不接之时宜酌量蠲免张鹏翮奏曰顷蒙

皇上特加殊恩已令运米賑济矣但连年蠲免甚多见今

动用至康 四十九年钱粮矣

上曰即动用至五十年钱粮有何妨碍今米虽运去但足餬口不能办钱粮也朕心惟以百姓为重蠲免之事不可迟延

十一月庚戌

上諭户部朕勤求民瘼无间遐迩虽在边徼远省偶有旱涝灾伤无不访察情形殫思賑救今岁直隶各省地方俱获收成惟广东三水清远高要高明四会五县福建侯官县福右卫二处甘肃靖远卫环县镇原县固原州固原卫平凉县平凉卫崇信县庆阳卫灵州所会宁县宁夏中卫宁夏所古浪所一十四处今岁夏秋被灾各督抚已经奏闻虽各省地丁钱粮新经全免然一方灾歉悉厯朕心艰食之际重以追呼朕所不忍其明年应徵广东省三水等五县额银七万七千七百两有奇米一万七千六百石有奇福建省侯官县等二处额银三万六千六百两有奇米六千四百石有奇甘肃靖远卫等十四处额银四万七千七百两有奇米八万八千五百石有奇草八十四万三百束有奇悉与豁免尔部即行文各督抚务须实力奉行徧为晓諭俾民间无催徵之累肆力东作用称朕抚恤灾黎至意

康 五十三年甲午十一月庚戌

上諭户部朕抚御寰区勤求民瘼凡地方水旱灾伤必详加咨詢先事预筹其有荒歉上闻蠲賑频施务令得所五十余年来夙夜孜孜如一日也前因甘肃靖远卫等处年岁不登民艰粒食已多方賑济本年钱粮或蠲或停而山地硠瘠民鲜盖藏若不大沛恩施目前已自艰难来岁更何倚恃此被灾二十八州县卫所康 五十四年额徵银九万七千八百七十两有奇粮二十三万九千四十石有奇草二百五十三万七千八十束有奇俱着通行蠲免行文甘肃巡抚实心奉行务使比屋均沾实惠用副朕抚恤灾黎至意

康 五十四年乙未三月己亥先是

上以蒙古地方大雪

命理藩院遣官閱勘牲畜倒毙缺食穷困人等至是回奏上谕曰散赈之事势难速达吴喇忒等旗居近黄河蒿齐忒阿霸垓阿霸哈纳苏尼特等旗有达尔诺尔郭果苏泰察罕诺尔诸水可先教其捕鱼为食每处派新满洲三十人并造船人等遣理藩院司官带网前去教导蒙古人等其作何运给米粮及给与牲畜养贍之处着速议具奏

庚申

上谕阿霸垓辅国公达尔汉德木楚克等曰从前四十九旗田禾不收以致大饥朕施恩给以米粮又赏牲畜嗣因大雪牲畜殆尽朕复施恩如前尔等三年内已渐致富又七旗喀尔喀为噶尔丹所败牲畜帐房全无单身来归者朕赐米粮牲畜等物不令死伤一人拯济以後富逾旧日今尔等十余扎萨克蒙古纵多不过万数令尔等富足甚易但尔等目今穷困救济宜速而运米势需时日故先教以捕鱼资食以待米至给散至其後施恩养贍处朕见在筹画二三年内可使致富也尔等徧谕衆蒙古知之

五月甲辰

上谕理藩院闻被雪各蒙古因朕贍济竝未伤损一人朕甚喜悦蒙古等已知捕鱼可将渔船及网给与伊等令其仍在泽旁捕鱼而食将所给米粮节省留以度冬又所给牲畜不久蕃息即可渐致富饶矣

是日

上谕议政大臣等曰哈密为策妄阿喇布坦所侵恐不能生理着甘肃巡抚遣官运送米粮牛羊往赈

六月庚辰

上谕大学士等曰甘肃地方被灾之民应作何赈济着九卿詹事科道会同速议具奏赈济饥民之事较之征剿策妄阿喇布坦为更紧要尔等可速传谕

十月壬辰

上谕户部朕早夜孜孜轸怀民瘼四方水旱时勤咨询惟恐闾阎之盖藏未裕一遇歉岁收获失望穷黎即无以资生也直隶顺天保定河间永平宣化五府所属地方今岁雨水过溢田亩被淹者甚多穀耗不登民艰粒食见今缓徵赈济虽惠泽频施而来春应徵钱粮若仍行徵收

恐匱乏之民輸將難繼着將五府州縣康 五十五年地丁銀八十五萬五千八百兩有奇糧米豆穀一十一萬五千五百石有奇草九萬四千九百束有奇悉與蠲免爾部即將此旨行文該督令徧飭所屬州縣官員務須實心奉行俾窮鄉僻壤均沾朝廷德意倘有不肖官吏私徵侵蝕者察出從重治罪

十二月乙酉

上諭戶部朕統一寰宇宵旰孜孜惟以年穀順成民生康阜為念故凡地方水旱情形必時加諮詢其有歲偶不登即詔所司即行蠲賑五十餘年來未嘗稍懈前因甘肅靖遠衛等處年歲歉收既已多方籌畫蠲賑頻施復將甘肅被災二十八州縣衛所康 五十四年額徵銀糧草束通行蠲免但被災之余民鮮蓋藏若非再沛宏施恐來歲辦賦猶艱將寧州隴西渭源狄道臨洮五州縣衛康 五十五年額徵銀糧草束悉行蠲免外其靖遠二十八州縣衛所康 五十五年額徵銀九萬七千八百七十兩有奇糧二十三萬九千四十石有奇草二百五十三萬七千八十束有奇亦盡與蠲免諭旨到日該督撫即通行曉諭俾遐陬僻壤莫不周知務期均沾實惠以副朕軫恤邊民至意

康 五十五年丙申十月癸巳

上諭戶部朕統一寰宇無分中外皆欲久安長治共樂昇平宵旰孜孜五十餘年未嘗頃刻去懷也策妄阿喇布坦前曾頻行請安遣使來往近忽狂悖侵擾哈密哈密已經編置佐領即與內地無異若不遣發師旅置之不問斷乎不可故特徵兵備邊一切飛刍挽粟悉支正項毫無累及閭閻然而行軍置驛及諸凡挽運皆由邊境今歲山陝二省雖年歲丰收喜登大有但邊民効力轉輸在所宜恤茲特大沛恩膏將山西屬前衛右衛大同懷仁馬邑朔州保德等州縣衛陝西屬府谷神木安塞綏德米脂安定吳堡保安榆林保寧常樂雙山魚河歸德向水波羅懷遠威武清平甘肅屬山丹高台古浪庄浪西寧肅鎮寧夏左屯中屯平羅中衛靈州寧州平涼固原鎮戎西安慶陽阜城甜水河州蘭州洮州等四十一州縣衛所堡康 五十六年額徵銀六萬六千一百兩有奇糧米豆穀三十一萬七千七百二十五石有奇草一百七十六萬五千九百束有奇悉與蠲免並將從前積年逋欠亦悉與蠲除諭旨到日該督撫即徧行張示使遐陬僻壤莫不周知仍嚴飭所司實心奉行以副朕加厚邊民至意其或陽奉陰違澤不下究該督撫題參從重治罪

十二月壬子

上諭戶部朕御極以來念切民生時勤宵旰凡巡歷所至必以編氓疾苦備悉詢問蓋欲比戶之蓋藏恒裕三時之水旱無虞斯民氣和樂事成豐享豫大之休也頃者朕巡幸口外經過三河等州縣暨永平府交界地方見今歲秋成豐稔米價稱平惟是去年雨水過溢田畝間被淹沒朕深加軫恤蠲賦平糶轉漕分賑貧民斯不失所今者雖復有秋然僅足支一歲之用恐來年之輸將尚多難繼是必再沛恩膏始可大培民力着將順天永平兩府大興宛平通州三河密雲薊州遵化順義怀柔昌平寶坻平谷豐潤玉田良鄉涿州武清永清香河霸州大城文安

固安东安房山保定延庆梁城卢龙迁安乐亭滦州抚寧昌黎山海等州县卫所康 五十六年地丁银二十六万四千三百三十六两有奇米豆高粱二万一千六百四十六石有奇草九万四千九百五十束有奇俱通行蠲免所有历年积欠银九万三百九十六两有奇米豆高粱一万六千三百七十五石有奇草八万四千四百七十束有奇亦竝与豁除

康 五十六年丁酉十一月丙子

上谕户部朕抚驭寰宇五十余年夜寐夙兴为小民勤求生遂凡率土远近皆期共享乐利聿成家给人足之休未尝一日去诸怀也数十年以来各省正赋屡经全免历年积欠亦已蠲徵偶有雨泽愆期或发仓廩散给或截漕粮赈救不惜亿万金钱米穀频沛恩施诚恐穷簷艰难或至於颠连失所耳近者民力虽已稍纾然念分年带徵银两若不格外优免则小民一岁之所获分纳二年之赋以其赢余养贍室家断难充足朕每念及此轸恻良深宜更加殊恩通行豁免今将直隶安徽江苏浙江江西湖广西安甘肃等八处带徵地丁屯卫银二百三十九万八千三百八十两有奇槩免徵收其漕项虽例不准免亦着破格施恩将安徽江苏所属带徵漕项银四十九万五千九百五十余两米麦豆一百十四万六千六百一十余石内免徵各半尔部即行文该督抚严饬所属实心奉行徧行晓谕俾民间无徵催之累均沾实惠用称朕抚恤羣黎至意

康 五十七年戊戌闰八月戊辰

上谕户部朕临御五十七年凡师行转饷及灾祲偶见靡不廵怀忧切蠲免赈济稠疊加恩盖治安天下惟期民生得所而欲民生得所必以敷恩宽赋为急也三年以来因策妄阿喇布坦狂逞跳梁遣发大兵屯驻西边一切军兴征缮虽动支正供钱粮不使累及闾阎而转输挽运陕西百姓劳苦急公实堪悯恤又庄浪等处地震随经特遣部院堂官驰往察賑而用兵之後尤宜格外施仁抚绥黎庶应将陕西巡抚甘肃巡抚所属通省各府州县卫所钱粮米豆草束悉予蠲免目今系有军务之时除米豆草束外其康 五十八年应徵地丁银一百八十八万三千五百三十六两有奇并历年积欠银四万七百五十七两有奇着一槩蠲免尔部速行文该督抚通行晓谕实心奉行务俾均沾德意以副朕笃念民劳拯恤灾伤至意

康 五十八年己亥十二月辛酉

上谕户部朕惟治天下之要务首以乂安民生为先故自御极以来於闾阎疾苦无不博谘广询涣敷麻泽其有动用民力之处尤恻然轸念刻不能忘盖六十年如一日也比年因策妄阿喇布坦狂逞跳梁兴兵征剿远历边陲其沿边数处师旅屯驻一切虽皆支用正项钱粮而协办转输行齎运送之事民力劳瘁朕心时切悯念

曾将陕西甘肃所属康 五十八年额徵地丁银一百八十八万两零历年旧欠银四万两零特沛恩纶悉行蠲免而沿边各州县卫所军行既多飞挽之劳办赋复滋催科之扰若非格外加恩小民恐致失业所有沿边一带陕西所属府谷神木安塞绥德米脂安定吴堡保安榆林

保寧常乐双山鱼河归德向水波罗怀远威武清平葭州龙川镇靖镇罗寧塞靖边柳树涧安边砖井定边饶阳水堡高家堡甘肃所属山丹高台古浪庄浪西寧肃镇寧夏左屯中屯平罗中卫灵州寧州平凉卫固原镇戎西安阜城甜水河州兰州洮州寧夏前卫平凉县固原卫河州卫兰州卫庆阳凉州卫永昌卫镇番卫甘州左卫右卫肃州卫镇彝所等六十六州县卫所堡康 五十九年钱粮米豆草束俱宜蠲免但目今系有军务之时除米豆草束外将康 五十九年额徵银九万八千一百两零尽行蠲免尔部行文该督抚通行晓谕实心奉行务俾均沾德惠以副朕曲轸边民至意

康 五十九年庚子六月丙辰

上谕大学士等曰朕闻保安怀来等处地震宜速遣大臣前往賑济若俟部中啓奏恐致迟延着副都御史杨柱屠沂速自京城出居庸关前往延庆保安怀来沙城等处查閱一面奏闻加恩并查驗蔚州广昌浑源等处如果被灾着一并加恩直隶守道李维钧亦着量带地方官数员前往賑济

七月丁卯

上谕副都御史杨柱等曰保安等处地震尔等前往散賑毋得爱惜银两有不足用即以奏闻务使百姓均沾实惠不可速回俟民情安定再行回奏其保安等处本年钱粮及次年钱粮俱着蠲免

十月戊申

上谕大学士等曰朕临御以来凡事惟以实心行实政务俾羣黎均沾实惠从未讳言灾伤崇尚虚文今岁江南浙江湖广等省大稔豫省微觉歉收朕已颁谕旨将漕粮停止起运令於彼处收贮但陕西地方见有军务又年岁歉收故朕预颁谕旨着总漕施世纶协同总督鄂海办理除陕西历年钱粮屡经蠲免并明岁钱粮另颁谕旨蠲免外见令动支仓穀散賑而地方官员大半悉在军前办事之人殊少应照从前賑济山东百姓之例差官往賑着九卿詹事科道会议具奏

庚戌

上谕户部朕自御极以来无日不以民生为念凡闾閻疾苦必详加諮访至於地方偶遇灾伤一有所闻即行蠲賑抚恤备至务期黎庶遂生乐业优游化日六十年来夙夜孜孜未尝稍释也迺年因西陲用兵师行粮从虽刍粟悉支正供丝毫不扰民间然转输必需民力劳苦宜恤曾将康 五十八年陕西甘肃所属额徵地丁银一百八十八万两零历年旧欠银四万两零康 五十九年沿边各州县卫所额徵银九万八千一百两零屡沛恩纶尽行蠲免近闻二年歉收民有艰於粒食办赋急公力何能支若非涣敷德泽无以培养穷民是宜特颁浩荡之恩用申勤求民瘼之念着将陕西甘肃所属各州县卫所除应徵米豆草束外康 六十年应徵

地丁银一百八十八万三千七百四十两零通行蠲免尔部速行文该督抚徧行晓谕实心奉行务俾均沾实惠如有不肖官吏阳奉陰违泽不下究该督抚严察题参从重治罪又署抚花善奏称甘肃地方数年歉收粮草价值腾贵兵丁采买维艰朕念兵丁効力行间劳瘁堪悯准预给半年兵饷着即行文附近省分拨银三十万两速解甘抚颁发以副朕笃念民劳优恤军士至意

康 六十年辛丑四月丙辰

上谕户部朕览京畿所报米价甚贵着将京通仓米石交与侍郎张伯行比时价酌减糴卖内务府庄头所交谷石见在州县收贮亦着派满汉贤能司官照此糴卖正值谷价腾贵之时恐有偷盗仓内米石者着提督不时缉拏

五月乙酉

上谕大学士等曰朕因陕西歉收虽将钱粮蠲免动给仓粮又发库帑特差官员散赈百姓尚未安堵今施世纶亦束手无策此皆系地方官员不切实留心为民设法绥理以至百姓流离闻得山西陕西富户积藏米石甚多若有贤能官员劝谕糴卖可以多得着将内库银发五十万两令左都御史朱轼往山西光禄寺卿卢询往陕西再派部院贤能官员随往每处银二十五万两劝谕富户照时价糴卖米石庶乎易得将此旨传示九卿

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十一

## 卷四十二

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成 仁皇帝圣训卷四十二

积贮

康熙十七年戊午二月庚戌

上谕户部积贮系国家大计年来各路兵马需用粮饷浩繁在外总督巡抚及经管钱粮各官俱宜洁己奉公殚心稽察一应支放开销务严加核实节省方於军国有裨近见各路奏销或制备物料并不先行题明藉口军机紧急滥请销筭或不行察核重复支給又不为扣抵或朦混重领希图利己致滋糜费以及侵欺浮冒种种弊端难以枚举以後应作何禁飭尔部会同兵部工部详议具奏

康熙十八年己未六月辛未

上谕户部民生以食为天必盖藏素裕而後水旱无虞自古耕九余三藏富於民经久不匮洵国家之要务也比以连年丰稔粒米充盈小民不知储积恣其狼戾故去年山东河南一逢岁歉即以饥馑流移见告虽议蠲议赈加意抚绥而被灾之民生计难遂良由地方有司各官平日不以民食为重未行申明劝谕故也近据四方奏报雨泽沾足可望有年恐丰熟之後百姓仍前不加撙节妄行耗费着各该地方大吏督率有司晓谕小民务令力田节用多积米粟俾俯仰有资凶荒可备以副朕爱养斯民至意

康熙二十年辛酉三月庚午

上谕户部仓场侍郎等曰近闻各仓发米多杂土尘有贿者给好米经管之人种种作弊上下串通侵欺盗取者甚多此米系人生命朕一经体察务将始末澄清尔等应知此等情弊若不加严察永行杜絶是知而自取罪戾矣

康熙二十一年壬戌七月甲寅

上谕户部各省常平等仓积贮米谷甚属要务有此积贮偶遇年谷不丰彼地人民即大有裨益虽先经奉旨通行恐有名鲜实一遇水旱议赈之时未能接济致民生艰困今将某省实心奉行某省奉行不力其逐一详察以闻



康熙二十五年丙寅六月丙辰

上谕大学士等曰朕自即位以来二十余年凡民间之事留心体访深知情状古人不言救荒而言备荒故三年有一年之积九年有三年之积虽间值水旱小民不致失所去岁可谓丰年设今岁不登即致饥馑总由素无积贮耳即常平一仓积米太多亦易朽烂若临时令有司捐贷则又不可纵有良法奉行不得其人终属无益苟得良有司视民如一家休戚相关始克有济耳

十二月丙辰

上谕大学士等曰闻有运盛京粮米於山海关内者又有泛海贩粳於山东者粮米所系最为紧要况今议遣防戍官军人口衆多粮糈未必足用宜下所司密咨移盛京将军副都统户部侍郎令以已意禁止之

康熙二十八年己巳十月辛卯

上谕户部仓廩积贮专备本地灾歉若因应賑州县无粮以他处仓米易银移賑则有粮州县反无备灾之粮倘遇凶荒其何以应且一时出粳其价必贱於賑济亦无大益其积贮不足之所可动支正供钱粮速行賑济

康熙二十九年庚午正月癸卯

上谕户部朕抚御区宇夙夜孜孜惟期厚民之生使渐登殷阜重念食以养民必盖藏素裕而後水旱无虞曾经特颁谕旨着各地方大吏督率有司晓谕小民务令多积米粮俾俯仰有资凶荒可备已经通行其各省徧设常平及义仓社仓劝谕捐输米谷亦有旨允行後复有旨常平等仓积谷关系最为要紧见今某省实心奉行某省奉行不力着再行各该督抚确察具奏朕於积贮一事申饬不啻再三藉令所在官司能俱体朕心实有贮积何至如直隶地方偶罹旱灾辄为补苴之术嗣後直隶各省总督巡抚及司道府州县官员务宜各遵屡次谕旨切实举行俾家有余粮仓庾充牣以副朕爱养生民至意如有仍前玩愒苟图塞责漫无积贮者将该管官员及总督巡抚一并从重治罪尔部即遵谕通行

七月癸巳

上谕户部朕抚育黎元勤思治理足民之道宜裕盖藏从来水旱靡常必丰年恒有积贮庶歉岁不忧饥馑如康熙二十七年颇称岁稔诚使民间经营撙节早为储峙何至康熙二十八年偶遇旱灾室皆悬磬总因先时无备遂至餬口维艰比蠲除正赋特发帑金分行賑济所在官司悉仰体朕怀竭力从事被灾之衆始获安全倘非拯救多方则莠黎必流移失所今霖雨时降黍苗被野刈获在即可望有秋惟恐愚民不知爱惜物力狼籍耗费祇为目前之计罔图来岁之需纵今年获屡丰亦难渐臻殷阜应行直隶各省督抚严饬地方官吏家谕户晓务俾及

时积贮庶终岁所食常有余储用副朕軫念民依绸缪区画至意尔部即遵谕行

康熙三十一年壬申正月壬子

上谕大学士等曰去岁陕西西安等处年谷不收罔有积贮以致闾阎困苦已遣使赈济之矣今年丰歉尚未可知陕西省府州县见存米谷之数应行察明先时豫备至各省府州县皆令积贮米谷数千石则裨益黎庶者大矣可下各该督抚等令各府州县积贮米谷其所积谷数逐一缮册报部

五月辛亥

上谕大学士等曰朕思积贮米谷最为要务倘能实有盖藏则虽遇荒歉必不至於饥馑但小民不知储备每遇丰稔之年恣意糜费一遇歉岁即坐困不支今值麦田收获之时应行各该地方官劝谕百姓令各户量力捐输积贮该州县官以输纳之人姓名数目详记册籍当秋禾收获以後亦依此例举行至春月转贷於匱乏之民俟秋月即照此数偿还备用每岁如此遵行不数年间米谷充裕纵使岁遇不登何至闾阎艰於粒食乎

康熙三十三年甲戌七月辛卯

上谕大学士等曰密云县田禾失收今年雨水甚大着速行文仓场侍郎将通州仓所贮粟米以一万石运至密云县五千石运至顺义县乘水方盛速行运到令其收贮

康熙三十四年乙亥八月癸巳

上驻蹕密云县

谕大学士等曰去岁朕见此处高粱结实者少秕者多米价腾贵高粱一斗几三百钱故将通仓米令运一万石至此处五千石至顺义县减时价发糶米价稍平一斗百钱民以不困北地寒冷米谷多至失收今河水方盛着将通仓米运至密云顺义各一万石令贮仓备用

康熙三十五年丙子十二月辛亥

上谕大学士等曰黑龙江吉林乌喇地方频岁不登可移文盛京将军令整缮船只将盛京仓储米谷以彼地人力运五千石至莫尔浑阿敦之地积贮之又

谕曰今岁自天津海运至盛京之米已给散科尔沁贫乏之衆来岁仍当自天津运米至盛京其转运船只不必用福建浙江二省船止用天津船挽输一次可传谕侍郎陶岱

康熙三十六年丁丑三月壬戌

上谕大学士伊桑阿曰州县俱有积贮米谷兵丁所驻沿边卫堡亦甚紧要其榆林等处卫堡俱照州县积贮之例将米谷积贮豫备着交该巡抚遵行

七月丙午户部议覆陕西巡抚巴锡疏言各卫堡

积贮米谷宜分拨沿边各堡运贮应如所请

上曰此各卫堡米谷若责令承收官员自备转运之费路远而险势必科派小民巡抚之奏户部之议皆非也其俟秋成後令该抚酌支正供买米收贮

康熙三十七年戊寅二月庚午

上谕大学士等曰户部将曾经保举司官二员差往被水灾沿河之保定霸州固安文安大城永清开州新安等州县截留山东河南漕粮每处运致一万石以备积贮俟米价腾贵时平价棗卖

康熙三十八年己卯十月癸酉

上谕大学士等曰黑龙江地方连岁歉收着将乌喇收贮米粮运至默尔根齐齐哈尔地方豫备若彼处有引水种田之处着能耕种之人前去教导交该部议行

康熙三十九年庚辰三月乙未

上谕户部淮扬等处百姓罹於水灾未宁干止朕心时切軫念比年以来多方优恤蠲免赈给靡不举行去年春朕亲履河工目击小民田庐皆被淹没灾黎艰於粒食益惻悯於怀爰命地方按户赈济又将截留漕粮发赈平糴俾得贍养上下两河堤岸前屡发帑金修筑去年二月面谕河工诸臣速行修治至今尚无成效复遴选廷臣同往经理无非軫念民瘼欲令黄运两河堤岸速成斯民早安生业耳念水患一日不除则百姓一日不得耕种因是深以为虑着将今年漕粮截留二十万石存贮淮扬地方备用尔部即遵谕行

七月丙辰

上谕户部国家要务莫如贵粟重农朕宵旰图治念切民生惟期年谷顺成积贮饶裕於以休养黎元咸登乐利今闻直隶各省雨泽以时秋成大熟当此丰收之时正宜以饥谨为念诚恐岁稔谷贱小民罔知爱惜粒米狼戾以致家无储积一遇岁歉遂致仳离着该督抚严飭地方有司劝谕民间撙节烦费加意积贮务使盖藏有余闾阎充裕以副朕重农敦本爱养元元至意

康熙四十一年壬午三月辛卯

上谕户部朕躬理几务年久深知稼穡之事念阜民之道期於有备去冬北地少雪今春雨泽微降尚未沾足诚恐蝗蝻易生有伤农事所在官吏亟宜先时预防直隶山东山西河南陕西江北地方历年积贮仓粮果否足额该督抚宜确加稽核务使廩有余储不致匱乏其一切豫备事宜须悉心讲求料理纵年岁不甚丰稔亦可赈济无虞至直隶各省见今雨泽有无多寡着该督抚即行具摺奏闻以纾朕宵旰勤民之意

康熙四十二年癸未十二月辛卯

上谕大学士等曰朕顷巡幸陕西閱视汾渭俱属大河直与黄河相通河南等处米谷似可由黄河转运但闻三门砥柱水势极溜船不能上朕欲亲往閱视因陕州知州奏无路径断难行走遂未果行特命三贝勒允祉同近御侍卫往视据回奏言伊等遣人乘骑涉河一道閱有神人鬼三门俱系凿石开通水从三门流出其势甚寬其流甚急古人於山上凿有曳船眼孔但未经以船试验不知可否行走前总河靳辅亦曾奏黄河通於汴河但淤垫年久若行疏导即可运粮朕至河南閱河南府居各省之中水路四达最为紧要之地应於此处储积米谷每年田亩岂能必皆丰收倘山陕等省间或收成歉薄即可将此积贮米谷修造船只由黄河挽运若到三门砥柱船不能上亦可於三门砥柱造船剥运以至山陕诚使河路疏通则商贾人民大有裨益所宜於无事之时预为筹画者也豫省每年解京漕粮二十万石有奇若将豫省三年漕粮截留备用则陕西等省虽值歉收之年将此米谷运至彼处赈济殊属有益俟明岁遣大臣往视

康熙五十二年癸巳五月辛巳

上谕大学士等曰今年八九月内应拨江南省积贮仓米十万石用京口将军标下战船及松江提标战船狼山镇标战船装载着总兵官穆廷弼总管船只浙江省积贮仓米内亦拨十万石用浙江提标战船及定海镇标战船装载着总兵官吴陞总管船只俱运至广东此运米兵丁往返时或遇风势不顺行船有阻亦未可定所需口粮皆宜预备但不得动用赈济额米江南织造署内朕曾令贮米一万石如八九月间江南无动用此项米石之处即将此米石亦令一并运去着行文该督抚知之

康熙五十三年甲午七月辛亥

上谕大学士九卿等曰朕听政年久深悉民生利弊凡国家要务无时不预为筹画有奏摺人来朕皆细问咸称江南天旱江浙米价亦不甚贱今春山东河南田麦歉收交冬米必腾贵若待彼时方为料理恐不能及朕详悉思维将漕粮拨三十万石江宁府十万石苏州府八万石淮安府扬州府共五万石杭州府五万石开封府二万石着漕运总督亲身閱兑速行运至令其加谨照数收贮有此米石军民心安而米价自不至骤贵豫省漕粮该部亦应预行详议今若雨泽及时田禾丰收则此项米石由水路拨给他处亦可着议奏

十一月乙卯

上谕户部朕临御多年无时不轸念民瘼每岁於直隶各省凡雨阳期候丰歉情形莫不留心访察虽在僻远必务周知偶值一二处灾伤蠲免赈救不惜重费仓帑以苏我民困也朕思赈济灾歉以速为贵必待督抚奏报往返候命使小民嗷嗷待哺何如预备积贮於平时则所在有可恃之资而临事免转移之劳今漕挽通行仓庾充裕江浙地方年来颇有歉收州县应酌量截留漕米分贮各处江寧原留五万石今再截留十万石苏州原留八万石今再截留二万石安庆截留十万石杭州原留十万石今再截留十万石皆於本年起兑内就近截留令地方官加谨收贮至应动用之时着该督抚题请尔部即遵谕行

康熙五十五年丙申五月壬申

上谕大学士等曰閱今岁督抚等奏摺陕西山西河南山东等省二麦丰收乃京师麦价未见甚减京师所赖者山东河南之麦此两处俱通水路不知一年贩来几何或沿途富商大贾预行收买以致京师麦价不减亦未可定从前江南浙江所买湖广江西米数及湖广江西卖去米数该督抚俱具摺奏闻大有裨益今山东河南除陆路贩卖者无庸稽察外自水路买来麦谷数目可否照湖广江西督抚具摺奏闻之处尔等会同九卿确议具奏

十月丁亥朔

上谕大学士等曰张伯行条奏宜立社仓前李光地为直隶巡抚时亦曾请立社仓朕谕此事言之甚易行之甚难尔姑试行後试行之果无成效仓粮库帑设官专理尚且亏空社仓所收谷石交百姓收贮寺庙亏空又何待言耶其果否可行之处尔等会同九卿详议具奏

康熙五十六年丁酉四月乙未

上谕大学士九卿仓场侍郎等曰迩年以来通仓积米甚多着分运直隶各府州县存贮预备於民甚有裨益每府或贮万石每州县或贮数千石附近通州河道者交与仓场总督等运送其余府州县所运米石速行文直隶总督????地方官乘未雨之先挽运值此青黄不接之时於各府州县平糶亦大有益於百姓其江南浙江如有应行截留漕粮若干之处尔等一并速议具奏

丁酉

上谕大学士九卿等曰近来米价必不能如往年之贱昔大学士张英曾奏桐城县米价银一两可得三石见今四川米价亦复如此云南广西贵州米价亦不甚贵大抵户口稀少则米价自贱今太平日久生齿蕃息安能比数年前之米价乎户口殷繁固是美事然当预筹安养之策今将米石运送各处或平糶或赈济不过仅可餬口未必即能充裕张伯行曾奏於永平府设立社仓永平知府近日行之甚苦社仓之法既属难行通仓米石有余不如运送各州县为便又

諭曰見今通倉米石甚多應運送之州縣即當運送去年皇庄米石俱交州縣積貯但倉中未必實有其數畿南廣平大名等府有水路可通應交直隸總督作何運送至密云古北口去年曾運通倉米每處各一萬石亦甚易或仍交倉場總督運送爾等速議具奏

康熙五十八年己亥正月壬寅

上諭大學士九卿等曰京城通州倉內貯米甚多各省運至漕糧亦無虧欠在倉堆積恐致紅朽杭州蘇州鎮江江寧淮安安慶等處俱有倉廩與水路相近江南浙江漕船想此時已過淮朕意欲將湖廣江西等未過淮漕糧截留存貯此等地方倉內遇米價騰貴之年將此存貯米石或減價糶賣或行散賑則民人得沾實惠大有裨益如蠲免地丁錢糧不過於田多富戶有益其無地窮民未必均沾實惠米谷甚屬緊要不可不預為備也年來丰收米價雖賤但歲歲大有豈能期必乎應將久遠裨益之處預行籌畫爾等將漕糧作何截留之處會同議奏

康熙六十一年壬寅四月戊午

上諭戶部趙宏燮奏將收貯真定順德各州縣四萬石米平糶其餘各州縣有未貴之處亦將倉米平糶十分之三俱俟秋收後買補還項等語去年各州縣收貯庄頭等所交米石部內曾遣司官會同地方官糶賣其糶米銀兩至今尚未完繳據此各州縣收貯倉米俱無實際平日積貯原為備荒而設今值青黃不接之時固應平糶但地方官虧空倉米不過糶賣數石即借此掩飾虧空究竟倉米既虧百姓何從糶買於民生並無裨益也見在存倉米谷如果足數即照該督所請糶賣倘朕遣大臣查看時州縣並無米谷黎庶不得糶買將州縣官即行正法該管上司从重治罪

六月壬戌

上諭大學士等曰暹羅國人言其地米甚饒裕價值亦賤二三錢銀即可買稻米一石朕諭以爾等米既甚多可將米三十萬石分運至福建廣東寧波等處販賣彼若果能運至於地方甚有裨益此三十萬石系官運不必收稅

十月辛酉

上諭議政大臣等曰倉糧關係甚要支放米時理應一廩放畢再放一廩今聞此廩米石支領方半又向別廩支領所剩米少而所占之廩甚多又支領白米時諸王公主等屬下之人不按應放之廩領米而揀廩霸占支領者有之此等斷然不可理應按廩支領如廩內余米一半者即是弊端應將此徹底清查若遣他人亦未能辦着和碩雍親王帶領弘昇延信孫渣齊隆科多查弼納吳爾泰前往會同張大有查勘再從前倉內每日進廩之米止四五千石自簡任富寧安以來每日進廩之米至四萬石進米多則於回空糧船有益至於米色之變俱在收貯之善與否即如昭五達地方所貯米石歷四十年米色照常并未霉爛今廩座有損漏者着即修理廩座如不敷用着即添造

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十二

## 卷四十三

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十三

饬臣工一

康熙七年戊申二月丁酉

上谕吏部等衙门前谕督抚奏事必举其事之原委明晰入告部院将应结之事亦即行完结勿得迁延駁察近见督抚奏疏仍有事情未晰者部院亦有将应结之事迁延駁察者如此草率不加详慎殊负委任之意今後督抚奏事若不详明具奏着严行参处各部院若将应结之事复搜求细故借端駁查定行治罪

康熙八年己酉六月丁卯

上谕户部凡奉差及直隶各省地方见任各官俱有董理公务并抚绥百姓之责宜各尽乃职以副朕差遣简用之意近闻奉差官员及督抚提镇大小文武各官不思尽职惟图利己及买良民为奴甚至多买馈送亲友此等违法妄行殊属可恶以後着通行严禁若仍前恣买良民者从重治罪决不姑恕

康熙九年庚戌三月己卯

上谕吏部等衙门时已入夏雨泽愆期皆由部院大小臣工因循旧习不能精白乃心公廉尽职以致政务失当有干

天和尔等堂官宜力图修省靖共职业严督所属司官凡事秉公勤励革除积弊毋得瞻徇情面仍稽察胥吏作奸事有宜结者速为完结勿借端屡駁冀遂己私至於法司一切讼狱务期平允得情速审速结勿株连无辜久致淹系尔等大小官员当实心修省毋视为具文怠玩如故有负朕委任责成之意

九月乙亥

上谕吏部兵部朕惟致治雍熙在於大小臣工悉尚廉洁使民生得遂内外满汉文武官员各有职守必律已洁清屏絶馈遗乃能恪共职业副朕任使近闻在外文武官尚有因循陋习借名令节生辰剥削兵民馈送督抚提镇司道等官督抚提镇等官复苛索属员馈送在京部院大臣科道等官在京官员亦交相馈遗前屡经严禁未见悛改殊违洁已奉公之义兵民日渐



困乏职此之由以後着痛加省改断絶馈遗以尽厥职如仍蹈前轍事发之日授受之人一并从重治罪

康熙十二年癸丑五月庚辰

上谕吏部国家大小事务在内责成部院在外责成督抚其事情重大繁难者仍照限完结如平常易结之事理应速结以清壅滞近见内外各衙门题覆本章有将易结之事迟延不结必俟限满具题其不行具题完结者必多牵连守候以致苦累自後着速行完结毋得迟延务俾案牘一清副朕委任至意

八月庚子

上谕都察院左都御史多诺等曰尔衙门职系言官凡事宜各抒己见岂可以公同具奏充数已乎尔衙门所奏之事虽皆曾经列名但副都御史岳诺惠等畏懦瞻顾竟无建白嗣後应公奏者公奏若事应独奏其各出己见以闻

九月甲申

上谕吏部等衙门国家致治首在崇尚寬大爱惜人才俾事例简明易於遵守处分允当不致烦苛乃符明作惇大之治向来各部院衙门俱定有处分条例已经颁行但其中款项太多過於繁密以致奉行者或以胶执为守法或以苛索为详明或例所未载援引比附轻重失宜徒据成规罔原情理大小各官稍有过误动触文网虽具才能弗克展布深为可惜着部院各衙门将见行处分条例重加订正斟酌情法删繁从简应去应留逐一分别详议具奏

十二月辛丑

上谕吏部兵部国家用人宜先沈静之才人臣服官首重廉耻之节迩来文武官员或因不得陞迁或因不得差遣辄称冤抑纷纷控告不过图便已私原非从公起见纵属应陞应差而自为辨白希求营利廉耻之道已亏岂能修举职业克副任使理宜严禁以肃官常尔二部可通行申饬

康熙十三年甲寅正月庚辰

上谕朝覲藩臬等官曰尔等朝覲官员各有职掌俱宜实心任事洁已爱民安辑地方消弭盗贼钱粮不得加派刑名务期明允賑济蠲免必使民沾实惠以副朕察吏安民至意如不遵行国法具在

三月辛巳

上谕安南将军华善曰京口地当要害特遣尔率兵往镇倘附近有警亦宜应援军行往来与驻防之地务严禁军士勿令扰民闻前者兵行率多扰害尔等当以为戒否则罪有所归

康熙十六年丁巳三月己丑

上谕镶白旗副都统吴璠及兵部尚书塞思赫显亲王下长史马七办理府务佐领达席贤温郡王下长史鄂乐办理府务一等护卫郭布博济等曰迩年以来镶白旗盗贼光棍匪人甚多凡此妄行之人皆因该管官不豫行晓谕严禁听其?於法网无知愚人自投死地且某旗好尚何事则一旗之人皆尤而效之某族中好尚何事则一族之人皆尤而效之种种陋习罔不渐染尔等系此旗官员各有管辖教训之职嗣後须晓谕严切务令盗贼光棍永行禁止至於所属之人因伊主幼小遂尔藐视恣行匪僻此皆尔大臣衆官不行严禁之故嗣後尔等宜各敬其主竭力料理公事至於用人勿得较论分属之人惟当选择贤能任事

七月甲辰

上谕大学士等曰人臣服官惟当靖共匪懈一意奉公如或分立门户私植党与始而蠹国害政终必祸及身家历观前代莫不皆然在结纳植党者形迹诡秘人亦於指摘然背公营私人必知之凡论人议事间必以异同为是非爱憎为毁誉公论难容国法莫追百尔臣工理宜痛戒若夫汲引善类不矜己长同寅协恭共襄国事是又不可以朋党论也

八月丁卯

上谕吏部等衙门向来各衙门事件关系重大者虽有定限赴科道稽察但事易结者即宜速结必俟限满方行题覆多致壅滞更有各项呈状不系注销者任意耽延借端拘提人犯数月不为审结无辜牵连殊堪悯恻自後题覆本章俱速为料理不必尽拘定限至於审理事件亦速为完结照注销钦件例定限每月造册赴都察院科道稽察具奏尔等各宜力图振作体恤民隐以副朕孜孜求治之意

康熙十七年戊午正月戊戌

上谕议政王大臣等曰逆贼吴三桂等背恩倡叛荼毒生灵扰乱疆宇朕念切除凶志安民社仁育义正恩威并行大将军等既承简任当励忠贞之谊早奏戡定之勲

以副朕爱民至意乃自用兵以来大将军王贝勒将军大臣等固有尽心王事已着劳绩者亦有观望逗遛不思振旅遄进竟尔营私适已希图便安或诱甲兵之不全或托舟楫之未具借端引日坐失事机者甚而干预公事挟制有司贪冒货贿占踞利藪更有多方渔色购女邻疆顾恋私家信使络绎尤可异者新定地方亟需安辑乃於所在攘夺焚掠种种妄行殊乖法纪本宜严察职名从重治罪但时当进剿姑免处分策励後效各路大将军王贝勒将军大臣等各宜乘时进取恢复封疆拯救民命一切违法之事严加禁止倘有不遵许督抚指参绳以重

典兵丁廝役犯者其将领家主均行连坐官员犯者除本官重治外将帅分别议处地方官逢迎馈献一并严惩如督抚不纠或经言官劾奏或为被害首陈该督抚以徇庇论督抚提镇等官自违禁条加倍究治其以此传示内外严加晓谕俾一体遵行

三月壬午

上谕吏部户部兵部朕统御寰区孜孜图治期於朝野安恬民生乐业共享昇平乃副朕宵旰励精之意不意逆贼吴三桂背恩煽乱各处用兵禁旅征剿供应浩繁念及百姓困苦不忍加派科敛因允诸臣节次条奏如裁减驿站官俸工食及存留各项钱粮改折漕白二粮颜料各物增添盐课盐丁房田税契牙行杂税官户田地钱粮奏销浮冒隐漏地亩严行定例处分用过军需未经报部不准销算以上新定各例不无过严但为筹画军需早灭逆贼以安百姓之故事平之日自有裁酌各省督抚提镇大小文武等官俱宜上体朕意下念民生洁已奉公爱惜物力务期早奏荡平与民休息以称朕乂安海宇至意

四月壬辰

上谕吏部等衙门国家设法定例原期章程尽善垂之久远上裨军国下益民生必藉内外臣工精白乃心恪共详慎实心奉行方克永遵而无弊近见各处章奏凡於见行之例或借端营私巧为掩饰或推诿卸过冀免处分或徇庇情面曲为弥缝凡行一事每滋弊端以致良法美意泽未下究而累已及民揆诸立法初意殊为未符此等情弊科道官虽有风闻因无确据难於指参朕虽洞悉缘由期其自行改悔不加深求遂尔因循以为侥幸之路以後在内部院等衙门在外督抚各官涤虑洗心痛改积习於有益国家民生事务筹画担当不避嫌怨务期法行无弊恩被闾阎以副朕立法定制爱养斯民至意如视为故事仍蹈前辙事经发觉定行严加处分着通行申飭遵行

七月戊午

上谕兵部直隶各省绿旗兵丁经制额数专为防守汛地征剿贼寇而设该管各官自宜实足兵数以资战守督抚提镇等经制兵内如有充伴当书记军牢以及马夫水夫等役悉行裁汰务足兵额倘仍不改陋习因循踵行该督等纠劾从重治罪若督抚徇庇不纠或为科道指参或被旁人首发治以徇庇之罪决不轻贷其通行晓谕

康熙十八年己未八月甲戌

上谕吏部等衙门凡为臣子者同寅协恭自古皆然今各部院办理事务大小汉官凡事推诿满官事之得当则归功於已如事失宜则卸过於人至於入署不待事毕诿於满官只图早归宴会嬉游不为国家尽力担当料理公务此後各宜协力同心务尽厥职不可仍前推诿至科道各官平日章奏内将一二可行之事隐附私情希图作弊凡有条议鲜非无因閱览奏疏多以已为至公至廉其嘱托公事肆行妄为外播威势挟制多端地方督抚等官莫不畏惧小民

困苦未必不由於此作何惩戒着九卿詹事科道详议具奏

辛卯

上谕大学士等曰满汉论事往往不能和衷汉官每谓满官偏执若汉官肯实心为公据理辨论满官岂有不从之理若满官坚意偏执汉官即当奏闻从来有治人无治法为政全在得人入臣事君全在辨心术之公私今尔诸臣之才皆能料理政务但徇私利已者多公忠为国者少若诸臣肯洗心涤虑公尔忘私国尔忘家和衷协恭实尽职业庶务何患不就理国家何患不治平哉尔诸臣其勉之

九月庚子

上谕议政王大臣等曰孙思克奏称贼多步行踰岭登山如履平地小路曲径贼所稔知我兵前进恐贼由曲径潜蹊我後以絶饷道为害滋甚朕思秦地绿旗之兵为数甚多其中步兵不少且各省绿旗兵向推秦兵精锐贼能跋涉山岭我兵参养有年何独不能况汉中兴安为秦内地满汉大兵经行熟悉何得视同绝域辄荒诞其辞凡将帅用兵前进冲锋後顾饷道务详度以合机宜乃一定之道也倘以贼间道潜来断绝饷道为忧怯懦不前则永无破贼之日矣又疏言大将军公图海分

满汉兵为四路虽分贼势终忧兵单绿旗兵每人止有一马且未必皆强壮可用之兵惟满洲大兵堪任第为数无多虽欲另调又恐秦地三边番夷甚众当此秋高马肥思逞之候实无兵可调不若俟来春二三月间塞外草尚未生水泉犹涸之时多调边兵以资战守各路进发朕思秦中满兵不少绿旗兵较各省更多今称兵力单弱显属畏缩憚於进兵且各省绿旗兵亦止一马曾无多给而且越境征剿粤东粤西闽楚诸处今又进定滇黔较之平定境内汉兴劳逸何如耶向者凡将军提镇官募兵时必选精壮勿使滥收充数定例严明今若以秦兵皆非强壮难以应用则孙思克职任何事观此则欺蔽之情更显然矣且有大将军公图海在彼乃妄议大兵多寡殊属狂妄又云番夷马肥思逞欲俟来春二三月间草尚未生泉水犹涸之时进取设或二三月间进取之後四五月间番夷马肥思逞将若之何正值秋成凉爽各处贼寇大败震惊之余不速行荡平反欲於来春青黄不接之时进取是又何意耶又奏称秦省大半皆山地瘠民贫不产秔稻所种惟麦豆之属向有捐纳之事稍裨用兵今例已停罢民受采买之苦且山路险阻必资负载驼运其雇赁之价数倍於应输之赋今各路需饷甚多山径狭隘挽运维艰时当初冬草枯叶落畜牧无资欲俟来春调集官兵务期兵强饷足共图进取者职此之故朕思粤东粤西诸省山岭亦多何曾豫备粮饷官兵岂有止食稻米不食他粟之理至於捐纳各省俱停止留粤西事例以资平滇军需之用自定秦省数年以来未曾劳民转运且汉兴虽多险阻乃陕西内地非隔省百姓转输可比今恐挽运累民至春又谁为转运耶当逆贼败遁之时急令进兵者正为早定地方以安百姓耳采买恐累於民巡抚杭爱题奏已经改定今以请开事例转运维艰为辞其规避进兵明甚又疏称八旗官兵今年七月二十八日京师地震房屋倾坏压毙人民闻之各怀内顾之忧臣所以暂停进取以回

天意俟人心稍定再议进兵未晚朕思八旗官兵世受豢养朕之加意臣僚士卒尤为渥厚不特房屋倾圯细故即蹈汤赴火谊亦难辞孙思克封疆大臣凡事不加详察妄言人情皆动以惑军心殊失大臣之体细察孙思克疏内前後情由惟耽安逸怯於进兵列款巧奏且自秦省有事孙思克等系封疆大臣俱应按律议处念同大兵进剿宥有过计功给以世袭之官加以不次之擢当捐躯报国破贼安疆自请前进効力乃孙思克身任提督统辖全师不思奋力前进反煽惑满汉动摇民心饰辞妄奏深负朕擢用之恩情罪殊属可恶其令翰林学士喇沙里速往严取口供来奏寻喇沙里取供还奏

上曰孙思克理应严察治罪但今方统兵与大兵分路进剿俟事平日再议

十月辛卯

上谕九卿詹事科道等曰迩来诸事尔等全不担当或遇事有疑难即以未经与闻不同启奏或托言他事及病不赴会议在部办事或推诿不肯列名或有过卸於司属意图侥幸若果应坐罪岂推卸便可脱免乎又有临事全无一语及既退之後辄云我曾如此立论而某官不肯见从朝廷不曾俞允此岂臣子靖共之道乎至部院衙门司官亦多偷安废弛各堂官宜将此等司官指名题参九卿会议处有规避者着都察院及科道官纠参嗣後尔等当直摅所见陈奏审酌可否自在於朕尔等勉之

康熙十九年庚申正月辛亥

上谕九卿等曰科道官内陞外转原以示劝惩也今见才优者犹知憚於外转其或才力不及不称言职之人安於外转道员者甚多是但以示劝非所以示惩也故令九卿詹事科道会议务期得当乃会议时俱瞻徇情面不肯议以小品用此无他直是畏科道耳夫人臣事君苟立心正直行事公平何所顾虑於人其畏科道者皆

由平日自处不正故也朕於诸臣素行无论在官在家一举一动罔弗知之不即发觉者欲令改过自新以全国家待臣下之体奈何不畏朝廷而徒畏科道之指摘乎近日科道官专以虚声肆其恐吓并未有真能参大奸大贪者如此不职若不分别惩劝何以大破积习使知勉励乎据魏象枢等奏恐天下不肖之辈不识朝廷慎重科道之意疑为厌薄言路之端迩年以来姚文然李之芳施维翰等内陞未久即任以大僚督抚亦因其克尽言职才能素着之故此无论天下智愚贤不肖当亦知朝廷无厌薄言路之意矣其外转者或系素无建白或系昧於事理或系任臆妄言或系才力不及原非因其条奏而外转也外转科道以小品官员用遂言有碍国体殊不可解朕心本虚公初不执定一说若果在必行何难旨意票出特命诸臣会议者正欲公同参酌务合乎中道耳尔等可传谕各官示以朕意

二月壬午

上谕大学士等曰初逆贼反叛时克殫忠义或从贼所设计来归或大兵已至尚为贼困此等

人錄其善而獎其忠方为允当亦有大兵已恢复地方奸猾之徒先附贼妄行因贼衆潰散焚毀伪割逃避山林文饰耳目以图侥幸者今给事中姚祖頊?请獎叙被难人员甚为失当可加严饬嗣後科道官条奏朕先行披览仍面加详问如此则人之才能及所奏之意咸可知矣

五月癸卯

上諭大学士等曰向以亢阳斋居?禱虽雨泽薄降四野田畴尚未沾足今兹不雨为时又久旱魃为灾朕甚惧焉意者政事之失宜者多欤不然

天心仁爱下民何其宜雨而久不雨也日者以政理之故勤求言矣而言者文繁无益其集九卿詹事科道掌印不掌印各官问有何事当行何事当革悉意以陈毋有所隐

是日

上諭大学士九卿詹事科道等曰朝廷致治惟在端本澄源臣子服官首宜奉公杜弊大臣为小臣之表率京官为外吏之观型大法则小廉源清则流洁此从来不易之理如大臣果能精白乃心恪遵法纪勤修职业公尔忘私小臣自有所顾畏不敢妄行在外督抚各官自应慎守功令洁已爱民乃大臣等每自谓清正无私粉饰空言至其所行往往营私作弊有玷官方深负委任之意科道系耳目之官凡有弊端自当据实参奏且居处甚近如此情弊岂无见闻乃瞻徇情面緘默不言即有条奏多系繁文言官职掌殊为未尽如肯从公纠举孰敢恣行无忌朕以为目今之弊莫大于此近因天气亢旱朕夙夜焦思念虑所及无不举行感格之道犹恐未尽故特召尔等各面陈所见因宣諭朕意令尔等知之

六月戊辰

上諭黄岩总兵官林本植曰黄岩要镇今海贼虽已败遁恐其出没不常又沿海之民或有奸宄勾连外寇为害匪细尤宜加意严防林本植奏曰沿海之地必须精练

水师臣西北人恐未深谙

上曰自古用将何分南北惟在得人且靖寇本以卫民攘外必先宁内为将之道亦惟在得民心也

七月乙未

上諭陕西总督哈占四川巡抚杭爱曰据哈占奏称秦饷由略阳运至保宁令四川接运杭爱又言四川官少船缺不能接运杭爱既以不能接运为言仍着哈占及巡抚鄂恺甘肃巡抚巴锡等即以略阳粮艘运官运至叙州四川督抚速趣空船使回方今大兵进剿云贵需饷至急既已尅期进取挽运无过今秋川陕督抚自宜殫心筹画勿悞军需乃妄分彼此互相推诿迟

延至今殊负任职嗣後当同心商酌不拘疆界速为馈运无悞进取如仍推诿迟延有失军机  
经管其事自督抚以下各官俱以军法从事

康熙二十一年壬戌正月己巳

上谕理藩院尚书阿穆瑚琅等曰近见内外蒙古接壤处所互相攘夺盗窃者甚多遇此种事  
遣尔衙门官员前往察閱不思调和两界裨益地方据实奏闻以副朕驱使但苟且竣局希图  
脱免凡事有问诿云不知今朕俱已洞悉尔等堂司官何曾启奏一事尚可谓克尽职掌者乎  
嗣後务期勤慎宣力不得仍前草率疎忽

二月壬辰

上谕直隶巡抚格尔古德曰凡为官者承贪吏之後名誉甚易承良吏之後名誉甚难金世德  
于成龙居官有声尔继其後得名必迟尔母欲速以求名速则恐致扰民直隶旗下庄头与民  
杂处朕闻所在凶恶庄头自以旗下倚恃其主甚为民害尔蒞任後加意严查务期惩创即管  
皇庄者亦毋寬宥

九月己酉

上谕福建将军佟国瑶曰国家设立督抚提镇原以为民向来驻防镇江杭州福建等处汉军  
官兵皆恣意妄行侵占市?擅放私债多买人口如哈喇库诺迈等一味营私罔遵法纪买人口  
至盈千百此等匪人用之何益昔孟乔芳总督陕西李率泰总督福建俱能洁已奉公爱民恤  
士秦闽人至今思之尔到地方宜恪遵国宪安戢兵民毋负朕委任至意

十月乙亥

上遣郎中崑笃伦等采办楠木

谕之曰尔等查采楠木所至地方当会同督抚实心详察毋借端滋扰凡官廨民房寺庙坟墓  
毋拆毀封采恐奸徒乘机诈害平民此意可晓谕地方令共悉知

大清圣祖合天弘运文武睿哲恭俭寬裕孝敬诚信中和功德大成仁皇帝圣训卷四十三

# 卷四十四

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十四

饬臣工二

康熙二十二年癸亥二月壬午

上谕直隶各省朝覲各官曰尔等各有职掌关系国计民生宜实心办理如奏销钱粮采买米石借端浮冒希图侵剋审理刑狱颠倒是非稽延岁月致累平民皆因尔等因循怠玩积弊未除嗣後俱宜洁已奉公殚心尽职诸凡公务俱照在内各官衙门事例勤慎办理副朕察吏安民之意若谓道途遥远所行弊端未必尽知仍沿陋习漫无省改宪典具存决不姑贷

癸未

上谕大学士等曰閱朝覲布按各官条奏於治民弭盗非不铺张累牍然如何绥缉则盗源可靖如何储备则凶岁无饥未见确切敷陈裨於实用惟麻尔图所称陕西积欠钱粮应分四年带徵其言颇当朕軫念陕西地方连年寇警挽运艰苦每欲蠲除宿负以兵革未息时方需饷未及豁免龚佳育言江边芦田坍塌无常应五年一丈量其在内田地原无增减请免丈量等语亦属可行余皆诸司琐事若概令议覆徒烦章奏尔等传集九卿詹事科道将各朝覲官奏疏同閱会议如有益於国计民生者始下所司确议否则拟旨报闻足矣且九卿詹事科道既全见伊等所奏本章则将来会推亦易知其贤否至所颁谕旨原为察吏安民若伊等各自收藏无益其令刊刻颁发府州县卫所使兵民一体通知不肖官员虽欲败检虐民亦知所忌憚不敢恣意以逞矣

三月甲子

上谕刑部国家设立问刑衙门期於明罚敕法弼教化民必审鞫精详灑决平允而後民情悦服冤抑毕伸近见尔部审理大小事件每多草率因循瞻徇舛错如听讼之时两造是非自应分别定案因意有偏私往往不问曲直含糊完结以致奸顽幸免良善含冤又如奉差籍没官员不能廉洁自持据实册报乃恣意侵盗竟饱私橐殊非人臣奉公守法之谊至於审事官员胶执己见听讼不公或更改口词图遂私意或恐吓犯证不令直供或妄肆株连稽迟日月或怠玩踈忽苟且告竣弊端种种难以枚举嗣後堂司各官俱着洗心涤虑痛改前非一切刑名事务必令情法允协无枉无纵恪遵法纪持廉秉公以副朕委任之意又

谕曰尔刑部弊端朕无不悉知自後永行改革则已倘仍因循如故将尔等弊端摘发一事勿



望幸免亦毋望止於罢斥已也尔等又每云身为堂官笔帖式胥吏所作弊端焉能悉知今堂官亦有由笔帖式出身者断难以不知情弊为辞朕时加谘访诸事莫逃洞鑒而尔等诿为不知可乎用复申飭务将夙弊尽行除革毋忽

闰六月癸亥

上谕大学士等曰一切政事皆国计民生所关最为重大必处置极当乃获实效朕每详览奏章内有所疑或折五六本七八本谘询尔等者务欲得至当耳今尔等不各以所见直陈一切附会迎合朕意则於事何益朕从来不憚改过惟善是从即如乾清门听政时虽朕意已定之事但视何人之言为是朕即择而行之此尔等所共知也坚执己见独持议论之人朕素所不悦观今之大臣甚不如昔日之大臣今之政事亦不如昔日部院无事无弊大臣无人无私外间之弊较内更多朕知之久矣欲严治之则其人甚多难於尽处所以朕数年来屡下严旨加意剔厘今虽较前差善而弊尚未除且部院堂官止图己身安逸办事不勤堂官推诿司官司官推诿笔帖式早归私家诡称终日在署此何理也

十一月戊辰朔

上谕湖广总督董卫国曰尔在外任二十余年地方事宜民生利病知之已悉何待朕言第总督为一省大吏惟以奉公秉法洁已爱民为要从前用兵之际未免骚扰闾阎今天下承平休养民力乃治道第一义何利当兴何弊当革俱宜从实详酌举行惟时当承平而常若民生未遂民困未苏则地方自然受福若谓地方已经宁谧不时加体恤则所失多矣至一切事务本可速结者自应速结每见在外官员故意迟延致滋民累尔宜申飭所属各官实心任事又在外官员行事京师无不悉知尔从前在任所行朕皆洞晓尔在军中克有劳绩朕即下旨褒獎嗣後务益加砥砺尔为部院已久在京部院大臣何须结纳尔行事无疵何畏人言若行事失当虽结纳大臣亦复何益耶

康熙二十三年甲子正月丙戌

上谕陕西按察使布喀曰按察使职司通省刑名必事随结不使迟悞方於事有益凡弊之生及百姓牵累皆由迟延不速结之故尔当洁已勤政将迟延牵累积弊详加纠察勿致烦苦良民以为属员表率

二月己亥

上谕翰林院掌院学士牛钮孙在丰曰翰林院乃储养人才之地教习庶常当以品行文章为事一切交际礼文皆宜杜絶近闻有馈送重礼者庶常等俱甚寒苦自翰墨外不应别有所取前拉萨礼在时待伊等甚善所以至今有感念者至库勒纳任学士以来交际之风渐盛尔等宜加洗剔无负简任之意

三月丁丑

上谕大学士等曰昨正阳门外被火朕数遣人往视该城及司坊巡捕营等官并无一人在者亦无一救火之人因遣内大臣侍卫往救火势方炽未能旋熄朕亲往登城指挥方得扑灭该城及司坊巡捕等官於该管地方职分所在平日不加谨堤防遇灾又不急救殊为怠忽左都御史科尔坤兵部侍郎郭丕阿兰泰奏请朕还宫伊等留视及朕还宫後使人视之伊等亦已散去城外之地多系汉官居住遇此等亦应协力料理乃置若罔闻袖手不顾则他事亦因循坐视可知伊等皆国家大臣凡事当视若一体乃於身外之事略不关心可乎尔等可将此言传谕吏兵二部及都察院知之

四月庚子

上谕大学士等曰凡为臣子必实心任事兴利除弊不可苟且塞责俾衙门事一切整顿无有废弛斯不负职业若循分碌碌因人成事虽小有勤劳殊无足取

五月癸未

上谕台湾总兵官杨文魁曰台湾远在海隅新经底定将弁立功者颇多尚未简用因尔系旧人故特简为总兵官彼处新附兵丁以及土人黑人种类不一向来未沾教化不知礼义尔莅任後务期抚辑有方宜用威者慑之以威宜用恩者怀之以恩总在军民两便使海外宴安以称朕意至於海洋为利藪海舶商贩必多尔须严饬不得因以为利致生事端有负委托

八月庚戌

上谕督捕侍郎达哈塔曰朕以尔素有操守简用侍郎近见尔衙门事务弊端尚多旗下人无怨言若但守已廉洁而於凡事不能勉力肃清究竟何益嗣後尔当严率属员事务悉加厘剔以副委任之意

九月己丑

上谕山东巡抚张鹏曰今见山东人民逃亡京畿近地及边外各处为非者甚多皆因地方势豪侵占良民田产无所倚藉乃至如此尔莅任後务剪除势豪招集流亡俾得其所

十一月壬戌朔

上巡幸江南驻蹕句容县

谕知县陈协濬曰知县系亲民之官与一县民生休戚相关朕巡行之次见此处百姓困若尔当洁已奉公爱民如子否则国法具在尔其慎之

康熙二十四年乙丑二月癸卯

上谕漕运总督徐旭龄曰源清则流洁尔为大吏洁已率属官吏自不为奸朕因前任诸臣均不称职闻尔向任山东居官清慎着有贤声故特简兹任尔当益励勤恪安辑军民以副朕委任至意至於河漕事务原属一体凡河工有关漕务者尔便宜行事不必推诿其属官贤否宜从容廉访果有真知确见方可入告凡举一人务使千万人知劝劾一人务使千万人知惩至於待属员不可过刻下吏亦各有艰难之处惟心平气和则皆悦服矣

五月庚申朔

上谕新选庶吉士张希良等曰士子读书稽古原期穷理致用平居砥砺廉隅敦修品行皆为异日服官莅政之本迨一登仕路志在功名未免奋意求进干营奔竞丧其怀来往往有之尔多士从田间来甫通仕籍务宜率其素履不改初心凡授内外任职其各加勉清操自矢恬静寡营循分尽职洁已爱民以副朕造就人才至意

八月己亥

上谕九卿等曰官以清廉为本如原任侍郎温代察库不可谓无才但以贪污故凡所行皆不足取此皆由不知廉耻耳又

谕曰部院堂官惟勤慎者能循分不致生事其专擅好之徒特欲假公事以遂其私意耳虽有才能於国家何裨

九月己卯

上谕大学士勒德洪等曰九卿詹事科道令其会议会推本期至正至公务得真实今闻九卿会议之事间或不据实具议草率苟且因循而行有此一次立议争胜以冀下次不与相拂而从之者或有此一次将彼意中之人荐出冀下次将其亲朋荐出以相报者或有荐其门生者有荐其同年者有荐其同乡亲友者夫九卿会议会推理宜虚公持论岂可一二人专擅以行且设立科道本欲其凡事从实建言有执拗护庇者即为指参也其擅专执拗护庇之人何未见纠劾耶衆议之时亦有一同具议後因其事不当复云彼时我原如此说者如果原议时衆论与伊意不合即宜将己见明白敷陈另立一议既不另立一议同列职名又称我曾如此说是断断不可者朕於康熙十八年亦因此等事曾经有旨申飭可查前旨一并复行传谕凡事会议不必询问本省大臣官员若每加询问或致不肖之人益在地方生事横行本省督抚地方官无不畏惧且将凡属会议之事无不嘱托本省大臣官员矣政务何由得平今会议山西巡抚穆尔赛因系满洲恐致败露意欲从平易归结耳若是何不於事前豫为劝戒令其公廉乃不为豫戒徒於事发之後欲如此结案可乎尔等齐集满汉九卿大臣传谕申飭之

十月庚戌

上谕大学士等曰近见工部凡於交送物件皆耽延时日抑勒不收弊端滋多此後其严禁之可传谕工部康熙二十五年丙寅正月甲戌云南贵州总督蔡毓荣题逆苗王腾龙等聚衆劫掠应行征剿

上谕大学士等曰苗蛮赋性朴实不敢生事只以地方该管官不克平情抚恤反需索马匹金银诛求无已不能供应遂生衅端耳前逆贼吴三桂亦因需索水西不遂贪欲捏奏水西反叛竟自发兵剿灭尽取其利以为已有今苗蛮之事恐亦类此勅该部知之

二月癸巳

上谕直隸各省朝覲官员等曰国家三载考绩原以崇獎廉善摈斥贪残必吏治澄清庶民生安乐今当大计已严饬所司重惩贪酷余俱如例降革其有衆论不孚是非失实者特黜一二以警积玩外姑准尔等仍服原官尔等平日官评贤否公论昭然若值会推辄钻营奔竞以图侥幸居心先已不肖何以率属莅民且凡朝覲之期每因仍陋习借端科派大小相循私通交际是察吏本以安民而反以扰民甚非朕激扬清浊至意嗣後务须洗涤肺肠勉图自新毋貌承心违蹈常袭故国宪具存决不尔贷

戊申

上谕吏部兵部我国家扫除逆孽平定遐荒即负山阻箐之苗民咸输诚供赋封疆大吏自宜宣布德意动其畏怀俾习俗渐驯无相侵害庶治化孚於远迩近见云南贵州广西四川湖广等处督抚提镇各官不惟不善抚绥更恣苛虐利其土产珍奇货藏饶裕辄图入已悉索未遂因之起衅职为厉阶蠢尔有苗激成抗拒即擅杀一二谎称累百盈千始黷货以生端既邀功以逞志藐玩因循殊负委任朕思土司苗蛮授官输赋悉归王化有何机隍互相格鬪无有宁居嗣後作何立法务令该地方督抚提镇等官洗心易虑痛改前辙推示诚信化导安辑各循土俗乐业遂生亦令苗民恪遵约束不致侵扰内地居民以副朕抚馭遐方至意

三月乙卯朔

上谕直隶巡抚于成龙曰直隶旗下各庄人户不守法度尔须执法严治不得瞻徇顾忌朕留心民瘼外事无不周知即如工部所用车马系发价现雇今俱????取州县如此积弊不止一端尔到任逐一查明奏闻尔固宜正己率属廉洁爱民亦宜寬以济猛勿过刻也且居官不善纵或漏网亦将祸及子孙尔须有始有终实心任事从国计民生起见尽力为之

闰四月乙亥吏部等衙门遵

旨会推广西按察使员缺吏部侍郎胡简敬保举江南淮扬道高成美拟正湖广下荆南道沈志礼拟陪具奏

上谕曰凡职任紧要官员奉旨会推原期从公保举务得真才有裨官守且官评贤否关系吏治民生若以本地方人推举本省官员必致瞻徇滋弊前已经屡谕申饬甚明今胡简敬以淮安府人推举淮扬道高成美殊属不合着严加议处九卿等不加详慎草率拟推亦属不合着通行申饬

康熙二十六年丁卯三月辛丑

上谕大学士等曰近来不雨政事恐有未当令九卿议奏越二日癸卯大学士等覆奏国家政事实无可更改厘定者

上曰尧舜之世方可称无阙失然犹兢兢业业不敢谓已治已安汉文帝亦古之贤主贾谊犹指陈得失直言切谏今但云主圣臣贤政事无阙岂国家果无一事可言耶况求言原属要事无论智愚皆当各陈己见以备采择始於政务有所裨益大小臣工各宜尽心职业视国事如家事方副委任之意今每部满汉堂官各有六员其间任事者但一二人余则随衆署名而已即如各部启奏本章每日不过数件其中情节如汉侍郎等未必了彻设朕问之谅有不能对者汉官公事之余或持斋诵经满官公事之余或崇尚僧道不以国事为念朕观今世之人专务逢迎諂媚鲜有直道而行者且已不勤而每谓人为惰已无能而每嗤人为劣此不过徒工浮议耳何益之有

七月辛卯刑部题浙江民张遴叩阍请发与该抚审理

上谕大学士等曰此案若交与该抚审理岂肯将实情明白审出着刑部择选贤能司官往审近见河南司官审事竟不明晰此皆瞻徇各部院堂官不敢结怨耳大凡督抚无不与部院堂官营求结纳分树门户若司官与督抚相悖即结怨於堂官尚能保其职乎部院堂官各援引亲戚朋党营求凡员缺未出之先其人预定及会推时惟赞扬援引而从公推拟者甚少又有为司官笔帖式时所行贪婪至於大位伪称清廉者若此居心深可鄙耻今部院官员亦稍知更改若循此而行固善倘仍蹈前辙贪污不悛是自弃其身也虽或侥幸苟免於刑鬼神岂肯宥耶

己亥

上遣刑部郎中阿西潭等往浙江察审张遴一案谕之曰向来奉差官员往往骚扰驿递貽累小民朕深悉之故数年以来槩不差遣昨见张遴所告似有冤抑因遣尔等往理务须详审公平慎毋颠倒是非奸民叩阍亦有巧为饰说者地方官员亦有善於夤缘者尔等不可偏私拘执专徇一面之词必得两造实情若是非不明舆论不服则大负朕怀矣

康熙二十七年戊辰正月丁酉

上谕江西巡抚王鵬广东巡抚朱弘祚曰巡抚为地方大吏以操守为要大法则小廉百姓俱

蒙福矣身为大臣寻常日用岂能一无所费若必分毫取给於家势亦有所不能但操守廉洁念念从爱百姓起见便为良吏为督抚者在朕前皆能言之及至地方与所言往往不符人贵始终如一朕特简尔等当砥砺清操毋负朕擢用之意朕事事以百姓为念尔等到地方一切利弊有关百姓者不妨事事奏闻为大吏者亦须安静安静则为地方之福凡贪污属吏先当训诫之若始终不悛再行参劾可也

二月壬子

上谕大学士等曰国家设官分职必须大法小廉实心任事庶不负朕拔擢简用之意朕亲政已久於大小官员行事无不深悉为臣子者既荷爵禄显荣便当知足无致陨越前已屡颁谕旨又再三面加训诲今在廷诸臣自大学士以下全不敬勤供职但知偷安自便互相交结贪贿营私种种情状不堪枚举九卿詹事科道皆朕委任之员凡遇会议理宜各出己见公同商酌乃一二人倡率持议於前衆遂附和於後又其甚者虽在会议之班茫无知识随衆画题更有於集议时缄默自容及至债事巧行推卸此等情状朕所痛恶至於用人关系重大恐贤否难以周知故遇紧要员缺特令会推原期为国得人亦欲令被举之人警心易虑惟恐溺职累及举者因而自加勉励乃历来所举官员如张汧章钦文之流贪黷败类往往发觉此皆瞻徇情面植党纳贿所

致前者班布尔善阿思哈等身为大臣所行悖乱致干重辟然朕尚耿於怀是以比来大小官员徇私纳贿朕虽洞见而不即指发冀其省改庶可终始保全岂意积习深锢漫无悛悔如审拟蔡毓荣一案瞻徇党类百计营救因朕具悉其奸私谋莫遂近差色冷额往审张汧被参情由朕曾谆谆面谕及色冷额回时奏称此案若有失实甘治死罪朕览其奏案则又庇护保举张汧之人内阁拟票亦未议及又靳辅下河工程屯田之案朕早已察其情弊及遣佛伦等前往勘议甚属偏私且凡会议之时科尔坤佛伦等务执己见苟非怀挟私情何以力排衆议屡经诫谕未见畏悔物议沸腾輿情愤激以致言官列款参奏虽言官亦非先期举发直待朕谕飭之後方行论纠然尔等果能持公争论何致败事且尔等行私朕皆洞晓因不忍加刑于大臣又用兵之时有着劳绩者故免其彰显厥罪嗣後大小臣工各宜痛改陋习勉尽职掌以副朕寬大矜全之意

五月壬申朔

上谕大学士等曰凡会议政事必详察合理不可怠忽轻易朕每遇事之大者即与内阁大臣商酌而後定凡授大僚无不如此至吏部陞补官员俱有一定之例或有不肖之徒贿求不已此皆习俗不良今当痛改前辙凡事俱各抒己见一意秉公不可碌碌徇人且徇人何益孰优孰劣岂有不知者乎

康熙二十八年己巳三月丙申

上谕大学士等曰凡地方文武官员务须各尽职掌实心任事黽勉効力方为称职今见直隶

各省文武各官多有虚糜廩禄怠玩因循事务废弛行伍虚冒船只任其朽坏器械全不整理且有无多寡茫然不知总因任内职业视为具文漫不经心殊属不合着各该督抚提镇通行所属官员严加申饬令其痛改积习力图振刷恪勤守职如仍前玩忽定行从重治罪

康熙二十九年庚午正月己酉

上谕九卿等曰朕自临御以来夙夜兢兢勤求治理念切民依冀登安阜去岁畿辅旱荒虽经蠲租发帑赈济穷黎朕犹轸念未已卿等各宜恪体朕衷持廉秉公实心尽职毋得营私结党师生亲友互相徇庇听受嘱托遇事推诿自图便安务期於国计民生实有裨益

康熙三十年辛未十一月己未

上谕吏部从来致治之道在正人心人心偏私则诈伪日生而习俗滋弊人心公直则嚣竞自息而庶绩允厘朕早夜孜孜崇尚德教蠲涤烦苛期与中外臣民共适於宽大和平之治凡大小诸臣素经拔擢咸思恩礼下逮曲全始终即或因事放归或罹咎罢斥仍令各安田里乐业遂生惟尔诸臣亦宜奉职恪共絶偏私而襄国事近见内外各官间有彼此倾轧伐异党同私怨交寻牵连报复或已所衔恨而反嘱人纠参陰为主使或意所欲言而不直指其事巧?术中虽业已解职投闲仍复吹求不止株连逮於子弟颠覆及於身家甚且市井奸民亦得借端凌侮蔑纪伤化不可胜言凡若所行虽迹甚诡秘朕总揽机务已三十年此等情态知之甚悉倘因仍陋习益致蔓延殊非朝廷所以体恤臣工保全爱惜之意夫谗譖媚嫉之害历代皆有而明末为甚公家之事置若罔闻而分树党援飞诬排陷迄无虚日以致酿祸既久上延国家朕历观前史於此等背公悞国之人深切痛恨自今以往内外大小诸臣应仰体朕怀各端心术尽蠲私忿共矢公忠岂独国事有裨即尔诸臣亦获身名俱泰倘仍执迷不悞复踵前非朕将穷极株悉坐以交结朋党之罪尔部可即传示中外使咸知朕意

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十四

## 卷四十五

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十五

饬臣工三

康熙三十二年癸酉十二月癸酉

上谕翰林院掌院学士傅继祖等曰翰林院衙门甚属紧要凡翰林官每日作文写字诵习讲究是其分内之事各宜勤勉以尽职掌若有结交不肖牵引妄行遇学差缺出恣为奔竞营求者不时访察题参

康熙三十三年甲戌正月丙辰

上谕大学士等曰凡为臣者须行实事不当沽取虚名于成龙奏称豁免民夫河道工程浩繁能不用民夫而可以集事乎且河道增设一官则民间多一事现在所设官员历年料理工程并无违悞之处总之河工经理惟在得人不在增设官员也于成龙任直隶巡抚时居官好亦曾効力但为人胆大凡事必欲取胜其所奏之事止徇人情面欲令人感彼私恩夫擢用人才乃朝廷之大权非为臣者市恩沽名所可擅行之事也至於于成龙条奏内修理通州天津一带河道及培修高家堰堤亦有当酌议之处高家堰保淮敌黄甚为紧要稍有疎虞则淮安一带州县居民田庐皆受水害矣

二月壬申

上谕大学士等曰设立科道官员特为条奏政事今观都御史以至科道条奏者少间有条奏者每存私意或将不睦之人欲行倾陷则托辞参奏此等情弊朕岂不知嗣後科道官员各宜端其心术以有益国家之事条奏尔等可将此旨传谕

三月丁卯

上谕大学士等曰山东巡抚桑额奏所属积贮米谷并无亏空此前任抚臣佛伦奉行之善也朕巡幸霸州时闻大城县知县祖延泰散谷赈济或有富户冒称饥民者查出即将其家所积之谷散给贫民因此并无假冒贫民得沾实惠是则奉行之善存乎其人从前总督张长庚屈尽美巡抚白色纯韩世琦等居官不善不数年间子孙穷困由此观之徒贻恶名此辈所贪取



者今安在哉且居官果善其光荣自不待言如江南将军博济调西安将军起程之日兵民泣送屈尽美居官不善离任之时地方百姓皆为切齿居官善否举朝之人及地方百姓自有公论岂能掩饰哉

十二月庚戌

上谕大学士等曰朕览福建浙江总督朱弘祚大计疏内有闽省地瘠民沬之语岂福建全省之人尽皆沬薄乎原任四川巡抚张德地署理延绥巡抚时曾奏延安边地并无可举博学宏词之人原任少詹事邵远平奏南方之人皆轻浮不可用朕思贤才不择地而生虽深山僻地岂无人材至於南方之人岂尽皆轻浮不可用者二人所言甚不愜於朕心因皆罢斥今朱弘祚又以此等谬言陈奏殊属不合着该部察议具奏

康熙三十四年乙亥二月戊戌

上谕大学士等曰近观言官奏事或受人嘱托或怀私卖本所奏之事俱非无故如原任侍郎郑重门生曾任陕西县令为总督佛伦题参遂转嘱彭鹏将陕西全省官员俱行参奏岂有因一人之仇遂参全省官员之理凡任言官者但宜将关系国家得失民生休戚之事从直陈奏岂可受人嘱托怀挟私仇贿卖本章而条奏乎如有此等之人必尽察出正法断断不恕

康熙三十五年丙子八月辛亥

上谕大学士阿兰泰曰军士所乘之马朕早令行察至今尚未具奏部中各官凡事不行速结惟务偷闲入署未久即散归家偃息如此则政事有不壅积者乎朕听政三十年夙兴夜寐有奏即答或有紧要事辄秉烛裁决此尔等所共知也各官果能勤敏诸事何至迟悞可同户兵二部大臣速行察奏

康熙三十六年丁丑正月甲戌

上谕大学士等曰观九卿凡保举人员非系师友即属亲戚是皆汉人相沿恶习天下官员朕一人何能周知惟左右大臣是赖诚善者善而恶者恶据实敷陈则善者劝而恶者惩矣国家事安有不理者乎况科道乃耳目之官如总兵卓策柯彩许盛居官最为贪鄙朕闻其军民皆怨乃为惩治前此科道官曾有题参者否尔等以朕旨宣谕倘後仍蹈前辙必不宽贷

二月甲申

上召督运都察院左都御史于成龙等问曰尔等何日起程于成龙奏曰俟効力运米官齐集同行

上曰尔此意即谬矣人臣宜以国事为重勤勉自効岂可援引朋类当此军务紧急尔等宜率

先啓行余令陆续随往若必俟衆同行岂不悞事尔自任巡抚及为总河惟知援引私人其後运米亦仍如此尔在河工曾带二百余人前往迄今未用一人欲任意援引得乎尔又云寧杀于成龙至効力人等不可不用此语岂非沽名干誉之意乎朕已屡加严饬尔竟不悛何也朕於国家之事未尝胶执已见惟虚己以视机宜即用兵之道亦复如是一日之中千变万化朕统大兵至克鲁伦时亦视贼之形势随机而应竝不豫立已见孔子云毋意毋必毋固毋我圣人之言至当不易尔惟执已见前此运米已因待衆悞事今又欲俟衆同行此意不过欲扶助党类令其感激耳用人之权岂人臣所得专擅朕今用人若有保举官员亦必就中论俸陞补即素所深知者亦视其効力之处酌量用之否则俱使论俸朕乃天下之主用人之际尚不肯任意为人臣者乃妄意自擅可乎大抵欲援助人者後必自己获罪尔其戒之

闰三月辛卯

上谕陕西督抚提镇等官曰朕宵旰勤民虑周遐迩缘向来巡幸未经亲莅边境顷特济河而西循秦省沿边地方延览风俗谘询疾苦见所在兵民筑土屋以为居耕砂碛以为业生聚之计甚属艰难朕惻然於衷軫念弗

释因思兵民倚赖全在将吏而将吏之表率惟督抚提镇是视诚使督抚提镇实能正己澄源则所属守职奉公禄足自贍必无朘削兵民之事若积习相沿滥受属员私馈因而所属官弁节次求索取偿於下文则加徵无艺武则侵扣月饷势不至於厉民剥兵不止如此而欲冀其疾苦日苏生聚日盛乌可得乎夫秦地俗尚素称简朴边方士卒尤属精銳总视抚驭得人斯於兵民胥益朕自驻蹕寧夏特召该省督抚提督总兵官以下官员凡在镇城者俱赐宴行宫加淳谕无非期望文武大吏董率属员以仰副朝廷爱兵恤民至意自今以後尔等其益体朕怀交相砥砺文官皆习知民事岂身作官吏不恤百姓之依武职多出身行伍岂甫为将领遽忘军士之苦上官克谨廉隅属吏各遵法纪驯至比屋殷阜列戍饱腾则兵民皆得其所而尔等亦与有休宠以视厉民剥兵身名俱隕者孰得孰失尔等其敬念之

康熙三十七年戊寅正月壬寅

上谕湖广总督李辉祖河南巡抚李国亮云南巡抚石文晟浙江巡抚张勳山东布政使刘曄等曰凡居官以实心爱民为主民虽愚终不能欺也果能实心爱民民自知感否则竭力矫饰终难掩人耳目朕在宫中惟以百姓为念督抚身在地方与百姓最亲岂可不一心爱民副朕委任之意一省之事全在督抚督抚洁已率属则府州县自然遵奉尔等系封疆大臣当自惜声名自立品望朕巡幸浙江江南陕西山西等处百姓利病俱所深知山陕地瘠地方官略加朘削情即显露然州县之私派皆由督抚布按科派所致若止在州县官则所害者不过一州一县巡抚与布政使通同妄行则合省俱受其害矣此等人朕断不姑容尔等识之

康熙三十九年庚辰十月己巳

上谕河南巡抚徐潮曰河南火耗甚重当严行禁止又闻彼处亏空甚多如何筹画令无亏空

河南连岁有秋未知积贮何如今天下太平武备不可有懈巡抚有标下兵卒尔从翰林出身武事恐未必留心宜飭将弁不时操练尔抚标操练精强则两总兵官有不凛然操练者乎

康熙四十年辛巳九月庚子

上谕大学士等曰朕观居官之人或优於微职至大任则改常者有之今部院堂司官等但求偷安而已并不勤於理事即侍卫亦比前少怠人虽优於办事若不勤慎亦何益哉

壬子

上谕大学士等曰朕凡用人皆谘询诸大臣而後用於诸大臣不信将谁信耶朕听政四十余年观尔诸臣保奏皆各为其党尔等致位宰辅皆有可否人材之责朕凡谘访人材当以实对若惟恐结怨不行陈奏何以责人耶

康熙四十一年壬午正月癸卯

上谕大学士等曰朕观诸臣任科道时多有敢言沽取直声以得陞迁者及为大僚辄不敢言问以小吏皆云不知前後何顿不相符耶

七月丙辰

上谕大学士等曰今之科道纠参一官举国皆闻方始入告或有先以疏稿示欲参之人然後题参者或有先告以题参之意其人不惧然後题参者若果贪污理宜参处倘因私怨以些微细故即行题参事必滋扰矣

十月辛卯

上谕山东省官员等曰尔等为官以清廉为第一为清官甚乐不但一时百姓感仰即离任之後百姓追思建祠以祀岂非盛事盖百姓虽愚而实难欺官员是非贤不肖人人有口不能强之使加毁誉尔等各宜自勉

十一月丁巳

上谕大学士等曰近见各部院衙门所办事件有错悞者惟恐事情觉露专务隐匿不行检举朕总理万几亦止详识紧要事务安能逐事一一记之各部院档案繁多势不能无舛错遗漏或有舛错遗漏而即自行检举则其过犹为可恕若惧罪隐匿不行检举则事必终於舛错悞甚大尔等将此旨传谕各部院满汉大臣知之

康熙四十二年癸未正月丙寅

上谕大学士等曰齐世武自授甘肃巡抚所属各官俱被参劾署事竟至乏人其中有初任者亦有他省调补者果有不法自当参处若止小过则惩戒可耳

二月丁亥

上谕大学士等传谕偏沅巡抚赵申乔曰湖南地方介在边远之境闻向来官吏积习相仍无艺私徵种种不一计每岁科派有较正供额赋增重数倍者有司徵收钱粮加取火耗又视别省为独重百姓穷蹙不支多致流离转徙非将宿弊逐一剔除无以砥砺官方大苏民困从前已往诸事姑免察究外尔到地方严饬大小属员痛改前非洗心奉职力减加耗尽革私徵务使流移者复返乡闾守业者获安陇亩庶副朕轸念远省民生至意如仍有藐法不尊重为民害者即据实纠参从重治罪决不轻宥

乙未

上谕大学士等曰赵申乔分文不取信然但朕临幸杭州谕访百姓言赵申乔好收词讼民多受累大凡居官固贵清廉尤必和平始为尽善如果好受词讼刁民兴讼即使审理其被讼之人一家产业已荡然矣如此民何以堪闻阿山亦喜受民词讼总之为督抚者以安静不生事为贵耳

九月丁巳

上谕大学士九卿等曰朕因山左灾荒劳心殫思屡行谕访山左岁歉非止今岁为然地方官历年隐匿不报今春朕因閱视河工亲见灾黎情形始行筹画賑济今岁田禾虽云失望尚有薄收之处巡抚布政使为伊等素有欠缺欲巧图完补故甚其词以奏报又夤缘科道纷纷急奏言盗贼蠭起人民相食私冀或开事例或拨银两因於其中侵蚀托言賑济而实欲完补亏空以施鬼蜮之谋也今京师遣往三路賑济人员俱掣籤派拨州县并不分成灾与否一概散賑遣去人员未奉有稽察谕旨惟视巡抚布政使所指地方賑济应将此事交与三路大臣加意稽察至御史李发甲条奏盗贼蠭起人民相食亦当明白询问如盗贼蠭起必有杀人放火抢夺财物粮米之处与失事之人如人民相食亦必有被伤之人与食人之人如有不实即为巡抚布政使急请设法银两而言也大学士九卿诸臣会同议奏言官并不实心为民专为巡抚布政使起见不诚可愧乎

康熙四十三年甲申正月辛酉

上谕大学士等曰朕数巡幸谕访民生利弊知之甚详小民力作艰难每岁耕三十亩者西成时除完租外约余二十石其终岁衣食丁徭所恃惟此为民牧者若能爱养而少取之则民亦渐臻丰裕今乃苛索无艺将终年

之力作而竭取之彼小民何以为生耶如朕前遣侍卫至铁索桥挂匾还京回奏彼处督抚饷

六千余两夫一侍卫而费至此则凡部院司官笔帖式等差遣往来者又不知烦费几何去岁所遣祭告诸臣回都朕曾问一二人彼虽饰辞以对然地方所费亦不少矣目今巡抚皆有廉声而司道以下何尝不受州县馈遗总之此时清官或分内不取而巧取别项或本地不取而取偿他省更有督抚所欲扶持之人每岁暗中助银教彼掠取清名不踰一二年随行荐举似此互相粉饰钓誉沽名尤属不肖之极至於蠲免钱粮原为加恩小民然田亩多归缙绅豪富之家小民所有几何从前屡颁蠲诏无田穷民未必均沾惠泽约计小民有恒业者十之三四耳余皆赁地出租所余之粮仅能度日加之贪吏苛索盖藏何自而积耶朕比年巡幸七省惟秦晋两地民稍充裕南四府及河南一路殊觉生计艰难山左初次巡幸民甚饶裕继而少减今则大异往昔矣皆由在外大小官员不能实心体恤民隐为民除弊而复设立名色多方徵取以此民力不支日就贫困科道官职司风纪当一切不避见之敷陈今惟挟仇报复者挂之弹章否则断断不言或专倚一人藉声势而听其指使然後敢言甚有大言不惭妄自矜夸者考其行事与言迥别子曰先行其言而後从之夫已之言已且不能行徒见之敷陈何益之有

三月癸卯

上谕大学士等曰部院情弊朕知之甚悉凡部院駁回事件有应駁回者亦有有故而駁回者倘欲实指其事朕并其始末皆能细言之朕日听万几惟据其理而处之以公平断不琐屑苛求但诸臣当自知足知足方不辱也

五月壬寅

上谕尚书侍郎等曰天下之民所倚以为生者守令也守令之贤否系於藩臬藩臬之贤否系於督抚督抚又视乎部院大臣而行部院大臣所行果正则外自督抚而下至於守令自为良吏矣今工部弊端发露尔等亦知愧否工部之弊朕屡降严旨切责并不悛改以至於此郎中费扬嘏等俱九卿保举之人仍尔作弊侵蚀河工帑金殊属不堪堂司官上下扶同但利之所在罔顾身命此何谓也尔等身为大臣诚能彼此箴规有所见闻郎为剖示属官有品行不端者即罢斥之庶几无玷厥职今部院诸弊尔等岂果不知但恐结怨於人隐忍不言科道官员亦因彼此掣肘不肯条奏举劾耳嗣後如有不谨识朕谕仍循故辙经朕察出必不姑宥

十一月壬戌

上谕大学士等曰徐潮为河南巡抚时居官实好平易得体民无不称颂之者朕西巡时经河南见州县司道官内有衰老者朕即酌量革退徐潮亦少过寬耳观李光地近日声名较前稍减彼每被人欺诳大凡为督抚者一被人欺诳则权必旁移张鹏翮向有清名在河工亦甚効力但被属员王谦等欺诳耳身虽不要钱子侄亲戚在外指名取钱可谓自己不取耶为大臣者约束不严自谓己不之知诿之他人可乎

康熙四十四年乙酉四月壬辰

上諭河道總督張鵬翮曰爾前因沖決時家馬頭參佟世祿一案於阿山徐潮勘奏後具疏強辯爾又請開河工捐納抵補事例明系脫卸屬員王謙等凡人既讀書先要辨明公私二字凡事從公起見方可以服人爾之名節關係固重佟世祿之身家關係獨不重乎王謙為人刻薄人人怨恨爾却偏信任其恣意妄行以致人心不服爾常云非堯舜之道不敢陳於王前如此行事豈得謂堯舜之道朕非不知爾在河工能任勞苦但聽信屬員流於刻薄從來大儒持身接物當如光風霽月爾平時亦講理學乃一味苛刻嚴厲豈所謂光風霽月乎況大臣受朝廷委任必須為國為民事事皆有實濟若徒飲食菲薄自表廉潔於國事何益耶

十二月庚戌

上諭貴州巡撫陳詵曰貴州地小易治雖有苗人亦無他事但以文武和睦安靜不生事為要清官多刻刻乃清官不足處屬吏貪污固當參劾其居官平常者則須教誨之邊地原苦為大吏者不可見才若生事顯才便非正理爾切識之

康熙四十五年丙戌三月丁亥

上諭盛京戶部侍郎董國禮工部侍郎席爾圖曰前因盛京衙門事務每至遲悞是以朕自京選擇大臣補授今聞官員辦事不勤爾等可往嚴察使朝參習射諸凡公事及圍獵不得有悞倘或不嚴朕有所聞爾等亦不能免罪

七月丁巳

上諭大學士等曰朕自親政以來斷不許人懷挾私讎互相害是以三四十年間無大臣懷私互讐之事此一事朕心頗以為善凡誣人及攻城屠戮人者縱使其身幸免於禍子孫斷乎不昌近觀貪官受報亦復如是從前督撫如屈盡美韓世琦白如梅賈漢復張長庚等皆以貪故其子孫極貧困不能自存或有學道考試不公而所生之子凡書讀過即忘并有瘖啞者天道甚可畏也前次考試時有朕所素知之人與考朕恐使人知之則必取中故不以告人凡人功名所系去取但欲其秉公耳朕尚以孤寒抱屈為念試官何不一計及於此乎

己卯

上諭大學士等曰侍郎穆和倫人不甚惡但性執拗耳朕聽政四十餘年何人不知何事不歷似此執拗之人倘有大事必至貽悞而伊身亦罹禍矣昔經略莫洛於事敏達而騎射亦優人材壯健但偏執己見莫洛欲率伊所招綠旗兵丁進剿其時王輔臣諫云召募之人不可信用莫洛言我所用之人有負我者乎朕所遣訥爾泰亦在彼力劝阻之莫洛謂訥爾泰童穉何知不聽與莫洛同行之員外郎薩哈連馳報至京朕謂之曰汝速往諭經略斷不可輕率兵前進必有變莫洛執意欲行至寧羌州地方王輔臣標下官兵鼓噪莫洛遂身被其害于成龍亦妄帶人至河上自謂所帶之人斷不負彼而信用之後皆貽悞朕往閱南河在御坝上朕親指示赫碩色令在此地下桩筑堤乃過三季不筑而河工皆不可問矣以此治赫碩色之罪後張

鵬翮到任并无别项効力但遵朕所指急速筑堤而河工告成既筑此堤有利於民衆民咸喜名之曰御坝故凡执拗轻信之人未有不悞厥事者也

乙酉

上谕福建陆路提督蓝理曰福建近海关系紧要曩时谙练海战者犹有其人今则寥寥矣且天下承平日久人皆贪於逸乐若不时加训练万一有事欲令其舍命冒险难矣尔当小心约束勤於操练务期兵民辑睦又

谕天津总兵官师懿德曰天津地方近在京师昔赵良栋为天津总兵官时甚善尔但以为法足矣尔年既壮人材亦健但当以骄傲为戒使无误公事

十月庚寅

上谕武殿试读卷官等曰凡人必耐得劳苦乃能有成不耐劳苦到处无用不但武臣为然即文臣若不劳苦学问如何成就今尔等二三老臣年虽高而勤劳实甚观部院官止图安逸凡事俱不经心至於会议时九卿内但一二人立议余皆随班画题竟少谙练事务之人矣

十一月壬午

上谕江南江西总督邵穆布曰朕知尔平日敬慎敬慎则何事不可为凡事不可迟缓若事久则弊生惟勤敏则事不壅积矣

康熙四十六年丁亥三月戊寅

上驻蹕松江府城内令地方各官俱近前

谕曰江南钱粮既多火耗虽轻养贍家口断无不足清乃居官之常清官每多残酷清而能寬斯为尽善

六月乙巳

上谕大学士等曰今部院一切公事堂官司官笔帖式遞相推诿皆不留心部院官员当以敬慎廉洁矢之於心勉励不怠朕尚不憚勤劳朝夕与诸臣商确政事伊等可图安逸乎

大清圣祖合天弘运文武睿哲恭俭寬裕孝敬诚信中和功德大成仁皇帝圣训卷四十五

# 卷四十六

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十六

饬臣工四

康熙四十八年己丑正月乙未

上谕文武诸臣曰朕向待大臣不分满汉一体包容诸臣当人人感戴自効乃九卿会议时但一二人发言衆俱唯唯其汉大臣则必有涉於彼之事方有所言若不与於彼之事即默无一语如此宁不有愧於举国之清议耶此後尔等皆当省改凡人既读书知义理即当以其所学见之於事非仅作文已也平时读书至临大事归无用则所读何书所学何事耶

是日

上谕浙江巡抚黄秉中曰为督抚者当清以持已实心办事不交通近侍不夤缘部院则无往不宜矣至於偶遇歉收除蠲粮发粟赈粥三者之外别无奇策但在地方官实心举行耳

五月丁酉

上谕大学士等曰在部効用人员初爲笔帖式之日即当念日後擢用可爲国家大臣自立品行今部院中欲求清官甚难岳飞云文官不要钱武官不惜命则天下太平矣

九月甲午

上谕大学士等曰工部光禄寺每年所用银两奏请预爲储备赴户部支领用完复奏一年之中光禄寺用二十余万两工部用四五十万两以至百万两不等俱造黄册奏閱所用数目虽较前略省而动工之处奉委官员於未估计之先即已领银备用以致浮支肥己之弊不絶嗣後工部光禄寺着十日一次将所委官员姓名及支給银数具摺奏闻如是则事务清而奢用之端絶矣又凡督工人员於工竣後销算延挨时日至十年销算者有之至二十年销算者亦有之凡工作物料俱登册籍何事稽迟若此此不过欲从中作弊耳工程所用钱粮朕常核算极其简易数日可毕嗣後官员销算如有踰年者立即奏闻罢斥

乙未

上谕河南巡抚鹿佑曰爲督抚者不畏惧人奉职循理本无所难每因部费繁多以致不能洁



已诚使实心任事专意民生一切情面俱可不必瞻顾河南俗朴民淳易於爲治比年以来五谷丰收今年开归等处虽少被水已经蠲免钱粮令地方官赈济矣嗣後一有灾伤即当据实奏闻不可隐匿至积贮备荒最属要紧巡抚乃地方大吏不在虚文宜实心爲利民之事且不徒一己清廉必使布按以下属官俱励廉洁始能利民至刑狱关系民命凡钱粮等事有不合者部院可以駁查惟刑狱之事定案达部部院亦难更改尔於疑狱应详慎駁审朕在位五十年於刑名最加慎重凡督抚陞辞之时每以钦恤刑狱训谕再三尔可加意详究以仰体朕矜恤庶狱之心至地方文武共事每多不和尔莅任後须文武和衷兵民一体为要

十月丙午

上谕大学士等曰近来科道言事必有所倚藉方始上疏至有关国计民生者全不念及如朕因浙江年岁歉收米价腾贵令江西湖广米商报名不许积囤沿海一带禁约不许出洋闻江浙米价皆平矣科道何不言及耶朕凡遇饥荒即蠲本年钱粮及历年逋欠又留漕赈济但恐民未必得沾实惠闻江南有催徵蠲免钱粮以偿已之亏空者科道何以不行指参

己酉

上谕四川巡抚年羹尧曰四川苗民杂处性情不一务须殚心料理抚绥得宜使之相安比年湖广百姓多往四川开垦居住地方渐以殷实为巡抚者若一到任即欲清丈地亩增加钱粮即不得民心矣湖南因丈量地亩反致生事扰民尔须使百姓相安钱粮以渐次清查可也此为川中第一要事至於刑名尤宜慎重人命关系至大审结之事达部亦难更改若有疑处即须駁审尔当留心地方武官每获一小贼辄张大声势自以为大有劳绩盗贼何处无有但须严行巡缉不可将小事看大了武官当勿令生事然亦须稍留余地使伊等养给其家尔为巡抚须文武和衷不可偏刻又

谕曰为督抚者不请托在京之人便是好巡抚尔须念一丝一粒民脂民膏得一钱须知从何处来总之以安静为要耳

十一月庚寅

上命户部尚书张鹏翮往审江南江西总督噶礼参江苏

布政使宜思恭一案

谕之曰审事从公而已若预存一意则不可也朕闻江南盗案尚有八百件尔到江南传谕噶礼作速审结总之罪疑惟轻功疑惟重与其杀不辜宁失不经凡为督抚者俱当体此语以行事

康熙四十九年庚寅正月庚寅

上谕八旗大臣及内阁部院大臣等曰朕总理国家大小事务必计久远今见八旗忽於生计习为奢侈此皆由该管之人不能约束伊等族长平时不先训诫所致也去冬因米价腾贵以二月应给之米於正月给发米价随即稍减可见八旗官兵以所支之米不运至家惟图微利一时即行变卖及至此银费去米价又贵势必请将八月之米於六七月间给发且将求来年之米於今年预支矣八旗官兵应互相告诫自是以後务将所支之米力加节省必用至支米之时庶不堕富商囤米术中尔等大臣官员俱有教养之责当仰体朕心洁已奉行

康熙五十年辛卯三月辛卯

上谕大学士等曰督抚大吏办事当於大者体察不可刻意苛求寬则得衆信则民任焉治天下之道以寬为本赵申乔任浙江巡抚时民多怨之後任湖南巡抚大小官员无不被参岂一省之内无一好官耶总之为大臣者不可轻率参人明时臣工不能秉公颠倒是非挟讎弹劾此风不可不戒夫官之清廉只可论其大者今张鹏翮居官甚清在山东兗州为官时亦曾受人规例张伯行居官亦清但其刻书甚多刻一部书非千金不得此皆从何处来者此等处亦不必究又两淮盐差官员送人礼物朕非不知亦不追求盖惟愚民为不可欺居官之善与不善到任不过数月人即知之故曰天视自我民视天聽自我民听民意即天意也

乙卯

上谕偏沅巡抚潘宗洛曰凡为督抚者操守甚为要紧尔宜洁已为下属表率今天下太平无事以不生事为贵兴一利即生一弊古人云多事不如少事职此意也馭下宜寬寬则得衆为大吏者偏执已见过於苛求则下属何以克当至於红苗僻在荒隅不得与内地百姓同视宜善为抚绥朕观尔等汉官一遇难事便欲告退夫设官分职原欲令其宁谧地方抚养百姓既为封疆大臣凡事宜一已担当黽勉効力一遇难事即图脱卸可乎

九月壬辰

上谕广西巡抚陈元龙曰广西地方近已宁静尔至彼处当使文武和睦兵民相安巡抚亦有管兵之责宜不时操练古人云兵可百年不用不可一日不备尔为翰林年久朕特试用以边疆之责观尔办事如何尔宜尽心加勉至於居官声名自有公论在也

十月丙辰朔江苏巡抚张伯行题臣属七府一州比来年岁丰登家给人足嗣後臣更劝民积储教民节俭行见户庆丰盈人敦礼让矣

上曰自古人臣事君必令民生疾苦具以上闻劝善惩恶屏絶私党以爱民弭盗革除恶习敦厚风俗为务前张伯行奏称务期家给人足仰报君恩今未及一年而遽云家给人足毋乃文饰太过乎闻江浙地方盗贼丛集乡绅兵民甚属不安又闻今岁钱粮未清亏欠甚多又粮船迟误米色不堪昔朕南巡时米价较前甚贱且竝无灾祲忧虑小民穷苦屡颁谕旨今盗贼滋蔓该抚反称家给人足者无非掩饰前言耳未必於小民实有利益也嗣後毋得如此虚词矜

誉凡事必速行完结敦风厚俗弭盗安民催餽粮船清理钱粮以图报効该部其严饬之

康熙五十一年壬辰十月丙辰九卿詹事科道面奏噶礼张伯行互参一案

上曰从古治天下者莫要於至公朕御极五十余年凡内外大小之事皆以公心处之观近日外官满洲所参大抵皆汉人汉人所参大抵多汉军皆非从公起见朕悉据理处断竝无偏向张伯行居官清廉人所共知其家亦殷实朕巡河工时适彼为按察使知之甚悉但才具略短耳噶礼办事历练至其操守朕不能信若无张伯行则江南地方必受其唆削一半矣语云文官不要钱武官不惜命然後天下乂安又云清官不累民朕为天下主如此等清官朕不为保全则凡为清官者亦何所倚恃以自安乎

康熙五十二年癸巳九月甲戌大学士等以科道内陞外转请

旨

上曰言路不可不开亦不可太杂明代国事全为言官所坏观今之进言者辄云某为上所喜某为上所恶每揣摩朕意私心窥伺以图迎合朕竝无所爱憎之人其居官善者则爱之不善者则憎之耳即如噶礼居官如此不善不但无一人劾奏反有从而誉之者後噶礼与张伯行互参差往审事满汉大臣谓朕意有偏向故审理俱不公平朕亦不露意旨直至议定奏闻方向九卿明谕於是衆乃知朕无偏向之意大凡人臣事君之道公尔忘私乃为正理且性理诸书中亦不过辨别公私二字事君者果能以公胜私於治天下何难若挟其私心则天下必不能治今科道於内外官员亦有明知其不善者或其人有所倚仗或其人素有声势不可动摇莫敢参劾亦由学浅胆小故耳为清官者惟洁己不要钱犹是易事若论公尔忘私诚为难得科道官员内朕无深知者今条奏亦少将伊等照例挨次陞转可也

十月庚辰大学士等遵

旨以御史董弘彪保举山西冀宁道彭腾翹问九卿九卿

云彭腾翹声名不佳

上曰朕知彭腾翹向来奉职不善屡经降级天下官员甚多朕不能尽识虽识之亦不能确知其为人然後问於九卿九卿宜一意秉公据实举奏今观九卿大臣率多苟且谓何必与人为讐不肯直言人臣居官一日则当尽一日之职若互徇情面不实心办事事何由而得理且科道者耳目之官果九卿保举不公即当纠参又科道亦有互参之例今观科道官惟有所倚恃始行题参殊非臣道所宜然也董弘彪彭腾翹俱着革退

庚寅

上諭大學士等曰翰林官員內多有不識字義不能作詩文者此皆教習不勤之故比年以來武英殿行走之人鄉會試中式者甚多蓋以在武英殿行走每日不釋卷耳此後凡修書校書處着併派庶吉士又

諭曰道學者聖賢相傳之理讀書人固當加意然詩文亦不可廢或有務取道學之名竟不留心於詩文者此皆欺人耳

康熙五十三年甲午三月丁卯

上諭奉天府府尹郝林曰盛京旗民雜處命案甚多爾必亲历所屬地方誠心教導毋謂此非久任之地將事諉與將軍各部國家設一官即有一官之職為官者當立志盡職興起教化有一番整頓方無忝厥職也

十月壬辰

上諭大學士等曰朕自幼讀書無一時不以民間疾苦為念巡撫乃專任封疆之大吏理應實心為民勤求樂利迺來浙省地方歉收民生艱難每觀巡撫王度昭所奏竝無尽心利民之處再河南巡撫鹿佑所奏事宜亦未得當爾等傳問九卿

十一月庚戌

上諭山西布政使噶什圖曰布政使一官專管錢糧山西錢糧每年全完竝無亏欠州縣或有徵耗過重者爾宜加意訪察凡有益百姓之處當酌量行之

十二月戊子先是商人馬維屏等以願領大錢收買小錢叩閣

上命內務府同戶部會議戶部尚書趙申喬以其事不可行而郎中羅復晉將准行議稿送侍郎王原祁廖騰煒畫題具奏不曾送伊畫題疏請罷黜

上曰凡事有理不可尚氣君子愆忿窒慾此語最宜詳思此一小事司官藐視即當參拏何必忿怒且寬則得衆爾性苛急不能容人向任巡撫時所參官員有身自知之而參者亦有因人言而參者果能實耶天地之大德曰生所謂好生者非但不殺而已蓋於萬物皆養育而保全之之謂也爾居官雖清豈可自恃其清而為矯激之行乎又

諭大學士等曰布政使牟欽元居官好巡撫張伯行題參牟欽元交通海賊此皆伊多疑所致朕曾遣張鵬翮往審尋張鵬翮摺奏時朕批令張鵬翮同張伯行領兵於有海賊之處亲身往拏總督赫壽聞此消息坐小船往黃天蕩探察方知張伯行所言盡虛妄耳張伯行又奏噶札下人甚衆恐欲殺伊為噶札報讐此亦無影響之事特因向牟欽元索幕賓不得遂起弊端總督巡撫皆有幕賓若為此生疑尋隙亦非為大臣之體清官多刻刻則下屬難堪清而寬方為

尽善朱子云居官人清而不自以为清始为真清又如易云不家食为官之人凡所用之物若皆取诸其家其何以济故朕於大臣官员每多包容之处不察察於细故也人当做秀才时负笈徒步及登仕版从者数人乘马肩舆而行岂将一一问其所从来耶

庚寅

上谕云南巡抚施世纶曰尔居官声名甚好但过於偏执不度事理惟以己所知者为是天下凡事当中道而行今为封疆大吏理宜尽改前非不可拘执己性云南年来米价腾贵地方甚远倘遇灾荒难於赈救尔宜留心料理至驭下属务以宽恕为本

壬辰

上谕大学士等曰户部尚书赵申乔保举潮州知府张应诏准其陞补两淮运使但赵申乔又奏张应诏为郎中时寓居寺院能耐贫苦授知府不制衣服随从数人果如此言殊为未当为清官者並不系於贫富张伯行家道甚饶任所日用之物皆取诸其家足迹所至防人谋害随从四五十人今以为不清可乎且巡抚管理军务一应兵丁宜鼓舞作兴常加恩恤今以己为清官独市餅餌而食兵丁赏赉不及岂合於理凡事皆有道理为官之人不取非义之财一心为国効力即为好官或操守虽清不能办事无论谕旨批駁与部駁之事积年累月概不完结似此清官亦何裨於国事乎

康熙五十四年乙未二月庚午

上谕大学士等曰部院满汉司官皆有办事职任必谨慎勤敏始克称职如有懒惰昏庸轻浮躁妄生事招摇疾病疲癯者岂容姑留又各省地方官内有大臣子弟及大臣保举陞任之人恃伊父兄及保举大臣恣意妄行督抚不能约束即居官清廉之人亦应素位而行谨慎自持岂可自恃清廉偏僻固执乎尔等会同九卿详议具奏

十月丙寅

上谕大学士等曰办理事情固不可不知文理然亦须谙练政务之人方善若遇大事不可徒执虚文又如外省督抚但以不贪为尽善以朕观之清乃居官一端之善苟於地方生事虽清亦无益也

壬辰

上谕大学士等曰凡满汉大臣遇事应同心办理今每满洲大臣一议汉大臣一议此处大有关系

世祖章皇帝时为此特下严旨至今

圣训昭然可不恪遵耶如果两议亦应满汉相闲岂可截然两议从前未曾如此自赵申乔来始然凡事只有一理不可执拗今朕听政五十余年何者不曾经历即小事必向大学士学士九卿问之大臣执拗犹之可也若为君者自行执拗则如之何着将满汉两议者交吏部都察院察出议罪

十一月辛丑

上谕大学士等曰张伯行为巡抚时每苛刻富民如富民家堆积米粟张伯行必勒行贱卖否则治罪此事虽使穷民一时感激要非正道亦祇为米价翔贵欲自掩饰耳地方多殷实之家最是好事彼家货皆从贸易积聚竝非为官贪婪所致何必刻剥之以取悦穷民乎况小民无知贪得无厌近闻陕西有方耕种即挟制州县报荒者此等刁风亦不可长又赈荒一事苟非地方官实心奉行往往生事盖聚饥寒之人於一乡势必争夺明时流贼亦以散粮而起此不可不慎也书云明四目达四聪朕於天下事无不洞悉然知之即发亦非大体总之为政以中正诚敬为本中正则能公诚敬则能去私朕日读性理诸书见得道理如此

康熙五十五年丙申三月戊午九卿议覆贵州巡抚刘?枢题请缓图北征一疏

上曰策妄阿喇布坦无知蠢动侵扰我哈密应发大兵即行殄灭但朕好生为念不忍骤加剿除因备兵边地遣使宣谕俟其悔罪自新为中外生灵计其万全措置之际必筹其前後虑及久远防微杜渐始合机宜自策妄阿喇布坦侵扰哈密以来朕从容与大小臣工公同商酌办理军务竝未尝有逞一己之怒形诸声色及统兵亲剿之处刘?枢听信讹传邸抄妄行具奏以为分清边界便可毕事如策妄阿喇布坦乘闲窃发边民能保不受害乎刘?枢尚未衰迈着乘驿前赴军前尽心周閱矢公详议具奏

九月戊寅贵州巡抚刘?枢奏臣遵

旨亲赴巴尔库尔军前閱视满汉官兵军势?壮首尾相连巴尔库尔地方闻入冬大雪动深数尺倘道路壅阻粮何以运草皆覆压马驼何以牧放臣谨奏闻

上谕大学士等曰军机事务关系重大一言可以鼓励士气一事可以退缩人心本朝自

太祖高皇帝

太宗文皇帝

世祖章皇帝迄今百有余年所向成功事事上应天心以正讨逆巡抚刘?枢乃读书之人年已八十非属无知初以朕为不能忍怒及至军前无可奏对乃称雪至三四尺粮何以运驼马何食於此愈知其无能矣外

藩蒙古共有百余扎萨克人无一分粮饷马无一束草乾自古及今极寒之地何以各安生业观其一经雪後惊惶失措忘其身为巡抚管辖文武之责如敌稍强必至效曹申吉罗森方光琛辈所为也朕三统大兵曾当严寒盛暑久行沙漠不毛乏水之地於军机事务以至调养驼马无不熟悉然後知古人论兵不得其道多无成功每至败事深为太息朕中路统兵至博洛和屯於三月十六等日遇雨雪风霰自京师运米出口马正肥者倒毙反多兵丁马匹不甚伤损蒙古马匹如常於此愈知古人乘春以图蒙古之失策也朕近训兵校猎至乌里雅苏台八月十六日岭巔雪深尺许至行营中惟深七寸驻蹕二日雪已全消此去京师七百里即如此矣设刘?枢见黑龙江东海北海等处冰结八尺之雪必至奏请毁城郭弃地方将居民尽行移徙矣古人云雪盈尺表瑞过尺成灾刘?枢今奏称巴尔库尔地方雪深三四尺或系伊亲见或系何人告伊之处竝未声明仍着刘?枢前去雪深三四尺果属亲见着据实奏闻倘听信他人妄诞恐吓之语亦着据实奏闻

甲申

上谕大学士九卿詹事科道等曰国家设立科道寄以耳目重任建言参劾乃其专责原任将军席柱任都统时补授官员及披甲拨什库等混索贿赂为西安将军时尤贪婪不堪顷交议政大臣审讯真情尽露人不知而科道等官竟不纠参昔年所用武大臣还来渐少所以补授都统副都统等官止视其効力处渐次陞用但伊等多不谙事体亦不能约束兵丁兵丁全无畏惧法度大为废弛如原任右卫副都统黑雅图人皆称为胡打铁卒以杀人获罪宗室内朕亦尝试用皆少不更事无胜任者至於总督巡抚但於地方不生事年岁丰登钱粮清楚即为称职或有人自谓清官纵妻子奴仆暗受贿赂以此为清朕断不许如此清官何益之有且九卿及督抚提鎮内居官贪婪行止不端者亦或有之即当从公参劾乃或因系某大臣保举或因系某大臣门生故旧彼此瞻徇情面竝不题参闲有条奏弹章亦止受人请托或欲使人畏惧自立威名耳至於会同保举时或有欲举之人指使他人举出而已佯为不知朕为人君特从寬不深求而已非不知也尔等皆读书之人性理一书公私甚明凡事一出於公斯为善矣科道内有招摇生事索诈取财代人陈奏者即行参奏

康熙五十六年丁酉十月己亥

上谕大学士等曰河南省盗贼蔓延地方官未尝奏闻朕谕山西总兵官金国正巡抚苏克济查奏复遣尚书张廷枢等前往查拏今已全获览其供状与金国正苏克济等所奏相符皆河南巡抚等不能查缉之故此案邻省各官俱已确闻而九卿岂无所闻耶九卿内有豫省人何亦无一人奏闻也四川巡抚年羹尧所赏差往松潘兵丁银两米石牛羊茶叶康泰等领去竝未全给兵丁致各兵鼓噪而回此皆康泰平素不训练竝不抚恤之故也各省督抚提臣悉系封疆大吏总兵官等各有管辖官兵防守地方之责关系甚重凡补总兵时朕惟视其骑射嫺熟人材壮健曾有效力之处即行除授此内有居官甚劣不留心地方者九卿应随闻随奏今观九卿保举人员惟图利己冀其酬报似此有关地方要务以及大吏贤否虽有闻知竝不具奏此何故也

康熙五十七年戊戌十月庚午

上谕议政大臣等曰每旗都统副都统或有起家微贱专意狗庇一应补授官员并佐领等事恒有迟至数年或十年不奏者或一官病故已久数年尚仍给俸者一切事件漫不稽查甚是旷废近闻都统石文英不出门户亦不见人有事来奏每不俟事毕祇图早归亦不瞻仰朕容甚属不堪现今正蓝旗满洲都统延信前往出兵其满洲蒙古汉军三旗之事着七阿哥办理正黄旗满洲都统巴赛署理将军事务其满洲蒙古汉军三旗之事着十阿哥办理正白旗满洲都统和里差往云南其满洲蒙古汉军三旗之事着十二阿哥办理如此则别旗各相效法自必发愤勤事也

康熙五十八年己亥十月丙寅

上谕议政大臣等曰尔等皆系议政大臣凡议政诸事竝不留心俱草率奏闻自备运米人员亲身竝未前往将官驼所运米石以为本身运到竟邀议叙自备种地人员竝未种地交粮而管理种地之人希图利益捏称交粮入仓亦邀议叙现今仓内米石已致缺乏所以侍郎敦拜等奏请明岁运米应作速运到以补缺乏尔等於诸事竝不留心草率议奏之处朕已屡降谕旨嗣後尔等须加意恪遵

康熙五十九年庚子五月辛巳

上谕议政大臣等曰今岁稍旱应速行文与各路将军或营中亢旱马匹未肥或进兵之路甚旱水草不敷俱未可定勿谓既经议定进兵不敢复以亢旱为辞奏请停止朕念军务所关甚大从前屡谕尔等及领兵大臣凡军机之事有今日定议明日又改者未可拘执要在相其机变而行朕於用兵之事必熟思而後颁发旨意若无旨意又恐军中之大臣难於奉行也然军前或因亢旱而无水草马匹倒毙则兵丁如何前进如何回旋明年又如何进兵耶总之雨水及时牧草果好前进自无艰阻应即行进兵倘或亢旱马匹疲瘦雨水不调牧草不堪则即以不宜进兵之处令军中之大臣等定议具奏断不可以今岁若不进兵来年亦可再进作游移之语呈奏也路途遥远恐发去文书迟延遗失亦未可定须於明日行文一次续後再行文一次有一处不可进兵即着将此一处奏请停止

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十六



# 卷四十七

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十七

训将士一

康熙十年辛亥十月壬辰

上谕宁古塔将军巴海曰朕向闻尔贤能今侍朕左右朕益知尔矣飞牙喀赫哲虽已降服然其性暴戾当善为防之必须广布教化多方训迪以副朕怀远至意罗刹虽云投诚亦当加意防御操练土马整备器械毋堕狡计至於地方应行大事毋得疑畏即行陈奏

康熙十二年癸丑十二月癸亥

上谕兵部遣发大兵原为剿除叛逆以安百姓凡兵丁厮役於所在地方恐有恃强掠民财物拆人庐舍坏人器具污人妇女扰害生民及损坏运河闸板桩木统兵主帅各宜体朕为民除叛用兵之意申明纪律严加钤束倘有违禁妄行从重治罪着即速行晓示

康熙十三年甲寅正月乙亥

上谕宁南靖寇大将军多罗顺承郡王勒尔锦安西将军都统赫业曰行军之道惟得民心为要今勒尔锦帅师之湖广赫业帅师之四川所过地方宜厚加抚恤严禁侵掠诚能无犯秋毫则百姓安矣至官兵暴露良苦亦宜拊循其进止处所谨设斥堠善自周防勿懈也南方卑湿念我军士远役或不习水土猝有疾病可择医药调治之其有劳绩者即向所司支給赏赉勿致踰时

五月戊辰

上谕驻防兗州喀喇沁土默特塔布囊等曰昔

太祖

太宗取有天下尔等祖父常同心効力朕仰体

祖宗抚恤尔等祖父之意恩典频加念尔等生长朔方粤西一带系炎蒸之地故不遣往特命鎮守兗州尔等至彼须节慎饮食凡有调遣当闻命星驰遣尔出师所以为百姓也当加意抚

恤沿途不得扰害至於设巡哨谨备御凡军旅事宜敬慎毋忽

八月癸巳

上谕科尔沁公图纳黑曰我

太祖

太宗以来尔祖父同心効力佐定天下尔国赋税听尔自取朕念尔国穷苦加意抚养今闻调至尔所属兵卒有掠取民物者在京尚如此况离此远去岂不益肆抢夺尔久历行间宜严禁兵卒毋得恣行强横如有乱法者即会同贝勒议行惩治且中夏炎热尔衆早晚饮食各宜自慎以副朕轸恤军士之意

十一月己巳

上谕安远靖寇大将军多罗贝勒尚善等曰览吴璠所奏尔等奏疏朕心深为嘉悦两贝勒皆朕懿亲运筹决策破贼立功在指顾间尔等请调荆州緑旗甲兵备用宜深加抚恤至临阵时明谕贼人有解甲来归者即与保全恩养安插朕未亲历行间但披览輿图据臆悬断所期尔诸将等恩威公普无间亲疎严饬哨探申明法纪速成破贼之功永表旗常之绩尔等所有筹画即行密奏两贝勒及大臣等兵士无恙并疏以闻

康熙十四年乙卯七月甲辰

上谕定西大将军多罗贝勒董额等曰国家仰荷天眷秦州巩昌兰州等处以次恢复朕甚嘉悦此系保宁旋旆之兵间关跋涉戮力効命所致须不时轸念恤其劳苦且尔等将兵在外事情经练须协和持平方克有济朕亦知尔等断不徇一己之利但意虑所及不得不为告诫将军张勇劳绩甚多慎勿狎侮致滋嫌怨尔等务期殚心为国运筹制胜一德同心早奏荡平以慰朕望

八月己巳

上谕出征鎮安将军都统噶尔汉曰尔所率蒙古兵丁马匹虽不甚肥健今野多青草师行必不致悞闻前往蒙古兵卒沿途颇行扰掠此行务加意严禁勿得侵夺民物凡行军驻营俱令与满洲兵相近勿得远离

康熙十五年丙辰二月乙亥

上谕陕西诸将士曰我国家自创业以来克敌攻城必主帅奋勇先登军士効死戮力方能速建肤功今闻尔等凡与敌遇率皆乘间伺隙观望不前但令士卒前驱冲突督抚等亦多坐失

事机故致劳师匱饷因命都统大学士图海为抚远大将军前往平凉总统诸军尔等痛改前愆殫心图効若仍蹈前辙一经大将军指名劾奏必置重典至兵士行间劳苦朕已悉闻尔等衆兵宜体朕豢养之恩益奋勇効力果建功勲不吝爵赏尔等勉之

三月庚寅

上谕大将军贝勒尚善曰尔等统率大兵闲坐日久未进寸步朕指授军机惟以雨雪为辞仍退缩不前各执全躯保身之意今安亲王已复萍乡醴陵二县进取长沙湖南逆贼岂尽弃他处而独固守岳州耶揆此则不实心用力显然矣尔等宜痛改前非奋发効力乘湖南逆贼骚动之时仍遵前旨速行进兵毋得坐失机会

四月丙辰

上谕大将军康亲王杰书宁海将军贝子傅喇塔曰王贝子皆朕懿亲受任讨贼师克在和近览王贝子屡次章奏似不相辑睦嗣後务同心一志合谋并力以奏肤功毋各执己见贻悞封疆负朕委任之意

七月辛巳朔

上谕大将军简亲王喇布等曰江西虽去京四千里朕知之甚悉王以宗室懿亲不乃心国家料理军务恢复地方惟坐守省会日事骑射以图安逸殊负委任之意今逆贼高大杰窃踞吉安朕旨到日即宜克期攻取副将军希尔根不思报国日驻省城安逸自便性尤偏执军中每分两翼独庇其右翼嗣後宜痛改前非力图报効哈尔哈齐额楚亦宜遵朕命速取吉安勿得推诿坐失机宜且觉罗舒恕莽依图穆成格现驻赣州南安王等宜协力攻取吉安进兵两粤凡行兵之道爱民为先若百姓富足粮饷充裕则徵调师徒庶不致有困乏自今大兵所至务禁戢扰掠以称朕抚辑兆民至意丁未河南土寇张成武侵扰永宁县境驻劄河南府参领胡世巴等移会巡抚进兵报至

上切责胡世巴等曰大兵驻防河南府本为扑灭盗贼今永宁有警胡世巴等距贼百八十里不率兵星赴乃称移会巡抚迁延时日殊为不合着胡世巴等即率官兵进剿该抚鎮亦即遣兵会剿无使滋蔓仍禁戢军士勿扰地方

八月戊午

上谕议政王大臣等曰大将军简亲王喇布副将军希尔根等俱有保全江西剿灭贼寇重任岂得各分疆界互相推诿今将军舒恕等兵至南康赣州为日已久马匹资仗乏絶如听其因地取给必致扰害生民吉安虽未恢复岂无间道可通赣州王及将军总督等宜多拨官兵由间道解送资粮器械接济士卒吉安即系南康赣州孔道大将军王等率兵速取之仍酌留官兵同总督董卫国鎮守南昌其速行文谕伊等知之

己未

上谕大将军安亲王岳乐等曰朕闻王恢复萍乡大创逆贼直抵长沙甚为嘉悦今日之事利在神速若稍迟缓俾贼得以固守则攻取不易今秦省全定自蜀中前来逆贼十余万尽已歼灭大兵即不下四川贼亦不敢复出若分发现在陕西之兵前赴湖广庶或有济王其善抚百姓倘民困已极即得地方亦复何益至叛逆之人皆系胁从情非得已且原皆朕之臣子王其时加招徕即吴三桂果有悔罪输诚之心亦何不可容受王膺此重任自有成算特以朕意示知

十一月丁亥

上谕湖广大将军王贝勒参赞大臣及官兵等曰我朝创业以来战胜攻取动合兵机将帅皆身先士卒无不立奏肤功逆贼吴三桂背恩反叛朕念尔等宗室大臣简閱官兵委以南征削平僭乱拯救生民今出师三年未获尺寸坐失机会使疆圉日逼贼势鸱张糜饷困民悞国孰甚罪在王贝勒将军大臣於衆官兵无与今陕西福建江西浙江虽渐次底定然贼渠吴三桂不诛於事何济日者穆占在川陕时劳绩茂着兹特简为征南将军命以讨贼尔等亦当同心戮力歼寇拓疆以副朕靖乱安民之意慎勿妄分疆界各顾部伍互相推诿仍蹈前失也衆官兵自遣发後为国効力暑雨蒸湿浚濠筑垒昼夜枕戈披坚冒刃分防侦探备极劳苦朕悉知之每念及此深用惻然尔衆官兵其念朕恤养之恩益加用命倘树立功勲朕不吝优加爵赏其各勉之

壬寅

上谕兵部将军哈尔哈齐额楚等已抵吉安数月不能剿除逆贼攻克城池故逆贼乘间陷醴陵窥萍乡恣意肆行觊断安亲王大兵後路及提督赵赖等领兵赴援又不并力剿贼徒拥重兵愒时玩日且屡檄简亲王喇布副将军希尔根令其亲统大兵速赴吉安乃藉口南昌重地逗留不前迟久始?又不多备弹丸火药等物即此观之貽悞军机匪小是日大将军简亲王喇布等疏称江西抚州等处汛兵单弱江西总督董卫国又请?援师并调邻省之兵防守

上谕曰各路调集江西兵为数不少简亲王喇布等不速取吉安徒尔劳师糜饷吉安一郡尚不能取湖南逆贼何日得平前理藩院郎中胡世巴所领蒙古兵已遣发江西董卫国又身在省城邻省之兵无庸调遣至恢复长沙平定湖南全赖吉安大兵接应简亲王喇布等若仍前迁延观望安亲王大兵脱有疎虞喇布等当以失机例从重治罪不贷

康熙十六年丁巳三月丙午

上谕兵部大兵需马甚殷非寻常比贝勒尚善等去贼甚近必审知万无一失方行遣送今长沙岳州之间路未甚通若逆贼阻截护兵力单难保无虞宜预约安亲王遣兵相迎度兵且来然後发往且将军鄂内率兵赴岳尚善所知或俟此兵到後多添兵力俾无他虑然後遣行今

但以千兵护送如许马匹殊为轻忽倘事出意外於我不利且为贼资则是尚善明悞进剿大事尚善其速侦送马消息以闻

四月辛未

上谕兵部简亲王喇布等统领重兵围吉安一城日久不下虚糜国帑徒劳士马被围之贼不能扑灭故使逸出逸贼率皆步行复不能追击听贼渠脱逃情罪重大宜即处分念见在进兵俟事平旋师之日严加治罪又王啓元奏称吉安虽复而贼皆逃出与土寇合势江西未为全定前因总督董卫国疏称吉安已复逸出之贼见在围剿故令酌量分遣大兵赴袁州南昌今江西既未全定可令参赞大臣到日相视地方轻重缓急如不能如前旨分遣则听其便宜调度至螺子山拒贼一案与纵贼逸出官兵其严察罪状以闻又传

谕喇布及诸将军等曰诸路大兵俱各殫力杀贼惟江西一路屡糜朕忧尔等围困吉安既已逾年乃纵贼尽令逸出又不恤人民肆行侵掠夫国赋出於民有一民斯有一民之赋若不抚辑招徕地方何由底定又屡称江西兵士战马羸瘦多毙尔等顿兵江西未出四五百里外战马何由羸毙况康亲王兵由浙江定福建入广东彼马何独能进岂非尔等惮入楚粤预为托故嗣今宜竭力剿贼平定疆土勉建功绩用赎前愆

六月己未

上命翰林院侍讲学士顾八代赴将军莽依图军前传谕莽依图曰用兵利在神速毋稽迟悞或不得已择便而行者有之凡此机宜尔自熟悉近以逗留悞事如长沙荆州诸处其明验也

九月丙子

上谕康亲王杰书尚书介山侍郎吴努春等曰今当剿灭吴逆招携抚顺之时不宜遽调耿精忠还会城以疑衆心王及大臣等不将此事预行请旨即撤耿精忠殊为失计嗣今凡此等重有关系之事务熟筹请旨毋得径行

十一月壬午先是扬威大将军和硕简亲王喇布奏据报韩大任等欲渡河潜遁楚贼来迎应乘其未合预行剿灭但护军统领哈克山等部兵甚少若剿逸贼则无兵以遏楚逆若御楚逆则追剿逸贼又复无兵今吉安无可调之卒臣等议分将军穆占兵之半暂守永新安福令其半赴泰和万安诸处遏御贼寇

上曰简亲王喇布自到江西并未建尺寸之功宴坐会城虚糜粮饷迨赴吉安以重兵围城逆贼韩大任奔逸不能击灭致韩大任窃踞宁都虽遣副都统布舒库等率兵前往究未大创贼衆今韩大任等自宁都窜突延及万安泰和诸处不能扑剿又以兵少具奏计喇布所辖满汉官兵为数不少一韩大任未能剿除任其出入宜即严加处分念现在与贼相持姑俟事平日

议罪其令将军穆占率兵急赴梁口务速剪灭勿使蔓延至是穆占奏称闻吴三桂遣伪帅三人由永新犯吉安臣身在地方洞悉情形伪帅来犯非迎击不可臣是以率兵前进於本月初三日已抵永新俟後军一至即剿除永新百里外所屯贼寇进取茶陵其逆贼韩大任应令大将军简亲王喇布或和硕额驸华善率兵堵御

上谕曰简亲王速调副都统布舒库提督赵赖等所辖兵亟灭韩逆将军穆占身临贼境必悉情形或先赴梁口协剿逸寇或已进取茶陵遏御楚贼即乘机平定湖南其详悉筹度无失事机

十二月癸丑

上谕护军统领哈克山副都统布舒库席山雅秦提督赵赖等曰尔等所统官兵颇多现今将军穆占击败楚贼收复茶陵攸县逆贼韩大任已无外援宜乘此时即行荡扫乃称山路险狭骑兵难用欲调兵守隘延引时日使贼复得闲固守殊误机宜简亲王量调附近官兵并严檄哈克山等乘贼势蹙急行剿灭

辛未

上谕兵部大将军图海身在陕西其沿边流番或令提督等率兵往逐或严飭边汛官兵各固守汛地选干练人员至头目处开诚晓谕令彼退回着大将军图海酌量指授而行毋致生衅

康熙十七年戊午二月乙巳

上谕将军穆占曰尔所密奏事宜朕已悉知前议政王大臣所议因无接济之兵令尔前进今贼韩大任穷蹙来归诸处俱已克复江西全省将士皆有余暇故着简亲王与尔会同酌议想移文尚未至是以尔先为陈奏今在廷所议乃合诸路情形统筹全局览尔将军等所奏各执己见者甚衆此皆无济於事嗣後须当同心勉力无负委任至意

三月丙戌

上谕议政王大臣等曰自逆贼吴三桂叛变以来大兵诸路征剿方平南王尚之信归正之时将军巡抚傅宏烈思念国恩密约反正所领官兵从未支领俸饷辄奋勇入粤西收复梧淥诸处歼戮渠帅屡奏捷功嗣以进取平桂规定滇黔奏乞迅发大兵以相助援因遣将军莽依图等协力恢复平桂本期莽依图等与傅宏烈并力平定广西克济大事不意莽依图等兵抵平乐寸步不前藉口緑旗营垒失陷遽奔还中山鎮仍复畏缩退至贺县又托言粮饷不继径回梧州德庆以傅宏烈恢复如许城池尽弃与贼今若梧州乏粮必将退回肇庆肇庆乏粮必将退至广州苟广州乏粮当复弃广州而还耶如此怯懦多端推诿不惟悞西征之事即粤东恐亦可虞顷有旨令莽依图驻鎮梧州兼顾高州诸处嗣今宜痛改前辙鼓舞军士勉图後効相机剿贼底定封疆尔等其严行申飭

闰三月庚申

上谕兵部据大将军图海疏报噶尔丹兴兵往攻青海厄鲁特如远从達布素图瀚海而去则无庸置议若来至近边欲经大草滩前往则将军侯张勇提督孙思克等务须令其坚立信誓不许骚扰人民仍整饬我军严加防护一面放噶尔丹过一面奏闻倘或肆横强欲入边将军提督等固守地方一面坚拒奏报尔部速即传谕

六月庚午朔

上谕议政王大臣等曰康亲王杰书用兵甚为选悞自至浙江安居无事之地及屡降严旨督趣始破衢州之贼进定福建福建既平不事预防固守俾海贼登岸遂困海澄我国家军法严明无敢轻忽浙江福建失机将士杰书未尝察取供词纠劾有负委任其会议以闻

己卯

上谕将军莽依图等曰向因规定广西调遣满汉官兵甚多今进征田州泗城若俟他路诸军齐集必稽时日若孤军独进恐难有济平粤事宜所系甚重将军莽依图额楚傅宏烈及参赞诸臣与总督金光祖等俟克复浔州俱赴梧州面议何路进兵先取何地务期和衷为国勿各图自便

丁亥

上谕兵部将军穆占大将军简亲王总统师旅受将帅之任宜求济大事彼此和衷若尔各怀嫌隙恐误疆场嗣今务相辑睦尔部即行传谕

己丑

上谕议政王大臣等曰简亲王喇布自抵江西未能剿除逆贼克复疆土而於失机将士复不严责军状及遣守茶陵攸县等处已收复地方又不能鎮防屡以力单奏请益兵凡所题奏率过其实此皆喇布庸劣不能効力之故俟事平旋师之日严加议处大将军安亲王兵现驻长沙无论护军甲兵每佐领选一二人遣赴简亲王军前且大军既鎮守茶陵攸县安仁等处则吉安已为内地吉安署副都统尼满等之兵亦听简亲王随宜调用

是日

上谕兵部长沙茶陵郴州地势及逆贼情形久未知悉大将军安亲王将军穆占大将军简亲王各遣熟识情形具谕始末奏事传旨不致遗误者一人驰驿赴京安亲王仍遣护卫雅图偕来

七月庚子

上谕征南将军都统穆占曰尔前此欲将简亲王兵与尔相继前进止留将军额驸华善副都统希福鎮守陈请前来朕未之允盖以江西地方所关甚钜且无接续之兵此将军所悉知倘如所请遣简亲王继尔进兵今此贼衆又将何兵御之满兵之势贵聚聚则处处攻战始克有利若无用空城使满兵分驻以寡力而遇贼轻战有志气者尽歿行阵无赖之徒俱行败北如此则实为可惜满兵关系极为重大利战则战利守则守宜合全力以破贼衆若徒分守恢复之空城似乎不可今福建广东情形亦不甚妥尔等益当同心协力保固地方特此密谕

九月辛酉

上谕兵部简亲王喇布方剿抚逆寇之际穆占尽撤其属兵茶陵攸县安仁诸处所存兵每佐领不足七人大将军安亲王每佐领兵二人复遣还长沙致简亲王兵力单弱遇有调遣穆占又相去甚远诚难应时即至今简亲王赴安仁相机进剿其所部兵当听随宜调遣简亲王所发官兵穆占竝未商酌任意留之甚属不合其内府佐领兵三百人仍令发回至永兴地方本令穆占简亲王协同鎮守今若止令简亲王驻守倘简亲王相机前进或逆贼来犯恐兵力单弱关系匪轻其令穆占简亲王协议各酌遣官兵共守永兴今逆贼吴三桂已死急宜剿抚之会穆占简亲王其凛遵谕旨同心合力以图济事

康熙十八年己未六月丁亥巡察潮惠等处海口吏部主事塞楞额等疏言粤东马?鸥汀背诸处宜严加防闲请调拨官兵分驻各口

上谕曰巡视海疆严禁奸民贸易潜资寇粮乃平海机宜所关马?鸥汀背石井寨诸处俱沿海要地其令广东总督巡抚提督等速拨官兵防御海寇杜絶奸民私逼粮糗塞楞额等乃特遣严察海疆之员何地紧要宜添兵防守即移文该督抚提鎮调兵驻防如汛守官员不加严缉或私纵奸民通贼贸易接济粮米等物塞楞额等即指名参奏

九月辛丑

上谕护军统领吴丹曰近者广西南宁贼将吴世琮被诛湖南武冈州吴国柱亦已授首广西湖南俱经投诚贼意懈弛贼兵溃散天下之人咸知贼势必败罔不引领望诸将军早靖逆氛尔等陕西将士驻扎善地马无伤毙人无疾病不思速灭贼寇支吾推诿进取无期又有何人代为尔等破贼耶尔在朕左右稔知朕意应勇果任事参赞大将军机宜以立功勲顷大将军称言来京陛见面奏军国大事比至陈奏竝无成算有失衆望此固军前将士所悉知也若失此机会可乘之时万一贼据四川贵州云南以为巢穴致岁月相持彼时悔无及矣宜速行筹画

十月辛未



## 上遣内阁学士禧佛郎中吴赫齋敕往陕西

谕将军张勇王进宝提督赵良栋孙思克曰自逆贼吴三桂背恩反叛遣发大兵各路征剿平定疆圉扑灭贼寇湖南广西福建诸处以次恢复余贼逃溃盘踞水陆险隘冀图抗拒此等残寇虽无烦速剿不久自当殄灭但朕轸念民生急於拯救令其得所故欲扫除诸孽以靖土宇今贼既败遁负险无容专恃马兵若用绿旗步兵之力於灭贼殊为有济况我绿旗兵较之贼兵甚强尔等素受国家厚恩戮力行间树绩边疆甚多殫矢忠贞图报恩眷朕所悉知尔等各率所属绿旗兵平定汉中兴安恢复四川宜分几道进兵作何调度始能恢复其详议具奏如尔等尽力报効恢复汉中四川朕必不拘成例优加恩赏尔等官兵前进则满洲大兵亦即相继进剿接运粮饷不致匮乏兹事所系甚为重大速详加酌定以闻又令禧佛等传

谕张勇等曰自古汉人逆乱亦惟以汉兵剿平彼时岂有满兵助战哉今逆贼大败乘此逃散之际理宜速定四川天下绿旗兵无如陕西强壮而其数较各省倍衆在陕西大臣官员又皆具有才能将灭之寇何难剿除尔等不即平定四川岂缘尔等名位事权轻欵倘谓地属险隘自古以来险隘之地若不攻取岂有自定之理作何调度官兵几路进剿事宜一并确议以闻

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十七

# 卷四十八

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十八

训将士二

康熙十九年庚申三月甲寅

上谕督理川湖粮饷佛伦金鋹等曰大兵进剿云贵务在安辑人民抚绥苗蛮其敕将军以下诸臣严禁官军掳掠

十月甲辰

上命礼科给事中莫络等传

谕大将军图海曰尔前奏暂停诸路进兵其说虽是但恐停止进兵贼愈滋蔓前尔面请缓兵朕下诏督战始复岳州湖南逆贼悉溃暂停入川之师朕趣进兵遂平四川今贼以全力逼犯四川若从广西南宁湖广沅州进取贵州则寇蜀之贼自溃从此诸逆渐平地方悉定诸军可以凯旋矣至投诚官员岂可深信宜留置左右时加防范朕前屡次密谕今谭宏彭时亨等果复叛乱朕向谓此辈俱在尔军中不意竟置之别所此等反叛之贼受尔何恩乃轻信如是也嗣後宜密防之

康熙二十一年壬戌五月壬子广西巡抚郝浴条奏抚标官兵不应裁去九卿会议山东江宁河南山西直隶兵丁俱应留一千名其余各省俱留一千五百名

上曰巡抚旧制管兵至辅政诸臣时始行停止朕思裁去官兵关系紧要必措置得宜地方始得安宁每见武弁额兵有名无实虚冒钱粮又徇情将年老有疾者存留强壮者反行裁去则老弱徒然充伍虚糜兵饷强壮弃置不用岂能安静若将此情弊清除则兵丁自俱心服而地方亦保宁谧矣可将此本交与议政王大臣九卿詹事科道会议具奏

康熙二十二年癸亥四月丁丑

上谕西安将军希佛曰陕西地方甚为紧要因尔効力行间练习军务特?此任尔到西安须严束兵丁加意操演不得骚扰百姓督抚布按俱封疆重臣地方大吏乃有驻防防御等官公然

骑马入伊衙门平行抗礼者大失体统倘知县等官与尔等将军副都统平行尔等之意若何近见浙江福建将军副都统督抚彼此不睦题请坐见礼仪岂不负朕视文武一体之意乎又汉中地方必?选精兵发往戍守不得以强壮兵丁留置本标止以疲弱者发往尔其识之

八月戊午

上谕荆州将军噶尔汉等曰朕以荆州地方极其紧要故特戍兵鎮守尔等至彼务令兵民相安方称委任荆州自兵燹以来地方残坏民生困苦曩时尔等亲历其地必知其详自将领以至兵丁宜严行禁飭凡市肆要地毋得侵占至秋成之後尔等可亲率兵丁不时操练务期队伍整肃纪律严明毋得借端扰害百姓凡尔等举动皆为兵丁之表率其所行若正不独官兵有益即地方亦受其福矣近见西安官兵尚有满洲旧制杭州驻防满兵渐习汉俗此等情事皆责在尔等可勉力图之至於尔等乘往船只皆系云南广西回京官兵所坐之船其船夫劳苦已极尔等最宜体恤勿加凌辱闻船夫受兵丁凌辱不堪皆弃船逃遁深为可悯尔等所宜切戒

九月戊寅

上谕宁古塔将军殷图曰南方各省人人愿往至宁古塔则不愿者多朕以尔才能可用故?任为将军乌喇别无他事彼土之人惟好评讼尔至当敷布教化俾识义理令俱改过迁善尤宜爱养兵丁令各得所我兵逼近罗刹须时加操练以修武备巴海暴戾贪污不恤士卒遂致失所其新满洲皆求主来归理应抚绥慰劳施以教化俾安其生盛京副都统佟宝是一堪用之人在乌喇将及一载彼处地方情形必能洞悉尔到日暂留佟宝一二月奏明後方遣回

十二月辛亥

上谕浙江温州总兵官陈世凯江西南赣总兵官许盛曰自吴逆叛乱以来尔等提兵征剿戮力用命扫荡逆氛建立功绩朕甚嘉之但为将之道务在戢兵爱民使兵民相安则地方受福尔等亦可永保勲名朕每见功大者易生骄傲以致文武不和地方多事尔等当以此为戒

康熙二十三年甲子四月乙丑江宁将军瓦岱疏请率标下官兵一年两次行围

上谕大学士等曰各省驻防官兵若不令其每年行围习武渐致怠缓军士将流於玩愒瓦岱所奏着即准行但江宁地方驻防虽久未有行围之事恐民人不知以为骇异其令该督抚将习武行围之处明白传谕又军士行围恐有借端抢夺骚扰地方者着该将军严行禁戢

康熙二十四年乙丑八月丙申

上命理藩院尚书阿喇尼等传

諭八旗察哈尔官兵曰尔等自

太宗皇帝时皆编旗分佐领爱养有年今朕巡行边外讲习武备见尔等人材壮健颇谙礼制与京师八旗无异朕所以獎勵尔等不分内外一视同仁嗣後各宜善为畜牧力勤农事谨守成法勿为盗贼如此不特人皆得所即朕任使亦有裨益矣尔等其谨志之

康熙二十六年丁卯十月己巳

上諭兵部尚书鄂尔多等曰黑龙江至为要地兵丁劳苦朕罔不知曩者鄂罗斯占据打虎儿索伦等处扰害边疆几四十余年後备足军食永戍黑龙江以困逼之鄂罗斯遂窘迫归顺苟粮储不足则如沙尔瑚達塔海等之往征而不能成功矣朕所以委曲区画自盛京等处转输粮食及今所种米谷积贮至裕彼地大臣官员皆不思撙节滥给与无用之人苟且草率希图军储罄尽势必将彼等撤回在我之官兵撤回鄂罗斯大衆亦难以齐来然或一二人或十余人陆续聚集於黑龙江松花江之间构造木城盘踞其地则我取之维艰是鄂罗斯为主兵而我反为客兵也今我惟多贮粮食永戍官兵则我兵以逸待劳矣如此则鄂罗斯频琐来犯断乎不能欲大队侵入则彼粮食何能挽运耶若黑龙江不将官兵永戍自松花江黑龙江以外所居民人难以安居尔等皆系选择差遣须殫心竭虑务期为久远充裕之计详加筹议惟此一举也亦无事再遣矣

康熙二十七年戊辰六月辛亥

上諭都统瓦岱曰兹以湖广督标裁兵鼓噪特命尔瓦岱为振武将军驰驿前往江宁尔到江宁带领满兵京口汉军兵丁京口鎮标水师营兵江南江西督标火器兵丁战船酌量带领水陆竝进星速前往湖广与荆州将军侯巴浑德江宁将军博霖副都统倭贺商酌而行务须平定乱兵抚安黎庶毋得迟延致令滋蔓仍宜剿抚竝用严加侦探毋得疎虞大兵一到抗拒不顺者戮之有先被贼胁从即时迎降者俱免诛戮有能擒杀贼渠投诚者分别陞赏须严禁兵将申明纪律经过地方无得骚扰百姓归顺良民加意抚绥以副朕定乱救民之意其行间将领功绩及重罪俱察实纪明彙奏

康熙二十九年庚午九月丁酉

上諭大学士等曰朕向闻蒙古临阵初虽骁勇一败北即奔窜首尾不顾懦怯殊甚顷我兵讨厄鲁特厄鲁特大败奔高山顶遁於险恶处因我兵排列太密敌人乱放鸟枪故有被伤者且进退之际海螺未鸣此皆未熟於战阵耳从古行兵未有不预操练者向时八旗兵丁每岁春秋校猎比者恐马疲於行故暂停止今春秋二季令八旗官兵集於寬敞平原之地排列阵势鸣螺进退以熟操练

康熙三十三年甲戌十月甲寅兵部题昭武将军郎谈移咨彼甲人等不遵法纪应将官兵治罪

上谕大学士等曰此事着严处且颁给将军等敕书内首言勿得累民凡行兵若无纪律断不能成事前南方用兵时不扰民者皆克成功凡扰民之兵无一成功者易曰师出以律民岂可令其扰害乎凡领兵将佐皆宜知之

十二月甲辰

上谕八旗护军校护军等曰朕於满洲蒙古地方行围勤劳効力之人无有及我满洲者此次官员兵丁尽皆整肃朕心深为嘉悦是以徧加恩赉若率此兵以临战阵更复何忧然兵丁所最仗者莫如马匹尔等所养马匹甚不加意每致疲乏皆由不善拴系及不时饮水之故也尔等既养官马若致疲毙必须买补岂不为累又尔等衣帽虽系小节有关生计尔等好用貂缎贵物不知一貂帽一缎衣其价值狐皮帽羊皮袍数件尔等何用此贵物朕此次谒

陵原欲巡幸边外见尔等衣装单薄故不果行若出师岂可如此特降此谕尔等各宜谨志

康熙三十五年丙子正月癸亥

上谕督运于成龙等曰尔等挽输絶塞每夜如临贼兵严为防护喀尔喀等素善盗马尤宜加意巡视喀喇沁兵守马防贼颇称熟练可将伊辈分与各营昼使驱车夜使守马庶乎有备无虞至新满洲健於步行熟於牵挽故选择数人交与尔等酌量用之

二月癸巳

上谕安郡王马尔浑辅国公赖土副都统迺图等曰尔等往归化城务扬军威以示兵力强盛各处远行侦探最为要紧尔等三人须同心効力不可互相推诿王与公皆年幼未曾历练凡事宜与迺图商酌而行迺图亦不得推诿王等至朕行在与归化城相近此时正当用兵之际不必差人请安

五月甲戌

上谕八旗大臣等曰尔等皆朕简用之人今噶尔丹震慑兵威闻风而遁诸大臣虽不得与战惟约束官兵不扰沿途居民不饮酒不妄行抢夺善饲马畜就水草小心牧放不盗刈田禾以饲牲畜不践踏田禾不遗一人一骑全使到家此即尔等之効力也如肆行抢夺遗留人马事发断不轻恕

康熙三十六年丁丑闰三月己丑

上召四川陕西总督吴赫西安副都统阿兰台宁夏总兵官王化行原任总兵官王潮海冯德昌及副将道员等

諭曰朕往者未尝临边不获目覩边地之苦今巡行至此视沿边地方土瘠民贫但兵丁甚精銳黄河以西榆林一带比他处实胜然兵虽良如不善抚绥而困苦之则虽良无用也善抚绥者但将其应得钱粮如数支給即是养兵之道若不知抚恤虽多给国帑兵丁断不能沾实惠尔等武臣多出身行伍一旦居官顿忘在昔为兵之苦而扣尅粮饷於心何忍今虽未员当计日後渐臻大任可不存心爱惜兵丁乎朕又闻营中虚悬兵数冒食钱粮各处皆然陕西尤甚且或闻朕来现招丁壮以补足原额者亦有之总之督抚提鎮当尽心体惜下僚免其馈献则下僚不至贫苦下僚既不贫苦则断不剥兵以自肥矣尔大小官员各有俸禄养廉衣食竝无所缺倘扣尅虚冒即罹於罪关系利害非轻即今总兵官柯彩练兵甚精前亦曾经効力後以操守不好致人疾怨朕撤彼回京大都武臣之中勇敢果毅出力効用者多而操守洁清者少有慎於履任之初而渝於後者赵良栋操守颇好恢复云南秋毫无犯在武臣中可谓良将矣尔等居官俱当法之但不可效其骄矜耳又闻总兵官师帝宾操守甚清虽身後而军士尚爱戴之凡有功而居官好者朕皆擢用矣其一时声名甚佳日久改节者皆年齿渐增贪货贿计身家而坐此失也尔等其遵此训旨通行晓諭

康熙四十一年壬午正月乙酉

上諭都统嵩祝副都统达尔占侍郎傅继祖等曰獠人所居之山通连广东广西湖广三省林木丛密山势崇峻恃此险僻顽梗不驯自宋明以来即在此三省扰害民生今差尔等到彼务体朕好生至意不必遽行征剿先晓示招抚如其不悛再行剿灭尔等驰驿前去须约束官兵毋得骚扰居民并将獠人山寨形势三省官兵进征之路及立营之处绘图呈览朕揣獠人受抚之事五月内必成只将杀害官兵之为首獠人即行正法可也

三月庚戌

上諭大学士等曰广东獠人盘踞深山恃其险峻素未归化今忽突出抢夺村民杀害官兵已遣都统嵩祝等前往调集广东广西湖广三省师旅直抵其穴嵩祝等遣郎中尤冷格所进图形云獠人为数无多栖身之地虽不寬广但山险路狭地接广东广西湖广三省钱粮转输甚易今三省之师已压彼境若獠人就抚则已否则令嵩祝等公议於獠人居处要隘立营围之不过稍费钱粮不劳兵力彼自穷迫矣着兵部速移文嵩祝等遵諭行

康熙四十二年癸未十月戊寅

上諭礼部尚书席尔达副都统图思海徐九如等曰尔等前往湖广招抚苗人凡事宜同心协力则事无不成不和则事无一成且行兵立营须用怯遇敌对垒须用勇又以机先为要倘临事时疑虑不定必致有悞尔等当以果毅行之如苗人归降止诛倡乱肆虐之人否则歼其抗拒不服者毋得玉石不分戮及无辜我满兵凡遇对敌恃勇以力胜者多尔等此行须用计招抚委婉从事勿徒恃勇力至於立营必择高阜处设立朕前在宁夏用兵审度时势多方调度是以钱粮不致耗费兵民亦无苦累此皆在主将之善於设施耳苗人归附之後探其巢穴仍谨慎堤防不可以彼归顺遂忽视之

康熙四十四年乙酉四月癸巳

上南巡

谕京口将军侯马三奇曰天下之兵朕皆知悉至此处之兵素称无敌亦朕所闻练兵之法一进一退有缓有急自始至终整肃有叙方为尽善尔等?练素精朕亦不必阅视可传谕衆兵丁知之

康熙四十七年戊子二月丁酉

上命内阁学士二格往湖广察审红苗

谕之曰湖广红苗前已设官管辖今何以彼此争鬪以致杀戮此皆地方官怠忽所致况苗人所居之地才百里一省之官何难鎮压尔往会同总督郭世隆巡抚赵申乔明白详审如兵民多事则惩究兵民果系苗人抗法则处治苗人不可姑息其以此旨传谕该督抚等

康熙四十八年己丑十一月甲申

上谕大学士等曰朕听政年久凡事无不留心昔朕西巡时曾以战地问於曾经行阵之提督总兵官等皆言自古战阵之事必於旧战地交战从无战於不可战之地者朕观韩信岭上下凡七十里未尝有一战於此者以无水不可立营故也前我师征漠北与噶尔丹战於昭莫多之地明永乐出塞时亦尝战於昭莫多以此观之皆於旧战地战也行兵之道立营必视水草西北土厚掘至百丈有余始能得泉一井之汲纔须一骑负之其地如此焉可屯兵是以用兵必以地利为要古人善用所长後人万不及一也凡为将者乌可不知此意乎

康熙四十九年庚寅四月癸卯

上谕兵部各省綠旗兵惟直隶及西方沿边一带兵略有可观此外别省之兵俱属不堪江浙之兵尤不耐劳苦该管官训练稍严即出怨言甘汰所食之粮而不愿操练此等人平时尚然至行阵之间安可用耶各省皆有食空粮者然不至已甚若浙省兵千名食空粮者则有五百名所存五百名亦仅充数而已俱非可用者近处州协标都司张朝臣往追山贼其身当先而进衆兵弃之先退此皆平时训练不善之故也若满兵则不然战阵间皆愿効死无离本伍退回一步之理江浙驻防满洲兵朕带往行猎之处以苦差试之略无怨意交相黽勉是以朕心大慰以此观之兵在训练之善不善耳不关乎风土也着将此旨传谕江浙督抚提镇等官八月庚辰福建浙江总督梁鼐疏请停止江浙二省官兵会哨海洋

上谕大学士等曰海中行舟必俟风便福建遇南风始可北来江浙遇北风始可南去风之顺逆不同难以会同巡邏着照所请停止会哨并行文江南浙江福建广东山东五省各查明海边分出巡哨

康熙五十年辛卯三月壬辰

上谕兵部朕於水陆兵丁调用年久深悉其情事船出海洋必俟风候若不察风而强行之必致兵船损坏官兵系朕历年养育之人遇贼自应効死如无贼而徒以巡哨受伤实属可惜凡提镇等官当於此留意务加谨慎

康熙五十二年癸巳正月辛丑

上谕大学士等曰朕思海防之道惟在陆路兵弁守御严紧乃为扼要如盛京山东沿海汛地官兵能加意防缉

以致贼势穷蹙遂革心向化以次投诚此即严防之明验也盖海贼原无窝巢初时不过数人或系穷民或为水手其力不能自备船只亦无器械因饥寒所迫抢夺营伍及商贾之船只器械渐次啸聚久而势众又苦无米粮乃往来海洋肆行劫掠每趁夏月南风至山东盛京等处至十一月西北风发方能南回其停留数月之中或被官兵缉获或因风雪冻馁渐次伤损所余无几如现在浙江巡抚王度昭招抚海贼陈尚义等询其原夥贼船十一只贼众不下千余人今止余船四只贼众不满百人矣观去年十月十七日陈尚义等在山东与官兵抵敌一事游击闫福玉率官兵船六只在刘公岛地方巡哨遇贼船四只乘西北风而来见官兵船即先发礮官兵放船追剿游击闫福玉奋勇向前因所乘之船出诸船之先里许贼见其势孤遂三面围住鏖战良久其余官兵船只为风飘散不能前救以致游击闫福玉被伤殒命而贼众亦伤多人迨官兵後船追至贼船已於十八日至尽山花岛矣原其所以伤官兵者皆因官兵与贼船相遇安排火器之际致贼人乘间围拥若如满洲兵操弓挟矢以待贼船何由能逼近也且海贼出没狡猾素习海性非徒恃水战所能扑灭也朕御极五十余载凡水陆用兵机宜无不洞悉今沿海地方督抚提镇能用心防御不时稽察使贼无所掠夺则不期灭而自灭矣前年关东海汛章京二员带领官兵八九十人击杀海贼四百余人朕面问二章京尔等何不诱贼远离海岸再行剿获可无遗类据奏离海岸五里有庄村居民若贼众过此倘地方万一有失即不免疎防之罪矣故未敢远诱是知沿海防汛果能严肃贼一登陆便成擒矣此防海之策惟陆路守御为最要也其令沿海督抚提镇等官明知朕意

康熙五十四年乙未八月辛卯

上谕都统穆赛曰朕以尔为人可用特令前往统领大兵其右卫黑龙江喀喇沁察哈尔土默特鄂尔多斯喀尔喀等处兵丁务令共相和好至管摄兵丁不可失之柔弱其効力赎罪诸人可分在各满洲蒙古绿旗兵内勿任其聚於一处祁里德谕练蒙古事务且诚实有胆气娄徵额虽老病曾随朕行兵熟识地利诸事应与伊等酌议奏闻朕所派往之新满洲等行走熟练可令同我兵往汛界哨探再彼处有黄羊沙米等物应令兵丁采取食用如省一月口粮即得一月之益

康熙五十五年丙申二月壬戌朔



上諭议政大臣等曰运送粮饷安设台站牧养马匹等项俱系领兵将军职任今米粮不能运至皆由水草不足之故朕昔亲统大兵中路出征时沿途必留有水草之处以牧运米牲口尔等所亲知者身为领兵将军此等事不能深晓领兵直前致沿途水草如火烧赤地後队兵马及运米人役牲畜有不至困乏者乎朕曾屡諭衆大臣云领兵将军甚难凡事不可不周知今岁停止进兵候种地及一应事务预备完毕审察两下军情再行定夺者为此故也且去年驻防哈密二百名兵丁战败策妄阿喇布坦时衆大臣俱欲进兵如果彼时即行进兵路途遥远米粮焉能接济现在驻扎食用米粮尚不能接续若彼时即行进剿不知作何景况矣如喀尔喀一路都统穆赛等所统之兵俱系满洲蒙古熟练之人竝无粮饷不足等事将军席柱等所统之兵尚未熟练所以如此倘运粮不至所关甚大行令将军席柱提督师懿德等酌留足用汛守调遣之兵其庸懦不堪者着会议撤回

庚午

上諭将军席柱提督师懿德总兵官路振声额駙阿宝等曰尔等出兵日久策妄阿喇布坦处竝无信息今值春令遣侍卫满泰閱视营伍汛界西安满洲兵陕西綠旗兵因系同省所以甚和尔等亦宜和睦为是

康熙五十八年己亥八月己未

上諭近御侍卫等曰朕於骑射哨鹿行猎等事皆自幼学习稍有未合式处默尔根侍卫即直奏无隐朕於诸事谙练者皆默尔根之功迄今犹念其诚实忠直未尝忘也朕自幼至今凡用鸟枪弓矢获虎一百三十五熊二十豹二十五猓猓十麋鹿十四狼九十六野猪一百三十二哨获之鹿凡数百其余围場内随便射获诸兽不胜记矣朕曾於一日射兔三百一十八若庸常之人毕世亦不能及此一日之数也朕所以屡諭尔等者以尔等年少宜加勤学凡事未有学而不能者朕亦不过由学而能岂生而能者乎

大清圣祖合天弘运文武睿哲恭俭寬裕孝敬诚信中和功德大成仁皇帝圣训卷四十八

# 卷四十九

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷四十九

训将士三【附】恤兵

康熙五年丙午七月甲辰

上谕户部防守地方扑灭盗贼皆需乎兵兵惟钱粮是赖支給解送钱粮何可迟误今见各省因协饷不至以数月未给兵饷具奏者甚多或系尔部不拨实在钱粮将杂项抵拨以致请报往返徒费时日或系地方官借称协解未齐以致迟延俱未可知嗣後拨饷时务拨实在欸项严定限期解送或因别故将别项钱粮协解该督抚速行题报其违限及借端推诿者作何处分尔部详确议奏

康熙十九年庚申三月壬寅

上谕议政王大臣等曰前遣往广西大兵劳苦日久宜令更番休息可拨京师每佐领护军二人骁骑三人汉军一千人令都统麻齐赵琿副都统洪世禄祖植椿等率往更替

闰八月乙未

上谕兵部今四方悉就荡平惟滇黔余孽尚尔稽诛前经会议各路官兵俱於八月内进剿兹师期已届士马饱腾正宜分路竝进奋勇长驱扫除残寇以靖边圉尔部其速传谕湖南四川广西诸大将军将军督抚提镇等整顿兵马速行进剿勿得借端推诿延缓时日有逗留不前者即加重处又闻各路统领绿旗将帅不恤军士令为满洲大兵盖房秣马及私行役使恣意虐害以致兵卒苦累如桑额标兵逃亡千余皆由於此不思为将者与士卒甘苦相同加意爱养方可责其用命罔惜卒伍惟便私图贻误军机深为可恶尔部即通行严饬嗣後有仍蹈前辙者指名参奏从重治罪

康熙二十一年壬戌五月乙丑

上谕宁古塔将军巴海副都统萨布素瓦礼祐等曰朕幸吉林地方访问民隐见兵丁役重差繁劳苦至极若不将各种无益差徭显与革除兵丁人等终无裨益且不得沾实惠矣即如鹰鹯窝雏於三月寻觅四月内捕取最妨农事况所得鹰鹯不谙呼饲难至京师徒劳人力应行停止又自八月放鹰原欲令其调习以便齎送数年来竝无名鹰贡至京师而乌喇地方兵丁辄於冬寒之时寻觅山鷄人马劳顿应行停止又围猎以讲武事必不可废亦不可无时冬月

行大围腊底行年围春夏则视马之肥瘠酌量行围令贫人采取禽兽皮肉须预先传示日期以便遵行所获禽兽均行分给其围猎不整肃者照例惩治不可时加责罚苛求琐屑遇有猛兽须小心防御以人为重勿致悞有所伤又如打鱖鲤等鱼既有专管西特库等乌喇兵丁应停差役其搬移新满洲采取造房并船只桅木等项及侦探巡逻等差俱系军务乃驻防官兵专责不可宽假应照常行此外偶尔差遣大臣侍卫督看采取东珠砍伐木植寻觅鹰鹫不涉每岁定例所行之事似无过劳此後将军以下拨什库以上应念兵丁远居边境冲冒严寒往采山木妻子汲水操作备极艰辛时加怜悯吉林乌喇田地米粮甚为紧要农事有悞关系匪细宜劝勉之使勤耕种朕轸念满洲人民生理欲遣人专往以驿递疲敝故因笔帖式来奏特谕知之

七月甲戌

上谕兵部近因逆贼荡平四方底定将经制之外增设绿旗兵丁议令裁汰於二年内陆续报完原以宽恤民力救宁地方今思各处兵丁多有随征进剿効力行间绵历岁时备尝艰苦事平回汛若漫无分别一槩裁汰深为可悯可令该督抚提镇等官於裁汰之时详加察阅不得混留私人反将曾经効力兵丁辄行裁退至於已裁兵丁及投诚归农人等恐有无籍可归艰於生计者令各省所司官设法安插善加抚辑务俾有以资生毋致流离失所扰累平民尔部即通行申飭文武大小各官实心奉行殫力料理以副朕恤兵爱民至意

康熙二十九年庚午九月戊子朔

上谕大学士等曰盛京兵丁全赖田亩耕获及月给粮饷以为资生之计昨岁盛京禾稼不登贫困兵丁难以粒食曾以也粮颁发赈救顷值军兴遣一等侍卫齐兰布往调盛京兵丁随发谕旨令无马匹者给与官厰马匹无行粮者给以庄屯粮米官兵踊跃遄征仓卒之际置办一切军装遂领明年二月分应给俸饷又预支五个月钱粮尅期进发比厄鲁特噶尔丹败遁盛京官兵虽未接战而奋勇敌忾深可嘉悦今若将预支俸饷复行扣抵则穷乏兵丁必至生计艰窘朕心殊切悯惻所预给明年二月分应支俸饷及增给五个月钱粮免其扣抵仍令照常支給以示朕爱养将士轸恤疾苦至意

康熙三十四年乙亥正月乙酉

上谕兵部朕巡视京畿见绿旗兵沿途奔走无顷刻之暇甚属劳苦深为可悯问之则云兵部内私用印信文移护送家口等事甚多除已往之事不复察究自後尔部移文各处总兵官将派出兵丁护送大臣官员事件数目年终详明造册送尔部察奏

五月丙寅

上谕大学士等曰尔等传谕八旗满洲蒙古都统各将前锋护军披甲兵丁之实无房舍者身自确查於此月初十日保奏凡官员子弟及有房舍与家仆披甲者不必查

辛未

上谕大学士等曰览八旗都统所查无房舍者七千有余人未为甚多京师内城之地大臣庶官富家每造房舍辄兼数十贫人之产是以地渐狭隘若复歛取房舍以给无者譬如剜肉补疮其何益之有贫乏兵丁僦屋以居节省所食粮以偿房租度日必至艰难今可於城外按各旗方位每旗各造屋二千间无屋兵丁每名给以二间於生计良有裨益此屋令无得擅鬻兵丁亡退者则收入官大略计之约费三十余万金譬之国家建一大宫室耳敕下钦天监相视汝等及八旗都统身往验看宜建造之处奏闻

九月丁丑盛京将军公绰克托等疏言开原等处马甲月给米二仓斛步甲月给米一仓斛今仓米不敷俟明年海运之米补给

上谕大学士等曰此奏甚属踈忽马甲之中亦有人口少者步甲之中亦有人口多者一例按甲支給可乎来年海道运米未可预必其全到即盛京田谷亦难预必其全收凡事须曲尽筹画岂可拘执定议此本发回令察明人口给米

庚辰

上谕大学士等曰开原等处给散兵丁米谷若令行查必稽时日兵丁或至重困着朱都纳嵩祝前往将不能度日人口数目查明一面散给一面具题

康熙四十一年壬午闰六月癸未户部议覆山西巡抚噶礼疏言右卫驻防官兵浮给康熙三十六年分草束折色银两请交各该旗追还

上曰此浮给官兵草束折色银两复行追赔殊为可悯若向悞给官吏追补必致派累小民其槩免之

康熙四十二年癸未四月乙亥

上谕八旗都统前锋统领护军统领副都统参领佐领等曰朕为官兵生计不时廛念前已屡施大泽今年诏欵内复特沛鸿恩不惜数百万帑金遍行赏赐嗣後兵丁人等应人人务立生计清偿夙逋丰裕度日倘有不肖之辈不思撙节俭约惟知纵酒酣饮鲜衣肥马过於费用则不数日间仍如未沛恩泽时也尔等俱有督率之责不当徒以督率为名亦当诱之向善使人人以孝弟为本各知自守爱惜产业则不特风俗可至淳朴而朕爱人之心亦不致徒劳矣可将此旨刊刻遍示军卒人等受朕重恩如此倘仍行赌博行止不端朕断不轻贷必将为首者立正典刑朕念切兵民生计是以亲书谕旨

十一月辛酉

上巡行陕西驻蹕西安府

谕将军博霖曰朕巡历江南浙江盛京乌喇等处未有能及尔西安兵丁者尔处官兵俱嫻礼节重和睦尚廉耻且人材壮健骑射精练深可嘉尚慎勿令其变易

康熙四十五年丙戌十一月癸酉

上谕户部朕念八旗禁旅为国家根本所系每加恩爱养用俾生计充盈或动支公帑数百万代清积逋或於各旗设立官库资济匱絀所以为衆甲兵筹画者甚切康熙四十二年又曾颁发帑金贷给八旗兵丁共六百五十五万两有奇至康熙四十五年冬除陆续扣完外尚未完银三百九十五万六千六百两有奇若仍行按月扣取恐各兵丁营办器用贍养家室必有不敷之虑朕深切軫恻兹特大沛恩施式弘抚育将未经扣取银两通行豁免尔部即传八旗都统等出示遍谕俾咸知朕优恤禁旅至意

康熙四十六年丁亥三月壬戌

上南巡

谕江宁将军朱满曰朕前至江宁赐此地兵丁一月钱粮京城马匹甚多入秋令解来给江宁兵丁此时兵丁有马倒毙者且勿买补

十月壬辰

上谕内务府据河屯营守备杨宏德奏称驻防河屯兵丁二百名已给钱粮请将原给地亩交回朕思兵丁内陞转病故者伊等妻子既无地亩又无钱粮何以养贍着将地亩仍令伊等耕种

康熙四十九年庚寅正月乙未

上谕八旗都统等曰八旗兵丁一人所得四十斛之米人口多者适足养贍人口少者食之不尽必至售卖与其自仓运出费脚价而复行转卖不若计口支放余者照时价给银於兵丁有益尔等即传谕户部

四月辛酉右卫将军宗室费扬固疏请右卫空闲官房交该抚照时值变价

上谕大学士等曰满洲户口滋息甚繁兵丁内无屋可居者有之右卫现有所造空房若增驻兵丁极是善策尔等可会同领侍卫内大臣八旗都统副都统满九卿议奏

康熙五十五年丙申十月癸巳

上谕兵部国家绥靖边圉剪除贼寇必须士马饱腾方克立奏肤功恤兵之道宜急讲也朕御极五十余年无时不以爱养士卒为念内而八旗禁旅外而各省绿旗兵丁视为一体或代还私债或遣官犒赏或严禁剋减所以体恤之者惟恐不至近策妄阿喇布坦狂逞跳梁侵我哈密故特徵兵预备既已转输糗粮又复颁给马驼筹画倍周加惠尤渥而山陕绿旗兵丁首奉调遣远途跋涉资用惟艰因而预借公帑朕念从军兵丁披坚执锐戮力戎行又责以还帑深可悯恻绿旗兵丁所借帑金四万八千八百余两咸与蠲除竝严饬统辖将领实心奉行倘有仍行私扣者该督抚据实指参从重治罪以仰副朕轸恤边兵至意

康熙五十六年丁酉九月丁巳靖逆将军尚书富宁安奏称官兵整理军器等物支借俸禄银粮共计银二十五万六千两有余俟事定之日扣除

上曰此次官兵虽未临阵克取地方然同心効力甚属可嘉将朕内库银两发出二十六万令其整理马匹器械如恐路远不能即達将附近地方所有钱粮着户部速行料理成功时此项银两不必扣除若无効力之处空回各本汛者仍行扣除现将内库银两照数交与户部此项钱粮系朕特恩其另造档案务令清楚

癸酉四川陕西总督鄂海疏言西宁镇标官兵因前往噶斯驻防借领六个月俸饷若照数扣除各兵无以自给请将已换班回西宁官兵每季扣除一月仍留两月粮饷给兵养贍再现令驻防噶斯官兵亦每季将两月粮饷解送军前给散本兵留一月粮饷贍养伊等家口俟换班回西宁之日陆续扣还

上曰噶斯换班回来竝现往驻防官兵所借粮饷着暂停扣除俟功成事竣作为朕所赏赐如不成功照该督所题扣除其行月粮饷送至军前并存留贍养家口之处着照该督所题给放

康熙五十七年戊戌正月戊寅

上谕议政大臣等曰两路军兵驻扎边塞二三年矣劳苦殊甚衣服亦将损敝朕深加轸念特令制衣二万袭现今所有一万袭派侍卫一员由内地驿站送至将军富寧安军前赏给军兵再一万袭俟制完日送至将军傅尔丹军前着尔等大臣查验装载牢固发往如尚有不敷计算军兵数日照此衣服将库贮布匹赏给令其自行制造

八月癸未

上命内阁学士渣克旦副都统萨尔禅等前往索伦赈恤谕之曰索伦人等効力围场甚属年久亦有现在出兵之人今被水灾朕甚惻然令尔等前往散赈尔等会同将军副都统将被灾之人逐一查明无房屋者即给房屋无衣服者即给衣服务令均沾实惠以副朕轸恤至意

十二月己酉

上諭大學士等曰福建廣東地方潮濕馬匹難存所倒馬匹若屢令償賠必致苦累兵丁業已給過草料銀兩者免其追賠着照綠旗兵丁例半為馬兵半為步兵馬兵人各養馬二匹爾等會同議政大臣九卿議奏

康熙五十九年庚子十月庚戌

上諭兵部朕惟國家綏乂地方愛養兵民實系緊要朕自臨御以來夙興夜寐無時不以兵民生計為念比年策妄阿喇布坦蠱動跋扈侵我哈密殲及拉藏占取藏地騷擾土伯特唐古特人民再吐魯番之人近四川雲南一帶邊境居住准噶爾人等若將吐魯番侵取又將土伯特唐古特人民鼓惑侵犯青海不但難於應援亦且難於取藏是以調四川雲南滿漢官兵由拉里進藏官兵俱感朕養之恩遵朕指授各加奮勵直抵險遠絕域克取藏地殊堪軫念應大沛恩澤四川雲南滿漢官兵從前所領俸餉俱着免其扣取仍遣堂官將取藏之四川雲南官兵每人賞銀十兩即給本人妻子以示朕軫恤官兵勞苦之至意爾部即遵諭行

大清聖祖合天弘運文武睿哲恭儉寬裕孝敬誠信中和功德大成仁皇帝聖訓卷四十九

# 卷五十

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十

褒忠节

康熙十四年乙卯三月丁丑

上谕兵部宁夏总兵官陈福効力岩疆劳绩素着屡次举首逆剏克笃忠贞且其妻子家属现在川中逆贼挟此招诱全无顾恋矢志不移深为可嘉着以现兼职衔陞补陕西提督仍暂驻宁夏管总兵官事俟平凉底定之後即赴该管地方料理提督事务陈福之弟守备陈奇妻子家口亦陷贼中深为可悯着从优以参将陞用尔部即遵谕行

闰五月壬子

上谕吏部两广总督金光祖奏称怀集县知县李云龙着有功绩积劳殒命如俟事平议叙则孀母孤儿久待可悯李云龙系旗人其旅榱及家口应沿途护送归旗着督臣给以水陆夫船再给藩库银一百两以资孤寡九月庚戌吏部奏陕西定边营守备刘士英当朱龙反叛同妻子殉难照旗下阵亡官员例优给拖沙喇哈番恤银四百两

上曰刘士英不肯从逆同妻子殉节深为可悯与一身阵亡者不同可更从优给拜他喇布勒哈番恤银五百两

十一月庚寅

上谕吏部礼部凡有世职官员以下及有顶带官员以上阵亡无承袭子嗣销去所给官职者照伊阵亡所得之官并其原官品级给与祭葬着为令

康熙十六年丁巳三月癸卯

上谕吏部户部兵部自逆贼吴三桂煽乱以来凡用兵地方文武官员或矢志固守势穷莫支尽节封疆或身陷贼中坚贞不屈横被惨害或从容就义全家殉难视死如归此皆为国捐躯克全忠节深为可悯其有骸骨未能归葬妻子尚寄远方孤苦无依更堪軫恻宜加恩恤以慰忠魂着各该督抚察明凡殉难文武大小官员骸骨妻子俱准动正项钱粮资送归里以昭朕优恤忠节至意



五月壬辰

上谕福建水师提督海澄公黄芳世曰尔父子功烈素著复全家殉难每念及此朕心深为伤悼况尔由粤东进剿忽遭广省兵变孤身涉险而出可见忠贞不贰颠沛不改其守今仍袭海澄公镇守福建水师提督总兵官宜愈加训练鼓舞将士以靖海氛使地方秋毫无犯百姓安堵方为不负封疆重寄

康熙十八年己未六月丙寅殉难广西巡抚马雄镇之子马世济疏请赴粤西取父骸骨

上曰马雄镇当地方叛乱之时不肯从逆克笃忠贞捐躯殉难深为可悯其骸骨并家口令马世济驰驿前往搬取仍着麻尔吉等预为察明料理交与马世济到日从优议恤

十月戊子辰州永兴阵亡参赞军务都统宜理布参赞军务护军统领哈克山及诸将士丧至

上命内大臣公噶布喇等四十七员各以茶酒往奠之复遣侍卫费耀色等齎银六百两赐宜理布之母传

谕曰宜理布时侍朕前深悉其人今出师着有劳绩方谓成功之後即可凯旋相见忽闻阵歿朕还顾议政王大臣不觉凄怆痛悼兹闻尔家费用不给特赐白金六百两治丧又

命内大臣舅舅佟国维等齎银五百两赐哈克山之弟巴

克山传

谕曰哈克山临阵捐躯戮力尽瘁殊为可嘉特赐白金五百两又传

谕正白旗大臣侍卫等曰退朝後於宜理布未出丧以前即赴丧次举殡时除值日大臣侍卫外余俱往送其哈克山噶尔图色黑郭色门度那穆浑举殡时分遣内大臣或散秩大臣一员侍卫等往送

康熙十九年庚申四月壬戌

上谕吏部兵部自吴逆叛乱以来凡用兵地方文武官员有矢志忠贞克笃臣谊抗贼不屈捐躯殉难者幽忠难泯大节可风彼时即宜锡以恤典但以各处尚未荡平其中有情节未确者有应行察访者不得已缓至今日朕每念及深为恻然兹各路会剿大势底定余氛指日歼灭其殉难各官应加褒恤以慰忠魂尔等即详察议奏

康熙二十年辛酉二月丙申户部题故平南王尚可喜子尚之隆请给其父在日所赐海州房地

上曰平南王忠诚劳勩坚守臣节其房地遣司官一员速往拨给

五月甲子随内大臣班尚之孝奏请迎其父尚可喜丧

上曰尚可喜当通城背叛时矢志不移临歿犹被服太宗皇帝所赐朝衣言虽死必葬於海州倘有知觉必効力於

先帝其忠诚之心始终无二今尚之孝前往可令其将还京之日预行啓奏遣官往德州前後迎其骸骨寻尚可

喜丧至遣侍卫锁住等往奠之

庚午兵部题殉难云南巡抚朱国治丧槨家属请令大将军贝子章泰等察明送京

上曰吴三桂反叛以来地方官有从逆者亦间有逃归者如朱国治仗节不屈骂贼身死殊可嘉尚如议速行

康熙二十七年戊辰八月丁未

上谕诸王大臣等曰凡地方官城存与存城亡与亡者乃人臣之分近有武昌兵乱叶映榴守义不屈骂贼自刎朕閱其遗奏五内伤悼王大臣等其共听之因令展读

奏疏闻者莫不感泣随

谕吏部礼部叶映榴值裁兵鼓噪抗志不屈捐生殉难忠节可嘉今览遗疏情词惨烈朕心深为惻然不忍披閱应从优赐恤以表忠贞

康熙二十八年己巳二月戊午

上驻蹕苏州府

谕扈从部院诸臣曰楚省兵譁时湖广粮道叶映榴尽节捐躯朕心深加悯悼特诏所司优赠亚卿兼予恤廕今巡行江南见其子叶莠迎伏道左弥增軫恻应特予諡以彰异数随

御书忠节二字赐之

康熙三十八年己卯三月丙申

上驻蹕杭州府

賜湖州府知府陳一夔父故溫處道陳丹赤

御書名垂青史匾額

諭曰爾父為國殉難朕至今憫之賜此特表爾父之忠康熙四十九年庚寅十二月戊辰海澄公黃應纘疏稱伊父黃芳泰蒙

恩以總兵官承襲公爵今歿已二十余年尚未營葬懇賜

恤典

上諭大學士等曰平定三逆之事朕知之甚明黃應纘之祖黃梧

世祖章皇帝時曾遣人令伊投降因海寇鄭芝龍齎書阻之故黃梧未降後鄭芝龍之子鄭成功寇鎮江瓜洲貝子羅托總兵官梁化鳳內外夾攻大破之余賊敗北投黃梧黃梧遂獻海澄縣歸順因封為海澄公黃梧故後公爵與伊子黃芳度承襲黃梧之弟有二子長子黃芳世次子黃芳泰黃芳世自一等侍衛授廣東總兵官耿精忠叛時黃芳度堅守漳州府舉家被害黃芳泰逃至廣東請兵值尚之信叛黃芳泰同伊兄黃芳世巡撫楊熙力戰而出黃芳泰等實心効力所立功績部中亦有檔案著該部查明賜恤

康熙五十二年癸巳五月癸卯禮部題黃岩守備管游击事閻福玉與海賊戰亡業已蒙

恩賜恤贈參將廕子弟一人以守備用其祭葬相應停止上曰閻福玉系登州人朕曾召見人材壯健戰時為賊所傷血流滿面謂眾曰此即報主之處也奮勇前進手刃十余人力戰而亡此系與伊交戰賊人所说宜優加恩賜以示鼓勵著給與祭葬

康熙六十年辛丑十一月壬辰

上諭大學士等曰原任總督額倫特侍衛色楞額副都統查札渾皆陣亡伊等世職俱著承襲又陣亡提督康泰總兵官康海司九經俱著議叙伊等有世職亦著承襲西安佐領札木素在軍中頗出力索倫之藍翎查倫察頗勇猛射死數賊身受重傷自盡俱著交部議叙

大清聖祖合天弘運文武睿哲恭儉寬裕孝敬誠信中和功德大成仁皇帝聖訓卷五十

# 卷五十一

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十一

恤旧劳

康熙元年壬寅正月庚寅

上谕吏部原任大学士希福范文程甯完我额色黑皆自太宗文皇帝时历任内院赞理机务効力最久勤劳素着其子宜加擢用以示鼓励范文程子范承谟额色黑子塞思赫已补内院学士希福甯完我各一子亦着以学士用

康熙二年癸卯五月甲戌

上谕礼部满汉官员恤典已有定例其一品官员与諡者宜加优异以示酬庸以後一品官员曾经与諡者除造坟外仍着予立碑

八月庚子

上谕兵部绿旗官员任满三年病故有加赠等第满洲官员病故者无加赠等第今满汉俱应一体尔部议奏康熙八年己酉五月己亥内秘书院学士禪布奏伊祖达海巴克式蒙赐諡文成请立石碑以光永久

上曰达海巴克式通满汉文字於满书加添圈点俾得分明又照汉字增造字樣於今赖之念其効力年久着有劳绩着追立石碑

六月壬申

上谕吏部兵部苏克萨哈奉

皇考遗诏辅政虽系有罪罪止本身不至诛灭子孙後嗣此皆鳌拜等与苏克萨哈不和挟讐灭其子孙後嗣深为可悯其白尔黑图等竝无罪犯因系族人连坐诛戮殊属冤枉其苏克萨哈原官及白尔黑图等官职俱应给还尔二部将此案所革官员俱行查明议奏

七月壬寅

上谕吏部朕閱处分原任户部尚书苏纳海等原案竝无大罪鰲拜等但以为拨地迟延遽行拏问多端文致诬陷不按律文任意将无辜处死原任总督朱昌祚巡抚王登聯於拨换地亩时见民间旗下困苦因有地方之责具疏奏闻辄以为非其职掌越行干预亦不按律文冤枉处死伊等皆国家大臣竝无大罪冤死殊为可悯理应昭雪以示仁恩作何恩恤予諡及廕子入监读书尔部详议以闻

康熙九年庚戌二月丁丑先是内国史院大学士卫周祚引疾乞归

上念其勤劳有年给禄如故俟病痊起用至是卫周祚以

在籍支俸三年受恩过当具疏辞俸

上曰卿在任着有劳绩回籍调理特给禄以资颐养可仍遵前命祇受勿辞

乙酉

上谕吏部兵部向来包衣佐领下官员子弟不准为廕监生其笔帖式亦无品级今思内外官员効力相同加恩岂宜有异嗣後包衣佐领下官员子弟应否为廕监生及笔帖式应否授品级尔部定义以闻

康熙十一年壬子六月辛丑先是兵部尚书王弘祚引年乞休

上念其旧劳命乘传归籍仍令滇省藩司给俸至是王弘

祚疏辞

上曰卿在官着有功绩引年乞休特给俸禄以资颐养其仍遵旨祇受不必控辞

康熙十二年癸丑二月辛酉

上谕致仕耆旧大臣等曰国有耆旧大臣规模甚觉可观其大臣等有疾若必俟奏明请医恐致迟滞嗣後有疾者於药房诸医中惟其所择延往调治不必奏闻朕亦即传谕诸医知之

康熙十三年甲寅六月甲午朔

上谕兵部耿精忠之祖耿仲明於

太宗文皇帝时航海归诚优锡王爵効力行间劳绩茂着及其身故睿亲王不令承袭

世祖章皇帝追念旧勲特允其子耿继茂仍袭王爵令两镇岩疆为国藩屏爰及朕躬惓怀勲裔恩宠有加後览其病终遗疏有地方兵民凋敝贼寇未灭死不瞑目等语忠义肫笃深切軫念且因耿继茂之子耿精忠自幼曾为近侍予袭王爵仍镇闽省朕以耿精忠必能绍祖父遗训殫竭忠猷无忝先烈乃不意近为逆贼吴三桂诱惑煽乱地方弃累世之忠贞构一旦之狂悖既干国法复坠家声朕犹念其祖父前功耿精忠系一时无知堕人狡计与吴三桂不同故将吴三桂子孙正法耿精忠在京诸弟照旧寛容所属官兵竝未加罪今遣宁南靖寇大将军多罗顺承郡王勒尔锦由湖南进兵镇南将军尼雅翰由广西进兵安西将军赫业及西安将军瓦尔喀等已克七盘朝天等关直抵保宁尅期恢复全蜀三路攻取云南吴逆指日授首定南将军希尔根由江西进兵平南将军赖塔由浙江进兵平寇将军根特巴图鲁由广东进兵三路攻取福建又遣扬威将军阿密达镇西将军席卜臣安南将军华善镇东将军喇哈达等各领大兵驻扎江南京口等处调度征剿耿精忠歼灭亦在旦夕但念耿精忠祖父宣力累朝今及其身遽至覆亡宗祀斩絶朕心深为不忍且吴三桂乃本身投诚之人背恩反叛自取诛戮耿精忠自祖父以来受恩三世四十余年非素蓄逆谋首倡叛乱者比尔部即传谕耿精忠果能追念累朝恩德及伊父忠荃遗言革心悔祸投诚来归将侵犯内地海贼速剿图功即赦前罪视之如初朕以至诚待天下诰谕昭如星日俾其善自审度勿负朕保全勲旧之意尔部即遵谕速行

七月辛卯

上谕兵部耿精忠身虽背叛念其祖父投诚効力累世旧勲朕岂肯以耿精忠之罪及其先人大兵平定闽省之日其祖父骸骨仍许收葬

十一月庚辰

上谕兵部平南王尚可喜孙女嫁为耿精忠子妇年未二旬忽遭事变王系勲旧大臣为国勤劳忠荃茂着其孙女理宜保全我兵剿平闽省之日大将军王等务留心察救给王团聚又

谕曰平南王尚可喜疏奏续顺公沈瑞眷属尚多沦陷闽中念沈瑞亦系勲旧眷属宜与保全其令大将军王等一体留心察访勿致失所

康熙十五年丙辰二月癸丑朔

上谕平南王尚可喜曰王累世勲旧奇猷重望久镇岩疆劳绩懋着自逆贼变乱以来王笃守忠诚殫抒筹略训练士卒保障地方剿御贼寇朕所倚毗今览王奏称年老渐衰身婴痾疾请遣大臣经理广东事务具见王实心为国计虑周详朕与王情同父子谊若手足览疏未竟朕心惻然但王属官兵驻镇日久地方宁谧措置咸宜军民依赖若别遣大臣前往恐该省之事一时未能周知所关匪细王可於诸子中择才略素优者遣赴潮州整理军务大将军平南王尚之孝回省城侍王左右扞卫封守王其加意调护期於平复以慰朕忧虑眷念至意

七月壬辰

上谕兵部吴逆背叛以来潜布伪书煽惑人心原任提督陈福妻子虽在四川毫无瞻顾笃志忠贞剿御贼寇恢复城池功绩茂着及率兵进剿固原中途为参将熊虎等所害前因变出仓猝不能救之兵弁俱释不问今既察明熊虎等四人实系首恶断难宽恕即行正法以惩奸宄其余兵弁各守汛地毋得牵连嗣後再有首告者即以其罪罪之其徧谕宁夏提标官兵知悉

八月丙子

上谕吏部兵部抚远大将军都统大学士图海器识老成才猷练达赞襄机务宣力累朝以文武之长才兼忠爱之至性劳绩懋着倚毗良殷前察哈尔布尔尼背恩反叛命图海为副将军率兵征剿运筹决胜克振军威未及一月捷功立奏逆贼歼灭疆圉敕宁近以平凉阻兵日久屡命剿抚罔有成效特简图海为大将军统率大军节制各路果尔谋略渊深调度得宜军锋所至一战克捷更能体朕好生之心宣布恩威开诚招抚遂使平凉庆阳固原等处文武官兵民倾心向化悔罪归诚生灵免於涂炭边境赖以保安数日之间关陇悉定皆因筹画周详布置神速剿抚竝用克建肤功图海以心膺大臣膺秉钺重寄实心为国克副倚任朕心深为嘉悦於军功议叙外应从优加恩封三等公以示朕眷注忠勤酬答勲庸至意又

谕兵部自逆贼煽乱以来奸徒附和侵扰地方关陇以西疆域辽阔大兵一时未集人心不无动摇靖逆将军侯张勇提督王进宝总兵官孙思克一闻兰州之变即率兵星驰渡河剿御收复城邑条奏机宜举发伪劄缉获奸谍绥定边陲厥功甚大及大兵攻取平凉专任靖逆将军侯张勇等镇守秦巩复殫心筹画调度合宜剿御川贼屡奏捷音纾朕西顾之忧功尤茂着伊等皆宿将重臣矢志报国同心协力展布谋猷兼以训练士卒忠义素孚故能身先行阵所向克捷其所属将卒亦皆効力共建功绩朕甚嘉之於军功议叙之外应从优加恩以示朕奖励忠贞酬答勲劳至意张勇着为一等侯袭十次王进宝加一等阿思哈尼哈番袭八次授为奋勇将军仍兼管平凉等处提督事务孙思克着授为一等阿达哈哈番提督凉州军务

康熙十七年戊午四月丙申

上谕兵部提督九门步军统领费扬古自任事以来夙夜勤劳殫心料理缉获盗贼搜捕奸宄使里巷宁谧輶轂肃清向来効力有年今尤克称厥职应行议叙以示鼓励着议奏

十二月甲戌

上谕大学士等曰满大臣有丧特遣大臣往赐茶酒满汉大臣俱系一体嗣後汉大臣有丧亦应遣大臣携茶酒往赐

康熙十八年己未十一月乙未

上谕议政王大臣等曰鄂尔多斯多罗郡王古鲁当榆林总兵官遣使请兵不及候旨即调兵应援及闻神木变叛又即遣其子统兵先行嗣复力疾亲往为国効力抚降神木县古鲁可封和硕亲王

康熙二十年辛酉四月丁酉

上驻蹕和尔和地方

谕喀喇沁杜楞郡王扎锡等曰喀喇沁故塔布囊和济吉尔出征时最着勤劳今朕至此地遣散秩大臣鄂齐儿等携茶酒往奠

康熙二十一年壬戌二月壬辰

上谕学士张英曰尔素性醇朴侍从有年朝夕讲筵恪共尽职兹以尔父未葬具疏请假朕念人子至情忠孝皆出一理准假南旋赐白金五百两表里二十疋既旌尔勤劳兼资墓田之用尔其钦悉朕惓惓至意

八月乙未原任拖沙喇哈番祁塔特叩阍称自幼从征得官与子都尔寿承袭缘事革职今年踰七十乞一养贍地部议不允

上曰祁塔特効力戎伍得官与子承袭今其子革职袭次已完而祁塔特乃身得世职者竟无资生之计朕心悯之以後此等革去承袭之官其袭次已完者原得世职人员应给与半俸

辛丑

上谕讲官牛钮陈廷敬曰大学士冯溥効力有年请老归里今特赐诗一章篆章一方墨刻一册尔等往宣朕旨朕闻山东之仕於朝者大小固结互相援引凡有涉於已私之事不顾国家往往造为议论彼倡此和务使济其私心而後已又闻居於乡者多扰害地方朕皆稔知其弊冯溥久在禁密之地归里後可教训子孙务为安静故大学士卫周祚居乡谨厚在闾里中若未尝任显秩者必如此人方副朕优礼之意

九月乙巳朔

上谕大学士等曰王进宝赵良栋当逆贼窃据汉中四川时悉力固守在外领兵诸将咸以恢复为难因特遣学士禧佛驰往传谕从来汉人地方猝有变乱即用汉兵戡定竝无藉力满兵之事尔等皆封疆大臣久历戎行应各率所隶部曲将士相机进取时赵良栋即首先倡议恢复随允所议令刻期进剿於是二人协力克取汉中至兰州失陷时王进宝遂率兵乘筏渡河恢复兰州巩昌等处剿御贼寇所向奏功及同取汉中之後二人意见不合嫌隙渐生遂分路进兵赵良栋直取成都王进宝恢复保宁若成都下则虽攻保宁未易即拔若保宁未克则



虽下成都难以固守势必至於复退是二人功绩俱着封疆使能公尔忘私和衷共济即统士卒乘胜长驱则滇黔贼寇可以计日殄灭何复迁延岁月迟至一二年之久耶且二人既克成都保宁贼衆畏惧遂悉其精锐入川抗拒虽彼中路空虚大兵得乘机进取沅州镇远贵阳等处而川中贼势复张已恢复之疆土几至再陷此皆由不能和衷之所致也二人赋性卤莽不谙大体各怀私忿互相攻讦交图陷害朕当二人讦奏之初即已洞悉情事念二人功绩并茂惟欲保全絶无究察之意且一切投诚人员有免其前罪者有仍加录用者况此建立功绩之人耶今二人俱在京师如欲治罪何难逮问重处但朕意终以保全为念将二人互讦章奏俱行发还概不究问其迟於救援失地方关系军机等事仍照例察议此非为二人调解盖深惟国家大体务欲保护劳臣用全终始故行申饬自今以往二人须洗心涤虑各改前愆消释私嫌共矢忠荃以副朕优待功臣至意

十二月癸未九卿议覆云南贵州总督蔡毓荣题土司承袭事

上曰所言承袭事似亦近理昔吴三桂未叛时征讨水西曾灭土司安坤其妻率所属奔於乌蒙生子安世宗今尚幼穉朕观平远黔西威宁大定四府土司本属苗蛮与民不同仍以土司专辖甚便且大兵进取云南此土司曾来接应着有勤劳尔等可传出征大将军贝子章泰都统赖塔等询明情形奏闻

康熙二十三年甲子二月庚戌

上谕福建提督靖海将军侯施琅曰进剿台湾官兵冲冒险阻远涉波涛効力甚久今海逆方平即行裁去殊属可悯应行文展界尚书杜臻学士席柱并料理钱粮侍郎苏拜等公同会议将闽省陆路官兵内裁汰老弱者即以征剿台湾官兵补额务令得所

九月甲戌

上谕大学士等曰纂修

太祖高皇帝实录朕已敬览毕满汉文义俱符不失本意其

实录内勲旧及诸臣後裔可察明另列一单进呈如无後者亦注明备览

康熙二十四年乙丑五月甲申

上谕户部原任广西巡抚郝浴前差两淮巡盐洁已奉公恤商裕课後经简任广西巡抚清廉爱民克称厥职其所动钱粮非系入已从寬悉免追取以昭朕优恤廉吏至意尔部即遵谕行

康熙二十七年戊辰七月乙酉

上谕福建提督靖海将军侯施琅曰尔前为内大臣朕特加擢用尔果能竭力尽心不负任使举六十年难靖之寇殄灭无余诚尔之功也迺来或有言尔恃功骄傲者今尔来京又有言当留尔勿遣者朕思寇乱之际尚用尔勿疑况天下已平反疑尔勿遣耶今命尔复任自此宜益加敬慎以保功名从来功高者不克保全终始皆由未能敬慎之故尔其勉之更须和辑兵民使地方安静以副朕爱兵恤民并保全功臣至意

康熙三十年卒未七月壬子

上谕大学士等曰杜立德在

世祖时着有贤声稟性厚重行事正大非若他人徒务虚名如遇事得其情理不但不苟随同列即於朕亦不曲从曩议政王大臣将尚之信议以正法朕以尚之信向受封爵一旦正法诚属不忍欲令伊自裁杜立德奏曰尚之信乃背国叛逆若不加之显戮以正国法非臣所能知也执奏甚力其他事类此者多诚可谓贤臣矣

康熙三十二年癸酉十二月癸未

上谕大学士等曰兵弁被创残废者虽已给身价之半而不食钱粮则贫者无以为生此等皆奋力行间至於残废良可悯恻兹後若此残废中尚可支持者充南苑门兵仓库诸地老人缺给以钱粮前为护军校骁骑校今犹可支持者诸馆之正副首领缺出用之

康熙三十三年甲戌九月甲申

上谕兵部凡地方防守官兵擒贼之时受伤身故者着给与身价银两着为令

康熙三十六年丁丑三月戊午

上驻蹕高家堡南昭武将军马思喀疏报原任勇略将军

赵良栋病故

上召随驾总兵官白斌等谕曰赵良栋伟男子也行间着有劳绩但性躁心窄每与人不合有时奏事朕前亦言语粗率朕保全功臣始终容之後有疾朕尝遣赐药食彼所奏无不准行此特欲有疾者喜悦而速愈耳今闻奄逝朕殊为恻然闻赵良栋存日与总兵官王化行不相能朕至宁夏务为其妻子区处使之安生断不使受害於其仇也

丙子

上自横城渡黄河驻蹕河崖

谕大学士伊桑阿曰赵良栋乃为国立功之人今已身故明日过其门着遣皇长子允禔部院诸大臣吊之赐祭一次陈福亦为国効力之人现经此地亦赐祭一次丁丑

上驻蹕宁夏

谕大学士伊桑阿曰朕临此地着查宁夏官兵去年在昭莫多翁金地方阵亡者兵丁赐之恤银官员着遣官致奠

康熙三十七年戊寅四月甲寅

上谕大学士等曰右卫西安阵亡拔什库及披甲人等其子着给与应得品级若令来京则贫者有移居之累着停其前来仍留原处供职

六月丁卯兵部议奏原任步军校雅母泰等因有功牌应给半俸

上曰该部但以残废之人议给半俸其阵伤告退何以竝未议及若輩於行间被创不能供职深为可悯宜加特恩

十月戊午

上驻蹕盛京

谕内大臣等曰开国佐运勲臣杨古利费英东额亦都三人効力甚可嘉尚此三人墓朕祭

昭陵之日亲临奠酒其余诸臣効力亦属可嘉康熙二十一年曾经祭奠者照前举行颯亲王萨哈廉克勤郡王岳托等墓各遣大臣致祭寻杨古利费英东额亦都之

子孙公福善等奏曰

皇上欲亲临臣等之祖墓奠酒臣不胜惶惧伏祈皇上停止

上谕之曰

太祖

太宗开国定鼎尔祖辅佐勲劳尔等未必详悉朕比年来观閱

实录知尔等之祖於开创时功绩懋着深属可嘉朕既亲来竭

陵必当临尔祖墓奠酒尔等毋庸再奏

康熙三十八年己卯九月戊午

上谕大学士等曰大学士阿兰泰効力年久品行清纯办事敬谨朕闻其病笃先遣皇长子允禔往视朕尚欲亲临及皇长子允禔回奏业已昏迷随闻其溘逝朕深用震悼即遣皇长子允禔等临其丧赐鞍马四匹白金千金大臣病故虽无辍朝之例朕心不忍特停办事一日

康熙三十九年庚辰八月己卯

上谕兵部将军孙思克谋勇素裕居官甚优効力行间克奏肤功久镇岩疆勤劳茂着允称良将其从前所革世职着给还以示优眷

康熙四十年辛巳十月壬申

上谕大学士等曰前曾谕袭职之人如有残疾将其职另袭他人但残疾不准承袭无以养贍其先立功之人亦属可悯嗣後应袭之人虽有残疾仍令袭职但不与食俸止给每月钱粮俟其子孙应袭之年再令承袭若无子孙俟其本身故後始准另袭则公差无悞其先立功之人亦得沾恩该部详议

康熙四十一年壬午二月己巳

上驻蹕真定府

谕大学士等曰此城十余里外有原任大学士梁清标墓凡朕巡幸所及遇已故大臣墓俱遣大臣致奠尔等其往奠之

四月甲戌

上谕予告大学士王熙曰卿耆年旧德历官最久自去岁告病在家朕无日不注念老臣也近日九卿皆求匾额字对想卿身虽在告心未尝一时不在朝中故特书匾对各一并临米芾书一幅赐卿卿其勉强餐食辅以医药慰朕不忘旧臣之至意

十二月壬午

上谕大学士等曰原任吏部侍郎额星额因诖误革职非有大过今年已衰老朕比来巡历所至凡以诖误罢职年老官员在籍者皆给与原官职衔以示朕优遇老臣之意额星额着以原衔给之

康熙四十二年癸未四月戊戌兵部议覆土司田舜年疏请以伊职令其嫡子田晒如承袭其次子田旻如愿入京备使令所给敕命免缴部俱无庸议

上谕曰逆贼吴三桂作乱之时田舜年一心効力颇有劳绩着依所请令伊长子田晒如袭职原领敕命亦着免缴部其次子田旻如着来京効力

是日

上谕大学士等曰顷朕往察河工原任侍郎任克溥於山东途次迎驾见其年将九十现在诸臣未有如其久者朕深为眷念着加刑部尚书衔以示优遇老臣至意可谕吏部知之

五月戊申

上谕兵部直隶各省所有世职官员皆因彼祖父有功故给以世职着召来引见如有马步射俱优人才堪用者及其年少补用

十一月戊申

上谕山西巡抚噶礼曰朕年少时卫周祚曾任大学士朕今经过其地已令大臣往奠其墓尔可传谕地方官将伊孙照看俾读书成立

丁巳

上驻蹕西安府閱驻防官兵射皆精练

上甚嘉悦因命记其善射之尤者

谕大学士等曰朕为西土兵民生计不辞地方遥远冒涉严寒躬行巡狩见西安右翼旧兵効力行间着有劳绩防戍频仍不计其数人多带伤其父与伯叔兄弟亲戚亦有阵亡者朕心深切軫念且皆循循奉法骑射熟嫻军容整肃朕甚嘉之较之各省之兵尤为超出应大沛恩泽以示朕不忘劳勩人员之意随赏赉银两有差

己未

上閱西安府兵召原任将军佛尼勒之子额伦特赐酒谕之曰尔父効力行间尔亦由兵丁効力以至协领因此亲赐饮表异於衆又以镶蓝旗协领辛泰由步军効力以至協领竝副将康泰韩忠俱人材矫健皆召至阶上令侍卫等饮之

康熙四十三年甲申十一月辛亥四川陕西总督博霖疏参凉州总兵官魏勲年老

上諭大學士等曰魏勲於軍前甚有勞績兵民亦皆愛戴此等人材今西陲亦復有几如果年邁令具呈請休可也何必題參原本發回又

諭曰魏勲及師帝賓麥良奎俱系舊臣詎可輕言參劾前者佛倫任總督時亦欲參師帝賓曾面奏朕前朕不之許如此等人若皆劾而罷之恐其寒心設有任用之處若等俱非易得者也提督潘育龍亦好武臣中一介不取操行俱全者實難得之但不犯法不貪冒即已矣且本朝邊疆武臣在地方不生一事與文臣同心効力兵民協和誠為自古所少今經歷軍陣之大臣已漸零落至於海戰又不得比於江湖前從福建海島來降者皆知海戰之法今亦少矣此可不留意乎

康熙四十四年乙酉二月辛巳

上諭大學士等曰原任刑部右侍郎勵杜訥向在南書房効力二十余年為人敬慎積有勤勞竝無過譴其品級雖不及予諡之例曩者原任侍郎沈荃曾經予諡今勵杜訥亦著賜諡爾等會同禮部議奏

三月壬戌

上諭大學士等曰原任禮部侍郎高士奇在南書房効力年久頗著勤勞其品級不至予諡朕軫念舊臣原任刑部侍郎勵杜訥已照侍郎沈荃例予諡今高士奇亦應予諡以示特恩爾等會同禮部議奏

四月己丑

上諭江南江西總督阿山等曰朕昨往雨花台曾見原任總督傅拉塔祠堂傅拉塔居官甚好其參劾之人雖多總無怨者大有氣節實心効力朕因是特書匾額賜之爾等刊畢可親懸其祠堂此匾額之字宜善加封裹給與其子

康熙四十五年丙戌六月丁亥朔

上諭修國史諸臣曰開國功臣作傳當因其事蹟先後以定次第若視功績分次第或有本人功績少而子孫功績多者反置子孫於前列可乎今應分別

太祖

太宗

世祖三朝功臣以何人居首請旨再定至逮事

三朝功臣各於本人传内通行开载事蹟其子孙有立功者附载於下俟作传毕可录出分给其子孙各一通令藏於家

七月丁巳兵部议覆原任云南贵州总督巴什请将进征红苗阵亡被伤官兵加恩一疏应俟该督分别议奏到日再议

上谕大学士等曰进征红苗阵亡被伤官兵席尔达所奏极明何俟督抚具题迟延日月彼时之督抚俱已更换若俟伊等分别议奏其事必致迟久官兵不得沾实惠矣

康熙四十六年丁亥五月戊寅

上谕吏部朕廑念河防屡行亲閱凡自昔河道之源流及历来治河之得失按图考蹟靡不周知粤从明末寇氛决黄灌汴而洪流横溢岁久不治迄於本朝在河诸臣皆未能殫心修筑以致康熙十四五年间黄淮交敞海口渐淤朕乃特命靳辅为河道总督靳辅自受事以後斟酌时宜相度形势兴建堤坝广疏引河排衆议而不挠竭精勤以自効於是淮黄故道次第修复而漕运大通其一切经理之法具在虽嗣後河臣互有损益而规模措置不能易也至於创开中河以避黄河一百八十里波涛之险因而漕挽安流商民利济其有功於运道民生至远且大朕每莅河干徧加谘访沿淮一路军民感靳辅治绩者衆口如一久而不衰夫人臣有大建树於国家者獎勲酬庸宜从优渥虽赐恤易名已循彝典尚应特予褒叙賁以殊恩靳辅着加太子太保仍给世职拜他喇布勒哈番用彰朝廷追美劳臣之典为矢忠宣力者劝

是日

上谕兵部国家绥辑兵民乂安海峽必资威望素重之臣以畀干城之寄有能久镇岩疆实彰劳绩者则锡命酬庸宜加显秩福建水师提督吴英当王师初定八闽即亲履行阵历四十余年比任提督以来益殫壮谋克修军纪目前诸将中明习水性训练舟师者罕与媲伦是用特賁殊恩俾膺异数着授为威略将军仍管水师提督事务以示朕优眷劳臣至意

康熙四十八年己丑八月乙巳

上谕兵部国家慎简武臣专膺阃寄惟是敕宁疆圉和辑军民斯於地方大有裨益而酬庸獎勲之典宜加优渥陕西提督潘育龙久履戎行蔚有劳绩历试重镇克殫谋猷自擢任西秦以来御兵飭伍有勇知方边境肃清闾閻安堵既威望之茂着亦年齿之日增兹特晋加显秩用彰异数着授为镇绥将军仍管陕西提督事务以示朕隆眷老臣至意

十一月己卯

上谕吏部漕运总督职任至为重要桑额自简任治漕以来老成持重谨厚寛平殫力转输悉心经画每岁身亲儋运俾漕艘依期抵通十余年间从无稽迟贻误之事且驭衆有法恤下有

恩所属运官旗丁无不感颂爱戴不愧为地方大吏今年齿已长而精力未衰久任勤劳良可嘉尚着特授兵部尚书兼都察院右都御史仍加太子太保以示朝廷崇獎老臣酬庸褒勲至意康熙四十九年庚寅三月乙亥吏部以提督四译馆太常寺少卿员缺请补

上谕大学士等曰今观汉大臣俱已年迈继此可用者难得其人至於直隶现为大臣者无一人矣昔如魏裔介李蔚杜立德王熙梁清标等俱优任大学士始终恪慎懋着勤劳今李蔚嫡孙工部主事李敏启着越格陞补提督四译馆太常寺少卿以示朕崇獎旧臣优录後嗣至意

十二月辛巳

上谕吏部朕每因朝列旧臣渐次衰谢时切轸怀特命内阁查顺治年闲进士罢职在籍者已无多人其王士正江臯周敏政叶矫然徐淑嘉宋庆远皆以公事诖误屏废里居今年臻耄耄深可悯念着复还原职以示朕格外加恩至意

康熙五十年辛卯五月丁未

上谕大学士等曰朕自幼读书见大臣多不能保其初终故立志待大臣如手足不论满汉蒙古非大奸大恶法不可容者皆务保全之五十年来如大学士蒋赫德卫周祚李蔚杜立德冯溥黄机吴正治王熙李之芳宋德宜梁清标李天馥张英熊赐履吴琬陈廷敬皆以年老告辞林下怡养保全名节朕亦未尝少忘常使人存问始终如此凡在朝诸大臣朕待之甚厚伊等亦矢忠尽力历数十年之久与朕同须发皤然矣

康熙五十二年癸巳三月壬寅

上谕大学士等曰年老诸大臣内曾於

世祖章皇帝时居官者惟宋荦田种玉而已今以年齿老迈闲居林下宋荦现有尚书品级在身田种玉着给与工部尚书衔俱准给诰封宋荦田种玉着酌加宫保以示朕不忘耆旧之至意

康熙五十八年己亥正月辛丑

上谕议政大臣等曰有本人立功授职後因年老或染病解任袭与兄弟子侄承袭之人若经病故即不准承袭立功之人现在而遽谓承袭世次已完不准袭职殊属可矜嗣後立功授职之人本身若在理宜再准承袭一次尔等会议具奏

康熙五十九年庚子四月戊午户部尚书赵申乔以衰疾乞休

上谕大学士等曰览赵申乔奏疏朕深怜之念其操守清廉始终一辙性虽暴躁而为人朴直



年近八旬病势料难全愈倘一时不保亦未可定赵申乔乃革职留任之官可复还原职仍令在任调理其应赔之银亦着从宽免追尔等将此旨速行发去使病人早知一日五内安宁便於调摄颐养也

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十一

## 卷五十二

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十二

广幅员

康熙二十三年甲子四月己酉

上谕户部兵部台湾僻处海外新入版图应设立郡县营伍俾善良宁宇奸宄消萌教化既行风俗自美着於赤墩设台湾府附郭为台湾县凤山为凤山县诸罗山为诸罗县设一道员分辖又设总兵一员副将二员兵八千名分为水陆八营澎湖设副将一员兵二千名分二营每营设游守千把等官

康熙二十五年丙寅正月甲戌

上谕大学士勒德洪学士麻尔图曰日者大兵往征鄂罗斯破雅克萨城释鄂罗斯不诛赦之使生还其时不并取尼布潮地者盖以尼布潮地画为疆索使鄂罗斯不得越尼布潮界界外听其捕牲也今萨布素等奏言鄂罗斯复来城雅克萨地今当即往征而灭之耶抑或缓之以待黑龙江墨尔根地方将土移家既定然後进兵为宜耶令议政王贝勒大臣及与鄂罗斯之役彭春佟保班达尔沙郎谈同尔等会议以闻

康熙三十五年丙子五月丙子

上驻蹕席喇布里图诸蒙古王等因大败噶尔丹行庆贺

礼跪奏云

皇上念我外藩蒙古不辞劳苦七旬之内行三千里无水

草之地立奏肤功诚世所罕有

皇上圣德神功如此谁不倾心归服

上曰尔等於引路探信牧马掘井诸事甚为効力诚属可嘉朕必重加赏赉朕昔以汎界之内

视为一家今土喇克鲁伦以内皆为一家矣

康熙三十九年庚辰六月庚寅

敕谕王布忒達阿普提曰边境素有定处尔纵放营官喋吧昌侧集烈将四川打箭炉土司蛇蜡喳吧居住地方恃强尽行霸占渐次侵踞河东鸟泥若泥凡州三处潜有窥伺嘉庆擦道之意先经钦差侍郎罗察等往勘营官犹然踞坐有侮慢天使之处今因内土司蛇蜡喳吧漏言将土司蛇蜡喳吧以致於死种种狂悖实难寬假川陕总督席尔達已经具题据此岂非尔私示所属人等侵犯生事边境地方岂可让与寸地此等事情尔俱违悖妄行敕旨一到将渐次侵占打箭炉版图内土司地方俱着退还打死内土司蛇蜡喳吧之营官即拏解送不然生事之罪归於尔身彼时悔之不及矣七月乙卯大学士等将鄂罗斯差人所奏本章进呈

上曰鄂罗斯地方遥远僻处西北海隅然甚诚敬噶尔丹窘迫求救彼曾拒而不答曩者遣人分画边界即献尼布潮地以东为界尼布潮等处原系布拉忒吴梁海诸部落之地彼皆林居以捕貂为业人称为树中人後鄂罗斯强盛遂并吞之已五六十年矣远服声教画疆献地出自忠诚即此允当軫念也

康熙五十年辛卯五月癸巳

上谕大学士等曰天上度数俱与地之寬大脗合以周时之尺算之天上一度即有地下二百五十里以今时之尺算之天上一度即有地下二百里自古以来绘舆图者俱不依照天上之度数以推算地里之远近故差误者多朕前特差能算善画之人将东北一带山川地里俱照天上度数推算详加绘图视之混同江自长白山後流出由船廠打牲乌喇向东北流会於黑龙江入海此皆系中国地方鸭绿江自长白山东南流出向西南而往由凤凰城朝鲜国义州两间流入於海鸭绿江之西北系中国地方江之东南系朝鲜地方以江为界土门江自长白山东边流出向东南流入於海土门江西南系朝鲜地方江之东北系中国地方亦以江为界此处俱已明白但鸭绿江土门江二江之间地方知之不明即遣部员二人往凤凰城会审朝鲜人李万枝事又派出打牲乌喇总管穆克登同往伊等请训旨时朕曾密谕云尔等此去并可查看地方同朝鲜官沿江而上如中国所属地方可行即同朝鲜官在中国所属地方行或中国所属地方有阻隔不通处尔等俱在朝鲜所属地方行乘此便至极尽处详加閱视务将边界查明来奏想伊等已由彼起程前往矣此番地方情形庶得明白

八月辛酉

上谕大学士等曰前差打牲乌喇总管穆克登等查看凤凰城至长白山边界伊等业将所查地方绘图呈览因路远水大故未能至所指之地着於来春冰解之时自义州乘小舟溯流而上至不可行之处令其由陆路向土门江查去但道路遥远万一中途有阻令朝鲜人供应将此情由令该部晓谕来朝正之朝鲜国官员书文给与带付伊王

康熙五十三年甲午七月丙寅

上谕大学士等曰拉藏汗题请打箭炉地方朕思打箭炉原系本朝之地人民攸聚於拉藏汗大有裨益若行撤回则茶市亦停大无益於伊等倘必要此地着伊亲来与我诸王大臣等会议

康熙五十九年庚子十月庚戌定西将军噶尔弼疏报八月二十三日进取西藏传西藏大小第巴头目喇嘛等宣示

圣主威德随将仓库封闭扎立营寨拨兵截准噶尔之运粮要路其策零敦多布伪授总管之喇嘛五名即行正法尚有准噶尔之喇嘛九十六名监禁请

旨

上曰噶尔弼等遵朕指授率领官兵历从古用兵未到之絕域各加奋励克取藏地将准噶尔人等信用之逆恶番僧五人正法抚绥唐古特土伯特人民甚属可嘉在事将军以下兵丁以上俱着从优议叙

十一月辛巳

上谕大学士学士九卿等曰朕於地理从幼留心凡古今山川名号无论边徼遐荒必详考图籍广询方言务得其正故遣使臣至崑仑西番诸处凡大江黄河黑水金沙澜沧诸水发源地皆目击详求载入舆图今大兵得藏边外诸番悉心归化三藏阿里之地俱入版图其山川名号番汉异同当於此时考证明核庶可传信於後大槩中国诸大水皆发於东南诺莫浑乌巴西大干内外其源委可得而缕析也黄河之源出西宁外枯尔坤山之东衆泉涣散不可胜数望之灿如列星蒙古谓之敖敦他拉西番谓之梭罗木中华谓之星宿海是为河源汇为萨陵鄂陵二泽东南行折北复东行由归德堡积石关入兰州岷江之源出於黄河之西巴顏哈拉岭七七喇哈纳番名岷尼雅克撮汉书所谓岷山在西徼外江水所出是也而禹贡导江之处在今四川黄胜关外之乃褚山古人谓江源与河源相近禹贡岷山导江乃引其流非源也斯言实有可据其水自黄胜关流

至灌县分数十支至新津县复合而为一东南流至叙州府与金沙江合流金沙江之源自達赖喇嘛东北乌尼尹乌苏岭流出乌尼尹乌苏岭中华谓之乳牛山也其水名穆鲁斯乌苏东南流入喀木地又经中甸入云南塔城关名金沙江至丽江府又名丽江至永北府会打冲河东流经武定府入四川界至叙州府流入岷江经夔州府入湖广界由荆州府至武昌府与汉江合汉江源出陕西宁羌州北嶓冢山名漾水东流至南郑县为汉水入湖广界东南流至汉阳县汉口合岷江此诸水在东南诺莫浑乌巴西大干之内源发於西番委入於中国也澜沧江有二源一源於喀木之格尔几杂噶尔山名杂褚河一源於济鲁肯他拉名敖穆绰河二水会於察木多庙之南名拉克褚河流入云南境为澜沧江南流至车里宣抚司名九龙江流入

緬國瀾滄之西為哈拉烏蘇即禹貢之黑水今雲南所謂潞江也其水自達賴喇嘛東北哈拉腦兒流出東南流入喀木界又東南流入怒夷界為怒江入雲南大塘隘更名潞江南流經永昌府潞江安撫司境入緬國潞江之西為龍川江龍川江之源從喀木所屬春多嶺流出南流入雲南大塘隘西流為龍川江至漢龍關入緬國此諸水在東南諾莫渾烏巴西大干之外皆流入南海也又雲南邊境有檳榔江者其源發自阿里之岡底斯東達木朱喀巴卜山譯言馬口也有泉流出為雅魯藏布江從南折東流經藏危地過日噶公喀兒城傍合噶爾詔模倫江又南流經公布部落地入雲南古勇州為檳榔江出鐵壁關入緬國而岡底斯之南有山名郎千喀巴卜譯言象口也有泉流出入馬皮木達賴又流入郎喀腦兒兩河之水西流至桑南地岡底斯之北有山名僧格喀巴卜譯言獅子口也有泉流出西行亦至桑南地二水合而南行又折東行至那克拉蘇穆多地與岡底斯西馬卜家喀巴卜山所出之水會馬卜家喀巴卜者譯言孔雀口也其水南行至那克拉蘇穆多地會東行之水東南流至厄納忒可克國為岡噶模倫江即佛法所謂恒河也佛國紀載魏法顯順恒河入南海至山東之渤海入口應即此水矣梵書言四大水出於阿耨達山下有阿耨達池以今考之意即岡底斯是唐古特稱岡底斯者猶云衆山水之根與釋典之言相合岡底斯之前有二湖連接土人相傳為西王母瑤池意即阿耨達池又梵書言普陀山有三一在厄納忒可克之正南海中山上有石天宮觀自在菩薩游舍是云真普陀一在浙江之定海縣海中為善財第二十八參觀音菩薩說法處一在土伯特今番名布塔拉山也亦謂觀音見身之地釋氏之書本自西域故於彼地山川亦可引以為據也禹貢導黑水至於三危舊注以三危為山名而不能知其所在朕今始考其實三危者猶中國之三省也打箭爐西南達賴喇嘛所屬為危地拉里城東南為喀木地班禪額爾德尼所屬為藏地合三地为三危耳哈拉烏蘇由其地入海故曰導黑水至於三危入於南海也至於諸番名號雖與史傳不同而亦有可據者今之土伯特即唐之突厥唐太宗時以公主下降公主供佛像於廟今番人名招招者譯言如來也其地猶有唐時中國載去佛像明成化中烏斯藏大宝法王來朝辭歸時以半駕鹵簿送之遣內監護行內監至四川邊境即不能前進而返留其儀仗於佛廟至今往來之人多有見之此載於明實錄者爾等將山川地名詳細考明具奏

大清聖祖合天弘運文武睿哲恭儉寬裕孝敬誠信中和功德大成仁皇帝聖訓卷五十二

# 卷五十三

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十三

弘制度

康熙十六年丁巳三月甲午

上谕礼部凡遇庆贺盛典朕率诸王大臣诣

太皇太后

皇太后宫行礼班行齐集不可无监察之人应设监察御史在慈宁门外及永康左门外侍仪

康熙十八年己未十一月壬辰朔吏部以内阁学士员缺请补

上曰着原任学士徐元文补授朕观内阁学士与翰林学士行坐前後皆论衙门但翰林官亦有从内阁调用者嗣後行坐班次以进衙门先後为序

康熙二十年辛酉十月丁未

上谕兵部凡驰递军机转输兵饷所关綦重刻不容缓今造修铁索桥恐稽迟时日闻盘江可造浮桥贵州巡抚杨雍建速行监造浮桥其铁索桥俟钱粮充足之日该督抚题明动支正项钱粮修造

康熙二十三年甲子二月庚戌

上命郎中博奇等赴乌喇设立驿站

谕之曰此系创立驿站之地关系紧要尔等会同彼处将军副都统询明熟识地方之人详加确议安设凡在驿人役及马匹牲畜需用之物并所食粮米今岁耕种不及须计及明年加厚料理倘过於俭嗇食用诸物或至匮乏尔等宜从长计议使其久远可行毋得徇於目前之见草率完事

十一月辛卯

上諭大學士九卿等曰凡齎詔官員及出使大臣御前侍衛等凡系經過地方各官接見應有定體至部院衙門差遣筆帖式等或有不肖之人要挾地方官以請安為名恣其需索外吏疲於供應致累小民奚以堪此且此等微員何由自達於上而有請安之舉甚屬非體應行禁止

康熙二十四年乙丑九月丁丑

上諭大學士勒德洪曰朕近觀正陽門牌樓原基甚深若將街衢掘至原基兩傍房屋皆在浮土之上難以久存而於觀瞻亦不相稱且所掘之土運於何處至濬治護城河若積土城下遇雨水流入河內旋至淤塞在濬河掘基需用帑金尚屬小事但慮興作無益應何法挑掘何方貯土爾等會同八旗都統副都統及各部院大臣步軍統領詳閱街衢議奏

十一月甲戌

上諭大學士等曰王等皆用紫纁乘騎或以紫纁濫給微賤之人乘用又其甚者遂至給與外省官員商賈等輩不待敝壞而更新騎用者頗多大悖儀典良由未經定例以至於王等既束用金黃帶若騎用金黃纁則不得妄給微賤而等威辨矣其令宗人府禮部會同定例議奏康熙二十六年丁卯十月乙亥漕運總督慕天顏疏言江浙漕運過江間遇風濤應設法救護查民間有渡生船甚為有益請仿其式造船十只分泊兩岸漕船遇風並出救護部議不准

上曰朕南巡時親見京口與瓜洲對峙往來渡人等所關甚重預備船只拯救沉溺多有裨益此渡生船只令如該督所題行

康熙三十一年壬申九月乙丑九卿議覆陝西巡撫布喀疏奏湖廣運至陝西米石其斛與部頒鐵斛相較微少二合請定畫一查順治十二年鑄鐵斛二十頒給戶部直隸各省及倉場漕運各一頒給年久應令工部照戶部鐵斛造木斛發往陝西

上諭大學士等曰湖廣之斛較西安之斛止少二合無甚差別此或小人量米時搖撼所致前將此事詳問馬齊熊賜履但以謹權量成語啟奏于成龍亦以斛之大小不同啟奏由此觀之九卿未諳原由可再問之又

諭曰斛之大小不同皆由以尺寸較量故致舛錯須以斛內所容之物為準方能畫一然但視所容之米穀尚有虛浮亦不足為準若精而推之或水與水銀始能符合今所用之斛皆屬參差順治十二年已將鐵斛頒發各省今又另造木斛頒給所議含糊着再議以聞

康熙三十三年甲戌十二月壬子

上諭大學士等曰武官品級比文官品級甚大武官於行間効力果有功績品級自宜從優今武官品級太過宜作何裁定爾等查議具奏

康熙三十六年丁丑六月己巳

上谕兵部汉军兵内懦劣甚多安肯勤养马匹朕行军以来知满兵精锐临阵骁勇较汉军相去远矣应将汉军鸟枪兵裁革满洲鸟枪兵增补其官马俱拨给满洲旗分

十一月丙戌

上谕大学士等曰嗣後凡遇行兵以武官委署户部兵部总尉之例着永行停止可将二部司官特行派遣战胜叙功之时伊等不得与如此伊等即可作明证诸事自从公料理将此交与该部着为定例

康熙四十一年壬午十月丁酉

上谕直隶山东巡抚总兵官等曰凡御前奉差之人及皇子诸王公主经过之处地方官理宜迎接请安至於部院衙门差去审事司官及笔帖式回京之日岂尽人人面奏地方官於彼过时跪请朕安无谓甚矣此乃不知礼之人创为此例衆人请安则一人不敢独异且远省陛见之官经过而近省之官反行迎接请安尤为非礼督抚等欲请朕安具摺奏闻有何不可又或有假充御前之人在外生事许地方官即行拏解此後如有部院衙门差去审事司官及笔帖式或织造往来或文武官进京陛见者迎接请安之礼其永行禁止

康熙四十三年甲申六月戊子

上谕大学士九卿等曰直隶各省民间所用斗斛大小迥然各别此皆牙侏评价之人牟利所致又升斗面寬底窄若稍尖量即致浮多稍平量即致亏少弊端易生职此之故嗣後直隶各省斗斛大小应作何画一其升斗式樣可否底面一律平准至盛京金石金斗关东斗亦应否一并画一尔等议奏

十月癸未

上谕大学士等曰天之一度即地之二百里但各省地里有以大尺量者有以八寸小尺量者画地理图稍有不合者职此故也户部呈樣之斛与升斗朕俱注水详加测量其樣升上下四角寬窄不匀算积数见方得三万一千三百八十二分有零其樣斗上下四角寬窄亦不匀算积数见方得三十一万六千七百六十四分有零其樣铁斛算积数见方得一百六十万分其数不相符查性理大全嘉量篇第十二内每斛一百六十二万分与今之铁斛较多二万分因铁斛用之已久不可轻改是以依今之铁斛五斗为准造新樣斗一具方径八寸深五寸积数见方得三十二万分又造新升一具方径四寸深二寸积数见方得三万二千分若依此樣十升一斗五斗一斛毫厘不差因出新樣铜斗升给户部

照式以铁为之



康熙四十九年庚寅正月辛卯

上谕礼部今日

祈谷坛见正卿噶世图帽顶上嵌东珠二颗御史亦俱嵌东珠伊等有何功劳僭分至此御史有查参他人之责何可自行僭越况今携红坐褥甚多凡加级自有定例岂可任意擅用礼仪系尔部专责应严加查禁又

谕曰官员顶带不许踰品惟一品官员帽顶应嵌东珠大学士尚书等俱系大臣职任亦大?顶亦应嵌东珠此外官员加级则帽顶嵌红宝石可也

康熙六十年辛丑十月壬戌

上谕大学士等曰福建总督巡抚提督俱奏请台湾添兵朕意添兵无用也台湾地方水师营着副将一员兵二千名驻劄陆路营着副将一员兵二千名驻劄水师有事陆路可以照应陆路有事水师亦可照应其台湾总兵官移於澎湖亦着兵二千名驻劄令其管辖均有裨益至驻劄之兵不可令台湾人顶补俱将内地人顶补兵之妻子毋令带往三年一换每年自京派出御史一员前往台湾巡查此御史往来行走彼处一切信息可得速闻凡有应条奏事宜亦可条奏而彼处之人皆知畏惧至地方事务御史不必管理将此旨传示九卿

康熙六十一年壬寅三月乙未

上谕大学士都统副都统等曰前因兵丁蕃庶住房不敷朕特降谕旨多发库帑於八旗教场盖设房屋令伊等居住近看八旗兵丁愈多住房更觉难容朕因思郑家庄已盖设王府及兵丁住房欲令阿哥一人往往今着八旗每佐领下派出一人令往驻防此所派满洲兵丁编为八佐领汉军编为二佐领朕往来此处即着伊等看守当差着八旗都统会同佐领等派往

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十三

# 卷五十四

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十四

弭盗

康熙四年乙巳七月庚子

上谕兵部近来地方失事盗贼遁逸不能即获皆各地方防汛官兵不急追捕之故如地方一有盗警防汛官兵即将盗贼去向接续速报於彼处防汛官兵随即剿捕盗贼安能逃遁以後凡有盗贼事情地方官兵一面速行追捕一面驰报於盗贼所到地方官兵该地方官兵亦即一面追捕一面接续前报务穷追盗贼踪迹期於必获如已经报知所到地方官兵因非其汛地不行追捕或稽误不行交付接续前报或失事地方官员迟延及隐匿不报俱应分别处分作何定例尔部严议具奏

康熙八年己酉八月乙丑

上谕兵部刑部京师重地理宜肃清近闻窃盗诈夺甚多此皆步军及五城司坊官并巡捕营官兵稽察不严巡缉不力或番役等与盗交通受贿容纵以致奸恶之徒肆行无忌殊违法纪嗣後所司文武官严加巡察督率番役兵丁力行缉捕务期奸宄斂迹良民无扰如仍前弊所司各官概治以重罪罔宥

康熙十年辛亥十二月壬午

上谕兵部督捕衙门直隶重地理宜肃清近来盗贼繁多大为民害地方官怠玩不能力行禁戢以致劫掠时闻盗贼捕获者少良民株连甚多皆因防汛官员止於降罚带罪缉拏至有失事最多不能尽职者仍令留任愈至贻悞地方今盗贼应作何禁戢严拏及以盗案降罚几次者作何处分尔部再行定议具奏至京城内外盗贼棍徒肆行无忌作何责成官役严行缉拏亦着一并议奏康熙二十年辛酉六月癸未直隶巡抚于成龙题直隶地方旗民杂处失事甚多道厅正印等官为盗案干连沉滞深为可悯祈宽限缉获

上曰朕亲巡畿辅自山海关以西永平以东一面傍海一面临边盗贼无地潜藏故剽劫犹少至玉田丰润遵化蓟州霸州保定诸处居民稠密盗贼所以繁也今处分之例太严恐官民俱累着九卿详议以闻

康熙二十一年壬戌九月戊辰

上谕刑部朕閱三法司会奏人命事件盜案甚多按律凡强盜情实即行梟示其情罪固为可恶较之反叛重案犹属稍轻向来反叛牵连之人尚有拟死罪而不行梟示者此等关系人命大辟朕每欲得良策澄清本源使远近清平永行遵守近见光棍事案较前差少惟强盜一事常厯朕怀未能即得良法夫人非至穷迫孰肯甘为盜賊每见盜案有获赃甚少牵连多人此类若不置之重典则匪人不知畏惧无以警戒将来若概置重典朕心又复惻然此皆未得澄清本源之道故耳今如何使盜賊屏息良善获安尔等会同三法司详议以闻

十月丁丑

上谕大学士等曰盜案人命攸关与其诛於既为盜之後不若弭於未为盜之先朕见每岁盜案处决甚多究其劫夺之物甚微岂尽甘於为盜亦或饥寒所迫而然朕心深为悯惻思立良法以弭盜源故与尔等商之至於情实罪当本无可寬然朕欲於伊等应死之中求可生之路故又令诸臣详议耳

康熙二十三年甲子十二月癸卯

上谕都察院满汉堂官五城御史曰京畿重地理宜肃清近闻盜窃公行居民不得安静且盜賊各有窝主马匹器械昼则藏匿其家夜则出而为盜大约多在坟圈荒僻之处为其窟穴即如向所拏获开人窑诱卖人口者必有藏匿处所盜无窝主何以能行其令五城严缉务在必获正法则盜源自絕矣

康熙二十六年丁卯十一月丙子朔

上谕都统纪尔他布御史巴什锡米图郎中迈图员外郎沙拜曰喜峯口冷口外盜賊藏匿山谷恃强霸占人之妻女劫掠财物庄头居民受其扰害尔等将喜峯口冷口满洲绿旗官兵酌量帶往搜缉

康熙二十八年己巳六月甲申湖广道监察御史李时谦条奏弭盜事宜

上谕大学士等曰李时谦以盜案令文官举报而缉拏责之武官则盜賊可弭朕就根本处言之若果家给人足孰肯为盜然亦托之空言则易行之实事则难朕自听政以来早夜孜孜惟以吏治民生为务凡事之可行与否俱加详审文官管民凡巡察乡村严缉奸宄是其专责今若置之不论独责之武官则州县兵少不但不足以缉盜即使业已缉获文官审讯时又谓其诬良为盜此岂可行者耶朕即欲降旨申饬恐言官畏惧不言此事令该部如常议覆

康熙三十年辛未二月丁巳朔

上谕大学士等曰京师为輦轂重地人民商贾四方辐辏京城内外统辖必有专责俾稽察奸宄消弭盜賊然後商民得以安堵今城内地方既属步军统领管理城外巡捕三营又属兵部

督捕衙门管辖内外责任各殊不相统摄遇有盗案反难查缉嗣後巡捕三营亦令步军统领管理京城内外一体巡察责任既专则於芟除盗贼安辑商民庶有裨益其三营事务着确议归并管理

康熙三十六年丁丑十一月丙午

上谕刑部每见广东省所题盗案纠集夥党多至数十人或恣行焚劫或勒赎子女种种不法皆由文武各官不能化导百姓禁戢奸顽所致嗣後该督抚提镇及各有司务实心教养绥靖地方以副朕息盗安民至意该部即行严飭

康熙三十七年戊寅八月戊辰

上巡幸塞外驻蹕巴伦席喇鄂累地方

谕阿禄科尔沁多罗郡王等曰朕数出征伐躬临朔漠观蒙古生计惟水草是赖今见沿途水草极佳但因盗贼时有恐牲畜被盗圈地拘守不使就牧水草以致瘠毙是以生业未遂不惟属下贫不聊生即王贝勒台吉等亦俱衣食维艰朕君临万国目击其状岂不为之抚育乎尔等勿谓主上谕旨抚育必行赏赐我等设使朕今日赐之尔等即於明日尽之无益也朕必曲加措置务使尔等得遂生业耳尔等若念抚育之恩仰体朕意严缉匪类消弭盗贼以安良善则已如仍怠惰不加严飭属下之人为盗不悛必加诛戮断不寬宥朕既能抚育岂不能禁止盗贼乎逆贼噶尔丹朕三行征讨亲剿灭之俘其妻子降其臣属噶尔丹虽死即朽骨朕亦不寬贷务必致之尔等当已闻之矣宜速行缉弭盗贼以副朕意

康熙三十八年己卯九月甲寅

上谕理藩院侍郎满丕曰欲复蒙古生业必严盗禁不严则不能弭盗朕顷巡省归化城曾问副都统阿迪据云归化城地方贼盗比前甚少朕曾谕尔务严盗禁嗣後倘有盗案必将尔等一并议处断不姑贷

十一月戊午理藩院奏称阿霸垓多罗郡王乌尔占噶喇布报伊属下人等牛只被劫臣等与刑部各差司官一员带领古北口喜峯口官兵查拏

上谕曰蒙古生养之计惟马匹牛羊是赖今盗贼行劫则蒙古生计必致困乏着侍读学士拉西将古北口喜峯口官兵酌量带往缉拏

康熙四十二年癸未九月戊午

上谕大学士等曰山东地方称有海贼坐鸟船二只行劫朕思山东不能造鸟船必往福建浙江江南造成而来历年福建商船於六月内到天津候十月北风始回朕因欲明晰海道令人

坐商船前往将地方所经之路绘图以进知之甚悉今欲知海贼之源但令往福建浙江及江南崇明等处察访即得之若在山东察访必不能得目下冬令将届正值北风海贼不能久留於直隶山东必已向浙闽路去俟明岁船只可行时令有水师海船之省入各海岛搜剿

十月甲戌

上谕大学士等曰江南督抚提督着公同造洋船二十只俟来年春令山东水师营官兵前往江南取至山东候用目前山东海盗非确系积贼皆贸易之人贖本亏折因肆行抢夺可命学士常壽前往招抚

康熙四十三年甲申正月辛酉福建浙江总督金世荣疏报擒获海寇徐荣等供出夥衆屯扎情形

上谕大学士等曰见差内阁学士常壽前往招抚海寇此事交与常壽带去即将所获人内量遣往招之此辈原系窃盗衆亦无几冬春啸聚海岛夏秋扬帆出掠今往抚之彼必归诚解散但日後难保其必不啸聚若抚之不来当即兴师殄灭如湖广红苗从前边民无不被害土司及地方文武官隐匿不报昨岁致讨彼奔逃无路殲厥渠魁宥其胁从军威震慑土司猘猘等无不股栗翕然奉法朕初以海寇故欲严洋禁後思若辈游魂何难扫涤禁洋反张其声势是以中止然未雨绸缪何可忽耶

三月辛酉

上谕内阁学士常壽曰沿海诸省虽稍有海贼闻俱啸聚於广东新会县地方若不扫靖此处不能奏绩尔可先至福建将已获贼中有紧要之人不必带去其余量带一二人前往广东至新会县时先遣一人偕彼同往招抚遣去之时尔可令彼晓贼云尔等情事皇上皆已洞悉尔等归顺则已否则必加大兵尽行扫灭如此晓谕则新会贼寇尽可招抚招抚之後尔可自广东而福建而浙江而山东沿海招抚而来自可奏绩

十一月癸丑

上命刑部右侍郎常绶内阁学士拉都浑往阿禄科尔沁

察审盗案

谕之曰尔等到彼会同扎萨克等查审盗贼如台吉等官员内有为盗者尔等可请旨其余照例将为首者正法为从者俱解京不可留於其地至喇嘛为盗者亦正法尔等往宣朕旨缉盗大为紧要今各旗俱无盗贼止一旗有盗以致衆蒙古之马畜俱不得牧放尔等若不查出惩治则衆人皆不得安居矣

康熙四十七年戊子二月丁酉

上命户部侍郎穆旦往浙江察审大岚山贼一案谕之曰此贼结队横行已二三年不比寻常小盗情罪可恶尔速往会同将军督抚严审若与江南干涉便同江南督抚会审务须决断毋得柔弱一到即将贼首所供朱三等作速追拏并将见获贼犯速行审结若俟衆犯全获则旷日迟久矣

闰三月己亥

上谕大学士等曰直隶各省人命盗案今已渐少惟盛京尚多皆因罪犯发遣多在盛京左侧仅有一府尹衙门衙役人少虽有驻守满兵不行严拏盛京乃本朝龙兴之地当兴行教化着谕兵刑二部檄盛京将军及副都统严加稽察禁止争鬪消弭盗贼

康熙四十九年庚寅九月辛亥

上谕大学士等曰奉天将军嵩祝奏报锦州边海之处有洋贼二百余人上岸抢刼经防御官兵擒斩三十余人见今冬季正遇北风余贼败遁者必乘风自东南方去一至山东江南又必行刼恐山东江南官兵不能追杀若舟师出大洋中不遇南风即难回汛略有疎虞关系非小此番之贼原欲刼粮因巡哨兵弁奋力杀之故皆败走总之洋贼惟仗行刼若兵弁实心防御使洋贼不得行刼则船中无粮必自饥饿而死矣

康熙五十年辛卯正月乙卯

上谕吏部兵科给事中王懿奏请禁止海洋商贾不知海洋盗刼与内地江湖盗案无异该管地方文武官能加意稽察尽力搜缉匪类自无所容岂可因海洋偶有失事遂禁絶商贾贸易耶

五月己酉

上谕大学士等曰闻福建百姓聚集数千在泉州所属地方抢夺食物奔入山中提督蓝理三路率兵进剿一路兵稍为挫折如果有所获蓝理必早已题报矣此事督抚提督等俱未奏闻据大学士李光地奏称有盗贼之处与臣居甚近彼处民皆坚守各人城堡等语去年朕一闻福建饥荒即命截漕三十万石赈济差去大臣及地方官以三十万石太多十五万石即足因止存留十五万石想此米俱散给兵丁未必散给百姓所以无甚裨益若果截留三十万石米运去民食充足於地方必大有裨益也伊等原非贼盗因年岁歉收乏食不得已行之耳若即出官兵征剿未免又生一事朕意遣部院大臣侍卫往行招安即可平复如此则人民不伤亦不致有害地方着问九卿詹事科道具奏

六月己未朔

上命户部侍郎张世爵等往福建招安泉州山寇谕之曰此辈山寇原系农民今一旦为寇田亩无人耕种必至荒芜如此则米价益贵无有生路矣彼若来降仍可耕田度日将伊等不行治罪之处使之通晓为首一二人须加惩治尔等到地方可将朕谕旨尽行书出大张告示明白晓谕

十月辛未

上谕大学士等曰窃盗强盗皆系不良之徒不可姑息乃地方官不肯缉拏督抚提镇文移往来不过沿袭故套州县有司概行不?更有乡绅大户始而畏贼相为容隐久之便作窝家盗贼横行皆由於此直隶山东向年盗案甚多近日地方官协力躡缉渐渐稀少北方盗贼流往南方因而江南浙江湖广江西所在多有若地方官实心办事何难消弭即如往年朱三一案初不过一二人州县不能缉获致成大盗今年福建山寇至於拒伤官兵此皆地方官畏葸之故须严行申饬

康熙五十二年癸巳三月己卯兵部议覆户部尚书张鹏翮疏言闽省沿海地方请将深知水性谋勇兼全之人委用凡各紧要之处添设兵丁营船及船中所用器械火药预备训练又春秋二季令该总兵官亲身巡查有贼船逃匿者即行文广东江南浙江等处协力擒剿应如所请

上谕大学士等曰张鹏翮所奏海上事宜率皆空言无补不可施行贼船停泊必依据海岛有淡水之处每日在山顶了望见官兵船来即遁去外洋官兵退後乃复却回有谓商船宜改为平底只用一桅者不知商船重载入水数尺方能压浪每造一船费至一二千金若勒令改造则不肖官员因此扰害商人将何以堪商船虽带军器火药一遇贼船商人并不敢与敌船中所有随其所取盛京泛海两三日即可抵尽山花鸟利之所在人所必趋泛海往来既速又省路费商船岂有不往之理朕昨问投诚海贼陈尚义康熙三十八年间伊等海贼尚多因与广东提标官兵拒敌大败而遁止存船四只此後从未登岸沿海官兵防守甚严即海外诸小国亦不许伊等停泊贼船缺少火药无处购买俱托渔船往盛京旅顺等处代买朕昨閱地图山东水师住处未为扼要然设立已久不便议裁宜於盛京上游要地添设营船十二只此驻防之船即将各省水师营船及驾船水手酌量调取出洋巡哨并带陈尚义等前往海中盗贼伊悉知之自然渐次擒获矣张鹏翮并未熟悉情形其所条奏即令伊身任其事亦未有裨益也

康熙五十六年丁酉九月癸酉

上谕大学士等曰旅顺口脱逃陈君元等贼党不过八人昨广东巡抚法海奏称此夥已获七人只有一名未获朕前以海中各岛皆可为贼藪及询投诚海贼云岛内树木不生地皆砾石不可耕种亦无好水故难栖止即如澳门地方所居不过万人因无田可耕米无所出俱自广东运米而食今海中藏贼之故皆沿海所居奸民春时觅小船捕鱼遇商船即行劫夺商船既得便拒敌官兵至严冬时水米既无伊等焚船上岸藏匿大势不过如此断不能於海岛栖止也明代金门厦门海坛澳门普陀岩崇明尽山花鸟等处俱有海贼从前海贼郑芝龙投顺本

朝用为内大臣令伊作字招降伊子郑成功伊子不从顺治十六年领海贼三十万侵犯江南攻镇江城宜思恭之父宜永贵时为巡抚坐镇瓜洲因未从贼城得不陷及贼进围江宁时满兵甚少值贵州回军之副都统噶褚哈等至同江宁将军喀喀穆合军出东门於明太祖陵南诱贼进三十里大败之殲其衆朕幸江南曾亲閱战地我朝所殲敌衆松山杏山败洪承畴兵十三万山海关败敌兵二十万安亲王於永兴地方败吴三桂兵并此番所败海贼共计四处江南地方所殲海贼若此福建地方施琅等又攻取金门厦门贼无栖止之处始取台湾为巢今台湾一带皆入版图矣

康熙六十年辛丑十二月丙寅

上谕大学士等曰闻江浙私盐盛行尽流为盗贼地方官员明知并不查拏应令江宁杭州京口将军等派出官兵严行查拏着九卿詹事科道会议具奏

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十四



# 卷五十五

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十五

牧政

康熙九年庚戌三月辛未

上谕兵部设立驿传原为往来差遣紧要事速於接应近闻州县各驿马匹缺少应付迟悞驿递原有额设钱粮以资刍牧驿传道专司其事乃不殚心严察以致侵减公帑缺少驿骑宜作何详核严其禁令尔部定议以闻

康熙二十年辛酉九月辛未

上谕大学士等曰乌朱穆秦等各旗蒙古往牧於喀尔喀巴尔虎之间先窃彼两地马畜以致喀尔喀巴尔虎等亦窃其马畜以报之曩无盗贼时驱马北至凉地牧养肥壮收回尽可度冬自盗贼繁兴夜间不敢放马拘於栏栅中牢笼防护马不得肥以致不能度冬毙者甚多且喀尔喀巴尔虎等结党行窃夜袭边汛我汛地之人畏惧四五汛并居一处两汛之间或去一日二日之程其间盗贼公行出入此汛虽觉不能即達知彼汛且穷蒙古马畜被窃急报该王贝勒及总统扎萨克等闲有不肖者或贪饮沈醉不即遣人缉拏详细察究纵有首告置若罔闻耽延时日有报一马被窃者守候食费竟至数马今有马被窃不敢举首多行隐匿诚以此也朕闻之深为惻然軫念作何筹画得以屏息盗贼贫穷者各遂其生其令议政王大臣及来朝贡之外藩蒙古王台吉等公同详议具奏

康熙二十一年壬戌十二月甲申户部会同内务府上驷院议山海关外大凌河地方展拓牧场事宜

上曰此内民居村落历年已久定有邱墓今若圈为牧场遽令迁移必致失所朕心不忍应将民地尽行开除

康熙二十七年戊辰三月戊子

上谕大学士等曰盛京宁古塔沿途驿站往来官员多索车马鞭撻驿站人役所在多有嗣後如此苦累驿站者管理驿站官即行报部如徇情不报事发并驿站官治罪其下兵部定例具奏

康熙三十一年壬申三月丙辰

上命内大臣阿尔第理藩院尚书班第等往边外蒙古地

方五路设立驿站

谕之曰凡遇边外事务皆用蒙古马匹不但甚累蒙古且恐事亦有悞今设立驿站虽费国帑日後於蒙古裨益良多亦不致迟延贻悞此事最为紧要特遣尔等料理务加详慎必将确然不易可垂永久之策筹画而行

康熙三十四年乙亥七月乙酉

上谕大学士等曰马之所系甚重宜於四十九旗诸地购买归化城二千匹科尔沁二千匹其余诸旗定额购买尔等定议以闻此买马事遣部院中曾出关差者副以八旗蒙古护军参领侍卫各一人会同该王台吉等遵谕以行

十月甲午

上谕议政王大臣及八旗都统等曰朕观京城八旗兵卒俱已熟练器械亦俱整齐倘有举动惟马匹缺少前命满洲蒙古汉军各佐领下拴马一半给草豆钱粮喂养但军行以马为重今可令衆兵一概置马一匹春冬全给草豆钱粮自四月起发一半放青留一半拴喂至九月驱回照常拴喂此所置马匹令兵丁各自小心饲养各交与该管官严行稽察设有怠玩从事以致马匹羸瘦迟悞公用者将该管大臣从重治罪其参领以下拨什库以上以及拴马之人俱照军法治罪俟噶尔丹事毕之後仍照常养马一半

康熙三十五年丙子二月壬辰理藩院奏乌朱穆秦等旗扎萨克王贝勒贝子公台吉等官兵应派在何路

上曰目今蒙古兵衆正当马匹羸瘦之时可止其来会大军着都统杜思噶尔理藩院章京达赖驰驿前往令蒙古王等将所属兵丁内情愿効力马匹足供驱策者尽数派出驻乌尔挥河地方预备乘青草牧肥马匹以待遣用杜思噶尔等宣谕毕可於汛界内来赴军前

三月乙丑

上谕议政大臣等曰内廐马拨一千匹兵部马拨五百匹八旗佐领所养马内择其肥者拨一千五百匹共三千骑於每佐领所留护军一名内酌量????出令同内廐人将此马赶护於三月二十日啓行出张家口约行二十余日可到此马到时如正当对敌之际则给兵骑用甚有裨益即旋师时令兵丁骑用亦大有济其赶护马匹之护军与内廐人亦应照出征人例给马四匹

戊寅

上谕议政大臣等曰兵丁疲乏马匹应交与驿站牧养部给四匹马内若有疲乏二三匹者察明即并本人留於驿站令於有青草处牧放肥壮等候旋师其察核沿途驿站马匹并存留牲口米粮等物俱系紧要着在京吏部尚书库勒纳前来自存留米粮马匹之驿站以至汛界令其往来稽查

四月乙未议政大臣等奏京城送来马三千匹应作何给发兵丁

上曰自京城每佐领下出兵七名每人给马四匹四人共骡一头今每旗留八十名则八旗共留六百四十名矣合绿旗兵察哈尔兵自京城赶马护军二百名通共计算比原数仍多计每旗所留八十名兵丁之马骡共三百四十有余於此马匹内拣臚壮者可得马一百五十匹再添自京城带来马一百五十匹则每旗三百匹矣若给火器营兵每旗一百匹二总兵官下绿旗兵各五十匹马自有余所留兵八十名着留十五日口粮其余米粮给与前去兵丁其补还此项米粮俟于成龙运米到时照数补给此马三千匹内拨给兵丁所剩着交与上驷院其赶马护军二百名令归各旗营内行走又

谕曰在前之兵若将赶来马匹复赶送前去则马匹劳苦内御马羣有马八百匹在前将此马内给前锋兵一百匹给两黄旗三百匹其在前行走之绿旗兵着马思喀達礼善安布禄给兵部马五十匹其在後六旗兵汉军火器营兵绿旗兵马匹着索额图将兵部赶来马匹取其臚壮者五百匹并自京城赶来旗下马匹照数给与内御马羣马一千匹不用给与其所留之兵着左都御史傅腊塔副都统海兰在此驻扎总管兵马遣人察看哨口侦探信息

六月乙未

上谕大学士等曰军士所乘出征马匹到时监收仍给钱粮照常饲养缺者毋令按补每佐领骆驼二只马或二十匹或三十匹定数饲养凡有军事可供需用为益良多至内廐发与骑乘之马到时亦俱交送内廐隐匿不交者亦或有之着各都统严察令其尽数送入

康熙三十六年丁丑三月戊辰

上驻蹕安边城东宁夏总兵官王化行奏请行围花马池

以观军容

上谕曰朕行军二次深悉军情今噶尔丹未灭马匹关系紧要宁夏兵来花马池往来须七八日马必疲乏夫猎细事耳以擒获噶尔丹为急今罢猎而休养马匹以猎噶尔丹何如尔速遣人传谕所属官兵勿来花马池俟朕至宁夏闲暇之日閱尔军容

闰三月癸未

上谕领侍卫内大臣公福善索额图马思喀大学士伊桑阿等曰黑龙江之兵効力心切故萨布素自称马壮朕今日巡视见黑龙江军中马匹羸瘦若将此马乘用恐归时必至疲毙伊等若有行走之事朕当另给马匹将伊等之马於察罕托海地方牧放遣人送往归化城俟军事毕各乘己马归本处则易到也

康熙三十七年戊寅正月辛丑

上谕大学士等曰青海厄鲁特亲王扎什巴图尔等遣还时此处给与马驼遣司官送往总督吴赫速赴宁夏俟伊等至宁夏时即应付马驼而遣之其自京师乘往宁夏之马驼交与送往之官於草生时在察罕托海地方牧养数日从塞外游牧而来若草未生则暂於彼处饲之俟草生加意牧养带回

三月庚子

上谕大学士等曰今承平无事八旗佐领所饲马匹每佐领或留六骑或留七骑其余以四月发往牧地於九月初旬仍复来京每岁如此则钱粮不致虚耗而羸马亦得以苏息矣其更代监视每旗副都统一员参领二员量领官员兵丁於水草佳处游牧

十一月丁酉

上谕大学士等曰前谕西宁茶马五千匹自边外驱送三千至京此地需马不甚紧要送二千足矣闻得南省驻防军士马匹甚艰其余三千送至荆州江宁杭州三处各一千给散军士此马由内地而行正值稼穡时必践踏民田着及时遣部院贤能官员赴彼领取起行沿途牧养尽心护送各至所派之处交与该将军

康熙三十九年庚辰八月丁卯

上谕太仆寺卿喇锡等曰八旗察哈尔所交尔衙门牧场之马拨八百匹给赐翁牛特多罗杜楞郡王班第旗分伊等马匹短少分给牧场令其生息此马即着喇锡前往分给

康熙四十年辛巳四月辛酉

上谕大学士等曰朕前命右卫西安兵丁拨往宁夏兰州二处豫备今右卫将军费扬固疏言领兵至鄂尔多斯马匹羸瘦请照向年例给一月草料向者朕率师至宁夏时值二月随行侍卫执事人等及军卒马匹竝未支給草料惟牧放往还而马匹仍然肥壮今正值草青茂盛之时将军费扬固请给喂马草料殊属不合今西陲絶无边警应将拨往宁夏之右卫兵丁撤回其往兰州之西安兵丁令於兰州所属有粮及青草茂盛处牧马

六月己未

上谕大学士等曰驿递马匹甚觉劳瘦可谕坐台笔帖式凡御遣奉差人员及京都差送物件人员往来俱书姓名并记随从骑驮之数造册存查倘有冒乘驿马者指名题参

甲子

上谕领侍卫内大臣等曰牧场之马着大臣督理其侍卫人等自京师乘来之马有疲瘦者令将牧场中肥马换给之太仆寺驱来牝马驽马亦可给散护军执事人等驮载至乌兰布通仍缴太仆寺闻乘官马者有私将良马留存以驽瘦之马换缴嗣後凡给官马将旗分姓名并马毛色牝牡注档存册倘有倒毙者於马首用印令其呈明倒毙之由记数回京送部查对

是日

上谕喀尔喀台吉等曰近数年来兴安境内尔等数旗穷困已极朕皆一体豢养尔台吉内尚有无马徒步者身系台吉何至如此尔蒙古等度日甚无成算今将台吉内有马一骑者给牝马九有二骑者给牝马八有三骑者给牝马七有四骑者给牝马六有五骑者给牝马五无马贫穷台吉皆给牝马十其乳既可取食所生马驹又可各立生业八年後将所给原数仍交牧场其所生之马尔等当善为畜养令其蕃息甚为有益朕令尔等立业如此倘仍难度日虽彼苍亦不能拯救也康熙四十四年乙酉闰四月乙未吉林乌喇将军宗室杨福请以吉林乌喇白都纳等处动支库银买马给兵丁牧养

上曰此事不准行朕屡以太仆寺之厰马竝茶马赏给京师兵丁及各处驻防兵丁所以兵丁无赔马之苦历观宋明之时尝议马政皆无善策牧马无如口外者朕口外厰马今孳生已十万牛有六万羊至二十一万若将如许马与牛羊驱至近畿牧养即日费万金亦不足也因择塞外水草肥美处牧放是以毫不费饷而马畜自然孳息前巡行塞外见马畜弥满山谷历行八日犹络绎不絶也

康熙五十四年乙未四月庚辰

上谕议政大臣等曰八旗马匹俱已出厰着照出厰马数令该佐领下人拴养照常给发钱粮後来如有用处甚为便益至於拴养骆驼之处并着详议具奏

康熙五十五年丙申十月己酉

上谕议政大臣等曰江南杭州荆州西安固原甘州宁夏等处拴养马驼如有用处甚属有益着西安兵拴养马二千匹驼一百只固原甘州宁夏兵各拴养马一千匹驼一百只江南杭州荆州兵各拴养马一千匹俱给发价银令其购买

康熙五十六年丁酉三月庚午

上谕八旗都统副都统等曰旧例八旗官兵派往马场牧马皆预支俸饷按月扣除嗣後每年往口外马场牧马官兵每人各赏给行月钱粮五月不必扣除俸饷

康熙五十七年戊戌十二月庚戌

上谕大学士等曰福建广东地方潮湿马匹难存所倒马匹若屡令赔偿必至苦累兵丁业已给过草料银两者免其追赔着照绿旗兵丁例半为马兵半为步兵马兵各养马二匹尔等会同议政大臣九卿议奏

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十五

# 卷五十六

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十六

礼前代

康熙十四年乙卯九月庚子

上谕礼部往代帝王陵寝所在地方理宜守护以安神灵朕近行幸汤泉道经昌平见明朝诸陵殿宇虽存户牖损坏附近树木亦被摧残朕心深为悯恻尔部即严加申飭守陵人户令其敬谨防护仍责令该地方官不时稽察勿致仍前怠玩以副朕优礼往代之意

康熙二十二年癸亥八月己酉刑部题发掘故明废藩坟墓盗案

上谕大学士等曰部议照盗发常人坟墓律拟绞盗发藩王等坟墓何得与平人一例凡历朝俱应称某代必称故明深觉未当以后本章凡故明废藩字样应悉除之其盗发坟墓与拨人看守之处着九卿詹事科道议奏

康熙二十三年甲子十一月甲子

上谕江南江西总督王新命江苏巡抚汤斌曰明太祖天资英武敷政神明芟刈羣雄混一区宇肇造基业功德竝隆其陵寝在锺山之麓系江宁所属地方向已有旨令有司各官春秋致祭严禁樵采并设有守陵人户朝夕巡视但为日已久不无废弛今朕省方江宁亲诣拜奠见墙垣倾圯林木凋残皆系无知民人不遵约束恣肆作践往来行走殊干法纪嗣後尔等督令地方各官不时巡察务俾守陵人役用心防护勿致附近旗丁居民仍前践蹋所有春秋二祭亦必洁举行以副朕崇重古帝王陵寝至意

康熙二十八年己巳二月己酉

上南巡驻蹕杭州府城

谕扈从部院诸大臣曰朕行次浙江禹陵在望大禹功德隆盛万世永赖朕亲诣行礼祭文内书朕名乃亲撰文致祭其词曰惟王精一传心俭勤式训道由天锡啓皇极之图畴功在民生定中邦之井牧四载昔劳胼胝永赖平成九叙早着谟谋惟歌府事行其无间德远益新朕省方东南道经吴越覩长江之浩渺心切溯洄瞻高巘之嵯峨企深仰止幸矣松楸伊迓俨然律度可亲特荐馨香躬修祀事惟祈灵爽尚克来歆

是日

上谕礼部祭以敬为主禹陵僻处荒村恐致?慢凡供献粢盛礼仪诸事令左都御史马齐与侍郎席尔达同往省视

甲寅

上谕福建浙江总督王鶚曰朕巡幸江表?怀禹德躬率羣臣展祭陵庙顾瞻殿庑倾圯礼器缺略人役寥寥荒凉增叹愚民风俗崇祀淫祠俎豆馨香奔走恐後宜祀之神反多轻忽朕甚慨焉在昔帝王陵寢理应隆重培护况大禹道冠百王身劳疏凿奠宁率土至今攸赖特书地平天成四字悬之宇下令地方官即加修理详备仪物守祀人役亦宜增添俾规模弘整岁时严肃兼赐白金二百两给守祀之人此後益令敬慎守土之臣亦须时为加意副朕尊崇遐慕之怀其各凛遵毋忽

康熙三十一年壬申正月丁丑

上谕大学士等曰前纂修明史诸臣以所撰本纪列传数卷进呈朕详晰披閱并命熊赐履校讎熊赐履於洪武宣德本纪訾议甚多朕思洪武系开基之主功德隆盛宣德乃守成贤辟虽时殊事异然皆励精着於一时谟烈垂诸奕世为君事业各克殫尽朕亦一代之主也銳意图治朝夕匪懈综理万几孳孳懋勉期登郅隆若将前代贤君搜求其间隙议论其是非朕实无此意也朕於古之圣君尚未能逮何敢轻议前代之令主耶若表扬洪武宣德着为论赞朕尚可指示诸臣重加称美倘深求刻论非朕意所忍为也至於开创佐命诸臣各着勲绩列传内纪文臣事蹟优於武臣则议论失平难为信史纂修史书虽史官之责而当朕之时修成此书稍有未协咎将归朕明代实录及纪载事蹟诸书皆当蒐罗藏弃异日明史告成新史与诸书俾得竝观以俟天下後世之公论焉

康熙三十六年丁丑正月甲戌

上谕大学士等曰观明史洪武永乐所行之事远迈前王我朝现行事例因之而行者甚多且明代无女后预政以臣陵君等事但其挽季坏於宦官耳且元人讥宋明复讥元朕竝不似前人辄讥亡国也惟从公论耳今编纂明史着将此谕增入修明史敕书内

康熙三十八年己卯四月庚戌

上南巡驻蹕句容县

谕大学士等曰明代洪武乃创业之君朕两次南巡俱举祀典亲往奠醑今朕临幸当再亲祭大学士等奏曰曩



者

皇上两次南巡业蒙亲往奠醑今应遣大臣致奠不必亲

临

上曰洪武乃英武伟烈之主非寻常帝王可比着兵部尚书席尔達致祭行礼朕亲往奠

御制祭文曰帝天锡勇智奋起布衣统一寰区周详制作鸿谟伟烈前代莫伦朕曩岁时巡躬修醑荐仰其遗辙不圉成规兹因閱视河防省方南迈园陵如故睇松柏以兴思功德犹存稽典章而可范溯怀弥切奠醑重申灵其鉴兹尚期歆享

壬子

上驻蹕江宁府诣明太祖陵奠爵閱视陵寢

谕大学士等曰朕今日诣明太祖陵寢致奠见其圯毁已甚皆由专司无人朕意欲访察明代後裔授以职衔俾其世守祀事古者夏殷之後周封之於杞宋即今本朝四十八旗蒙古亦皆元之子孙朕仍沛恩施依然抚育明之後世应酌授一官俾司陵寢俟回都日尔等与九卿会议具奏九月二十八日大学士等议得明亡已久

其子孙急难查访今

皇上隆礼前代恩泽有加臣等愚见应委该地方佐贰官一员专司祀典俟查访得人再行奏闻从之康熙四十一年壬午十一月壬申工部议覆浙江巡抚赵申乔题请修葺禹陵应令捐修

上曰凡古帝王陵寢地方官应不时修葺今禹陵必颓坏已极赵申乔始行题请着杭州织造会同地方官动用历年节省钱粮即行修理以称朕尊崇前代圣王之意

康熙四十二年癸未十一月丁巳

上驻蹕西安府翰林院以撰拟周文王武王祭文进呈上曰文王武王皆古之圣君非他帝王可比且向以孔子圣人已书朕名致祭矣此祭文内亦须书名

康熙五十五年丙申十一月乙酉刑部题盗犯韩七等偷掘明朝陵寢为首之韩七现在脱逃获日另结为从之王五等拟绞监候秋後处决

上曰偷掘明朝陵寢即与掘伊祖父坟墓相同韩七着该管官严缉务获到日着即处斩王五

等着立绞

康熙五十六年丁酉正月己卯

上谕诸皇子及领侍卫内大臣等曰

世祖章皇帝曾以礼殡葬崇祯念太监王承恩尽忠并命大学士为之殡葬诸帝陵寝皆躬亲奠酌命人看守岁时祭祀垂为定例近日拏获偷掘明代陵寝之贼部议将为从者拟以充发朕思今日之百姓皆明代所遗之百姓也此与掘伊祖父之墓何异是以降旨将首从诸贼俱行处死但明代诸陵年久或看守之人不谨亦未可定尔等往各陵祭奠务详细查明具奏

四月丙申礼部题

皇上命诸皇子及领侍卫内大臣等拜奠明朝诸陵请宣

付史馆

上曰明朝十三陵朕四十年前曾经亲往今已多年恐看守人等疎忽陵寝或有毁坏之处故遣诸皇子等往奠据回奏宫殿与一切屋宇修葺坚整历年虽久毫无动坏看守人等亦俱谨慎此所奏已知之

康熙六十一年壬寅四月辛酉礼部遵

旨会议自伏羲氏以逮有明应入庙崇祀帝王及从祀功臣详开一摺偏据一方不入正统及不应崇祀者详开一摺具疏陈奏

上谕大学士等曰此所议应崇祀处皆是但其中尚有宜详细斟酌者从前所定配享功臣大槩开国元勲居多如明之徐達不过一草莽武夫刘基系元之进士遭遇成功遂以元勲配享耳其有治安之世辅佐太平有功军国者反不得与配享之列是皆未为允当也又如有明天下皆坏於万历泰昌天啓三朝愍帝即位未尝不励精图治而所值时势无可如何明之亡非愍帝之咎也朕年少时曾见明耆旧甚多知明末事最切野史所载皆不足信愍帝不应与亡国之君同论万历泰昌天啓实不应入崇祀之内尔等会同九卿将此详细分别确议具奏

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十六

# 卷五十七

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十七

柔远人一

康熙五年丙午五月乙未

敕谕安南国王黎维禧曰自尔父抒诚进贡以来朕遣使锡赉恩礼有加兹海寇杨二杨三黄明标等久逋天诛在尔亦应同仇近两广督臣卢兴祖奏至云此数贼并洗彪妻子等俱藏匿尔所属海牙州官潘辅国处一切船只器用皆其资给曾差官往索乃闭栅开礮若敌国然朕览之殊为骇异念系边吏所为或尔未与知今特此敕谕尔其祇遵即察出杨二杨三黄明标并其家口及洗彪妻子等解送两广督臣处交收且察处潘辅国助逆抗拒情罪若不将贼犯拏解不处分尔之属官恐生兵端尔其筹之特谕

康熙七年戊申四月庚寅初安南都统使莫元清爲安南国王黎维禧所逼奔入云南上疏陈诉

上命安置莫元清於南宁安南国王黎维禧亦上疏言兴

兵复讐始末

上遣内秘书院侍读李仙根等齎敕宣谕黎维禧敕曰皇帝敕谕安南国王黎维禧据尔奏称因莫元清之祖莫登庸有逼尔先国母先嗣王行弑夺国之讐今兴兵致讨等语又称报复尔国前讐剿除莫氏止有莫敬恭莫敬宽窜居高平尔又往讨已经设誓和好等语据此则尔讐已复和好完结各居异地矣莫氏作乱之人既皆丧亡又系故明嘉靖时已完之事盖已世远年久莫元清先经纳贡归诚朕授为都统使之职尔後又纳贡归诚随封为王尔今生事兴兵称为复讐理应於未兴兵之前将情节陈奏听候敕旨乃竟未请旨遽尔兴兵残破高平地方杀戮兵民殊为不合今既称遵旨罢兵着将高平地方人民俱复还莫元清各守土安生以副朕绥乂生民之心尔奉藩之义庶永承宠眷之祉矣其慎思恪遵而行毋违特谕

五月甲子安南国王黎维禧疏请六年两贡并进礼部议仍照会典定例三年朝贡

上曰览王奏称该国僻居禹服之外道路悠远山川阻深贡役劳苦三年六年先後虽异礼意恭敬则一等语该国遵奉教化抒诚可嘉这进贡着照该王所奏行十一月己亥礼部题暹罗国进贡方物与会典不符应责其後次补贡

上曰暹罗小国贡物有产自他国者与会典难以相符所少贡物免其补进以後但以伊国所有者进贡康熙八年己酉十二月庚申朔云南贵州总督甘文焜疏报赧牛等四十九寨野苗慕义来归

上曰野苗慕化归顺可嘉着加意抚绥勿致失所康熙九年庚戌二月己巳云南贵州总督甘文焜疏报定番州所属岗渡等一百四十五寨苗蛮倾心归化请纳赋起科

上嘉其诚命兵部檄督抚赏赉

康熙十年辛亥六月壬午

上谕理藩院闻苏尼特等八旗人民被灾牲畜俱死难以存活朕心深为惻然尔衙门会同礼部太仆寺将马场之马与礼部所管之牛羊酌量派出赏给被灾之人康熙十一年壬子三月戊辰广东巡抚刘秉权疏言暹罗国贡使又至所进方物仍与会典不符较前次更少其一

上以先有谕旨命礼部免其察议其携来货物或愿运至京师贸易听其自运愿在广贸易令督抚委官监视之康熙十二年癸丑二月壬戌礼部奏暹罗国贡物短少请令补贡

上曰暹罗国贡物虽与原数不符但念该国航海远来抒诚进贡其虫蚀短少等物免其补进

六月辛丑礼部奏吐鲁番国进贡方物未全请责其如会典入贡

上曰吐鲁番国路途遥远入贡殊艰嗣後止令进贡马匹玉石其余诸物俱令勿进以示朕轸念远人至意

康熙十三年甲寅正月辛巳

上谕户部迺者京师需用驼马凡蒙古驼马进张家口杀虎口贸易者自今至九月免其税课

康熙十四年乙卯四月癸巳

上命抚远大将军信郡王鄂扎等帅师征讨察哈尔布尔

尼

谕之曰大兵出山海关当宣布累朝待布尔尼厚恩及朕不忍加诛之意彼若悔罪来归则已否则以敕书付纵还蒙古持往谕之即布尔尼等临阵来降亦当保全恩养今值蒙古马瘦尔等速往毋违

五月甲子

上谕议政王大臣等曰昔察哈尔遭乱覆亡

太宗文皇帝收集豢养编为整旗历有年所今布尔尼背恩作乱实僧额浑津噶尔马色冷辈匪类教之其余官民俱无干涉此皆

太宗文皇帝抚育之人朕甚悯焉凡投归军前或投入隣旗及溃散者其令大将军鄂扎副将军图海等速行收集作何贍养另疏请旨

九月戊申

上以察哈尔布尔尼已平遣理藩院侍郎博罗特等於义

州锦州等处安插余党

谕之曰今时届严冬其逃散人丁户口加意移来安插务令得所以副朕柔远至意

康熙十五年丙辰六月己卯

上谕兵部平凉投诚猱苗官兵若留内地恐伊等父母妻子或被逆贼残害其官员各加一级兵丁酌量赏赉俱发回原籍并晓谕令招抚从贼人民倘立有功绩准与优叙

康熙十六年丁巳四月戊午

上谕科尔沁和硕卓礼克图亲王鄂齐尔曰尔部人民宜勤加抚恤尔能驭之以恩则属下自竭忠尽力若但以威制则人皆解体不乐効用尔其志之

五月甲午

上谕大学士等曰厄鲁特鄂齐尔图车臣汗与噶尔丹台吉向俱进贡今噶尔丹台吉与鄂齐尔图车臣汗内自相残噶尔丹台吉攻鄂齐尔图车臣汗以阵获弓刀等物来献若径收纳朕心不忍可止收其常贡之物以此旨传谕来使

十月甲寅

上谕大学士等曰闻厄鲁特喀尔喀交恶兴戎虽虚实未确朕统御寰区一切生民皆朕赤子中外并无异视厄鲁特喀尔喀倘因细故交恶至於散亡朕心大为不忍两部落向相和好贡献本朝往来不絕若交恶果实当遣使评其曲直以免生民於涂炭如仰副朕一视同仁之意

仍前和好相与优游太平朕大嘉悦焉但天寒路远若遣使前往无饲马驰驿之所或致有悞今厄鲁特喀尔喀使至其令理藩院明白备檄交发来使传谕之

康熙十八年己未四月丙寅

上谕達赖巴图尔台吉等曰去年闰三月吴喇忒巴達里台吉等男妇子女马驼盔甲为厄鲁特厄尔德尼和硕齐劫去今墨尔根台吉察获送还诚属可嘉夫劝善惩恶国之法也今闻厄尔德尼和硕齐等在额济内河之地尔達赖巴图尔台吉墨尔根台吉将伊等严加治罪所掠人畜什物照数察还如此则同修和好边境生民得安矣墨尔根台吉事毕之日另加恩赉

九月庚申

上谕大学士等曰厄鲁特厄尔德尼和硕齐等抢掠吴喇忒人畜深为可恶今噶尔丹正遣使来可写敕付彼齎往若收回人衆则已如不收回当另有处置即令鄂尔多斯图之亦不为难也

康熙二十年辛酉五月己未

上谕理藩院苏尼特等旗被灾今虽赈以银米止可供一岁之用又闻别旗亦皆罹灾甚是饥饉倘秋草不肥何以为生此事重大应预为久远生全之计尔等速遣司官前往相閱情形以闻

七月丙子理藩院郎中赛柱等以往赈苏尼特等处事竣回奏

上切责之曰前遣尔等往赈济时在朕前惟言事关重大及至彼处复奏粮米断难运至使非侍郎阿喇尼陈奏尔等即不顾而归矣朕軫念蒙古饥荒死亡流散陆续催饘运米至彼蒙古方得更生若听尔等之言此数万生灵岂不徒死乎尔等便利则趋劳苦则避大亏职守矣

八月甲申

上命理藩院侍郎明爱等往迁苏尼特等被荒蒙古谕之曰此等蒙古饥饉殊甚故令迁移当听其徐来不可促之恐毙於道路现今所给牲畜必当节省以备来年之用恐今岁食尽来年禾稼不登又致饥饉尔等前往详视先所给米谷今年足用则已如不足再行议奏迁移到日交与八旗蒙古分驻善为抚恤务令得所若不善养以致死亡必将本旗总管议罪朕亦不时遣官往察尔等将此旨传谕

庚寅

上命理藩院郎中马喇等往查张家口外贫困八旗蒙古谕之曰此等蒙古因遇灾荒先经赈

济粮米牲畜今闻其尚无生计尔等前往详察果系穷困之人作何再赈俾得资生即行议奏间遇有牲畜者尔等勿以为有此即可度日不行察出其畜牧之物今若食尽明年必致又饥其稍有牲畜而米谷缺乏生业艰难者亦以实闻务加详慎毋忽

十月己亥理藩院尚书阿穆瑚琅等奏嗣後进贡蒙古内有年老残疾者赐食时请免其进内

上曰外国之人远来进贡如此分别即非柔远之道赐食时仍令同进

癸卯礼部奏吐鲁番国贡物请照康熙十二年例进贡

上曰外藩所进方物有用者令其进贡若犬马等物甚属无益且沿途供应草料驿站苦之嗣後免其进贡

戊申

上谕苏尼特多罗杜楞郡王阿玉锡等曰观尔属下衆台吉服用甚是不堪尔为部落之主所属人等当矜恤抚养岂可不抚恤下人独自享用乎且尔国之人喀尔喀不和互相侵扰偷盗亦为非宜理应各加严禁视尔等所属相宜地方饲牧牲畜令得遂生朕为尔外藩人等每常留意是以凡事尽知朕所以再三教诲者无非欲俾天下人民各得其所安生乐业耳尔其切识朕谕善养尔民

康熙二十一年壬戌七月乙卯

上命内大臣奇塔特费扬古等赏赉厄鲁特喀尔喀诸外

藩

谕之曰尔等俱系贵显之臣凡事须仰副盛典以正大行之尔等皆属一体勿以满洲蒙古各分彼此务须同心协和满洲大臣不谙蒙古语言凡议事尔台吉塔布囊等译宣於满洲大臣一同商酌确妥对答之勿致失言尔等所言伊等所答及一切传闻事件俱备录来奏至内地蒙古向与喀尔喀互相盗窃以致盗风渐炽若将妄行作乱生事者各自擒拏惩究盗何由生盗贼既弭则牲畜可以散放牧养牲畜既肥则入冬不瘦春时孳孕无复可虞蒙古何至贫困又加以各置汛哨遇有妄行作乱之人即从公究处则民庶得安其生矣其以此晓谕之又

谕曰我朝威德天下外国无不知之谅厄鲁特喀尔喀必大加恭敬然伊等现行之例俱用蒙古礼今若凡事指授而去或致相岐行事反多滞碍是在临时斟酌行之近闻人言罗卜臧台吉已为扎萨克图汗所执尔等可於沿途细加采探如果被执尔等即归可也至罗卜臧设有子弟代袭则敕书赏赉不可轻与须喀尔喀通国保奏授为扎萨克准纳九白之贡始可加以恩赉其厄尔德尼和硕齐等如系噶尔丹属下即限日收捕如非彼属下不能收捕我朝另有

裁夺至给发贡使符验前已谕檄噶尔丹矣近见来使有给符验者亦有不给符验者何项人等给以符验须询明至无符验不准放入之例亦明白晓谕之尔等行路如马驼等物被小贼偷窃当优容之勿令追赔更须约束随从人等毋使妄行争鬪厄鲁特喀尔喀有至尔等旅寓者须以礼貌和藹接待之和则可以识其心志也

十月癸未理藩院奏称厄鲁特巴图尔额尔克济农陈诉属下人等所盗马匹竭力偿补仅及百数余欠实不能完应仍令追缴照例处分

上曰巴图尔额尔克济农等自本地败窜投至近边未谙法令盗马与牲畜亦迫於贫困耳今力不能偿情词哀恳其应赔马匹及处分姑免此一次仍行文严禁嗣後毋违法肆扰自干罪戾

十一月辛亥礼部题安南国进贡金银器皿与本内数目缺少不符

上谕大学士等曰外邦贡献其物本无足重特以倾心向化诚意可嘉耳金银器皿缺少乃细事也其余各种皆非适用之物尽纳之则彼将轻视中国矣况驿递传送尤属烦苦令礼部酌减为例

癸丑

上谕理藩院京城痘疹盛行今年朝贺元旦蒙古王贝勒贝子公台吉塔布囊等已出痘者令其来朝其未出痘者可俱停止各属护卫随从人等亦如之速行宣示

康熙二十二年癸亥七月辛未

上谕科尔沁达尔汉亲王额驸班第等曰人生以道理为重人为情欲所牵恣意妄为以致丧身者皆由不明道理故耳朕见其无知陷罪甚为悯恻即今阿禄科尔沁翁牛特二旗盗贼甚衆为盗贼而致富者能有几人身受恶名被获则死凡贫富皆由天命违理妄求能必得乎尔等若遵法守分有一二牲畜者择水草善地畜牧能耕田者勤於耕种则各得生理天亦佑之如此岂不善乎倘有贫困至极无以聊生者该管之主宜加抚恤使之得所坐视其迫於饥寒以致离散尔等之心何安朕本内外一视竝无分别尔外国遇年岁荒歉朕即运粮米赈济或有困乏即赐牲畜綬疋无非虑尔等失所之意况此番巡幸尔等或有过犯朕竝不执法治罪且频加赏赉优待尔等於此可见嗣後尔等宜遵守教谕革除恶习以副朕好生之意

八月庚子朔

上谕大学士等曰近观厄鲁特噶尔丹博硕克图来使较前渐多每一次常至数百人闻其沿途遇边外游牧蒙古肆行扰害外国之人若行痛惩又恐失柔远之意彼处遣来人员当有定数不可听其意为多寡嗣後正使头目酌量数人令进关口其余人等或令在张家口外或在



归化城交易事毕应即遣回此事着议政王大臣会同确议具奏

己酉理藩院题打虎儿哈纳乌尔等三人告称贫苦难以聊生恳入内地应编入旗下

上曰哈纳乌尔等以贫苦无聊来投内地甚为可悯务令安插得所

乙卯理藩院题苏尼特四子部落台吉及属下人等无以聊生者先曾迁至八旗游牧地方养贍今该扎萨克王竝协理旗下事务台吉等既请收回抚养应准发回

上曰此不能资生之台吉人等迁至游牧地方给贍牲畜粮米已经三年今该扎萨克王等既请收回抚养应遣大臣一员前往亲行验明交与扎萨克王等内有不能前去愿留者仍准存留嗣後如再不能养贍则该扎萨克王及协理旗下事务台吉等俱应处分着申饬晓諭

九月丁丑

上諭理藩院尚书阿穆瑚琅曰朕统一寰区无分中外凡尔民人咸吾赤子惻然怜悯皆欲使各安其居各乐其业鄂罗斯国罗刹等无端犯我索伦边疆扰害虞人肆行抢掠屡匿根特木图等逃人过恶日甚朕不忍即遣大兵剿灭屡行晓諭令其自释过愆速归本地送还隐匿逃人前次所差使臣尼过来亦经晓諭但罗刹尚执迷不悟反遣部下人於飞牙喀奇勒儿等处肆行焚杀又诱索伦打虎儿鄂罗春之打貂人额提儿克等二十人入室尽行焚死此曹虽经晓諭藐不畏法因特遣将军统兵驻守黑龙江呼马儿等处不许罗刹仍前恣意妄行遇即擒杀顷者罗刹诸人经过黑龙江地方遇我将卒降其三十余人奏至朕体好生之德未戮一人皆加豢养使各得其所今牙克萨尼布潮罗刹等若改前过将根特木图等逃人送来急回本地两相安於无事於彼为益不浅倘犹执迷不悟留我边疆彼时必致天讨难免诛罚如路远难归倾心投诚者朕亦纳之必加恩恤使各得其所尔衙门即遵旨明白具文晓諭彼有何言令其回奏

癸未

上諭厄鲁特噶尔丹曰声教既一以来尔历世相承?修职贡聘问有年朕嘉尔尽心敬顺往来不絕故向来尔处所遣之使不限人数一槩俱准放入边关前此来使无多且头目人等善於约束是以竝无妄行作乱者比年尔处来使或千余人或数千人连绵不絕沿途抢夺塞外蒙古马匹牲畜进边之後任意牧放牲畜残食田禾綑缚平民抢掠财物妄行者甚多边外蒙古与内地百姓非不能相拒报复祇以凜遵朕之法度耳朕俯念尔等素行恭顺不将若辈照内地律例?处遂致妄行殃民日以益衆用是限定数目放入边关嗣後尔处所遣贡使有印验者限二百名以内准入边关其余俱令在张家口归化城等处贸易其向不用尔处印验另行纳贡之厄鲁特噶尔马戴青和硕齐和硕特之博洛库济台吉杜尔伯特之阿尔達尔台吉图尔古特之阿玉奇台吉等所遣贡使放入边关者亦不许过二百人尔噶尔丹博硕克图汗尚其仰体朕四海一家中外一体至意敬慎遵行嗣後遣使必选贤能头目严行约束若仍前沿途

抢掠殃民作乱即依本朝律例伤人者以伤人之罪罪之盗劫人财物者以盗劫之罪罪之特此先行晓谕尔其知之

乙未户部议奏罗刹归顺人机里郭礼等应交与正白旗编入佐领下少壮丁者

上曰罗刹归顺颇多应令编为一佐领令其彼此相依庶有资藉

十一月壬申喀尔喀土谢图汗车臣汗等遣子弟请安入贡并奏请水草游牧以何处为界

上赐敕谕曰尔喀尔喀等向来不越噶尔拜瀚海之地游牧康熙三年七月内尔等越界而来朕念乱之所生皆此之故特颁敕旨晓谕尔等部下属衆迨後喀尔喀间有一二违禁来近边游牧以致逃盗纷纷不絶故令尔等设哨立界今尔等既称就水草迁徙居止不定难以置哨请限以何地为界可停其置哨限以噶尔拜瀚海为界不得越此游牧噶尔拜瀚海之地距我边界有三日程其瀚海尽界之东亦须离我边境三日之地不得入内朕视天下为一体率土之人靡不抚恤我边境地方刍牧美好朕亦知之若喀尔喀遇灾旱刍草不生必不得已具奏请旨方可内向游牧俟草生时仍回原处如不请旨擅入内地即令我边地官兵驱逐

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十七

## 卷五十八

<史部,诏令奏议类,诏令之属,圣祖仁皇帝圣训

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十八

柔远人二

康熙二十三年甲子二月庚子先是喀尔喀右翼扎萨克图汗疏言自康熙元年罗卜臧变乱以来我兄弟子侄多投左翼屡索不还曾往诉达赖喇嘛蒙谕七旗曰尔七旗当共尊扎萨克图汗其投左翼人民俱应发还为此差扎尔布柰前来莅盟而左翼土谢图汗不至

皇上系我大衆之主谨以此情上闻至是

上念喀尔喀累世恭顺职贡有年不忍其子弟人民离散遣阿齐图格隆等齎敕往谕达赖喇嘛令遣使议和

敕曰朕统御寰区愿中外无征战之劳离散之苦使羣生皆臻安乐近者喀尔喀扎萨克图汗屡奏右翼子弟人民离散奔入左翼索之未还尔喇嘛从来积大福力永远真诚慈悲济衆声闻炳着无不钦乃高行而赞颂之者喀尔喀诸汗贝子皆供奉尔喇嘛信尔之教而尊崇道法尔於本朝亦诚心敬慎进贡来往不絶今天下共享太平而扎萨克图汗人民离散未得完聚朕心大为怜悯念其中必有父子兄弟骨肉分离者未必不生事互杀交相战争兵戎一起姑无论人民困苦即两汗亦岂能并存伊等於朕向来恭顺竭诚奔走於尔喇嘛亦为护法久矣何忍默视使至此极乎朕与尔俱当遣使往谕将扎萨克图汗离散人民给还俾两翼永归於好既副朕一视同仁之至意而於尔喇嘛六度之行四无量之心亦符合矣尔喇嘛其遣大喇嘛一人与朕行人会於喀尔喀境内定期而遣之朕於此亦遣使臣赴所约之地与尔使同往

十二月己酉

上谕贵州威宁总兵官王潮海曰威宁乃猺蛮杂处之地性多骄悍今海内昇平边陲无事尔在任宜加意抚恤务使戢宁以副朕意

康熙二十四年乙丑四月戊申礼部议准福建总督王国安所奏外国进贡船内货物一体纳税

上曰外国私自贸易之船或可税其货物若进贡者亦槩税之殊乖大体且非朕柔远之意

五月癸未

上谕大学士等曰巴图尔额尔克济农违离彼土向化而来宜加爱养经理其居处乃彼等原为鄂齐尔图汗所属累世进贡诚恳恪恭鄂齐尔图汗之孙罗卜藏滚布与巴图尔额尔克济农当使聚合一处於所宜居之地为之经理令其居处赐之封号给以敕印用昭朕继絶举废之至意可遣贤能台吉与理藩院堂官侍卫晓谕巴图尔额尔克济农云以尔等抢夺毛明安及三吴喇忒之故本宜遣兵征剿悉行翦灭但念鄂齐尔图汗累世进贡诚恳恪恭特加矜恤尔等罪戾尽皆宽宥罗卜藏滚布乃鄂齐尔图汗之孙尔等皆属一国为亲近兄弟今令尔等皆与罗卜藏滚布等聚合封以名号与罗卜藏滚布等可以同居之善地相度定居遣使於达赖喇嘛亦如此颁朕谕旨其宜居之地亦与罗卜藏滚布巴图尔额尔克济农等公同相视令其遣台吉等还奏此事於今年八月即宜举行尔等与议政王大臣蒙古大臣会同详议以闻

七月丙寅

上谕理藩院尚书阿喇尼曰朕顷见蒿齐忒郡王车卜登奏所属旗下蒙古大饥朕心深为悯恻奚可坐视任其艰厄彼所居地距此亦不甚远可亟遣尔衙门司官速察饥民户口以闻

癸酉

上谕理藩院尚书阿喇尼曰食为民天朕先有谕旨各处设立常平仓令其储积以备赈饥今岁畿内秋成大熟正宜详酌举行至救荒之道以速为贵倘赈济稍缓时日则流离死丧者必多虽有赈贷亦无济矣朕每闻水旱灾伤即遣官动支正项钱粮赈济以此故也今欲救蒿齐忒蒙古若以畿内粟转运至彼恐不能待可速以拜察地方储备之粟措支一千石遣贤能司官昼夜兼驰运往赈济

十一月癸酉

上命扎萨克喇嘛垂木珠尔拉木扎木巴得木齐商南多尔济副都御史拉笃祜齋敕往谕达赖喇嘛

敕曰朕统御宇内继絶举废欲期咸底隆平厄鲁特噶尔丹博硕克图汗灭鄂齐尔图汗时罗卜藏滚布阿拉布坦巴图尔额尔克济农等纷纷离散来至边境窜迹於金塔寺贺兰山等处乃巴图尔额尔克济农厄尔德尼和硕齐等又以生计穷迫在鄂尔多斯毛明安吴喇忒宁夏等处妄行刼掠朕於此时不即发兵剿灭者乃軫念鄂齐尔图汗历世职贡诚敬奔走是以宽宥其罪巴图尔额尔克济农等亦戴朕恩愿依朕为生屡疏奏请敕印前此朕曾谕厄鲁特噶尔丹博硕克图汗云巴图尔额尔克济农等如尔所属即当收之不能朕另有裁度乃彼约以丑年春为期如逾期悉惟上裁今逾期已数月矣天下太平惟伊等兄弟骨肉分离散处失所朕心殊为惻然尔喇嘛素以惻隐之心度此衆生凡厄鲁特诸贝子皆供奉喇嘛信崇尔法朕

思罗卜藏滚布阿拉布坦巴图尔额尔克济农皆鄂齐尔图汗之苗裔也鄂齐尔图汗於喇嘛为护法久矣何忍默视其子孙宗族至於困穷今朕欲将伊等归并一处安插於可居之地以示兴絶举废之至意尔喇嘛其遣使与朕行人定期往会朕於此即遣大臣至所约之地偕尔使人前往康熙二十五年丙寅正月戊辰先是理藩院奏厄鲁特巴图尔额尔克济农携其属七百八十人将至请遣官往迎

上曰巴图尔额尔克济农所属亦限以二百人入关余者留归化城则现在噶尔丹之贡使可无辞矣兹当严冬之际行李牲畜盗贼可虞归化城都统古睦德现以年节来覲可令速回监视着遣户部理藩院司官各一员前往宣化府优给供应以示柔远之意至是巴图尔

额尔克济农来朝

上赐宴锡赉以优礼之

乙亥

上谕厄鲁特巴图尔额尔克济农曰尔祖顾实汗於太宗皇帝时输诚进贡是时同达赖喇嘛来通款尔叔鄂齐尔图车臣汗当

世祖皇帝时竭抒忠悃每年进贡请安其土产白鹰以时来贡朕犹及见之夫贡物何足珍贵正鉴其诚敬之心耳及尔等厄鲁特内乱噶尔丹攻灭鄂齐尔图车臣汗并吞其衆遣使献俘朕念前此鄂齐尔图车臣汗勉効悃忱闻其破亡且加悯恤何忍受之因谕来使却其所献俘获顷者尔为噶尔丹击败奔来边境将沿疆附近居民牲畜等物偷盗侵夺朕即应正尔犯边之罪何难遣兵剿除但念尔祖昔时颇竭诚款尔复引罪自首以迫於饥穷濒死妄行等情奏请朕即寛宥今若徙尔於边境内外不拘何地居之尔敢不凛遵特念尔祖顾实汗尔叔鄂齐尔图车臣汗素効恭谨故俾尔絶者复继散者复聚欲使鄂齐尔图车臣汗之孙罗卜藏滚布阿拉布坦与尔聚处尔等宜相与辑睦善自安业至於尔等聚合与否在朕本无损益惟是朕为天下主凡在函盖咸欲使之共乐太平朕兹谕旨自尔身及尔子孙当世世念之勿替

四月乙酉朔

上赐敕谕喀尔喀七旗汗济农台吉等曰朕统御寰宇中外一体务使交相辑睦共享昇平乃尔右翼扎萨克等内自相乱兄弟人民多归左翼其左翼扎萨克兄弟人民亦有归於右翼者尔等以兄弟之亲互相吞并异日必致交恶生乱朕心惻焉康熙二十三年曾颁敕於达赖喇嘛议遣使谕和尔等而达赖喇嘛亦谓朕俯念道法慈悯衆生有如父母意甚善也特遣噶尔丹西勒图前来朕亦命尚书阿喇尼台吉巴忒马什毕力克图喇嘛阿齐图绰尔济等与之偕往尔汗济农台吉等当仰体朕意及达赖喇嘛之心尽释旧怨将兄弟人民各归本扎萨克令其和协照旧安居不但仰副朕命与达赖喇嘛之意即尔七旗永无离散之苦争鬪之害福祿所绥亦且无疆矣

七月癸巳

上谕理藩院右侍郎拉笃祐一等侍卫文达曰尔等可与达赖喇嘛使者同往召集巴图尔额尔克济农罗卜藏滚布阿拉布坦等相度伊等可以游牧之地指而与之仍会同提督孙思克将地之界限令伊标下官弁认记如巴图尔额尔克济农等因给地安插欲来谢恩则许之来达赖喇嘛使人欲来请安亦许之来否则给以廩饩而遣之其厄尔德尼和硕齐等欲与巴图尔额尔克济农等一同游牧亦许之尔等可与彼定沿边为盗作乱之罚着为令前巴图尔额尔克济农来觐时已自誓不复令属下为非其罗卜藏滚布阿拉布坦亦须严禁所属兄弟既已完聚从此和睦安居倘再致流亡他往殊负朕归并眷恤之意朕所以不憚谆切训谕者亦以其先世恭顺有年不欲令其子孙失所也其一传谕之

己酉

上谕议政王大臣等曰向者罗刹侵犯雅克萨尼布潮诸地戕我居民边境骚然曾谕鄂罗斯察汉汗来使尼果来等撤回其衆自後竟不覆奏反在在侵犯肆行扰害意尼果来未达前旨於察汉汗复令被擒罗刹持书从喀尔喀地宣谕之亦不覆奏因遣发官兵往雅克萨招抚罗刹不戮一人令其头目额礼克谢等持书归去罗刹闻我师言旋复回雅克萨筑城以居朕思本朝频行宣谕曾未一答而雅克萨罗刹又死守不去或尼布潮诸地阻隔前书未达或雅克萨罗刹皆彼有罪之徒不便归国俱未可知今问荷兰国贡使称伊国与鄂罗斯接壤语言亦通其以屡谕情节备悉作书用兵部印付荷兰国使臣转发鄂罗斯察汉汗处收回雅克萨尼布潮罗刹於何处分立疆界各毋得踰越则两界人民均得宁居不失永相和好之意察汉汗覆奏时令其使由陆路直来若陆路难通即以来疏付荷兰国代奏再以此作书发西洋国转达之

九月己亥礼部题朝鲜国王李焞遣使谢罪进贡方物应交内务府收贮

上曰朝鲜国因谢罪进贡理宜不收但恐发还不惟齎送人役劳苦亦且驿递骚扰可将此项准作年例常贡嗣後因谢罪贡纳着停止

己酉鄂罗斯察汉汗遣使疏陈下国边民如有构衅作乱之人恭请

天朝察明正法先令米起佛儿等星驰齎书以行乞撤雅

克萨之围仍悬详晰晓谕下国

上谕议政王大臣等曰鄂罗斯国察汉汗以礼通好驰使请解雅克萨之围朕本无屠城之意欲从宽释其令萨布素等撤回雅克萨之兵收集一所於近战舰处立营并晓谕城内罗刹听其出入毋得妄行攘夺俟鄂罗斯後使至定议

十一月癸巳

上諭理藩院噶尔璽多尔济既系鄂齐尔图车臣汗之孙应令其与巴图尔额尔克济农等一同游牧其拉笃祐等所定地界并严禁盗窃之例尔衙门其移文督抚提镇通行晓諭

康熙二十六年丁卯二月丙子喀尔喀车臣汗故其长子伊尔登阿拉卜滩遣使奏闻

上曰喀尔喀七旗誓和未久车臣汗之位不便久悬其敕諭土谢图汗泽卜尊丹巴胡土克图扎萨克图汗等将车臣汗长子伊尔登阿拉卜滩速袭为汗仍敕諭达赖喇嘛知之

賜土谢图汗等敕曰朕惟自古帝王统御寰区遐迩一体其历年久远职贡恭顺竭尽诚心者益加眷赖焉尔等累世惓诚遣使入贡恭顺有年正在嘉赏忽闻车臣汗身故朕殊震悼特遣大臣遗之賻赠近念尔喀尔喀内自交恶朕特遣大臣諭令和睦未久车臣汗之位不可久虚尔喀尔喀例以长子承袭伊尔登阿拉卜滩台吉既系长子且闻其人亦可着嗣立为汗尔等其遵諭行

九月庚子

上賜敕諭噶尔丹曰据喀尔喀土谢图汗奏称厄鲁特内向游牧两路来攻我界上人等屡请赴彼故出兵迎之等语朕统御宇内无分中外尔厄鲁特喀尔喀两部落若果互相残害朕心大不忍焉曾於康熙十六年檄諭尔等务期共相和好尔覆奏云厄鲁特蒙古之道仗达赖喇嘛福庇得以巩固圣諭诚是等语尔噶尔丹累世恭顺职贡有年如果举此大事无不奏闻於朕者因路远地遥虚实难明朕尚未之深信或不逞之徒两地构煽亦未可定尔两部落如果兴兵必有一方至於败亡不但重负朕向来一视同仁之至意羣黎之死亡离散朕心深为惻恻敕书到日即为息争修好则尔恭顺之心朕实嘉之已敕諭土谢图汗令其罢兵矣为此特令尔使陶赖哈什哈等齎敕往諭

十一月丙申

上諭大学士等曰今闻外藩蒙古出汛界哨地有侵害抢掳喀尔喀之巴尔呼等蒙古者甚多以後着严行禁止毋使妄行

康熙二十七年戊辰八月癸丑

上諭理藩院尚书阿喇尼曰闻蒿齐忒贫困实甚应賑济米粮且賜以银两买牲畜养庶有裨於生理拜察地方有米五百石并发白银一千两令侍读学士喀拉等持往量给之

癸亥喀尔喀洪俄尔戴青台吉等率其属来朝

上谕曰尔等喀尔喀与厄鲁特世世进贡朕心宠眷从无偏庇一体优待恩赉有加今闻喀尔喀厄鲁特互相结怨亟遣使臣令其和睦使臣未至而喀尔喀败遁悉至哨探地方居牧朕一体加恩今乱尚未定故留之未遣尔母达赖达熙纳闻朕大兵往尼布潮地方预备餼粮牛羊以待朕甚嘉之尔先衆人报厄鲁特横肆情形又先衆人请安进贡尤为可嘉谕毕

上取所带珊瑚数珠赐之以示优眷

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十八



# 卷五十九

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十九

柔远人三

康熙二十八年己巳正月丁亥喀尔喀土谢图汗以不能与噶尔丹会盟具疏自陈

上谕议政王大臣等曰朕统御天下凡穷者救之绝者继之离散者使之完聚交恶兴戎者使之和协一切生灵无不欲其咸底於安乐也土谢图汗泽卜尊丹巴胡土克图等背弃盟誓加兵厄鲁特今为厄鲁特所败奔入我泛界请降朕念土谢图汗向来职贡惟谨久在属国之列是以受而纳之留於边境矜其困穷给以米粟车臣汗之子亦准其承袭但两国相攻生民不得义安兵戎无日休息今土谢图汗泽卜尊丹巴胡土克图等又难於会盟其以朕收养伊等中外一体不忍令人失所之德意并将土谢图汗等背盟兴戎之故一一申明遣使齎敕宣谕噶尔丹令达赖喇嘛亦遣使於噶尔丹则案可结矣

是日

上赐敕谕达赖喇嘛曰朕统御寰区惟愿中外息征战之劳无败亡之祸率土共享昇平前闻喀尔喀两翼内自作乱兄弟人民互相吞并日後必成战争之祸特敕谕尔喇嘛同遣使人谕和尔喇嘛亦谓朕鉴恤衆生心如父母诚至善也遣西勒图来朕特使台吉巴忒马什尚书阿喇尼等与西勒图偕往召集七旗喀尔喀会盟誓和意谓从此兄弟相亲可永享安乐後土谢图汗奏言闻厄鲁特兴兵两路来伐是以出兵往迎朕轸念厄鲁特喀尔喀两国相攻必有一伤复遣书於尔喇嘛息其干戈仍敕谕喀尔喀土谢图汗以为厄鲁特噶尔丹职贡恭顺往来有年果似此大举谅必奏闻朕心犹未深信未必非不良之徒从中离间尔等慎毋先启兵端务体朕不忍生民死亡之至意尔喇嘛亦遣齐缉克他赖

堪布偕朕所遣阿齐图绰尔济学士拜里往厄鲁特谕和朕与尔如此行事原不忍视喀尔喀厄鲁特至於涂炭欲其相睦衆生得安之意也乃喀尔喀土谢图汗泽卜尊丹巴胡土克图等自取灭亡达旨兴戎首先起兵杀扎萨克图汗又杀噶尔丹之弟多尔济扎卜噶尔丹遂起兵破喀尔喀此喀尔喀先举召衅之过朕不以之责噶尔丹也朕之初念本欲率土之民皆获生成原无乐他人败亡以为己利之意今喀尔喀败汗及济农台吉等率其通国之人决计归降於朕朕为天下主来归之人不为收养其谁收养之爱纳其降安插於汎界之外发粟赈济仍存其汗济农台吉之号嗣立其车臣汗之子为汗朕兴灭继绝之心非特於喀尔喀如是已也诸国有穷迫来归者朕之爱养皆与之同不但朕之所行如此喀尔喀等如往归尔喇嘛决不忍其死亡亦必如此爱养之也征战非美事互相报复无有已时亦岂能保其常胜乎朕意欲

使厄鲁特喀尔喀尽释前怨仍前协和各守地方休兵罢战特遣使齎敕往谕噶尔丹噶尔丹向遵奉尔喇嘛道法若遣使往谕务令两国嗣後永息兵戎则朕与尔解纷恤难之本心亦可以慰矣尔喇嘛可即遣使与朕所遣之人偕往

四月甲午先是喀尔喀土谢图汗等以米粮将尽续到二万余人不能赡给奏请赈济

上命领侍卫内大臣费扬古等齎银两茶布前往散给至

是

谕大学士等曰朕闻喀尔喀乏食有至饿死者深为軫念顷虽令内大臣费扬古等齎茶布银两采买牲畜赈其乏絶但采买尚需时日若不速发粮以拯之则死者愈多矣泽卜尊丹巴胡土克图现有贸易骆驼百余在张家口竝内驷廐及太仆寺骆驼共发一百将张家口仓米星速运到散给计支一两月间费扬古等所买牲畜可继之矣如此则喀尔喀可活也其令侍卫吴达禅侍读学士西拉牧廐侍卫太仆寺堂官户部贤能司官各一员前往经理

八月丁丑

上谕内大臣大学士等曰朕自春至今缘兹旱灾无日不为軫念近出口閎视更不堪寓目当此仲秋之时即以山核桃作粥而食若时届冬春何能存活且闻诸蒙古所在亦然如此情形躬亲目击忧不能止前於边口积粮特为衆蒙古计今蒙古牲畜目前尚可支持若不愿给米粮则牲畜羸瘦至极穷困之时虽再议给赈无论彼不能承领此间亦无术可以运致矣今择贤能官分遣诸处察其实不能存活极困穷者一面令带人夫车辆骆驼而来即以就近边口所收粮食量给之则所需之粮不至万斛而衆蒙古之感戴无穷矣

九月戊戌理藩院题喀尔喀信顺额尔克戴青等六台吉奏称所属牲畜尽毙饥荒不能度日祈赐恤养应遣官清察

上曰此六台吉饥荒不速行拯救则死亡愈多着速行差官确查

是日理藩院议苏尼特满济思哈硕色等抢夺喀尔喀多尔济巴尔桑之骆驼行李又喀尔喀朱布尔哈什哈等抢夺哨探人之马匹应将为首者论绞余各罚牲畜有差

上谕大学士等曰满济思哈硕色朱布尔哈什哈等竝从寛免死照为从例完结至求入内地之喀尔喀等互相杀夺若不速为安插渐至流亡今宜专遣大臣收集喀尔喀散亡之衆又

谕曰昔

太宗文皇帝以次收定四十九旗蒙古後欲全收北边喀尔喀未及行而

太宗文皇帝宾天後苏尼特腾机思怀恨睿王反入喀尔喀喀尔喀欲杀腾机思所尚我国公主腾机思向喀尔喀哭云我如何负

太宗文皇帝仁恩杀我妻耶尔等欲杀我妻将我一并加戮如此坚执故我国公主未曾遇害今闻喀尔喀国内饥荒互相杀掳朕欲普天万国皆得其所一体加恩喀尔喀流离至此故特遣大臣收集流亡使安插得所

十二月癸亥朔

上谕大学士等曰朕览书籍边外各处蒙古等在明代时屡侵边境即於伊各蒙古内亦互相战鬪不得宁谧

太宗文皇帝统驭以来各蒙古皆安静矣如朕所见三十年来各蒙古俱获安生极其恬息彼等欢欣称道谓从未闻有如此太平令我诸蒙古安然享昇平者皆出自圣恩所赐伊桑阿等奏曰

皇上视天下百姓尽如赤子故使内外之民各得其所如

此

康熙二十九年庚午七月甲寅

上谕理藩院朕问二等侍卫吴达禅云喀尔喀土谢图汗泽卜尊丹巴胡土克图属下贫不聊生者甚多可遣尔衙门司官一员至土谢图汗处将至穷乏食者带至张家口外相宜处同口北道动支张家口所贮之米日给饭食将食米人及所需米数奏闻

十一月甲辰达赖喇嘛率西海诸台吉及噶尔丹等具疏请上

尊号进贡礼物

上谕议政王大臣等曰朕统御宇内冀中外人民咸无戕贼共享昇平是以前闻喀尔喀七旗兄弟不睦特遣使於达赖喇嘛欲使归好达赖喇嘛遣噶尔旦西勒图朕遣尚书阿喇尼前往而伊等所行不能仰体朕心及达赖喇嘛之意虽已和喀尔喀七旗而喀尔喀与厄鲁特相仇之故实从此起後闻交恶兴戎即遣使於达赖喇嘛达赖喇嘛遣齐缉克他赖堪布朕遣阿齐图绰尔济学士拜里等止彼相攻乃伊等不行宣谕止之听其纵战喀尔喀遂为所败朕不忍坐视复遣使达赖喇嘛相与同定两国之好达赖喇嘛遣济隆胡土克图朕遣伊拉古克三胡土克图往说之詎意两人见噶尔丹不行谕止与之偕行阑入泛界抢夺人畜朕出兵问罪而两人又不为谕止立视其战我军不得已而击之致厄鲁特大败远遁请罪朕与达赖喇嘛期於抚育衆生而使臣故违意旨遂至於此朕心甚为隐痛有何可贺而受尊号乎其以是晓谕

达赖喇嘛诸汗衆台吉来使所贡礼物其并发还

康熙三十年辛未二月乙丑

上赐敕谕噶尔丹曰朕为天下一统主务使四海之内人民咸获其所以享太平虽向与本朝抗拒之国如穷迫来归必拯而养之无不使得其所者喀尔喀向曾与本朝交战穷而来归朕竝不念前罪受而抚养之济困继絶之心不但於喀尔喀为然也诸国有穷迫来归者朕之抚养皆与此同前已有旨谕汝矣今闻喀尔喀逃来人等言汝厄鲁特牲畜已尽无以为食极其穷困人被疾疫死亡相继朕重念天下率土人民之命闻此困敝有不惻然軫念者乎况前已致谕於达赖喇嘛言噶尔丹如不得已而来归朕亦抚而养之使之得所今果穷困无食不能归故土其移近边汛朕当厚加恩赐如决计入降益从优抚养断不辱汝此朕俯视率土人民一体之实心勿贰勿疑汝亦曾誓不侵扰喀尔喀况我军已在在设备矣若朕果有蹙汝困穷之事则不使策妄阿喇布坦使人见汝之人如此情事汝使亦皆知之自此以後汝之人无所刼夺不能归故土衆庶益至死亡虽悔莫及汝当熟审之

五月戊子

上谕喀尔喀济农诺顔台吉等曰朕承天命统御万方惟思率土人民咸得其所中外同观罔有殊别前尔七旗喀尔喀等本皆兄弟乃互相争夺吞噬人民以致不睦朕曾特遣大臣往洺会所令尔等各相和协而土谢图汗等自食誓言不遵约会已定之议起衅用兵致为厄鲁特噶尔丹博硕克图所败丧其国土汗诺顔台吉等不能保聚所属人民其人民亦不能各保妻子纷纷溃

散来求归附尔等当此困穷至极之际倘朕之衆扎萨克等各行收取尔喀尔喀早已无遗类矣朕好生之心本於天性不忍坐视尔等之灭亡给地安置复屡与牲畜糗粮以资贍养汗诺顔台吉仍留如故车臣汗仍令承袭又因尔等互相偷夺故於各处添设管辖扎萨克以便稽察且念尔等素无法纪故颁示定例令各遵行自古以来未有如朕拯救爱养如此者也朕既加爱养更欲令尔等苏息繁育用是亲临训谕大行赏赉会同之时见尔等倾心感戴故将尔等与朕四十九旗一例编设其名号亦与四十九旗同以示朕一体仁爱之意土谢图汗车臣汗名号俱着仍旧存留扎萨克图汗无辜被杀且所属人民离散困苦已极深为可悯着将伊亲弟策旺扎卜封为和硕亲王其余各分等级授以郡王贝勒贝子公台吉之衔自今以往尔等体朕爱养之恩各守法度力行恭顺如此则尔等生计渐蕃福及子孙世世被泽若违法妄行则尔等生计既坏且国法具在凡事必依所犯之法治罪特谕

六月乙卯朔

上谕大学士等曰喀尔喀厄鲁特谕和之举朕令达赖喇嘛行之今喀尔喀已安插得所应遣使齎敕於达赖喇嘛着丹巴色尔济往谕之

敕曰朕统御寰区以仁育为本抚养是先虽末陲异域之民有困穷而归命者必受而养之使得其所尔喇嘛奉行佛法广度衆生而救苦难其心亦犹是也前以七旗喀尔喀兄弟内相侵夺外与厄鲁特交兵朕与尔喇嘛谕令罢兵归好後噶尔丹又追侵土谢图汗泽卜尊丹巴胡土克图杀夺喀尔喀之人朕遣伊拉古克三胡土克图尔喇嘛遣济隆胡土克图往谕噶尔丹尔使人不能仰副朕与尔之心噶尔丹称兵大举杀掠喀尔喀深入我边泛之地朕稍发兵以问其故反与我兵拒战至於大败乘夜远遁此彼来犯顺非朕往伐之也彼所行违朕与尔好生善念自求穷困而已喀尔喀土谢图汗

车臣汗诸济农诺顏台吉决志内附於本年四月躬亲大閱喀尔喀之汗济农诺顏台吉等既执臣礼跪而稽顙请与四十九旗同列朕设大宴厚赐之照四十九旗编为旗分给地安插土谢图汗自以妄举兴戎陈情请罪朕发衆喀尔喀议之皆言加彼之罪则与我衆无光是以宥免其罪仍留土谢图汗车臣汗之号又念扎萨克图汗被杀冤痛属下裔民散亡可矜授其亲弟策旺扎卜为和硕亲王其余各分等级授以郡王贝勒贝子公台吉之衔明其法度昭其典章矣尔喇嘛普济生灵向以喀尔喀国破为忧今已安措得所遣谕尔喇嘛知之尔喇嘛闻之必大喜也其左翼之喀尔喀无复可议至右翼扎萨克图汗属下人等被掳散亡有在尔喇嘛所者亦有在他处者尔喇嘛普济生灵必能查明发归原土也今厄鲁特人等屡有归降闻噶尔丹穷困已极无食而饥於此可见噶尔丹之获罪於天矣未必不往归尔喇嘛若果往归作何措置惟尔喇嘛裁之噶尔丹遁去之时曾立誓而去倘违誓而稍犯我喀尔喀降人朕必发大兵分路前进务期剿灭之其时地方遥远不及遣人齎敕於尔喇嘛亦未可定是以豫遣教习唐古特文喇嘛丹巴色尔济谕尔知之

七月甲午理藩院以喀尔喀既照四十九旗编为旗分其遣使请安进贡及来朝等事亦应照四十九旗例

上曰喀尔喀初来归顺新经安插其俟三年後行之

九月丁卯

上以达赖喇嘛向来恭顺噶尔丹事必其使臣及属下人通同蒙蔽非达赖喇嘛意因赐敕谕之

敕曰朕统御宇内以爱育黎庶为本务使万邦共相安乐前闻喀尔喀厄鲁特交恶相攻屡遣使於尔喇嘛以和两国尔喇嘛从来奉命不违敬慎而行亦屡遣喇嘛说和奉差喇嘛诸人若能仰体朕与尔好生之意尽心行事则喀尔喀厄鲁特和好早息战争矣但尔近侍与济隆胡土克图等皆有私意不体朕与尔之心济隆胡土克图身在噶尔丹营中竝不说和噶尔丹借追喀尔喀为名阑入边汛劫掠乌朱穆秦又不劝阻且噶尔丹与我军交战济隆张盖於山顶观之而报尔以为竭力说和听从立誓济隆之去朕面谕以告尔喇嘛之言亦不行传谕以前项事情揆之未必由济隆一人之意亦尔近侍之人通同贪利而欺蔽汝徇庇噶尔丹之所致也尔岂有如是之心乎朕灼见於尔喇嘛无涉是以朕不责汝朕与尔之心向来合一故将若

輩行事违朕与尔之心遣敕谕尔知之至噶尔丹乞兵於达赖台吉而不许驻防四川打箭炉之兵尽撤已具悉所奏矣康熙三十一年壬申三月壬申理藩院题喀尔喀部落多罗郡王固鲁西希旗分无牲畜之人请以米粮给之

上曰贫穷蒙古给与米粮特为施恩赡养闻奉差放米官员往往诱买转卖惟思利已不论蒙古之果能度日与否而称为穷困者甚多嗣後朕若察出其实必将该管堂官一并置之重典

十一月丙午朔

上谕大学士等曰闻外藩蒙古有极贫困不能为生者宜作何抚养尔等会同领侍卫内大臣议政大臣蒙古大臣都统等酌议以闻

康熙三十二年癸酉九月辛亥兵部议覆广东广西总督石琳奏称风飘日本国船只至阳江县地方计十二人请发回伊国应如所请

上曰外国之人船只被风飘至广东情殊可悯着该督抚量给衣食护送浙省令其归国

康熙三十三年甲戌四月辛卯理藩院员外郎二郎保奏报厄鲁特台吉巴拜与其兄子齐克宗来归

上曰巴拜等习居边外若来内地居住难以为生着理藩院遣官送至喀喇沁令扎什王抚养之

康熙三十四年乙亥二月乙卯

上赐敕谕噶尔丹曰去岁谕尔敕内诸凡开示甚晰朕俯念中外咸在怀抱尔厄鲁特与喀尔喀仇杀相寻日无宁息心实伤之且思尔等皆职贡之国朕一槩秉公举无偏庇後喀尔喀穷迫来归朕乃收抚以全其生命此亦朕矜恤羣生之至意也尔噶尔丹不遵朕言亦自失其生理而已於我四十九旗蒙古何败坏之有今尔纵戕害使臣马迪之人不正法请罪巧饰诟奏是尔违朕之旨迷惑回子之教坏宗喀巴与达赖喇嘛之法明甚朕是以遣回尔使不令进边嗣後若仍怙非不悛蔑视前谕尔永勿上疏遣使贸易特谕

康熙三十五年丙子二月己亥厄鲁特策妄阿喇布坦遣使囊素等请安进贡又奏噶尔丹奸恶乞遣还回子归已

上赐以敕书曰朕为万国元后惟以率土乂安咸享乐利为心其能体朕覆载之怀敬慎自持者朕必爱惜教育

之其或不循分谊包藏祸心悖安和之理者朕必惩创匡正之此朕统御寰区为人君之大道

也今尔策妄阿喇布坦遣使请安贡献方物又以噶尔丹奸诈屡肆侵陵与尔有不共戴天之讐披沥情实齎奏入告诚心求恤朕为一统万邦之主有不眷尔诚心效顺之人乎查尔所奏回子之事今噶尔丹处虽无回子前来贸易此後或来朕必交该部查明如尔所请发往尔尚永怀敬慎朕将浣加恩赐焉前噶尔丹猖獗横行阑入乌阑布通之时朕遣偏师大败之欲即穷追歼灭其衆而噶尔丹乃长跪於达赖喇嘛所遗威灵佛像前设誓曰自後不敢复侵中华皇帝之喀尔喀与衆人民载书加印始免其诛灭而纵之朕殊不喜征诛今噶尔丹悖弃誓言戕我賚尔之使劫喀尔喀之人阻止班禅胡土克图之来今又至巴顔乌阑动摇我人民内怀诡诈欲行祸乱其迹显然朕不得不加创艾是以发三路大军诛讨其罪罪在噶尔丹他无与也但三路大军竝集声灵赫濯恐边外人民不无震怖尔其遍谕属衆以至吐鲁番诸处各令照常安居勿致惊溃

六月癸丑达赖喇嘛使人戈尼尔罗卜藏帕克巴格隆等遵

旨自西宁至京

上命领侍卫内大臣索额图大学士伊桑阿传

谕曰噶尔丹败於乌阑布通遁走之时首顶威灵佛像设誓云不但圣上属下人民即喀尔喀降人以外再不敢复犯矣去年又背誓至克鲁伦地方残害喀尔喀掠我降人纳木扎尔陀音於是朕亲统大军往讨噶尔丹惧而奔遁适遇我防御之兵诛杀过当噶尔丹率数人逃窜余者尽降厄鲁特遂灭厄鲁特降人告曰达赖喇嘛久已脱缁矣天下蒙古皆遵奉达赖喇嘛如达赖喇嘛身故理宜报闻诸护法主以班禅主喇嘛之教继宗喀巴之道法乃匿达赖喇嘛之丧指达赖喇嘛之名唆诱噶尔丹朕屡遣使问之第巴伪称达赖喇嘛居高楼之上不令与使臣相见第巴原系达赖喇嘛下管事人朕优擢之封为土伯特国王乃阳奉宗喀巴之道法陰与噶尔丹朋比欺陵达赖喇嘛班禅而坏宗喀巴之法前遣济隆胡土克图至噶尔丹所为噶尔丹诵经选择战日朕为衆生往召班禅阻而不遣朕无责达赖喇嘛达赖汗青海诸台吉之意朕今遣使於达赖喇嘛果达赖喇嘛尚在则面见朕使臣晓谕噶尔丹遵朕旨行朕凡事俱略无介意若仍诳我使人不令相见断不轻止至噶尔丹之誓济隆胡土克图等现在其地问之岂有谬乎今将遣使往彼其来人或欲全归或欲数人先归可询明随其意遣之

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷五十九

# 卷六十

钦定四库全书

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷六十

柔远人四

康熙三十六年丁丑二月丁酉

上谕副都统吴达禅曰右卫所有厄鲁特降人着拨户部理藩院官各一员解往张家口曼都处如伊等马驼羸瘦难行着内务府郎中董殿邦助之沿途粮草及赏赐衣服等类亦令董殿邦给与董殿邦可住右卫如大将军处解到厄鲁特即收养之如解到者多则逐队送往张家口俟青草出後董殿邦往归化城住待大将军解到厄鲁特即从外送往张家口曼都处

壬寅

上驻蹕榆林村前桑乾河崖奉差达赖喇嘛理藩院主事

保住回至

御营以第巴疏呈奏

上以示议政大臣等问曰第巴之疏尔等以为何如议政大臣等奏曰第巴差尼麻唐胡土克图面奏今尚未到应俟到日再行议奏

上曰朕意与尔等之意不同朕閱经史塞外蒙古多与中国抗衡自汉唐宋至明历代俱被其害而克宣威蒙古竝令归心如我朝者未之有也夫兵者凶器圣人不得已而用之譬之人身疮疡方用鍼灸若肌肤无恙而妄寻苦楚可乎治天下之道亦然乱则声讨治则抚绥理之自然也自古以来好勤远略者国家元气罔不亏损是以朕意惟以不生事端为贵达赖喇嘛蒙古等尊之如佛第巴者即代达赖喇嘛理事之人噶尔丹叛逆皆第巴之故因朕遣主事保住严颁谕旨第巴悚惧悉遵朕谕奏辞甚恭自陈乞怜畏罪矢誓此亦敬谨之至矣至达赖喇嘛身故朕已悉知今第巴云遣尼麻唐胡土克图前来代彼密陈其情想尼麻唐胡土克图到後必奏明达赖喇嘛已经身故朕为伊等掩饰达赖喇嘛与我朝交往六十余年竝未有隙第巴既如此奏恳事亦可行即此可以宽宥其罪允其所请第巴必感恩而衆蒙古亦欢悦矣

三月庚辰



上遣理藩院主事保住萨哈连齋敕往谕第巴偕尼麻唐

胡土克图同行

敕曰朕临御天下统理万邦溥播仁恩惩创乱逆其诚心恭顺者必加獎賚焉尔布特達阿卜地前与噶尔丹同谋凡事必徇厄鲁特而行济隆胡土克图败乃公事尔坚留不遣其时朕谓達赖喇嘛若在断不至此故严加诘责兹尔奏言圣上严旨下须心甚忧惧今惟钦遵圣谕随力报効倘軫念達赖喇嘛乞降温纶諄切奏请尔既知过引罪朕岂不念達赖喇嘛通使修礼历有年所乎且朕若不加眷恤尔土伯特国岂得安其生耶其济隆胡土克图乃達赖喇嘛所特遣以合喀尔喀厄鲁特之好者也彼竟不使喀尔喀厄鲁特和好反导厄鲁特入我境内与我军交战情罪甚属可恶务必擒解彼之身命朕俱准尔所请寬而宥之其班禪胡土克图应於何年月日来朝尔从容定期具奏至噶尔丹与朕抗我师大克之凶恶逆贼情罪重大其女断不许留於青海尔必解来若不解送则罪归於尔矣如噶尔丹果悔罪来归其时另有处分今尼麻唐胡土克图至将尔奏请之言俱已密奏朕前朕亦密有谕旨朕之素怀惟愿率土之人咸跻雍和共享安乐断不欲摘发隐私倾人家国嗣後尔宜益加恭顺勿违朕旨朕亦嘉惠如初如此则尔土人民大蒙利赖尔之荣贵可获长享矣

闰三月乙巳

上谕议政大臣等曰青海诸台吉来朝若於口外受之恐於典礼不备且伊等於四月起程正遇塞内炎热着在九十月间朝於京师

八月辛酉

上谕大学士阿兰泰曰撰敕赐策妄阿喇布坦宜曰噶尔璽多尔济率衆来归朕已安集使之耕种得所今忽弃其田苗逃去想彼有甚不得已之情朕已谅之彼乃鄂齐尔图车臣汗之孙也倘至尔所如欲居尔即留养如欲归尔即遣还

九月癸未厄鲁特台吉丹济拉至

御营

上命大学士阿兰泰及郎中阿尔法引入

上独坐氊帷内屏退左右并令阿兰泰阿尔法出独留丹济拉语良久丹济拉出惊谓诸大臣曰我乃叛逆罪人穷困来归蒙

皇上略不致疑尽屏左右召我入见授我显爵乃知圣主至勇至仁如此我敢不诚心感戴永无异念上随召阿兰泰入

谕曰尔等偕丹济拉入者盖以防不测也尔等所见虽是朕思凡人无不可以诚感丹济拉虽来降其心不无疑畏朕推诚如此伊必感激喜出望外断无妄动之事朕令尔等俱出不留疆帷内者欲使丹济拉之不疑也十一月戊戌礼部议覆朝鲜国王李焞疏请於中江地方贸易米粮应不准行

上谕曰朕抚驭天下内外视同一体竝无区别朝鲜国王世守东藩尽职奉贡克効敬慎今闻连岁荒歉百姓艰食朕心深为悯恻彼既请采以救凶荒现今盛京积贮甚多着照该国王所请於中江地方令其贸易

癸卯青海扎什巴图尔台吉等来朝

上御保和殿受朝礼毕引至

御座前

谕曰朕顷巡幸宁夏所以命尔等来朝者盖欲天下生灵各得其所此朕本怀朕富有四海率土皆臣固不在尔等之来否此後宜仰体朕意各遂安全即噶尔丹亦非朕先加征讨因彼屡侵边境扰害边民然後致讨朕性从不以威武临人惟愿与天下共享太平之福耳

康熙三十七年戊寅正月庚寅

上召策妄阿喇布坦之使彭苏克喇木扎木巴多尔济寨桑至前问以疏参第巴之故彭苏克等奏曰第巴行事不端有乖道法是以参奏

上谕之曰休息兵戎令宇内昇平始云道法若以护法为辞必生衅端如尔等虽招抚回子遏止其教亦能令其皈依佛法跪拜喇嘛乎今天下太平之时惟令各行其道若强之使合断不可行四十九旗扎萨克蒙古等迄今六十余年朕视如一家初喀尔喀厄鲁特构兵时朕曾谕達赖喇嘛令从彼处遣人往解朕亦於此处命大臣等前往谕之使其相和不意達赖喇嘛之使竟偏向厄鲁特彼时朕即知達赖喇嘛当已物故矣若彼尚存决不为此第巴之构衅噶尔丹人尽知之又假托達赖喇嘛之言令将泽卜尊丹巴胡土克图土谢图汗擒拏解赴噶尔丹今者泽卜尊丹巴胡土克图土谢图汗亲身皆在此处前土谢图汗於鄂罗海地方为噶尔丹所败比时曾遣一寨桑来奏云臣等系历来进贡请安之国若蒙主上怜恤收养我等即投顺前来等语今不但泽卜尊丹巴胡土克图土谢图汗等即七旗之喀尔喀数万蒙古归顺前来朕皆收养离散者使之完聚危殆者使得生全令其各得恒业至於泽卜尊丹巴胡土克图土谢图汗朕皆待以优礼无稍替焉衆蒙古以第巴为达赖喇嘛传戒之人皆缄口不敢议朕曾以敕谕往责第巴彼甚心服具疏认罪朕因宥之嗣後第巴若改前行敬奉班禅达赖喇嘛则已若怙终不悛不但尔等请征第巴即其所属青海台吉等朕亦不寬貸也前者青海台吉等闻朕出师宁夏之信尽皆震怖游牧移营而去今日青海台吉等以噶尔丹平定亲来庆贺伊等竝无过端朕岂忍加兵朕统驭天下总愿宇内羣生咸各得所岂有使尔两国生衅之理惟

期尔等安谧而已

七月壬午

御制海运赈济朝鲜记曰朕闻救灾拯患王政所亟是以夙夜求莫虽在遐荒絕域犹若痼瘵乃身矧属在藩维苟有疾苦何忍一日置之康熙三十六年冬朝鲜国王李焞奏比岁洊饥廩庾告匱公私困穷八路流殍相续於道吁恳中江开市贸谷以苏沟瘠俾无殄国祀朕深为惻然立允其请遂於次年二月命部臣往天津截留河南漕米用商船出大沽海口至山东登州更用鸡头船拨运引路又颁发帑金广给运直缓徵盐课以鼓励商人将盛京所存海运米平价贸易共水陆运米三万石内加赉者一万石朝鲜举国臣庶藜藿不饱获此大仓玉粒如坻如京人赐之食莫不拚舞忻悦凋瘵尽起该王具表陈谢感激殊恩备言民命续於既絕邦祚延於垂亡盖转运之速赈贷之周亦古所未有也朕念朝鲜自

皇祖抚定以来奠其社稷绥其疆宇俾世守东藩奉职修贡恩至渥矣兹者告饥不憚转输数十里之劳不惜糜费数万石之粟环国土而户给之非独一时救灾拯患实所以普泽藩封而光昭

先德也是乌可以无记

康熙三十八年己卯二月丁未

御舟泊杨柳青地方扈从大臣等会议商南多尔济等奏

请禁止第巴遣人贸易应如所请

上谕曰前扎海保住等来奏第巴与达赖汗鲁会同商议以为今年乃班禅胡土克图本命之岁不便前去请俟来岁三月遣之而阿南达等以为此系推诿之言欲遣二郎保扈木德同彼前去催令速来并驳其奏章朕思阿南达之谋亦失之轻率即使二郎保等前去能令班禅胡土克图速来耶第巴以匿其奏章禁其贸易藉为口实彼所属之人皆赖贸易为生朕为天下主何必以班禅胡土克图之故泥於小见集其贸易絕其生计乎第巴既称来岁使班禅胡土克图前来且待至三月如仍不遣来则曲在彼矣我朝惟图理直凡事豫为斟酌然後行之亦不为迟朕巴遣扎海等作速回京传谕尚书班第令其移文阿南达等倘第巴有奏章前来即行转奏毋得拦阻商南多尔济等竝不计此即请止第巴贸易之人殊为未当尔等准其议亦失之矣

八月己巳

上驻蹕乌喇岱昂阿

谕大学士等曰朕轸念蒙古生计曾遣官教养已各安生理无有不乐业者近闻巴林人等饥荒离散朕甚悯之此系公主所居若令微员前去恐亦无济着护军统领鄂克济哈学士苏赫纳至彼会同扎萨克等将巴林所存米一千石赈之勿仅给公主人员也其离散之人令其招徕若人衆米少再将坡赖村米粮速行挽运至彼可速议以闻

康熙三十九年庚辰十月丙寅福建浙江總督郭世隆奏称红毛国英圭黎被风飘至夹板船请遣回本国

上曰英圭黎船只遭风飘来可悯着该地方官善加抚恤酌量资助给足衣食乘时发回本国以副朕柔远之意

康熙四十一年壬午正月丙午

上命郎中舒图员外郎铁图等往打箭炉地方监督贸易谕之曰尔等至彼即将奉差情由移文第巴须文辞明悉令彼速遣大喇嘛来监督贸易倘若迟滞将我等撤回永远不得贸易矣侍郎满丕督师彼处与尔等事各不同务各勤尔事其番人最贪见小利便喜税银勿取於彼只就我国商人徵之不可专以税额为事若立意取盈商贾不至与禁止何异此项钱粮不多勿以此注念至彼处尤当熟谙地方情形有应奏之事即行具奏五月丁亥户部题喇嘛商南多尔济养育银两令地方官捐助

上谕曰商南多尔济食用之物若令捐助重为地方之累着动支正项钱粮不必捐助仍移文商南多尔济飭其日用饮食务从节俭所用钱粮数目明晰以闻九月戊午浙江巡抚赵申乔奏称琉球国进贡使臣遭风船坏救出二人

上谕曰琉球失水二人拯救复苏着该地方官加意赡养俟便船资给发还此等船只损坏人被溺伤皆因修艖不坚所致嗣後琉球贡使回国时该督抚须验视船只务令坚固以副朕矜恤远人之意

十二月壬寅厄鲁特丹津阿喇布坦来朝

上召入面谕曰尔厄鲁特为人多疑朕亲率师至克鲁伦屡遣使谕噶尔丹归降彼不肯从故致交战失利其时设若归欵朕亦已矣前厄鲁特来归者朕皆授以大臣之职尔等尚不之信有言此必是计後定诛戮今厄鲁特为大臣者现在已养至十年矣计耶非耶至於喀尔喀人材庸劣不及尔厄鲁特厄鲁特来归者虽未遇从征立功其扈从巡哨亦甚尽力今观尔体貌健壮他日得力可知念尔远涉劳乏且善调摄暇日更与尔言也康熙四十三年甲申十一月戊午礼部题朝鲜国王李焞议将其国越境杀人之金礼进等立斩该管人员革职流徙应如所议

上谕大学士等曰览朝鲜国王奏章其所议甚为敬慎周详越境杀人者依该国王所议正法

固其宜也其余罪犯内尚有当恕者尔等可参酌原有议奏凡外国之事轻忽者多处置少有不当即不能以服其心所关甚大朕必慎之而又慎焉寻大学士等将事内应宥人员酌

议具摺奏请

上曰内地被杀之人皆偷采人参者非良民也即为内地擒获亦当从重治罪但朝鲜国人越境而来杀人行刼法所不宥应将金礼进等立斩其该管官员当宽以处之李有白等俱从宽免罪朴锡昌等俱革职从宽免流徙如此则尽得其当矣

康熙四十五年丙戌十月丁未

上谕大学士等曰观朝鲜国王凡事极其敬慎其国人亦皆感戴闻其国有八道北道与我瓦尔喀地方土门江接界东道接倭子国西道接我凤凰城南道接海犹有数小岛此等地方

太宗文皇帝定朝鲜之役我兵无处不到以已破之国我朝为之重加营建俾安堵如故是以其国人於

太宗文皇帝驻军之地树立石碑备书更生之德累世感戴以至於今且彼更有可取者明之末年彼始终未尝叛之犹为重礼义之邦也

康熙四十六年丁亥十一月丁卯理藩院议外藩诸王供应折给银两事具奏

上曰尔等所议殊不均平少者太少多者太多蒙古护卫及喇嘛等供应俱如所议行公主每日食物折价银两可稍裁减至公主等来未尝携如许随从今当据彼来人实数酌量给发如果随来人多再照尔等数目供给勿得逾额昔年外藩蒙古来部院必滥开浮数冒支钱粮朋分肥己此弊已久今如此行则钱粮不致妄费而事务亦易清楚尔等再议具奏至外藩蒙古来京有当住五日者亦有当住七日者今一概俱五日一次给发银两则住七日者不得不将所余两日另作一次支领矣今尔等可将五日者五日一次给发七日者七日一次给发如是则於外藩蒙古其便尔等办理之事亦不至繁琐也

康熙四十八年己丑正月乙未理藩院题阿禄科尔沁固山额駙巴特玛之妻县君以所属人丁进献

上曰此等人断不可受县君乃中朝下嫁者也所献之人乃阿禄科尔沁之番兵岂可取乎尔等将朕谕旨明谕蒙古诸王照土默特苏克图尔之妻所献八佐领一例暂遣官至彼处管理事务日後仍将所献之人安插彼旗内可也

康熙四十九年庚寅五月丙子江苏巡抚张伯行疏报朝鲜国商人高道弼等被风坏船请候朝鲜国使来交付遣回

上曰若俟朝鲜国使来为日迟久着高丽通事一人自部给文驿送前去

康熙五十年辛卯十月戊寅

上谕礼部朕统御寰区抚绥万国中外一体保育维殷惟期遐迩咸宁共享昇平之福至於藩邦有能仰体此心修明厥职者朕尤加意优待之兹朝鲜国王李焞自袭爵以来慎守邦圻恪循仪度岁时贡献方物克殫惓忱四十余年未尝少懈其国中之事稍有关系者必奏明仰请定夺罔敢隐讳每於钦差人员竭尽心力倍加敬礼且抚恤国人善於爱养所属靡不悦服朕用是甚为嘉美既尝曲示恩谊值彼地饥饉又自海洋运米赈济故举国人衆至今犹深感戴朝鲜贡物朕屡次裁减以至甚轻但国小地隘其年例贡物内有白金一千两红豹皮一百四十二张犹恐艰於备办嗣後将此二项永停贡献又闻朝鲜国使沿途馆舍尽皆倾圯难以止宿历年进贡奏事人员甚为劳瘁着令各该地方官作速修葺坚固用副朕加惠远人至意

康熙五十二年癸巳正月戊申

上谕理藩院班禅胡土克图为人安静熟谙经典勤修贡职初终不倦甚属可嘉着照封達赖喇嘛之例给以印册封为班禅额尔德尼

康熙五十三年甲午六月乙亥

上谕领侍卫内大臣等曰朕想拉藏汗二子一往策妄阿喇布坦处娶亲一现在青海地方驻劄往策妄阿喇布坦处娶亲之子倘彼托词爱壻留住数年不令之归再如驻劄青海之子朕复怜爱留住则伊处竟至无人岂不孤危可悯况拉藏汗年近六十自当为其身计伊处人少土伯特人甚多而又秉性凶恶可保安常无事乎拉藏汗将凶恶第巴杀死朕加褒獎封为翊法恭顺汗伊倾心内向不但朕知之即各处人皆知之但厄鲁特秉性猜疑又甚疎忽倘或事出不测朕虽怜伊伊虽倚朕此间相隔万里救之不及徒貽後悔耳凡事当为远大之计伊亦系晓事之人是以朕为伊时常留意若不深谋防范断乎不可

康熙五十五年丙申二月丙子礼部题安南国进贡礼物请交内务府察收

上谕大学士等曰安南国年例进贡犀角象牙等物物既沉重道复遥远运送未免劳苦非所以柔远之意嗣後着将犀角象牙免其进贡

康熙五十六年丁酉九月己巳礼部题朝鲜国王李焞因目眚甚剧遣人来购空青应准其采买

上谕翰林院侍读学士阿克敦銓仪卫治仪正张廷枚曰朝鲜国王李焞安静奉法人民爱戴四十余年伊国中享太平之福未有如此之久者朕甚嘉之览礼部奏请王因病日来购空青朕闻王病深为軫念特简尔等齎空青往赐此系格外之恩凡一应礼节尔等到时令王不必

拘於成例随处可以相见并传谕之

康熙五十七年戊戌五月戊午侍卫阿齐图疏奏苏尔扎之妻与从前属下人等现在若可以餬口聽其自为生理若不能餬口请令青海寨桑等酌量养济

上谕曰据奏苏尔扎妻既云我系妇人属下人等不能养育且恐他人欺压亦未可定着翰林院侍读学士花色领银一千两前往波罗重可克地方给与苏尔扎之妻令其办理生业且朕差官照看伊等必无有敢行欺压之人矣

康熙五十九年庚子九月甲申

上谕理藩院朕巡视土默特喀喇沁等旗分见今年禾稼着霜微早来年恐致米贵应传谕伊等各旗分务宜节省米粮不得耗费

戊子翁牛特喀喇沁土默特王贝勒等奏臣等所属旗分因亢旱歉收请借支仓米赈济

上曰各旗分设仓贮米原以备水旱赈济之用前苏尼特阿霸垓等旗分荒旱之年朕曾令发帑赈济其翁牛特等所属之人朕视之均系一体该王贝勒等以此奏请极合朕心着即照所请行如尚有不敷之处仍着再行陈奏

十月甲辰朝鲜国王李焞薨世子李昀遣使奏闻兼贡方物

上曰朝鲜国王李焞袭封将五十载自来伊国从未有似此历爵年久者且袭封以来奉藩至为敬谨进献方物极尽诚款未尝稍懈又防御伊国边疆安靖克享太平伊举国老幼靡不感戴具见事上恭顺抚民慈爱深为可嘉忽闻患病溘逝朕心不胜痛惻除遣大臣往唁外其所贡礼物着即交使臣带回以示轸念之意应得恤典该部察例具奏

大清圣祖合天弘运文武睿哲恭俭宽裕孝敬诚信中和功德大成仁皇帝圣训卷六十